





OTIVM  
SINE LITERIS  
MORS EST

*Seneca*

*Ex Libris Joannis Nencini*  
1874



D. 1.



M. TULLII  
CICERONIS  
OPERA.  
TOMUS QUINTUS.

---

HOC VOLUMINE

*continentur Orationes*

PRO A. CLUENTIO AVITO.  
DE LEGE AGRARIA I, II & III.  
PRO C. RABIRIO PERD. REO.  
IN L. CATILINAM I, II, III, & IV.  
PRO L. MURENA.  
PRO P. SULLA.  
PRO ARCHIA *POETA*.  
PRO L. FLACCO.



M. TULLII  
CICERONIS  
OPERA.

*Recensuit J. N. LALLEMAND.*

TOMUS QUINTUS.



*PARISIIS,*

Apud { SAILLANT, viâ S. Joannis Bellov.  
          { DESAINT, viâ Fœneâ.  
          { BARBOU, viâ Mathurinensium.

---

*M DCC LXVIII.*







P R O

## A. CLUENTIO AVITO.

### ORATIO DECIMA QUARTA.

*Anno urbis 687. Ciceronis 41. Æmilio  
& Volcatio coff. A. Cluentius Avi-  
tus, eques Romanus, e municipio  
Larinate, accusatus est ab Oppianici  
filio, & a T. Attio Pisauensi,  
quos accusatores filio compararat  
Sassia mater, improbi ingenii, &  
libidinis effrenatæ mulier. Veneno  
sustulisse quum alios nonnullos, tum  
Oppianicum, vitricum suum, ar-  
guebatur Cluentius. Hunc Cicero,  
qui hoc anno prætor erat, defendit  
apud collegam suum, Q. Voconium  
Nasonem, qui quærebat de veneficiis.  
Sed antequam ad veneficii crimen  
veniat, Cluentium longâ primùm*  
Tomus V. A

*oratione de falsa infamia purgat. Quum enim Oppianicus ante annos octo a Cluentio accusatus & condemnatus esset, defensor ejus, L. Quintius tribunus plebis, rem in invidiam adduxerat, quum diceret pecuniam in judicio fuisse versatam; & quum incertum esset, ex qua parte esset profecta; populus Romanus non credidit ab Oppianico datam, qui damnatus erat; & errore multorum in falso crimine Cluentius fuerat. FABRICIUS.*

I. **A**NIMADVERTI, Judices, omnem accusatoris orationem in duas divisam esse partes: quarum altera mihi niti & magnopere confidere videbatur invidiâ jam inveteratâ judicii Juniani: altera tantummodò consuetudinis causâ timidè & diffidenter attingere rationem veneficii criminum; quæ de re lege est hæc quæstio constituta. Itaque mihi certum est hanc eandem distributionem, invidiæ, & criminum, sic in defensione servare; ut omnes intelligant, nihil me nec subterfugere voluisse reticendo, nec obscurare dicendo.

2. Sed quum considero, quomodo mihi in utraque re sit elaborandum, altera pars, ea quæ propria est iudicii vestri, & legitimæ veneficii quæstionis, per mihi brevis, & non magnæ in dicendo contentio- nis fore videtur: altera autem, quæ procul a iudicio remota est, quæ concionibus se- ditiosè concitatis accommodatior est, quàm tranquillis moderatisque iudiciis, prospicio, quantum in agendo difficultatis, & quan- tum laboris sit habitura.

3. Sed in hac tanta difficultate illa me res tamen, Iudices, consolatur, quòd vos de criminibus sic audire consueistis, ut eo- rum omnem dissolutionem ab oratore quæ- ratis: ut non existimetis, plus vos ad salu- tem reo largiri oportere, quàm quantum defensor, purgandis criminibus, consequi, & dicendo probare potuerit. De invidia autem sic inter vos disceptare debetis, ut non, quid dicatur a nobis, sed quid opor- teat dici, consideretis. Agitur enim in cri- minibus, A. Cluentii proprium periculum; in invidia, causa communis. Quamobrem alteram partem causæ sic agemus, ut vos doceamus; alteram sic, ut oremus: in al- tera, diligentia vestra nobis adjungenda est; in altera, fides imploranda: nemo est enim, qui invidiæ, sine vestro, ac sine ta- lium virorum subsidio possit resistere.

4. Equidem quod ad me attinet, quòd

me vertam , nescio : negem fuisse illam infamiam judicii corrupti ? negem illam rem agitatam in concionibus ? jactatam in judiciis ? commemoratam in senatu ? evel- lam ex animis hominum tantam opinio- nem ? tam penitus insitam ? tam vetustam ? non est nostri ingenii : vestri auxilii est , Judices , hujus innocentiae sic in hac cala- mitosa fama , quasi in aliqua perniciosissi- ma flamma , atque in communi incendio subvenire.

II. Etenim sicut aliis in locis parum fir- mamenti , & parum virium veritas habet : sic in hoc loco falsa invidia imbecilla esse debet. Dominetur in concionibus , jaceat in judiciis : valeat in opinionibus ac ser- monibus imperitorum , ab ingeniis pruden- tium repudietur : vehementes habeat re- pentinos impetus , spatio interposito , & causâ cognitâ consenescat : denique illa definitio judiciorum æquorum , quæ nobis a majoribus tradita est , retineatur ; ut in judiciis & sine invidia culpa plectatur , & sine culpa invidia ponatur.

6. Quamobrem a vobis , Judices , an- tequam de ipsa causa dicere incipio , hæc postulo ; primum id , quod æquissimum est , ut ne quid præjudicati afferatis : ete- nim non modò auctoritatem , sed etiam nomen judicum amitteremus , nisi hîc ex ipsis causis judicabimus , ac si ad causas



*PRO A. CLUENTIO.* 5

judicia jam facta domo deferemus : deinde si quam opinionem jam vestris mentibus comprehendistis , si eam ratio convellat , si oratio labefactabit , si denique veritas extorquebit ; ne repugnetis , eamque animis vestris aut libentibus , aut æquis remittatis : tum autem , quum ego unaquaque de re dicam , & diluam , ne ipsi quæ contraria sunt , taciti cogitationi vestræ subjiciatis ; sed ad extremum expectetis , & me meum dicendi ordinem servare patiamini : quum peroraro , tum , si quid erit præteritum , a me requiratis.

III. Ego me , Judices , ad eam causam accedere , quæ jam per annos octo continuos ex contraria parte audiatur , atque ipsâ opinione hominum tacitâ propè convicta atque damnata sit , faciliè intelligo : sed , si quis mihi deus vestram ad me audiendum benevolentiam conciliarit , efficiam profectò , ut intelligatis , nihil esse homini tam timendum , quàm invidiam ; nihil innocenti , susceptâ invidiâ , tam optandum , quàm æquum judicium , quodd in hoc uno denique falsæ infamiæ finis aliquis atque exitus reperiatur. Quamobrem magna me spes tenet , si ea , quæ sunt in causa , explicare , atque omnia dicendo consequi potuero , hunc locum confessumque vestrum , quem illi horribilem A. Cluentio , ac formidolosum fore putaverunt ,

eum tandem ejus fortunæ miseræ multumque jactatæ, portum ac perfugium futurum.

8. Tametsi permulta sunt, quæ mihi, antequam de causa dicam, de communibus invidiæ periculis dicenda esse videantur: tamen, ne diutius oratione meâ suspensa expectatio vestra teneatur, aggrediar ad crimen cum illa deprecatione, Judices, quâ mihi sæpius utendum esse intelligo, sic ut me audiat, quasi hoc tempore hæc causa primùm dicatur, sicuti dicitur; non quasi sæpe jam dicta, & numquam probata sit: hodierno enim die primùm veteris istius criminis diluendi potestas est data: ante hoc tempus error in hac causa, atque invidia versata est. Quamobrem, dum multorum annorum accusationi breviter dilucidèque respondeo, quaeso, ut me, Judices, sicuti facere instituistis, benignè attentèque audiat.

IV. Corrupisse dicitur A. Cluentius judicium pecuniâ, quò inimicum suum innocentem, Statium Albium, condemnaret. Ostendam, Judices, primùm (quoniam caput illius atrocitatis atque invidiæ fuit, innocentem pecuniâ circumventum) neminem umquam majoribus criminibus, gravioribus testibus esse in judicium vocatum: deinde ea de eo præjudicia esse facta ab ipsis iudicibus, a quibus condem-

*PRO A. CLUENTIO.* 7

natus est, ut non modò ab iisdem, sed ne ab aliis quidem ullis, absolvi ullo modo posset. Quum hæc docuero, tum illud ostendam, quod maximè requiri intelligo, iudicium illud pecuniâ esse tentatum, non a Cluentio, sed contra Cluentium: faciamque, ut intelligatis, in tota illa causa quid res ipsa tulerit, quid error afflexerit, quid invidia conflarit.

10. Primum igitur illud est, ex quo intelligi possit, debuisse Cluentium magnopere causæ confidere, quòd certissimis criminibus & testibus fretus ad accusandum descenderit. Hoc loco faciendum mihi, Iudices, est, ut vobis breviter illa, quibus Albius condemnatus est, crimina exponam. Abs te peto, Oppianice, ut me invitum de patris tui causa dicere existimes, adductum fide atque officio defensionis: etenim tibi si in præsentia satisfacere non potuero, tamen multæ mihi ad satisfaciendum reliquo tempore facultates dabuntur: Cluentio nisi nunc satisfecero, postea mihi satisfaciendi potestas non erit: simul & illud quis est, qui dubitare debeat, contra damnatum & mortuum, pro incolumi & vivo dicere; quum illi, in quem dicitur, damnatio omne ignominiae periculum jam abstulerit, mors verò etiam doloris; huic autem, pro quo dicitur, nihil possit offensionis accedere sine acer-

bissimo animi sensu ac dolore , & sine summo dedecore vitæ ac turpitudine ? Atque , ut intelligatis , Cluentium non accusatorio animo , non ostentatione aliquâ , aut gloriâ adductum , sed nefariis injuriis , quotidianis insidiis , proposito ante oculos vitæ periculo , nomen Oppianici detulisse , paulò longius exordium rei demonstrandæ repetam : quod quæso , Judices , ne molestè patiamini. Principiis enim cognitis , multò faciliùs extrema intelligetis.

V. A. Cluentius Avitus fuit , pater hujusce , Judices , homo non solum municipii Larinatis , ex quo erat , sed etiam regionis illius , & vicinitatis , virtute , existimatione , nobilitate facilè princeps. Is quum esset mortuus , Sulla & Pompeio consulibus , reliquit hunc annos xv natum ; grandem autem , & nubilem filiam , quæ brevi tempore post patris mortem nupsit A. Aurio Melino , consobrino suo , adolescenti in primis , ut tum habebatur , inter suos & honesto , & nobili.

12. Quum essent hæ nuptiæ plenæ dignitatis , plenæ concordiæ , repente est exorta mulieris importunæ nefaria libido , non solum dedecore , verum etiam scelere convincta. Nam Sassia mater hujus Aviti ( mater enim a me , nominis causâ , tametsi in hunc hostili odio & crudelitate est , mater , inquam , appellabitur ;

*PRO A. CLUENTIO.* 9

neque umquam illa ita de suo scelere & immanitate audiet, ut naturæ nomen amittat: quod enim est ipsum nomen amantius indulgentiusque maternum, hoc illius matris, quæ multos jam annos, & nunc quum maximè filium interfectum cupit, singulare scelus, majore odio dignum esse ducetis) ea igitur mater Aviti, Melini illius adolescentis, generi sui, contrà quàm fas erat, amore capta, primò, neque id ipsum diu, quoquo modo poterat, in illa cupiditate continebatur; deinde ita flagrare coepit amentia, sic inflammata ferri libidine, ut eam non pudor, non pudicitia, non pietas, non macula familiaris, non hominum fama, non filii dolor, non filia mœror a cupiditate revocaret.

13. Animum adolescentis, nondum consilio ac ratione firmatum, pellexit iis omnibus rebus, quibus illa ætas capi ac deliniri potest: filia, quæ non solum illo communi dolore muliebri in ejusmodi viri injuriis angeretur, sed nefarium matris pellicatum ferre non posset, de quo ne queri quidem sine scelere se posse arbitraretur, ceteros sui tanti malignaros esse cupiebat; in hujus amantissimi sui fratris manibus, & gremio, mœrore & lacrymis consenescebat.

14. Ecce autem subitum divortium; quod solatium malorum omnium fore vi-

debatur : discedit a Melino Cluentia , ut in tantis injuriis , non invita , ut a viro , non libenter. Tum verò illa egregia , ac præclara mater , palam exsultare lætitiâ , ac triumphare gaudio cœpit , victrix filiæ , non libidinis. Itaque diutius suspicionibus obscuris lædi famam suam noluit ; lectum illum genialem , quem bienio antè filiæ suæ nubenti straverat , in eadem domo sibi ornari & sterni , expulsâ atque exturbatâ filiâ , jubet : nubit genero socrus , nullis auspiciis , nullis auctoribus , funestis ominibus.

VI. O mulieris scelus incredibile , & , præter hanc unam , in omni vita inauditum ! o libidinem effrenatam & indomitam ! o audaciam singularem ! non timuisse , si minùs vim deorum , hominumque famam , at illam ipsam noctem , facesque illas nuptiales ! non limen cubuli , non cubile filiæ , non parietes denique ipsos , superiorum testes nuptiarum ! Perfregit , ac prostravit omnia cupiditate ac furore : vicit pudorem libido , timorem audacia , rationem amentia.

16. Tulit hoc commune dedecus familiæ , cognationis , nominis , graviter filius : augebatur autem ejus molestia quotidianis querimoniis , & assiduo fletu sororis : statuit tamen nihil sibi in tantis injuriis , ac tanto scelere matris , gravius facien-

*PRO A. CLUENTIO. II*

dum , quam ut illâ matre ne uteretur : ne , quam videre sine summo animi dolore non poterat , eâ si matre uteretur , non solum videre , sed etiam probare suo iudicio putaretur.

17. Initium quod huic cum matre fuerit simultatis , audistis : pertinuisse hoc ad causam , tunc , quum reliqua cognoveritis , intelligetis : nam illud me non præterit , cuiusmodicumque mater sit , tamen in iudicio filii de turpitudine parentis dici vix oportere : non essem ad ullam causam idoneus , Iudices , si hoc , quod in communibus hominum sensibus , atque in ipsa natura positum atque infixum est , id ego , quum ad amici pericula depellenda adhiberer , non viderem. Facile intelligo non modò reticere homines parentum injurias , sed etiam animo æquo ferre oportere. Sed ego ea , quæ ferri possunt , ferenda ; quæ taceri , tacenda esse arbitror.

18. Nihil in vita vidit calamitatis A. Cluentius , nullum periculum mortis adiit , nihil mali timuit , quod non totum a matre esset conflatum & profectum : quæ hoc tempore sileret omnia , atque ea , si oblivione non posset , tamen taciturnitate suâ tecta esse pateretur : sed ea verò sic agit , ut prorsus reticere nullo modo possit. Hoc enim ipsum iudicium , hoc periculum , illa accusatio , omnis testium co-

pia , quæ futura est , a matre initio est adornata , a matre hoc tempore instruitur , atque omnibus ejus opibus & copiis comparatur : ipsa denique nuper Larino , hujus opprimendi causâ , Romam advolavit : præstò est mulier audax , pecuniosa , crudelis : instituit accusatores , instruit testes : squalore hujus & sordibus lætatur ; exitium exoptat : sanguinem suum profundere omnem cupit , dummodo profusum hujus antè videat. Hæc nisi omnia perspexeritis in causa , temerè a nobis illam appellari putatote : sin autem erunt & aperta , & nefaria , Cluentio ignoscere debetis , quòd hæc a me dici patiatur : mihi ignoscere non deberetis , si tacerem.

VII. Nunc jam summatim exponam , quibus criminibus Oppianicus damnatus sit ; ut & constantiam A. Cluentii , & rationem accusationis perspicere possitis. Ac primùm causa accusandi quæ fuerit , ostendam , ut id ipsum A. Cluentium vi & necessitate coactum fecisse videatis.

20. Quum manifestò venenum deprehendisset , quòd vir matris Oppianicus ei paravisset ; & res non conjecturâ , sed oculis ac manibus teneretur , neque in causa ulla dubitatio posset esse ; accusavit Oppianicum : quàm constanter , & quàm diligenter , postea dicam : nunc hoc scire vos volui , nullam huic aliam accusandi



*PRO A. CLUENTIO. 13*

causam fuisse , nisi uti propositum vitæ periculum , & quotidianas capitis insidias hac unâ ratione vitaret. Atque , ut intelligatis , his accusatum esse criminibus Oppianicum , ut neque accusator timere , neque reus sperare debuerit ; pauca vobis illius iudicii crimina exponam : quibus cognitis , nemo vestrûm mirabitur , illum , diffidentem rebus suis , ad Stalenum , atque ad pecuniam confugisse.

21. Larinas quædam fuit Dinea , forcrus Oppianici , quæ filios habuit M. & Numerium Aurius , & Cn. Magium , & filiam Magiam , nuptam Oppianico. M. Aurius adolescentulus , bello Italico captus apud Asculum , in Q. Sergii senatoris , ejus , qui inter sicarios damnatus est , manus incidit , & apud eum fuit in ergastulo. Numerius autem Aurius frater , mortuus est , heredemque Cn. Magium , fratrem suum , reliquit : postea Magia , uxor Oppianici , mortua est : postremò unus , qui reliquus erat Dineæ filius , Cn. Magius , est mortuus : is fecit heredem illum adolescentem Oppianicum , sororis suæ filium , eumque partiri cum Dinea matre jussit : interim venit index ad Dineam , neque obscurus , neque incertus , qui nuntiaret ei , filium ejus , M. Aurium , vivere ; & in agro Gallico esse in servitute.

22. Mulier , amissis liberis , quum unius

filii recuperandi spes esset ostentata , omnes suos propinquos , filiique sui necessarios convocavit , & ab iis flens petivit , ut negotium susciperent , adolescentem investigarent , sibi restituerent eum filium , quem tantum unum ex multis fortuna reliquum esse voluisset. Hæc quum agere instituisset , oppressa morbo est : itaque testamentum fecit ejusmodi , ut illi filio H-S cccccc millia legaret , heredem institueret eundem illum Oppianicum , nepotem suum : atque his diebus paucis est mortua : propinqui tamen illi , quemadmodum vivâ Dineâ instituerant , ita mortuâ illâ ad investigandum Aurium cum eodem illo indice in agrum Gallicum profecti sunt.

VIII. Interim Oppianicus , ut erat , sicuti multis ex rebus reperietis , singulari scelere & audaciâ , per quemdam Gallicanum , familiarem suum , primum illum indicem pecuniâ corripit : deinde ipsum Aurium , non magnâ jacturâ factâ , tollendum , interficiendumque curavit. Illi autem , qui erant ad propinquum investigandum & recuperandum profecti , litteras Larinum ad Aurius , illius adolescentis propinquos , suosque necessarios , mittunt ; sibi difficilem esse investigandi rationem , quod intelligerent indicem ab Oppianico esse corruptum. Quas litteras

*PRO A. CLUENTIO. 15*

A. Aurius, vir fortis, & experiens, & domi nobilis, M. illius Auri propinquus, in foro, palam, multis audientibus, quum adesset Oppianicus, recitat, & clarissimâ voce se nomen Oppianici, si interfectum M. Aurium comperisset, delaturum esse testatur.

24. Interim brevi tempore illi, qui erant in agrum Gallicum profecti, Larinum revertuntur: interfectum esse M. Aurium renuntiant: animi non solum propinquorum, sed etiam omnium Larinatium odio Oppianici, & illius adolescentis misericordiâ commoventur. Itaque quum A. Aurius, qui antea denuntiabat, clamore hominem, ac minis insequi cœpisset; Larino profugit, & se in castra clarissimi viri, Q. Metelli, contulit.

25. Post illam fugam & sceleris, & conscientiae testem, numquam se judiciis, numquam legibus, numquam inermem inimicis committere ausus est: sed per illam L. Sullae vim atque victoriam, Larinum in summo timore omnium, cum armatis advolavit: quatuor viros, quos municipes fecerant, sustulit: se a Sulla, & alios præterea tres, factos esse dixit: & ab eodem sibi esse imperatum, ut Aurium illum, qui sibi delationem nominis, & capitis periculum ostentarat, & alterum Aurium, & ejus C. filium, & Sex. Vir-

bium , quo sequestre in illo indice cor-  
rumpendo dicebatur esse usus , proscriben-  
dos , interficiendosque curaret. Itaque ,  
illis crudelissimè interfectis , non medio-  
cri ab eo ceteri proscriptionis & mortis  
metu terrebantur. His rebus in causa ju-  
dicioque patefactis , quis est , qui illum  
absolvi potuisse arbitraretur ?

IX. Atque hæc parva sunt : cognosci-  
te reliqua , ut non aliquando condemna-  
tum esse Oppianicum , sed aliquamdiu in-  
columem fuisse miremini. Primùm videte  
hominis audaciam. Sassiam in matrimo-  
nium ducere , Aviti matrem , illam , cu-  
jus virum A. Aurium occiderat , concupi-  
vit. Utrùm impudentior hic , qui postu-  
let ; an crudelior illa , si nubat , difficile  
dictu est : sed tamen utriusque humanita-  
tem , constantiamque cognoscite.

27. Petit Oppianicus , ut sibi Sassia nu-  
bat , & id magnopere contendit : illa au-  
tem non admiratur audaciam , non impu-  
dentiam aspernatur , non denique illam  
Oppianici domum , viri sui sanguine re-  
dundantem , reformidat : sed quòd haberet  
tres ille filios , idcirco se ab his nuptiis  
abhorreere respondit. Oppianicus , qui pe-  
cuniam Sassiae concupivisset , domo sibi  
quærendum remedium existimavit ad eam  
moram , quæ nuptiis afferebatur. Nam ,  
cum haberet ex Novia infāntem filium :

alter autem ejus filius, Papiâ natus, Theani Appuli, quod abest a Larino decem & octo millia passuum, apud matrem educaretur: arcessit subitò sine causa puerum Theano; quod facere, nisi ludis publicis, aut festis diebus, antea non solebat. Mater nihil mali misera suspicans, mittit. Ille se Tarentum proficisci quum simulasset, eo ipso die puer, quum horâ undecimâ in publico valens visus esset, ante noctem mortuus, & postridie, antequam luceret, combustus est.

28. Atque hunc tantum mœrorem matri prius hominum rumor, quàm quisquam ex Oppianici familia renuntiavit. Illa quum uno tempore audisset sibi non solum filium, sed etiam exsequiarum munus ereptum, Larinum confestim exanimata venit, & ibi de integro funus jam sepulto filio fecit. Dies nondum decem intercesserant, quum ille alter filius infans necatur. Itaque nubit Oppianico continuo Sassia, lætanti jam animo, & spe optimâ confirmato: nec mirum, quæ se non nuptialibus donis, sed filiorum funeribus delinitam videret: ita quòd ceteri propter liberos pecuniæ cupidiores solent esse, ille propter pecuniam liberos amittere jucundius esse duxit.

X. Sentio, Judices, vos pro vestra humanitate, his tantis sceleribus breviter a

me demonstratis, vehementer esse commotos. Quo tandem igitur animo fuisse illos arbitramini, quibus his de rebus non modò audiendum fuit, verùm etiam judicandum? Vos auditis de eo, in quem judices non estis: de eo, quem non videtis: de eo, quem odisse jam non potestis: de eo, qui & naturæ, & legibus satisfecit: quem leges exilio, natura morte multavit: auditis non ab inimico: auditis sine testibus: auditis, quum ea, quæ copiosissimè dici possunt, breviter a me stricteque dicuntur. Illi audiebant de eo, de quo jurati sententias ferre debebant: de eo, cujus præsentis nefarium & consceleratum vultum intuebantur: de eo, quem oderant propter audaciam: de eo, quem omni supplicio dignum esse ducebant: audiebant ab accusatoribus: audiebant verba multorum testium: audiebant, quum unaquaque de re a P. Canutio, homine eloquentissimo, graviter & diu diceretur.

30. Et est quisquam, qui quum hæc cognoverit, suspicari possit, Oppianicum judicio oppressum & circumventum esse innocentem? Acervatim jam reliqua, Judices, dicam, ut ad ea, quæ propiora hujus causæ, & adjunctiora sunt, perveniam. Vos, quæso, memoriâ teneatis, non mihi hoc esse propositum, ut accussem Oppianicum mortuum: sed, quum

hoc persuadere vobis velim, judicium ab hoc non esse corruptum, hoc uti initio ac fundamento defensionis, Oppianicum, hominem sceleratissimum, & nocentissimum, esse damnatum: qui uxori suæ Cluentiæ, quæ amita hujus Aviti fuit, quum ipse poculum dedisset, subitò illa in media potione exclamavit, se maximo cum dolore mori; nec diutius vixit, quàm locuta est; nam in ipso sermone hoc, & vociferatione mortua est: & ad hanc mortem tam repentinam, vocemque morientis, omnia præterea, quæ solent esse indicia & vestigia veneni, in illius mortuæ corpore fuerunt. Eodemque veneno C. Oppianicum, fratrem, necavit.

XI. Neque est hoc satis: tametsi in ipso fraterno parricidio nullum scelus prætermissum videtur; tamen, ut ad hoc nefarium facinus accederet, aditum sibi aliis sceleribus antè munivit. Nam quum esset gravida Auria, fratris uxor, & jam appropinquare partus videretur; mulierem veneno interfecit, ut unà illa, & quod erat ex fratre conceptum, necaretur. Postea fratrem aggressus est: qui serò, jam exhausto illo poculo mortis, quum & de suo, & de uxoris interitu clamaret, testamentumque mutare cuperet, in ipsa significatione hujus voluntatis, est mortuus. Ita mulierem, ne partu ejus ab he-

reditate fraterna excluderetur , necavit : fratris autem liberos priùs vitâ privavit , quàm illi hanc ab natura propriam lucem accipere potuerunt ; ut omnes intelligerent , nihil ei clausum , nihil sanctum esse posse ; cuius ab audacia , fratris liberos ne materni quidem corporis custodia tegere potuisset.

32. *Memoriâ teneo , Milesiam quamdam mulierem , quum essem in Asia , quòd ab heredibus secundis acceptâ pecuniâ , partum sibi ipsa medicamentis abegisset , rei capitalis esse damnatam : neque injuriâ ; quæ spem parentis , memoriam nominis , subsidium generis , heredem familiæ , designatum reipublicæ civem , sustulisset. Quanto Oppianicus in eadem injuria majore supplicio dignus ? siquidem illa , quum suo corpori vim attulisset , se ipsa cruciavit : hic autem idem illud effecit per alieni corporis mortem atque cruciatum. Ceteri non videntur in singulis hominibus multa parricidia suscipere posse : Oppianicus inventus est , qui in uno corpore plures necaret.*

XII. Itaque quum hanc ejus consuetudinem audaciamque cognosceret avunculus illius adolescentis Oppianici , Cn. Magius ; isque gravi morbo affectus esset , & heredem , illum sororis suæ filium , faceret : amicis adhibitis , præsentem matrem suâ ,



Dineâ, uxorem suam interrogavit, essetne prægnaus : quæ quum se esse respondisset ; ab ea petivit , ut , se mortuo , apud Dineam , quæ tum ei mulieri socrus erat , quoad pareret , habitaret , diligentiamque adhiberet , ut id , quod conceperat , servaret , ut saluum parere posset. Itaque ei testamento legat grandem pecuniam a filio , si qui natus esset : ab secundo herede nihil legat.

34. Quid de Oppianico suspicatus sit , videtis : quid judicarit , obscurum non est. Nam quum ejus filium faceret heredem , eum tutorem liberis non adscripsit. Quid Oppianicus fecerit , cognoscite : ut illum Magium intelligatis longè animo prospexisse morientem. Quæ pecunia mulieri legata erat a filio , si qui natus esset , eam præsentem Oppianicus non debitam mulieri solvit : si hæc solutio legatorum , & non merces abortionis appellanda est. Quo illa pretio accepto , multisque præterea muneribus , quæ tum ex tabulis Oppianici recitabantur , spem illam , quam in alvo commendatam a viro continebat , victa avaritiâ , sceleri Oppianici vendidit.

35. Nihil posse jam ad hanc improbitatem addi videtur : attendite exitum. Quæ mulier obtestatione viri decem illis mensibus ne domum quidem ullam , nisi socrûs suæ , nosse debuit , hæc quinto mense post

viri mortem ipsi Oppianico nupsit : quæ nuptiæ non diuturnæ fuerunt : erant enim non matrimonii dignitate , sed sceleris societate conjunctæ.

XIII. Quid ? illa cædes Asinii Larinatis , adolescentis pecuniosi , quàm clara tum , recenti re ? quàm omnium fermone celebrata ? Fuit Avilius quidam Larinas perditâ nequitia , & summâ egestate , arte quadam præditus ad libidines adolescentulorum excitandas accommodatâ : qui ut se blanditiis & assentationibus in Asinii consuetudinem penitus immerfit , Oppianicus continuò sperare cœpit , hoc se Avilio , tamquam aliquâ machinâ admotâ , capere Asinii adolescentiam , & fortunas ejus patrias expugnare posse. Ratio excogitata Larini est ; res translata Romam : iniri enim id consilium facilius in solitudine , perfici rem ejusmodi commodius in turba posse arbitrati sunt. Asinius cum Avilio Romam est profectus. Hos vestigiis Oppianicus consecutus est. Jam ut Romæ vixerint , quibus conviviiis , quibus flagitiis , quantis , & quàm profusis sumptibus , non modò conscio , sed etiam convivâ & adjutore Oppianico , longum est mihi dicere , præsertim ad alia properanti. Exitum hujus assimilatæ familiaritatis cognoscite.

37. Quum esset adolescens apud mu-

lierculam quamdam , atque ibi pernoctaret , & ibi diem posterum commoraretur : Avilius , ut erat constitutum , simulat se ægrotare , & testamentum facere velle. Oppianicus obsignatores ad eum , qui neque Asinium , neque Avilium nossent , adducit , & illum , Asinium appellat : ipse , testamento Asinii nomine obsignato , discedit. Avilius illico convalescit. Asinius autem brevi illo tempore , quasi in hortulos iret , in arenarias quasdam extra portam Esquilinam perductus , occiditur.

38. Qui quum unum jam & alterum diem desideraretur ; neque in iis locis , ubi ex consuetudine quærebatur , inveniretur , & Oppianicus in foro Larinatum dictitaret , nuper se & suos amicos testamentum ejus obsignasse : liberti Asinii , & nonnulli amici , quòd eo die , quo postremum Asinius visus erat , Avilium cum eo fuisse , & a multis visum esse constabat , in eum invadunt , & hominem ante pedes Q. Manilii , qui tum erat triumvir , constituunt. Atque ille continuò , nullo teste , nullo indice , recentis maleficii conscientiam perterritus , omnia , ut a me paulò antè dicta sunt , exponit , Asiniumque ab se , consilio Oppianici , interfectum fatetur.

39. Extrahitur domo latitans Oppiani-

cus a Manilio : index Avilius ex altera parte coram tenetur. Hic jam quid reliqua queritis ? Manilium plerique noratis : non ille honorem a pueritia , non studia virtutis , non ullum existimationis bonæ fructum umquam cogitarat ; sed ex petulanti atque improbo scurra , in discordiis civitatis ad eam columnam , ad quam multorum sæpe conviciis perductus erat , cum suffragiis populi pervenerat. Itaque rem cum Oppianico transigit : pecuniam ab eo accipit : causam & susceptam , & manifestam relinquit. At tum in Oppianici causa crimen hoc Asinianum quum testibus multis , tum verò indicio Avilii probabatur : in quo , inter allegatos , Oppianici nomen primum esse constabat , ejus , quem vos miserum atque innocentem , falso judicio circumventum esse dicitis.

XIV. Quid ? aviam tuam , Oppianice , Dineam , cui tu es heres , pater tuus non manifestò necavit ? ad quam quum adduxisset medicum illum suum , jam cognitum , & sæpe victorem ( per quem interfecerat plurimos ) mulier exclamat , se ab eo nullo modo velle curari , quo curante suos omnes perdidisset. Tum repentè Anconitanum quemdam , L. Clodium , pharmacopolam circumforaneum , qui casu tum Larinum venisset , aggreditur , & cum eo H-S quadringentis , id quod ipsius tabulis  
tum

tum est demonstratum, transigit. L. Clodius, qui properaret, cui fora multa restarent, simul atque introductus est, rem confecit: primâ potione mulierem sustulit; neque postea Larini punctum est temporis commoratus.

41. Eâdem hac Dineâ testamentum faciente, quum tabulasprehendisset Oppianicus, qui gener ejus fuisset, digito legata delevit: & quum id multis locis fecisset, post mortem ejus, ne lituris coargui posset, testamentum in alias tabulas transcriptum; signis adulterinis obsignavit. Multa prætereo consulto: etenim vereor; ne hæc ipsa nimium multa esse videantur: vos tamen eum similem fui fuisse in ceteris quoque vitæ partibus existimare debebitis. Illum tabulas publicas Larini censorias corrupisse, decuriones universi judicaverunt: cum illo jam nemo rationem, nemo rem ullam contrahebat: nemo illum ex tam multis cognatis & affinibus tutorem umquam liberis suis scripsit: nemo illum aditu, nemo congressione, nemo sermone, nemo convivio dignum judicabat: omnes aspernabantur, omnes abhorrebant, omnes, ut aliquam immanem ac perniciosam bestiam pestemque fugiebant.

42. Hunc tamen hominem tam audacem, tam nefarium, tam nocentem, num-

- quam accusasset Avitus, Judices, si id prætermittere, salvo capite suo, potuisset. Erat huic inimicus Oppianicus; erat; sed tamen erat vitricus: crudelis, & huic infesta mater; attamen mater: postremò nihil tam remotum ab accusatione, quàm Cluentius, & naturâ, & voluntate, & institutâ ratione vitæ. Sed quum esset hæc illi proposita conditio, ut aut justè pièque accusaret, aut acerbè indignèque moreretur; accusare, quoquo modo posset, quàm illo modo emori, maluit. Atque, ut hæc ita esse perspicere possitis, exponam vobis Oppianici facinus manifestò compertum, atque deprehensum; ex quo simul utrumque, & huic accusare, & illum condemnari necesse fuisse, intelligetis.

XV. Martiales quidam Larini appellabantur, ministri publici Martis, atque ei deo veteribus institutis, religionibusque Larinatum consecrati: quorum quum factis magnus numerus esset, quumque item, ut in Sicilia permulti Venerei sunt, sic illi Larini in Martis familia numerarentur; repentè Oppianicus eos omnes, liberos esse, civesque Romanos cœpit defendere. Graviter id decuriones Larinatum, cunctique municipales tulerunt. Itaque ab Avito petiverunt, ut eam causam susciperet, publicèque defenderet. Avitus quum se ab

nni ejusmodi negotio removisset, tamen  
o loco, pro antiquitate generis sui, pro  
, quod se non suis solum commodis,  
d etiam suorum municipum, ceterorum-  
e necessariorum natum esse arbitra-  
, tantæ voluntati universorum Larina-  
m deesse noluit.

44. Susceptâ causâ, Romamque dela-  
, magnæ quotidie contentiones inter  
itum & Oppianicum ex utriusque stu-  
defensionis excitabantur. Erat ipse  
mani, acerbâque naturâ Oppianicus:  
debat ejus amentiam infesta atque  
mica filio mater Aviti: magni autem il-  
ua interesse arbitrabantur, hunc a causa  
artialium demovere. Suberat etiam alia  
isa major, quæ Oppianici, hominis  
arissimi atque audacissimi, mentem ma-  
nè commovebat.

45. Nam Avitus usque ad illius judicij  
npus nullum testamentum umquam fe-  
rat: neque enim legare ejusmodi ma-  
poterat in animum inducere; neque  
tamento nomen omnino prætermitte-  
parentis. Id quum Oppianicus scirêt  
eque enim erat obscurum) intellige-  
, Avito mortuo, bona ejus omnia  
matrem esse ventura: quæ ab se  
tea, auctâ pecuniâ, majore præmio;  
ata filio, minore periculo, necare-  
: itaque his rebus incensus, quâ ra-

tionem Avitum veneno tollere conatus sit, cognoscite.

XVI. C. & L. Fabricii, fratres gemini, fuerunt ex municipio Aletrinate, homines inter se quum formâ, tum moribus similes: municipum autem suorum dissimillimi; in quibus quantus splendor sit, quàm propè æquabilis, quàm ferè omnium constans, & moderata vitæ ratio, nemo vestrum, ut mea fert opinio, ignorat. His Fabriciis semper usus est Oppianicus familiarissimè. Jam hoc ferè scitis omnes, quantam vim habeat ad conjungendas amicitias, studiorum ac naturæ similitudo. Quum illi ita viverent, ut nullum quæstum turpem esse arbitrarentur: quum omnis ab his fraus, omnes insidiæ, circumscriptionesque adolescentium nascerentur, quumque essent vitiis atque improbitate omnibus noti; studio, ut dixi, ad eorum se familiaritatem multis jam antè annis Oppianicus applicarat.

47. Itaque tum sic statuit, per C. Fabricium (nam L. erat mortuus) insidias Avito comparare. Erat illo tempore infirmâ valetudinè Avitus: utebatur autem medico ignobili, sed spectato homine Cleophanto; cujus servum Diogenem Fabricius ad venenum Avito dandum spè & pretio sollicitare cœpit. Servus non incallidus, sed, ut ipsa res declaravit, frugi



*PRO A. CLUENTIO. 29*

que integer, sermonem Fabricii non est pernatuſ: rem ad dominum detulit: elephantuſ autem cum Avito eſt locuſ. Avituſ autem ſtatim cum M. Bebrione, familiariffimo ſuo, communicavit; qui quâ fide, quâ prudentiâ, quâ dilitate fuerit, meminiffe voſ arbitror: eiſcivit, ut Diogenem Avituſ emeret à elephantò, quò faciliuſ aut comprehenderetur reſ ejus indicio, aut falſa eſſe conſciceretur. Ne multis; Diogeneſ emittitur: venenum diebuſ paucis (multi viri niſi quum ex occulto interveniſſent) perſicæque obſignata, quæ ad eam rem datur, in manibuſ Scamandri, liberti Fabriciorum, deprehenditur.

XVII. Proh dii immortaleſ! Oppianiſ quiſquam, hiſ rebuſ cognitiſ, circumventum eſſe dicet? Quiſ umquam auctior? quiſ nocentior? quiſ apertior inſulicium adductuſ eſt? Quod ingenium, et facultatſ dicendi, quæ a quoquam excitata deſenſio, huic uni crimini potuit iſtere? ſimul & illud quiſ eſt, qui dicit, quin hac re compertâ, manifeſtoque prehensâ, aut obeunda moſ Cluentio, ſuſcipienda accuſatio fuerit?

19. Satiſ eſſe arbitror demonſtratum, ſiſceſ, iſiſ criminibuſ accuſatum eſſe Oppianicum, ut honeſtè abſolvi nullo modo poterit. Cognoscite nunc ita reum cita-

tum esse illum ; ut re semel atque iterum præjudicatâ , condemnatus in judicium venerit. Nam Cluentius , Judices , primum nomen ejus detulit , cujus in manibus venenum deprehenderat : is erat libertus Fabriciorum , Scamander : integrum consilium : judicii corrupti nulla suspicio : simplex in judicium causa , certa res , verum crimen allatum est. Hic tum Fabricius , is , de quo antè dixi , qui , liberto damnato , sibi illud impendere periculum videret ; quod mihi cum Aletrinatibus vicinitatem , & cum plerisque eorum magnum usum esse sciebat , frequentes eos ad me domum adduxit. Qui quamquam de homine , sicut necesse erat , existimabant ; tamen , quod erat ex eodem municipio , suæ dignitatis esse arbitrabantur , eum , quibus rebus possent , defendere ; idque a me , ut facerem , & ut causam Scamandri susciperem , petebant ; in qua causa patroni omne periculum continebatur. Ego , qui neque illis talibus viris , ac tam amantibus mei ; rem possem ullam negare ; neque illud crimen tantum , ac tam manifestum esse arbitrarer , sicut ne illi quidem ipsi , qui mihi tum illam causam commendabant , arbitrabantur , pollicitus iis sum , me omnia , quæ vellent , esse facturum.

XVIII. Res agi cœpta est : citatus est Scamander reus : accusabat P. Canutius ,

homine in primis ingeniosus, & in dicendo exercitatus: accusabat autem ille quidem incamandrum verbis tribus, *Venenum esse prehensum*. Omnia tela totius accusationis in Oppianicum conjiciebantur: aperiretur causa insidiarum: Fabriciorum familiaritas commemorabatur: hominis vita, & audacia proferebatur: denique omnis accusatio variè graviterque tractata, ad extremum manifestà veneni deprehensione conclusa est.

51. Hic ego quum ad respondendum arrexì, quâ curâ? dii immortales! quâ sollicitudine animi? quò timore? Semper quidem magno cum metu incipio dicere: quotiescumque dico, toties mihi videor in iudicium venire, non ingenii solum, sed etiam virtutis, atque officii; ne aut id profiteri videar, quod non possim implere; quod est impudentiæ; aut id non efficere, quod possim, quod est aut perfidiæ, aut negligentiae: tum verò ita sum perturbatus, ut omnia timerem; si nihil dixissem, ne infantissimus; si multa in ejusmodi causa dixissem, ne impudentissimus existimarer.

XIX. Collegi me aliquando, & ita constitui, fortiter esse agendum: illi ætati, quâ tum eram, solere laudi dari, etiam in minus firmis causis hominum periculis non defuissem: itaque feci: sic pugna-

vi, sic omni ratione contendi, sic ad omnia confugi, quantum ego assequi potui, remedia ac perfugia caufarum, ut hoc, quod timidè dicam, confeutus fim, ne quis illi caufæ patronum defuiſſe arbitraretur.

52. Sed, ut quidquid ego apprehenderam, ſtatim accuſator extorquebat e manibus. Si quæſieram, an inimicitia Scamandro cum Avito; fatebatur, nullas fuiſſe: ſed Oppianicum, cujus ille miniſter fuiſſet, huic inimiciſſimum fuiſſe, atque eſſe dicebat. Sin autem illud egeram, nullum ad Scamandrum morte Aviti venturum emolumentum fuiſſe; concedebat: ſed ad uxorem Oppianici, hominis in uxoribus necandis exercitati, omnia bona Aviti ventura eſſe dicebat. Quum illâ deſenſione uſus eſſem, quæ in libertinorum cauſis honeſtiſſima ſemper exiſtimata eſt, Scamandrum patrono eſſe probatum; fatebatur: ſed quærebat, cui probatus eſſet ipſe patronus.

53. Quum ego pluribus verbis in eo commoratus eſſem, Scamandro factas inſidias eſſe per Diogenem, conſtitutumque inter eos de alia re fuiſſe; ut medicamentum, non venenum Diogenes afferret: hoc cuivis uſu venire poſſe: quærebat, cur in ejuſmodi locum tam abditum, cur ſolus, cur cum obſignata pecunia veniſſet. Denique hoc loco cauſa teſtibus, honeſ-

issimis hominibus, premebatur. M. Bel-  
 rius de suo consilio Diogenem emptum ;  
 e præsentē Scamandrum cum veneno ;  
 ecuniaque deprehensum esse dicebat. P.  
 Quintius Varus, homo summā religione,  
 & summā auctoritate præditus, de insi-  
 diis, quæ fierent Avito, & de sollicita-  
 one Diogenis, recentī re, secum Cleo-  
 hantum locutum esse dicebat.

§4. Atque in illo iudicio quum Scaman-  
 drum nos defendere videremur, verbo-  
 le reus erat, re quidem verā, & pericu-  
 o, & totā accusatione Oppianicus. Ne-  
 ue id obscure ferebat, nec dissimulare  
 illo modo poterat: aderat frequens, ad-  
 vocabat, omni studio gratiāque pugnabat:  
 ostremò, id quod maximo malo illi cau-  
 e fuit, hoc ipso in loco, quasi reus ipse  
 sset, sedebat. Oculi omnium iudicium  
 on in Scamandrum, sed in Oppianicum  
 onjiciebantur: timor eius, perturbatio,  
 aspensus incertusque vultus, crebra co-  
 ris mutatio, quæ erant antea suspiciosa,  
 æc aperta ac manifesta faciebant.

XX. Quum in consilium iri oporteret,  
 uasivit ab reo C. Junius, quæsitōr, ex le-  
 e illa Cornelia, quæ tum erat, clam, an  
 alam, de se sententiam ferri vellet. De  
 Oppianici sententia responsum est, quod  
 Aviti familiarem Junium esse dicebat ;  
 lam velle ferri. Itum est in consilium.

B. v.

Omnibus sententiis, præter unam, quam suam Stalenus esse dicebat, Scamander primâ actione condemnatus est. Quis tunc erat omnium, qui, Scamandro condemnato, non iudicium de Oppianico factum esse arbitraretur? quid est illâ damnatione iudicatum, nisi venenum id, quod Avito daretur, esse quæsitum? quæ porro tenuissima suspicio collata in Scamandrum est, aut conferri potuit, ut is suâ sponte necare voluisse Avitum putaretur?

56. Atque, hoc tum iudicio facto, & Oppianico, re, & existimatione, jam; lege & pronuntiatione, nondum condemnato; tamen Avitus Oppianicum reum statim non fecit: voluit cognoscere, utrum iudices in eos solos essent severi, quos venenum habuisse ipsos comperissent; an etiam consilia, conscientiasque ejusmodi facinorum, supplicio dignas iudicaret. Itaque C. Fabricium, quem propter familiaritatem Oppianici conscium illi facinori fuisse arbitrabatur, reum statim fecit; utque ei locus primus constitueretur, propter causæ conjunctionem, impetravit. Hic tum Fabricius non modò ad me meos vicinos & amicos, Aletrinales, non adduxit, sed ipse iis neque defensoribus uti postea, neque laudatoribus potuit. Rem enim integram hominis non alieni, quamvis suspiciosam, defendere, humani-

PRO M. C. DUENTIO. 35

reus esse putabamus: judicatam labefactam conari, impudentiæ. Itaque tum ille, nopia & necessitate coactus, in causa ejusmodi ad Cepasios fratres confugit, homines industrios, atque eo animo, ut, prae cumque dicendi potestas esset data, non honore, atque in beneficio ponerent.

XXI. Jam hoc quoque propè iniquissime comparatum est, quod in morbis corporis, ut quisque est difficillimus, ita medicus nobilissimus atque optimus quaeritur: in periculis capitis, ut quæque causa difficillima est, ita deterrimus obscurissimusque patronus adhibetur.

58. Citatur reus: agitur causa: paucis verbis accusat, ut de re judicata Caninius. Incipit longo & altè petito proœmio respondere major Cepasius. Primò attentè auditur ejus oratio: erigebat animum, iam demissum & oppressum, Oppianicus: audebat ipse Fabricius: non intelligebat, nimios judicum, non illius eloquentiã, sed defensionis impudentiã commoveri: posteaquam de re cœpit dicere, ad ea, quæ erant in causa, addebat etiam ipse nova quædam vulnera. Hoc quamquam festulo faciebat, tamen interdum non defendere, sed prævaricari accusationi videbatur. Itaque quum callidissime se dicere ostendat, & quum illa verba gravissima ex animo artificio deprompsisset: *Respicite,*

*Judices, hominum fortunas: respicite dubios  
variosque casus: respicite C. Fabricii senec-  
tutem.* Quum hoc, *Respicite*, ornandæ  
orationis causâ, sæpe dixisset, respexit  
ipse: at C. Fabricius a subselliis, demisso  
capite, discesserat. Hic judices ridere:  
stomachari atque acerbè ferre patronus,  
causam sibi eripi; & se cetera de illo lo-  
co, *Respicite, Judices*, non posse dicere:  
nec quidquam propius est factum, quàm  
ut illum persequeretur, & collo obtorto  
ad subsellia reduceret, ut reliqua posset  
perorare. Ita tum Fabricius primùm suo ju-  
dicio, quod est gravissimum, deinde le-  
gis vi & sententiis judicum est condem-  
natus.

XXII. Quid est, quòd jam de Oppia-  
nici causa plura dicamus? Apud eosdem  
judices reus est factus, quum his duobus  
præjudiciis jam damnatus esset: ab iisdem  
autem judicibus, qui Fabriciorum damna-  
tione de Oppianico judicarent, locus ei  
primus est constitutus: accusatus est cri-  
minibus gravissimis, & iis, quæ a me bre-  
viter dicta sunt, & præterea multis, quæ  
ego omnia nunc omitto: accusatus est  
apud eos, qui & Scamandrum, ministrum  
Oppianici, & Fabricium, conscium male-  
ficii condemnarant.

60. Utrùm, per deos immortales! ma-  
gis est mirandum, quòd is condemnatus



*PRO A. CLUENTIO.* 37

est, an quoddam omnino respondere ausus est? Quid enim illi iudices facere potuerunt? qui si innocentes Fabricios condemnassent, tamen in Oppianico sibi constaret, & superioribus consentire iudiciis deberent. An verò illa sua per se ipsi iudicia rescinderent, quum ceteri soleant, in iudicando, ne ab aliorum iudiciis discrepent; providere? & illi, qui Fabricii libertum, quia minister in maleficio fuerat; patronum, quia conscius, condemnassent; ipsum principem atque architectum sceleris absolverent? & qui ceteros, nullo præiudicio facto, tamen ex ipsa causa condemnassent; hunc, quem bis condemnatum jam acceperant, liberarent?

61. Tum verò illa iudicia senatoria, non falsâ invidiâ, sed verâ atque insigni turpitudine notata, atque operta dedecore & infamiâ, defensionem locum nullum reliquissent. Quid enim tandem illi iudices responderent, si quis ab iis quæreret, Condemnastis Scamandrum, quo crimine? nempe quoddam Avitum per servum medici, veneno necare voluisset. Quid Aviti morte Scamander consequeretur? nihil, sed administer erat Oppianici: Condemnastis C. Fabricium: quid ita? quia, quum ipse familiarissimè Oppianico usus, libertus autem ejus in maleficio deprehensus esset: illum expertem ejus consilii fuisse.

se non probabatur. Si igitur ipsum Oppianicum, bis suis judiciis condemnatum, absolvissent, quis tantam turpitudinem judiciorum, quis tantam inconstantiam rerum judicatarum, quis tantam libidinem judicum ferre potuisset? Quod si hoc videtis, quod jam hac omni oratione patefactum est, illo judicio reum condemnari, præsertim ab iisdem judicibus, qui duo præjudicia fecissent, necesse fuisse; simul illud videatis necesse est, nullam accusatori causam esse potuisse, cur judicium vellet corrumpere.

XXIII. Quæro enim abs te, T. Atti, relictis jam ceteris argumentis omnibus, num Fabricios quoque innocentes condemnatos existimes? num etiam illa judicia pecuniâ corrupta esse dicas; quibus judiciis alter a Staleno solo absolutus est, alter etiam ipse se condemnavit. Age, si nocentes; cujus maleficii? Numquid præter venenum quæsitum, quo Avitus necaretur, objectum est? numquid aliud in illis judiciis versatum est, præter hasce insidiâs Avito ab Oppianico per Fabricios factas? nihil, nihil, inquam, aliud, Judices, reperietis. Exstat memoria: sunt tabulæ publicæ: redargue me, si mentior: testium dicta recita: doce, in illorum judiciis quid, præter hoc venenum Oppianici, non modò in crimi-

*PRO A. CLUENTIO. 39*

nis, sed in maledicti loco sit objectum.  
63. Multa dici possunt, quare ita necesse fuerit judicari; sed ego occurram expectationi vestræ, Iudices. Nam, etsi a vobis sic audior, ut numquam benignius, neque attentius quemquam auditum putem: tamen vocat me aliò jamdudum tacita vestra expectatio, quæ mihi obloqui videtur: Quid ergo? negasne, illud iudicium esse corruptum? non nego: sed ab hoc corruptum non esse confirmo. A quo igitur est corruptum? opinor, primum, si incertum fuisset, quisnam exitus illius iudicii futurus esset, verisimilius tamen esset, eum potius corrupisse, qui metuisset, ne ipse condemnaretur, quàm illum, qui veritus esset, ne alter absolveretur: deinde, quum esset nemini dubium, quid judicari necesse esset, eum certè potius, qui sibi aliquâ ratione diffideret, quàm eum, qui omni ratione confideret: postremò, certè potius illum, qui bis apud eos iudices offendisset, quàm eum, qui bis causam iis probavisset. Unum quidem certè nemo erit tam iniquus Cluentio, qui mihi non concedat, si constet corruptum illud esse iudicium, aut ab Avito, aut ab Oppianico esse corruptum: si doceo non ab Avito, vinco ab Oppianico: si ostendo ab Oppianico, purgo Avitum. Quare, etsi satis docui, rationem

nullam huic corrumpendi fuisse ; ex quo intelligitur , ab Oppianico esse corruptum ; tamen de illo ipso separatim cognoscite.

XXIV. Atque ego illa non argumentabor , quæ sunt gravia vehementer ; eum corrupisse , qui in periculo fuerit : eum , qui metuerit : eum , qui spem salutis in aliaratione non habuerit : eum , qui semper singulari fuerit audaciâ : multa sunt ejusmodi : verum quum habeam rem non dubiam , sed apertam atque manifestam , enumeratio singulorum argumentorum non est necessaria.

65. Dico , C. Ælio Staleno judici pecuniam grandem Statium Albium ad corrumpendum judicium dedisse : num quis negat ? Te appello , Oppianice ; te , T. Atti ; quorum alter eloquentiâ damnationem illam , alter tacitâ pietate deplorat : audete negare , ab Oppianico Staleno judici pecuniam datam : negate , negate , inquam , in eo loco : quid reticetis ? At negare non potestis , quod repetistis , quod confessi estis , quod abstulistis. Quo tandem igitur ore mentionem corrupti judicii facitis , quum ab ista parte judici pecuniam ante judicium datam , post judicium ereptam esse fateamini ?

66. Quonam igitur hæc modo gesta sunt ? repetam paulò altius , Judices , &

*PRO A. CLUENTIO. 41*

omnia, quæ in diuturna obscuritate latuerunt, sic aperiâ, ut ea cernere oculis videamini. Vos quæso, ut adhuc me attentè audistis, item, quæ reliqua sunt, audiat; profectò nihil a me dicetur, quod non dignum hoc conventu & silentio, dignum vestris studiis atque auribus esse videatur. Nam, ut primùm Oppianicus, ex eo, quòd Scamander reus erat factus, quid sibi impenderet, cœpit suspicari, statim se ad hominis egentis, audacis, in judiciis corumpendis exercitati, tum autem judicis, Staleni familiaritatem applicavit. Ac primùm Scamandro reo, tantum donis, datis, muneribus perfecerat, ut eo auctore uteretur cupidior, quàm fides judicis postulabat.

67. Post autem, quum esset Scamander unius Staleni sententiâ absolutus, patronus autem Scamandri ne suâ quidem sententiâ liberatus, acrioribus salutis suæ remediis subveniendum putavit. Tum a Staleno, sicut ab homine ad excogitandum acutissimo, ad audendum impudentissimo, ad efficiendum acerrimo (hæc enim ille & aliqua ex parte habebat, & majore ex parte se habere simulabat) auxilium capiti & fortunis suis petere cœpit.

XXV. Jam hoc non ignoratis, Judices, ut etiam bestię, fame dominante, plerumque ad eum locum, ubi pastæ ali-

quando sint , revertantur. Stalenus ille biennio antè , quum causam bonorum Safinii Atellæ recepisset , sexcentis millibus nummum se judicium corrupturum esse dixerat : quæ quum accepisset a pupillo , suppressit ; iudicioque factò , nec Safinio , nec bonorum emptoribus reddidit. Quam quum pecuniam profudisset , & sibi nihil non modò ad cupiditates suas , sed ne ad necessitatem quidem reliquisset , statuit ad easdem sibi prædas ac suppressiones judiciales revertendum. Itaque quum Oppianicum jam perditum , & duobus jugulatum præjudiciis videret , promissis eum suis excitavit abjectum , & simul saluti desperare vetuit. Oppianicus orare hominem cœpit , ut sibi rationem ostenderet iudicii corrumpendi.

69. Ille autem ( quemadmodum ex ipso Oppianico postea est auditum ) negavit , quemquam esse in civitate , præter se , qui id efficere possit : sed primò gravari cœpit , quòd ædilitatem se petere cum hominibus nobilissimis , & invidiam atque offensionem timere dicebat : post exoratus , initio permagnam pecuniam poposcit : deinde ad id pervenit , quod confici potuit , & sestertiùm sexcenta quadraginta deferri ad se domum iussit. Quæ pecunia simul atque ad eum delata est , homo impurissimus statim cœpit in ejusmodi mentè

*PRO A. CLUENTIO. 43*

& cogitatione versari, nihil esse suis rationibus utilius, quàm Oppianicum condemnari: illo absoluto, pecuniam illam aut iudicibus dispertiendam, aut ipsi esse reddendam: damnato, repetiturum esse neminem. Itaque rem excogitat singularem. Atque hæc, Iudices, quæ verè dicuntur a nobis, faciliùs credetis, si cum animis vestris longo intervallo recordari C. Staleni vitam, & naturam volueritis: nam perinde ut opinio est de cuiusque moribus, ita, quid ab eo factum, & non factum sit, existimari potest.

XXVI. Quum esset egens, sumptuosus, audax, callidus, perfidiosus, & quum domi suæ, miserrimus & inanissimus, tantum nummorum positum videret; ad omnem malitiam & fraudem versare mentem suam cœpit: Demne iudicibus? mihi igitur ipsi, præter periculum & infamiam, quid quæretur? nihil excogitem quamobrem Oppianico damnari necesse sit? qui tandem? nihil enim est, quod fieri non possit. Si quis eum fortè casus ex periculo eripuerit, nonne reddendum est? præcipitantem igitur impellamus, inquit, & perditum prosternamus.

71. Caput hoc consilium, ut pecuniam quibusdam iudicibus levissimis polliceatur: deinde eam postea supprimat: ut, quoniam graves homines suâ sponte se-

verè judicatuꝛos putabat , hos , qui leviores erant , destitutione iratos Oppianico redderet. Itaque , ut erat semper præposterus atque perversus , initium facit a Bulbo ; & eum , quòd jamdiu nihil quæsierat , tristem , atque oscitantem leviter impellit. Quid tu , inquit ? ecquid me adjuvas , Bulbe , ne gratis reipublicæ serviamus ? Ille verò , simul atque hoc audivit , *ne gratis* , Quòd voles , inquit , sequar : sed quid affers ? Tum ei quadraginta millia , si esset absolutus Oppianicus , pollicetur : & eum , ut ceteros appellet , quibuscum loqui consuesset , rogat : atque etiam ipse conditor totius negotii , Guttam aspergit huic Bulbo : itaque minimè amarus is visus est , qui aliquid ex ejus sermone speculæ degustarat.

72. Unus & alter dies intercesserat ; quum res parum certa videbatur : sequester , & confirmator pecuniæ desiderabatur. Tum appellat hilari vultu hominem Bulbus , ut blandissimè potest ; Quid tu , inquit , Pæte ? ( hoc enim sibi Stalenus cognomen ex imaginibus Æliorum delegerat , ne , si se Ligurem fecisset , nationis magis suæ , quàm generis uti cognomine videretur ) qua de re mecum locutus es , quærunt a me , ubi sit pecunia. Hic ille planus improbissimus , quæstu judicario pastus , qui illi pecuniæ , quam



*PRO A. CLUENTIO. 45*

condiderat, spe jam atque animo incubaret, contrahit frontem (recordamini faciem, atque illos ejus fictos, simulatosque vultus) queritur se ab Oppianico destitutum: &, qui esset totus ex fraude & mendacio factus, quique ea vitia, quæ a natura habebat, etiam studio atque artificio quodam malitiæ condidisset, pulchrè asseverat se ab Oppianico destitutum: atque hoc addit testimonii, suâ illum sententiâ, quam palam omnes laturi essent, condemnatum iri.

XXVII. Manarat sermo in consilio, pecuniæ quamdam mentionem inter judices esse versatam: res neque tam fuerat occulta, quàm erat occultanda: neque tam erat aperta, quàm reipublicæ causâ aperienda. In ea obscuritate, ac dubitatione omnium, Canutio, perito homini, qui quodam odore suspicionis Stalenum corruptum esse sensisset, neque dum rem perfectam arbitraretur, placuit repente pronuntiare judices: dixerunt, se id velle. Hic tum Oppianicus non magnopere perterritus: rem a Staleno perfectam esse arbitrabatur.

74. In consilium erant ituri judices triginta, & duo: sententiis decem & sex absolutio confici poterat. H-S CCXL. in singulos judices distributa, eum numerum sententiarum conficere debebant, ut ad

cumulum, spe majorum præmiorum, ipsius Staleni sententia septima decima accederet. Atque etiam casu tum, quod illud repente erat factum, Stalenus ipse non aderat: causam nescio quam apud judicem defendebat. Facile hoc Avitus patiebatur: facile Canutius, at non Oppianicus, neque patronus ejus L. Quintius: qui quum esset eo tempore tribunus plebis, convicium C. Junio, judici quaestionis, maximum fecit, *Ut ne sine Staleno in consilium iretur*: quumque id ei per viatores consultò negligentius agi videretur, ipse e publico judicio ad privatum Staleni judicium profectus est, & illud pro potestate dimitti jussit: Stalenum ipse ad subsellia adduxit.

75. Consurgitur in consilium, quum sententias Oppianicus, quæ tum erat potestas, palam ferri velle dixisset, ut Stalenus scire posset, quid cuique deberetur. Varia judicum genera: nummarii pauci; sed omnes irati. Ut qui accipere in campo consuerunt, iis candidatis, quorum nummos suppressos esse putant, inimicissimi solent esse; sic ejusmodi judices, infestum reo venerant: ceteri nocentissimum esse arbitrabantur: sed spectabant sententias eorum, quos corruptos putabant; ut ex iis constituerent, a quo judicium corruptum videretur.

XXVIII. Ecce tibi ejusmodi fortitio , ut in primis Bulbo , & Staleno , & Guttæ esset judicandum. Summa omnium expectatio , quidnam sententiæ ferrent leves ac nummarii judices. Atque illi omnes sine ulla dubitatione condemnant. Hic tum injectus est hominibus scrupulus , & quædam dubitatio , quidnam esset actum : deinde homines sapientes , ex vetere illa disciplina judiciorum , qui neque absolvere hominem nocentissimum possent , neque eum , de quo esset orta suspicio , pecuniâ oppugnatum , re illâ incognitâ , primò condemnare vellent ; non liquere dixerunt. Nonnulli autem severi homines hoc statuerunt , quo quisque animo quid faceret , spectari oportere : & , si alii pecuniâ acceptâ verum judicabant , tamen nihilo minus se superioribus suis judiciis constare putabant oportere. Itaque damnarunt. Quinque omnino fuerunt , qui illum vestrum innocentem Oppianicum sive imprudentiâ , sive misericordiâ , sive aliquâ suspicione , sive ambitione adducti , absolverent.

77. Condemnato Oppianico , statim L. Quintius , homo maxime popularis , qui omnes rumorum & concionum ventos colligere consuesset , oblatam sibi facultatem putavit , ut ex invidia senatoria posset crescere , quòd ejus ordinis judicia

minùs jam probari populo arbitrabatur. Habetur una atque altera concio vehemens & gravis : accepisse pecuniam iudices , ut innocentem reum condemnarent , tribunus plebis clamitabat : agi fortunas omnium dicebat : nulla esse judicia : qui pecuniosum inimicum haberet , incolumem esse neminem posse. Homines totius ignari negotii , qui Oppianicum numquam vidissent ; virum optimum , & hominem pudentissimum , pecuniâ oppressum arbitrarentur ; incensi suspicione , rem in medium vocare cœperunt , & causam illam totam deposcere.

78. Atque illo ipso tempore in ædes T. Anni , hominis honestissimi , necessarii , & amici mei , noctu Stalenus , arcessitus ab Oppianico , venit. Jam cetera nota sunt omnibus : ut cum illo Oppianicus egerit de pecunia : ut ille se redditurum esse dixerit : ut eorum sermonem omnem audierint viri boni , qui tum consultò propè in occulto stetissent : ut res patefacta atque in forum prolata , & pecunia omnis a Staleno extorta atque erepta sit.

XXIX. Hujus Staleni persona ; populo jam nota atque perspecta , ab nulla turpi suspicione abhorrebat : suppressam esse ab eo pecuniam , quam pro reo propuntiaisset , qui erant in concione , non intelligebant :

telligebant : neque enim docebantur : versatam esse in judicio mentionem pecuniæ sentiebant : innocentem reum condemnatum esse audiebant : Staleni sententiâ condemnatum videbant : non gratis id ab eo factum esse , quòd hominem norant , judicabant : similis in Bulbo , in Gutta , in aliis nonnullis suspicio consistebat.

79. Itaque confiteor ( licet enim jam impunè , hoc præsertim in loco , confiteri ) quòd Oppianici non modò vita , sed etiam nomen ante illud tempus populo ignotum fuisset : indignissimum porrò videretur , circumventum esse innocentem pecuniâ : hanc deinde suspicionem auget Staleni improbitas , & nonnullorum ejus similium judicum turpitudine : causam autem ageret L. Quintius , homo quum summâ potestate præditus , tum ad inflammandos animos multitudinis accommodatus : summam illi judicio invidiam , infamiamque esse conflatam : atque in hanc flammam recentem , C. Junium , qui illi quæstioni præfuerat , injectum esse meminì ; & illum hominem ædilitium , jam prætorem opinionibus hominum constitutum , non disceptatione dicendi , sed clamore hominum , de foro atque adeo de civitate esse sublatum.

80. Neque me pœnitet hoc potius tempore , quàm illo , causam A. Cluentii de-

fendere. Causa enim manet eadem, quæ mutari nullo modo potest : temporis iniquitas atque invidia recessit, ut, quod in tempore mali fuit, nihil obsit ; quod in causa boni fuit, profit. Itaque nunc quemadmodum audiar, sentio, non modò ab iis, quorum iudicium atque potestas est ; sed etiam ab illis, quorum tantum est existimatio. At tum si dicerem, non audirer : non quòd alia res esset, immo eadem, sed tempus aliud. Id adeo sic cognoscite.

XXX. Quis tum auderet dicere, nocentem condemnatum esse Oppianicum ? quis nunc id audet negare ? Quis tum posset arguere, ab Oppianico iudicium tentatum esse pecuniâ ? quis id hoc tempore infitiri potest ? Cui tum liceret docere, Oppianicum reum factum esse tum deniquè, quum duobus proximis præiudiciis condemnatus esset ? quis est, qui id hoc tempore infirmare conetur ?

Si. Quare, invidiâ remotâ, quam dies mitigavit, oratio mea deprecata est, vestra fides atque æquitas a veritatis disceptatione rejecit ; quid est præterea, quod in causa relinquatur ? Versatam esse in iudicio pecuniam, constat : ea quæritur unde profecta sit ; ab accusatore, an ab reo. Accusator dicit hæc : Primum, gravissimis criminibus accusabam, ut nihil opus esset pecuniâ : deinde, condemna-

*PRO A. CLUENTIO. 51*

eum adducebam, ut ne eripi quidem pecuniâ posset: postremò, etiam si absolutus esset, mearum tamen omnium fortunarum status incolumis maneret. Quid contrà reus? Primum, ipsam multitudinem, & atrocitatem criminum pertimescebam: deinde, Fabriciis, propter conscientiam mei sceleris, condemnatis, me esse condemnatum, sentiebam: postremò, in eum casum veneram, ut omnis mearum fortunarum status unius iudicii periculo contineretur.

82. Age, quoniam corrumpendi iudicii causas ille multas & graves habuit, hic nullam; profectio ipsius pecuniæ requiratur. Confecit tabulas diligentissimè Cluentius: hæc autem res habet hoc certè, ut nihil possit neque additum, neque detractum de re familiarilatare: anni sunt octo, quum ista causa in ista meditatione versatur: quum omnia, quæ nunc ad eam rem pertinent, & ex hujus, & ex aliorum tabulis, agitis, tractatis, inquiritis: quum interea Cluentianæ pecuniæ vestigium nullum invenitis. Quid? Albiana pecunia vestigiisne nobis odoranda est, an ad ipsum cubile, vobis ducibus, venire possumus? Tenentur uno in loco H-S IOCKL: tenentur apud hominem audacissimum: tenentur apud iudicem. Quid vultis amplius?

83. At enim Stalenus non fuit ab Oppianico, sed a Cluentio ad iudicium corruptendum constitutus. Cur eum, quum in consilium iretur, Cluentius, & Canurius abesse patiebantur? cur quum in consilium mittebant, Stalenum iudicem, cui pecuniam dederant, non requirebant? Oppianicus quærebat? Quintius flagitabat? Sine Staleno ne in consilium iretur, tribunitiâ potestate perfectum est. At condemnavit. Hanc enim damnationem dederat obsidem Bulbo & ceteris, ut destitutus ab Oppianico videretur. Quare si istinc causa corruptendi iudicii, istinc pecunia, istinc Stalenus, istinc denique omnis fraus & audacia est: hinc pudor, honesta vita, & nulla suspicio pecuniæ, nulla corruptendi iudicii causa: patimini, veritate patefactâ, atque omni errore sublato, eò transire illius turpitudinis infamiam, ubi cetera maleficia consistent; ab eo invidiam discedere aliquando, ad quem numquam accessisse culpam videtis.

XXXI. At enim pecuniam Staleno dedit Oppianicus, non ad corruptendum iudicium, sed ad conciliationem gratiæ. Tene hoc, Atti, dicere, tali prudentiâ, etiam usu atque exercitatione præditum? Sapientissimum esse dicunt eum, cui quod opus sit, ipsi veniat in mentem: proximè accedere illum, qui alterius bene in-



*PRO A. CLUENTIO. 53*

ventis obtemperet. In stultitia contrà est: Minus enim stultus est is, cui nihil in mentem venit, quàm ille, qui, quod stultè alteri venit in mentem, comprobatur. Istam conciliationem gratiæ Stalenus tum recentiore, quum faucibus premeretur, excogitavit, sive ut homines tum loquebantur, a P. Cethego admonitus, istam dedit conciliationis & gratiæ fabulam.

85. Nam fuisse hunc hominum sermonem recordari potestis: Cethegum, quòd hominem odisset, & quòd ejus improbitatem versari in republica nollet, & quòd videret, eum, qui se ab reo pecuniam, quum judex esset, clam, atque extra ordinem accepisse confessus esset, salvum esse non posse; minus ei fidele consilium dedisse. In hoc si improbus Cethegus fuit, videtur mihi adversarium removere voluisse: sin erat ejusmodi causa, ut Stalenus nummos se accepisse negare non posset; nihil autem erat periculosius, nec turpius, quàm, ad quam rem accepisset, confiteri: non est consilium Cethegi reprehendendum.

86. Verùm alia causa tum Staleni fuit; alia nunc, Atti, tua est. Ille, quum re premeretur, quodcumque diceret, honestiùs diceret, quàm si, quod erat factum, fateretur: te verò illud idem, quod tum explosum, atque rejectum est, nunc re-

tulisse demiror. Quî enim poterat tum in gratiam redire cum Oppianico Cluentius ? qui cum matre habebat similitates : hærebat in tabulis publicis reus & accusator : condemnati erant Fabricii : nec elabi alio accusatore poterat Albius , nec sine ignominia calumniæ relinquere accusationem Cluentius.

XXXII. An ut prævaricaretur ? jam id quoque ad corrumpendum iudicium pertinet. Sed quid opus erat ad eam rem iudice sequestre ? & omnino quamobrem tota ista res per Stalenum potius , hominem ab utroque alienissimum , sordidissimum , turpissimum , quàm per bonum aliquem virum ageretur , & amicum necessariumque communem. Sed quid ego hæc pluribus , quasi de re obscura , disputo , quum ipsa pecunia , quæ Staleno data est , numero ac summâ suâ non modò quanta fuerit , sed etiam ad quam rem data fuerit , ostendat ? Sexdecim dico iudices , ut Oppianicus absolveretur , corrumpendos fuisse : ad Stalenum sexcenta & quadraginta millia nummum esse delata. Si , ut tu dicis , gratiæ conciliandæ causâ , quadraginta istorum accessio millium quid valeat ? si , ut nos dicimus , ut *IXCXL* millia nummum sexdecim iudicibus darentur ; non Archimedes melius potuit describere.

*PRO A. CLUENTIO. 55*

88. At enim judicia facta permulta sunt, a Cluentio iudicium esse corruptum. Immo verò ante hoc tempus omnino ista ipsa res suo nomine in iudicium numquam est vocata. Ita multum agitata, ita diu jactata ista res est, ut hodierno die primum causa illa defensa sit, hodierno die primum veritas vocem contra invidiam, his iudiciis freta, miserit. Verumtamen multa ista judicia quæ sunt? ego enim me ad omnia confirmavi, & sic paravi, ut docerem, quæ facta postea judicia de illo iudicio dicerentur, partim ruinæ similiora aut tempestati, quàm iudicio & disceptationi fuisse: partim nihil contra Avitum valere: partim etiam pro hoc esse: partim esse ejusmodi, ut neque appellata umquam judicia sint, neque existimata. Hic ego, magis ut consuetudinem servem, quàm quòd vos non vestrà hoc sponte faciatis, petam a vobis, ut me, dum de his singulis disputo judiciis, attentè audiat.

XXXIII. Condemnatus est C. Junius, qui ei quæstioni præfuerat: adde etiam illud, si placet: tum est condemnatus, quum esset iudex quæstionis. Non modò causæ, sed ne legi quidem quidquam per tribunum plebis laxamenti datum est. Quò tempore illum a quæstione ad nullum aliud reipublicæ munus abduci licebat, eo tempore ad quæstionem ipse abreptus est. At

quam quæstionem ? Vultus enim vestri ;  
Judices , me invitant , ut , quæ reticenda  
putaram , libeat jam liberè dicere.

90. Quid ? illa tandem quæstio , aut  
disceptatio , aut iudicium fuit ? putabo  
fuisse : dicat , qui vult hodie de illo po-  
pulo concitato , cui tum mos gestus est ,  
qua de re Junius causam dixerit : quem-  
cumque rogaris , hoc respondebit , quòd  
pecuniam acceperit , quòd innocentem cir-  
cumvenerit. Est hæc opinio. At , si ita es-  
set ; hac lege accusatum esse oportuit , quâ  
accusatur Avitus. At ipse eâ lege quære-  
bat. Paucos dies exspectasset Quintius. At  
neque privatus accusare , nec , sedatâ jam  
invidiâ , volebat. Videtis igitur non in cau-  
sa , sed in tempore ac potestate spem om-  
nem accusatoris fuisse.

91. Multam petivit. Quâ lege ? quòd  
in legem non jurasset : quæ res nemini  
umquam fraudi fuit : & quòd C. Verres ,  
prætor urbanus , homo sanctus & dili-  
gens , subsortitionem ejus in eo codice  
non haberet , qui tum interlitus profere-  
batur. His de causis C. Junius condem-  
natus est , Judices , levissimis & infirmis-  
simis ; quas omnino in iudicium afferri  
non oportuit : itaque oppressus est non  
causâ , sed tempore.

XXXIV. Hoc vos Cluentio iudicium  
putatis obesse oportere ? Quam ob cau-

*PRO A. CLUENTIO.* 57.

fam? Si ex lege subfortitus non erat Junius, aut si in legem aliquando non juraverat; idcirco illius damnatione aliquid de Cluentio judicabatur? Non, inquit: sed ille idcirco his legibus condemnatus est, quod contra aliam legem commiserat. Qui hoc confitentur, possunt iidem illud iudicium fuisse defendere. Ergo idcirco, inquit, infestus tum prætor Junio fuit, quod illud iudicium corruptum per eum putabatur. Num igitur hoc tempore causa mutata est? num alia res, alia ratio illius iudicii, alia natura totius negotii nunc est, ac tum fuit? Non opinor, ex iis rebus, quæ gestæ sunt, rem ullam potuisse mutari.

93. Quid ergo est causæ, quod nunc nostra defensio audiatur tanto silentio, tunc Junio defendendi sui potestas erepta sit? Quia tum in causa nihil erat, præter invidiam, errorem, suspensionem, conciones quotidianas, seditiosè ac populariter concitatas: accusabat tribunus plebis idem in concionibus, idem ad subsellia: ad iudicium non modò de concione, sed etiam cum ipsa concione veniebat. Gradus illi Aurelii, tum novi, quasi pro theatro illi iudicio ædificati videbantur: quos ubi accusator concitatis hominibus complerat, non modò dicendi ab reo, sed ne surgendi quidem potestas erat.

C v.

94. Nuper apud C. Orchinium, collegam meum, locus ab iudicibus Fausto Sullæ de pecuniis residuis non est constitutus: non quò illi aut exlegem esse Sullam, aut causam pecuniæ publicæ contemptam atque abjectam putarent; sed quòd, accusante tribuno plebis, conditione æquâ disceptari posse non putaverunt. Quid? conferam Sullamne cum Junio? an hunc tribunum plebis, cum Quintio? an verò tempus cum tempore? Sulla maximis opibus, cognatis, affinibus, necessariis, clientibus plurimis: hæc autem apud Junium parva, & infirma, & ipsius labore quæsita atque collecta. Hic tribunus plebis, modestus, pudens, non modò non seditiosus, sed etiam seditiosis adversarius: ille autem acerbus, criminofus, popularis homo ac turbulentus. Tempus hoc tranquillum ac pacatum: illud omnibus invidiæ tempestatibus concitatum. Quæ quum ita essent, in Fausto tamen illi iudices statuerunt, iniquâ conditione reum causam dicere, quum adversario ejus ad jus accusationis summa vis potestatis accederet.

XXXV. Quam quidem rationem vos, Iudices, diligenter pro vestra sapientia & humanitate cogitare, & penitus perspicere debetis, quid mali, quantum periculi unicuique nostrum inferre possit vis tri-

*PRO A. CLUENTIO.* 59

būnitia, conflata præsertim invidiâ, & concionibus seditiosè concitatis. Optimis hercle temporibus, tum, quum homines se non jactatione populari, sed dignitate atque innocentia tuebantur, tamen nec P. Popilius, nec Q. Metellus, clarissimi atque amplissimi viri, vim tribunitiam sustinere potuerunt: nedum his temporibus, his moribus, his magistratibus, sine vestra sapientia, ac judiciorum remediis, salvi esse possimus.

96. Non fuit igitur illud judicium, judicii simile, Judices, non fuit; in quo non modus est habitus, non mos consuetudoque servata, non causa defensa: vis illa fuit, &, ut sæpe jam dixi, ruina quædam, atque tempestas, & quidvis potius, quàm judicium, aut disceptatio, aut quæstio. Quod si quis est, qui illud judicium fuisse arbitretur, & qui his rebus judicatis standum putet; is tamen hanc causam ab illa debet sejungere: ab illo enim sive quod in legem non jurasset, sive quod ex lege subsortitus judicem non esset, multa petita esse dicitur: Cluentii autem ratio cum illis legibus, quibus ab Junio multa petita est, nulla potest ex parte esse conjuncta.

97. At etiam Bulbus est condemnatus. Adde, majestatis; ut intelligas, hoc judicium cum illo non esse conjunctum. At

est hoc illi crimen objectum. Fateor : sed etiam legionem esse ab eo sollicitatam in Illyrico , C. Cosconii litteris & multorum testimoniis planum factum est : quod crimen erat proprium illius quæstionis , & quæ res lege majestatis tenebatur. At hoc obfuit ei maximè. Jam ista divinatio est : quâ si uti licet , vide , ne mea conjectura multò sit verior. Ego enim sic arbitror , Bulbum , quòd homo nequam , turpis , improbus , multis flagitiis contaminatus , in judicium sit adductus , idcirco faciliùs esse damnatum : tu mihi ex tota causa Bulbi , quod tibi commodum est , eligis , ut id esse secutos judices dicas.

XXXVI. Quapropter hoc Bulbi judicium non plus obesse huic causæ debet , quàm illa , quæ commemorata sunt ab accusatore , duo judicia , P. Popilii , & T. Guttæ ; qui causam de ambitu dixerunt : qui accusati sunt ab iis , qui erant ipsi ambitus condemnati : quos ego non idcirco esse arbitror in integrum restitutos , quòd planum fecerint , illos ob rem judicandam pecuniam accepisse ; sed quòd iudicibus probarint , quòd in eodem genere , in quo ipsi offenderissent , alios reprehendissent , se ad præmia legis venire oportere. Quapropter neminem dubitare existimo , quin illa damnatio ambitus nulla ex parte cum causa Cluentii , vestroque judicio conjuncta esse possit.



*PRO A. CLUENTIO. 61*

99. Quid, quòd Stalenus est condemnatus? non dico hoc tempore, Iudices, id quod nescio an dici oporteat, illum majestatis esse damnatum: non recito testimonia hominum honestissimorum, quæ in Stalenum sunt dicta ab iis, qui M. Æmilio, clarissimo viro, legati, & præfecti, & tribuni militares fuerunt: quorum testimoniis planum factum est, maximè ejus operâ, quum quæstor esset, in exercitu seditionem esse conflatam. Ne illa quidem testimonia recito, quæ dicta sunt, de H-S 100; quæ ille quum accepisset nomine judicii Sabiniani, sicut in Oppianici judicio postea, retinuit atque suppressit.

100. Omitto & hæc, & alia permulta, quæ illo judicio in Stalenum dicta sunt: hoc dico, eandem tum fuisse P. & L. Cominiis, equitibus Romanis, honestissimis hominibus & disertis, controversiam cum Staleno, quem accusabant, quæ nunc mihi est cum Attio. Cominii dicebant idem, quod ego dico: Stalenum ab Oppianico pecuniam accepisse, ut judicium corrumperet: Stalenus conciliandæ gratiæ causâ se accepisse dicebat.

101. Irridebatur hæc illius reconciliatio, & persona viri boni suscepta, sicut in statuis inauratis, quas posuit ad Juturnæ: quibus subscripsit, *Reges ab se in gratiam esse reductos*. Exagitabantur omnes ejus

fraudes atque fallaciæ : tota vita in ejusmodi ratione versata aperiebatur : egestas domestica , quæstus forensis in medium proferebatur : nummarius interpret pacis & concordia non probabatur. Itaque tum Stalenus , quum idem defenderet , quod Attius , condemnatus est.

102. Cominii quum hoc agerent , quod nos in tota causa egimus , probaverunt. Quamobrem si Staleni damnatione , Oppianicum judicium corrumpere voluisse , Oppianicum judici ad emendas sententias dedisse pecuniam , judicatum est : quum ita constitutum sit , uti in illa culpa aut Cluentius sit , aut Oppianicus : Cluentii nummus nullus judici datus ullo vestigio reperitur : Oppianici pecunia post judicium factum a judice ablata est : potest esse dubium , quin illa damnatio Staleni , non modò non sit contra Cluentium , sed maxime nostram causam defensionemque confirmet ?

XXXVII. Ergo adhuc Junii judicium video esse ejusmodi , ut incursionem potius seditionis , vim multitudinis , impetum tribunitium , quàm judicium appellandum putem. Quòd si quis illud judicium appellet , tamen hoc confiteatur necesse est , nullo modo illam multam , quæ a Junio petita sit , cum Cluentii causa posse conjungi. Illud igitur Junianum per vim fac-

*PRO A. CLUENTIO. 63*

tum est : Bulbi , & Popilii , & Guttae , contra Cluentium non est : Staleni , etiam pro Cluentio est. Videamus ecquod aliud iudicium , quod pro Cluentio sit , proferre possimus. Dixitne tandem causam C. Fidiculanus Falcula , qui Oppianicum condemnarat , quum praesertim , id quod fuit in illo iudicio invidiosissimum , paucos dies ex subfortitione sedisset ? dixit , & his quidem dixit. In summam enim L. Quintius invidiam concionibus eum quotidianis , seditiosis & turbulentis adduxerat. Uno iudicio multa est ab eo petita , sicut ab Junio , quod non suae decuriae munere , neque ex lege sedisset : paulò sedatiore tempore est accusatus , quam Junius , sed eadem ferè lege , & crimine. Quia nulla in iudicio seditio , neque vis , neque turba versata est , primâ actione facillimè est absolutus. Non numero hanc absolutionem : nihilominus enim potest , ut illam multam non commiserit , accepisse tamen ob rem iudicandam , pecuniam , quam captam nusquam Stalenus eadem lege dixit. Proprium crimen illud quæstionis ejus non fuit.

104. Fidiculanus quid fecisse dicebatur ? accepisse a Cluentio H-S cccc. Cujus erat ordinis ? senatorii : quâ lege in eo genere a senatore ratio repeti solet , de pecuniis repetundis , eâ lege accusatus , honestissimè est absolutus. Acta est enim causa more

majorum, sine vi, sine metu, sine periculo: dicta, & exposita, & demonstrata sunt omnia: adducti judices sunt, non modò potuisse honestè ab eo reum condemnari, qui non perpetuò sedisset, sed, si aliud is judex nihil scisset, nisi, quæ præjudicia de eo facta esse constarent, audire præterea nihil debuisse.

XXXVIII. Tum etiam illi quinque, qui imperitorum hominum rumusculos aucupati, tum illum absolverunt, jam suam clementiam laudari magnopere nolebant: a quibus si qui quæreret, sedissentne judices in C. Fabricium; sedisse se dicerent: si interrogarentur, num quo crimine is esset accusatus, præterquam veneni ejus, quod quæsitum Avito diceretur; negarent: si deinde essent rogati, quid judicassent; condemnasse se dicerent: nemo enim absolvit. Eodem modo quæsitum si esset de Scamandro, certè idem respondissent: tametsi ille unâ sententiâ est absolutus; sed illam unam nemo tum istorum suam dici vellet.

106. Uter igitur faciliùs suæ sententiæ rationem redderet: isne, qui se & sibi & rei judicatæ constitisse dicit: an ille, qui se in principem maleficii, lenem; in adjutores ejus & conscios, vehementissimum esse respondit? Quorum ego de sententia non debeo disputare: neque enim

*PRO A. CLUENTIO. 65*

dubito, quin ii tales viri, suspitione aliquâ perculsi repentinâ, de statu suo declinarint. Quare eorum, qui absolverunt, misericordiam non reprehendo: eorum, qui in judicando superiora judicia secuti sunt suâ sponte, non Staleni fraude, constantiam comprobo: eorum verò, qui sibi non liquere dixerunt, sapientiam laudo: qui absolvere eum, quem nocentissimum cognorant, & quem ipsi bis jam antea condemnarant, nullo modo poterant; condemnare, quum tanta consilii infamia, & tam atrocis rei suspicio esset injecta, paulò posterius patefactâ re, maluerunt.

107. Ac ne ex facto solum sapientes illos judicetis, sed etiam ex hominibus ipsis, quod ii fecerint, rectissimè ac sapientissimè factum probetis; quis P. Octavio Balbo ingenio prudentior, jure peritior, fide, religione, officio diligentior, aut sanctior commemorari potest? non absolvit. Quis Q. Considio constantior? quis judiciorum, atque ejus dignitatis, quæ in judiciis publicis versari debet, peritior? quis virtute, consilio, auctoritate præstantior? ne is quidem absolvit. Longum est de singulorum virtute ita dicere: quæ, quia cognita sunt ab omnibus, verborum ornamenta non quærunt. Qualis vir M. Juventius Pedito fuit ex vetere illa judicum disciplina? qualis L. Cauius Mergus? M.

Basilus ? C. Caudinus ? qui omnes in judiciis publicis , jam tum florente republicâ , floruerunt. Ex eodem numero L. Cassius , Cn. Hejus , pari & integritate , & prudentiâ : quorum nullius sententiâ est Oppianicus absolutus. Atque ex his omnibus , natus minimus , ingenio , & diligentiâ , & religione par iis , quos antea commemoravi , P. Satorius , in eadem sententia fuit. O innocentiam Oppianici singularem ! quo in reo , qui absolvit , ambitiosus : qui distulit , cautus : qui condemnavit , constans existimatur.

XXXIX. Hæc tum agitante Quintio , neque in concione , neque in judicio demonstrata sunt : neque enim ipse dici pariebatur , nec per multitudinem concitatam consistere cuiquam in dicendo licebat. Itaque ipse , postquam Junium pervertit , causam totam reliquit : paucis enim diebus illis & ipse privatus est factus , & hominum studia deferbuisse intelligebat. Quod si , per quos dies Junium accusavit , Fidiculanum accusare voluisset : respondendi Fidiculanio potestas facta non esset. Ac primò quidem , omnibus illis iudiciis , qui Oppianicum condemnarant , minabatur.

109. Jam insolentiam noratis hominis : noratis animos ejus , ac spiritus tribunitionis. Quod erat odium ? dii immortales !

*PRO A. CLUENTIO. 67*

quæ superbia? quanta ignoratio fui? quàm gravis atque intolerabilis arrogantia? qui illud etiam ipsum acerbè tulerit (ex quo illa nata sunt omnia) non sibi, ac defensionì suæ condonatum esse Oppianicum: proinde quasi non satis signi esse debuerit, ab omnibus eum fuisse desertum, qui se ad patronum illum contulisset. Erat enim Romæ summa copia patronorum, hominum eloquentissimorum, atque amplissimorum, quorum certè aliquis defendisset equitem Romanum, in municipio suo nobilem, si honestè putasset ejusmodi causam posse defendi.

XL. Nam Quintius quidem, quam causam umquam antea dixerat, quum annos ad quinquaginta natus esset? quis eum umquam non modò in patroni, sed in laudatoris, aut advocati loco viderat? qui quoddam Rostra jamdiu vacua, locumque illum post adventum L. Sullæ a tribunitia voce desertum, oppresserat, multitudinemque jam defuèfactam a concionibus ad veteris consuetudinis similitudinem revocaverat, idcirco cuidam hominum generi paulisper jucundior fuit. Atque idem quanto in odio postea suis illis ipsis fuit, per quos in altiore locum adscenderat? neque injuriâ.

III. Facite enim, ut non solùm mores ejus & arrogantiam, sed etiam vultum

atque amictum, atque illam usque ad talos demissam purpuram recordemini. Is, quasi non esset ullo modo ferendum, se ex judicio discessisse victum, rem ab subfelliis in Rostra detulit. Et jam querimur sæpe, hominibus novis non satis magnos in hac civitate esse fructus? nego usquam umquam fuisse majores; ubi, si quis ignobili loco natus, ita vivat, ut nobilitatis dignitatem virtute tueri posse videatur, usque eò pervenit, quoad eum industria cum innocentia profecuta est.

112. Si quis autem hoc uno nititur, quòd sit ignobilis; procedit sæpe longius, quàm si idem ille esset cum iisdem suis vitiis nobilissimus: ut Quintius (nihil enim dicam de ceteris) si fuisset homo nobilis; quis eum cum illa superbia atque intolerantia ferre potuisset? Quòd eo loco fuit; ita tulerunt, ut, si quid haberet a natura boni, prodesse ei putarent oportere: superbiam autem atque arrogantiam ejus deridendam magis arbitrarentur propter humilitatem hominis, quàm pertimescendam.

XLI. Sed, ut illuc revertar: quo tempore Fidiculanus est absolutus, tu, qui ea judicia facta commemoras, quæro; quid tum esse existimas judicatum? certè gratis judicasse. At condemnarat: at causam totam non audierat: at in concioni-



*PRO A. CLUENTIO. 69*

bus omnibus a L. Quintio vehementer erat, & sæpe vexatus. Illa igitur omnia Quintiana, iniqua, falsa, turbulenta, popularia, seditiosa judicia fuerunt. Esto: potuit esse innocens Falcula. Jam ergo aliquis Oppianicum gratis condemnavit: jam non eos Junius subsortitus est, qui pecuniâ acceptâ condemnarent: jam potuit aliquis ab initio non sedisse, & tamen Oppianicum gratis condemnasse. Verum, si innocens Falcula, quæso, quis nocens? si hic gratis condemnavit, quis accepit? Nego rem esse ullam in quemquam illorum objectam, quæ Fidei culano objecta non sit: neque aliquid fuisse in Fidei culani causa, quod idem non esset in ceterorum.

114. Aut hoc iudicium reprehendas tu, cujus accusatio rebus iudicatis niti videbatur, necesse est: aut, si hoc verum esse concedis, Oppianicum gratis condemnatum esse fateare. Quamquam satis magno argumento esse debet, quod ex tam multis iudiciis, absoluto Falculâ, nemo reus factus est. Quid enim mihi damnatos ambitus colligitis, aliâ lege, certis criminibus, plurimis testibus? quum primum illi ipsi debuerint potius accusari de pecuniis repetundis, quàm ambitus: nam, si in ambitus iudiciis hoc his obfuit, quum aliâ lege causam dicerent; certè, si propriâ

lege hujus peccati adducti essent , multò plus obfuisset.

115. Deinde , si tanta vis fuit istius criminis , ut , quâ quisque lege ex illis iudicibus reus factus esset , tamen hac plagâ periret : cur in tanta multitudine accusatorum , tantis præmiis , ceteri rei facti non sunt ? Hic profertur id , quod iudicium appellari non oportet , P. Septimio Scævola litem eo nomine esse æstimatam. Cujus rei quæ consuetudo sit , quoniam apud homines peritissimos dico , pluribus verbis docere non debeo. Numquam enim ea diligentia , quæ solet adhiberi in ceteris judiciis , eadem , reo damnato , adhibita est.

116. In litibus æstimandis ferè iudices , aut , quòd sibi eum , quem semel condemnarunt , inimicum putant esse , si qua in eum lis capitis illata est , non admittunt : aut , quòd se perfunctos jam esse arbitrantur , quum de reo judicarunt , negligentius attendunt cetera. Itaque & majestatis absoluti sunt permulti , quibus damnatis , de pecuniis repetundis , lites essent æstimate : & hoc quotidie fieri videmus , ut , reo damnato de pecuniis repetundis , ad quos pervenisse pecunias in litibus æstimandis statutum sit , eos illi iudices absolvant : quod quum fit , non judicia rescinduntur , sed hoc statuitur , æstimatio-

nem litium, non esse judicium. Scævola condemnatus est aliis criminibus, frequentissimis Apuliæ testibus: omni contentione pugnatum est, ut lis hæc capitis æstimeretur: quæ res, si rei judicatæ pondus habuisset, ille postea vel iisdem, vel aliis inimicis, reus hac lege ipsâ factus esset.

XLII. Sequitur id, quod illi judicium appellant: majores autem nostri numquam neque judicium nominarunt, neque perinde, ut rem judicatam, observaverunt, animadversionem, atque auctoritatem censoriam: qua de re antequam dicere incipio, perpauca mihi de meo officio verba facienda sunt: ut a me quum hujusce periculi, tum ceterorum quoque officiorum, & amicitiarum ratio conservata esse videatur. Nam mihi cum viris fortibus, qui censores proximè fuerunt, ambobus est amicitia: cum altero verò (sicuti & plerique vestrûm sciunt) magnus usus, & summa utriusque officii constituta necessitudo est.

118. Quare, quidquid de subscriptionibus eorum mihi dicendum erit, eo dicam animo, ut omnem orationem meam non de illorum facto, sed de ratione censoria habitam existimari velim: a Lentulo autem, familiari meo, qui a me pro eximia sua virtute, summisque honoribus, quos a populo Romano adeptus est, ho-

noris causâ nominatur, facilè hoc, Judices, impetrabo, ut, quam ipse adhibere consuevit in amicorum periculis fidem & diligentiam, tum vim animi, libertatemque dicendi; in hac mihi concedat, ut tantum mihi sumam, quantum sine hujus periculo præterire non possum. A me tamen, ut æquum est, omnia cautè pedetentimque dicentur, ut neque fides hujus defensionis relicta, neque cujusquam aut dignitas læsa, aut amicitia violata esse videatur.

119. Video igitur, Judices, animadvertisse censores in judices quosdam illius consilii Juniani, quum istam ipsam causam subscriberent. Hic primum illud commune proponam, numquam animadversionibus censoriis hanc civitatem ita contentam, ut rebus judicatis, fuisse: neque in re nota consumam tempus exemplis: ponam illud unum: C. Getam, quum a L. Metello, & Cn. Domitio, censoribus, ex senatu ejectus esset, censorem ipsum postea esse factum: & cujus mores a censoribus erant reprehensi, hunc postea & populi Romani, & eorum, qui in ipsum animadvertebant, moribus præfuisse. Quod si illud judicium putaretur: ut ceteri, turpi judicio damnati, in perpetuum omni honore ac dignitate privantur; sic hominibus ignominia notatis, neque ad honorem aditus, neque in curiam reditus esset,

120. Nunc, si quem Cn. Lentuli, aut L. Gellii libertus furti condemnarit, is, omnibus ornamentis amissis, numquam ullam honestatis suæ partem recuperabit: quos autem ipse L. Gellius, & Cn. Lentulus, duo censores, clarissimi viri, sapientissimique homines, furti, & captarum pecuniarum nomine, notaverunt, ii non modò in senatum redierunt, sed etiam illarum ipsarum rerum judiciis absoluti sunt,

XLIII. Neminem voluerunt majores nostri non modò de existimatione cujusquam, sed ne pecuniaria quidem de re minima esse judicem, nisi qui inter adversarios convenisset. Quapropter in omnibus legibus, quibus exceptum est, de quibus causis aut magistratum capere non liceat, aut judicem legi, aut alterum accusare, hæc ignominia causa prætermissa est. Timoris enim causam, non vitæ poenam in illa potestate esse voluerunt.

121. Itaque non solum, Judices, illud ostendam; quod jam videtis, populi Romani suffragiis sæpenumero censorias subscriptiones esse deletas, verum etiam judiciis eorum, qui jurati statuere majore cum religione & diligentia debuerunt. Primum judices senatores equitesque Romani, in compluribus jam reis, quos contra leges pecunias accepisse subscriptum est, suæ potius religioni, quam censorum opinio-

ni, paruerunt. Deinde prætores urbani, qui jurati debent optimum quemque in selectos judices referre, numquam sibi ad eam rem censoriam ignominiam impedimento esse oportere duxerunt.

122. Censores denique ipsi sæpenumero superiorum censorum judiciis (si ista judicia appellari vultis) non steterunt: atque etiam ipsi inter se censores sua judicia tanti esse arbitrantur, ut alter alterius judicium non modò reprehendat, sed etiam rescindat: ut alter de senatu moveri velit, alter retineat, & ordine amplissimo dignum existimet: ut alter in ærarios referri, aut tribu moveri jubeat, alter vetet. Quare quì vobis in mentem venit, hæc appellare judicia, quæ a populo Romano rescindi, ab juratis judicibus repudiari, a magistratibus negligi, ab iis, qui eandem potestatem adepti sunt, commutari, inter collegas discrepare videatis?

XLIV. Quæ quum ita sint: videamus, quid tandem censores de illo judicio corrupto judicasse dicantur. Ac primùm illud statuamus, utrùm, quia censores subscripserint, ita sit; an, quia ita fuerit, illi subscripserint. Si ideo, quia subscripserint: videte, quid agatis, ne in unumquemque nostrùm censoribus in posterum potestatem regiam permittatis: ne subscriptio censoria non minùs calamitatis civibus,

quàm illa acerbissima proscriptio , possit afferre : ne censorium stylum , cujus mucronem multis remediis majores nostri retulerunt , æquè posthac , atque illum dictatorium gladium pertimescamus.

124. Sin autem quod subscriptum est , quia verum est , idcirco grave debet esse ; hoc quæramus , verum sit , an falsum : removeantur auctoritates censoriæ : tollatur id ex causa , quod in causa non est : doce , quam pecuniam Cluentius dederit , unde dederit , quemadmodum dederit : unum denique aliquod a Cluentio profectæ pecuniæ vestigium ostende. Vince deinde , virum bonum fuisse Oppianicum , hominem integrum : nihil de illo umquam secus esse existimatum : nihil denique præjudicatum : tum auctoritatem censorum amplexator : tum illorum judicium cum re conjunctum esse defendito.

125. Dum verò eum fuisse Oppianicum constabit , qui tabulas publicas municipii sui corrupisse judicatus sit : qui testamentum interleverit : qui , suppositâ personâ , falsum testamentum obsignandum curarit : qui eum , cujus nomine id obsignatum est , interfecerit : qui avunculum filii sui in servitute ac vinculis necarit : qui municipes suos proscribendos , occidendosque curarit : qui ejus uxorem , quem occiderat , in matrimonium duxerit : qui pecuniam

pro abortione dederit : qui socrum , qui uxorem , qui uno tempore fratris uxorem , speratosque liberos , fratremque ipsum , qui denique suos liberos interfecerit : qui quum venenum privigno suo quæreret , manifestò sit deprehensus : cujus ministris consciisque damnatis , ipse adductus in judicium pecuniam judici dederit ad sententias judicum corrupendas : dum hæc , inquam , de Oppianico constabunt , nec ullo argumento Cluentianæ pecuniæ crimen tenebitur : quid est , quòd te ista censoria , sive voluntas , sive opinio fuit , adjuvare , aut hunc innocentem opprimere posse videatur ?

XLV. Quid igitur censores secuti sunt ? ne ipsi quidem , ut gravissimè dicam , quidquam aliud dicent , præter sermonem atque famam : nihil se testibus ; nihil tabulis , nihil gravi aliquo argumento comperisse ; nihil denique , causâ cognitâ , statuisse dicent. Quod si ita fecissent ; tamen id non ita fixum esse deberet , ut convelli non liceret. Non utar exemplorum copiâ , quæ summa est ; non rem veterem , non hominem potentem aliquem , aut gratiosum proferam. Nuper hominem tenuem , scribam ædilitium , D. Matrinium quum defendissem apud M. Junium , Q. Publicium prætores , & M. Plætorium , C. Flaminium , ædiles curules , persuasi , ut scri-



ham jurati legerent eum, quem iidem isti censores ærarium reliquissent: quum enim in homine nulla culpa reperiretur, quid ille meruisset, non quid de eo statutum esset, quærendum esse duxerunt.

127. Nam hæc quidem, quæ de iudicio corrupto subscripserint, quis est, qui ab illis satis cognita, & diligenter iudicata arbitretur? In M'. Aquilium, & in T. Guttam video esse subscriptum. Quid est hoc? duos esse corruptos solos pecuniâ. Quid ceteri? videlicet gratis condemnarunt. Non est igitur circumventus, non est oppressus pecuniâ, non ut illæ Quintianæ conciones habebantur, omnes, qui Oppianicum condemnarunt, in culpa sunt, ac suspicione ponendi: duos solos video auctoritate censorum affines ei turpitudini iudicari. Aut illud afferant, aliquid esse, quod de iis duobus habuerint compertum, de ceteris comperisse.

XLVI. Nam illud quidem minimè probandum est, ad notationes, auctoritatemque censoriam, exemplum illos a consuetudine militari transtulisse. Statuerunt enim ita maiores nostri, ut, si a multis esset flagitium rei militaris admissum, sortitione in quosdam animadverteretur: ut metus videlicet ad omnes, pœna ad paucos perveniret. Quod idem facere censores in delectu dignitatis, & in iudicio civium, &

in animadversione vitiorum, qui convenit? nam miles, qui locum non tenuit, qui hostium impetum, vimque pertimuit, potest idem postea & miles esse melior, & vir bonus, & civis utilis. Quare, ne in bello, propter hostium metum, delinqueret, amplior ei mortis & supplicii metus est a majoribus constitutus: ne autem nimium multi pœnam capitis subirent, idcirco illa fortitio comparata est.

129. Hoc tu idem facies, censor, in senatu legendo? si erunt plures, qui, ob innocentem condemnandum, pecuniam acceperint, ut non animadvertas in omnes, sed carpas, ut velis, & paucos ex multis ad ignominiam sortiari? Habebit igitur, te sciente & vidente, curia senatorem, populus Romanus judicem, respublica civem sine ignominia quemquam, qui ad perniciem innocentis, fidem suam & religionem pecuniâ commutarit? &, qui pretio adductus eripuerit patriam, fortunas, liberos civi innocenti, is censoriæ severitatis notâ non inuretur? Tu es præfectus moribus, tu magister veteris disciplinæ & severitatis, si aut retines quemquam sciens in senatu, scelere tanto contaminatum; aut statuis, qui in eadem culpa sit, non eâdem pœnâ affici oportere? & quam conditionem supplicii majores in bello timiditati militis propositam es

se voluerunt, eamdem tu in pace constitues improbitati senatoris? Quod si hoc exemplum ex re militari ad animadversionem censoriam transferendum fuit; sortitione id ipsum factum esse oportuit: sin autem sortiri ad poenam, atque hominum delictum fortunæ judicio committere, minimè censorium est; certè in multorum peccato carpi paucos ad ignominiam & turpitudinem, non oportet.

XLVII. Verùm omnes intelligimus, in istis subscriptionibus ventum quemdam popularem esse quæsitum. Jactata res erat in concione a tribuno seditioso: incognitâ causâ probatum illud erat multitudini: illicitum est contrà dicere: nemo denique, ut defenderet contrariam partem, laborabat. In invidiam porrò magnam illa judicia venerant: etenim paucis postea mensibus alia vehemens erat in judiciis ex notatione tabularum invidia versata. Prætermitti a censoribus, & negligi macula judiciorum posse non videbatur: homines, quos ceteris vitiis, atque omni dedecore infames videbant, eos hac quoque subscriptione notare voluerunt, & eò magis, quod illo ipso tempore, illis censoribus erant judicia cum equestri ordine communicata: ut viderentur per hominum idoneorum ignominiam suâ auctoritate illa judicia cum equestri ordine reprehendisse.

131. Quòd si hanc apud eos ipsos censores mihi, aut alii causam agere licuisset, hominibus tali prudentiâ certè probavissem (res enim indicat) nihil ipsos habuisse cogniti, nihil comperti: ex tota ipsa subscriptione rumorem quemdam & plausum popularem esse quæsitum. Nam in P. Popilium, qui Oppianicum condemnarat, subscripsit L. Gellius, quòd is pecuniam accepisset, quò innocentem condemnaret. Jam id ipsum quantæ divinationis est, scire, innocentem fuisse reum, quem fortasse numquam viderat, quum homines sapientissimi, iudices, ut nihil dicam de iis, qui condemnarunt, causâ cognitâ, sibi dixerint non liquere?

132. Verùm esto: condemnat Popilium Gellius: judicat accepisse a Cluentio pecuniam. Negat hoc Lentulus: nam Popilium, quòd erat libertini filius, in senatum non legit: locum quidem senatorium ludis, & cetera ornamenta reliquit, & eum omni ignominiâ liberat: quod quum facit, judicat, ejus sententiâ gratis esse Oppianicum condemnatum: & eundem Popilium postea Lentulus in ambitûs judicio, pro testimonio diligentissimè laudat. Quare, si neque L. Gellii judicio stetit Lentulus, neque Lentuli existimatione contentus fuit Gellius; &, si uterque censor censoris opinione standum non puta-

*PRO A. CLUENTIO. 81*

Vit : quid est , quamobrem quisquam nostrum censorias subscriptiones omnes , fixas , & in perpetuum ratas putet esse oportere ?

XLVIII. At in ipsum Avitum animadverterunt : nullam quidem ob turpitudinem , nullum ob totius vitæ non dicam vitium , sed erratum : neque enim hoc homine sanctior , neque probior , neque in omnibus officiis retinendis diligentior esse quisquam potest : neque illi aliter dicunt : sed eandem illam famam iudicii corrupti secuti sunt : neque ipsi secus existimant , quàm nos existimari volumus , de hujus pudore , integritate , virtute : sed putarunt prætermitti accusatorem non potuisse , quum animadversum esset in iudices. Quæ de re tota si unum factum ex omni antiquitate protulero , plura non dicam.

134. Non enim mihi exemplum summi & clarissimi viri , P. Africani , prætereundum videtur : qui quum esset censor , & in equitum censu C. Licinius Sacerdos prodiiisset , clarâ voce , ut omnis concio audire posset , dixit se scire , illum verbis conceptis pejerasse : si quis contra dicere vellet , usurum esse eum suo testimonio : deinde quum contra nemo diceret , jussit equum traducere. Itaque is , cujus arbitrio & populus Romanus , & exteræ gentes contentæ esse consueverant , ipse suâ con-

scientiâ ad ignominiam alterius contentus non fuit. Quodd si hoc Avito facere licuisset, facile, illis ipsis iudicibus, & falsæ suspicioni, & invidiæ populariter excitatæ restitisset.

135. Unum etiam est, quod me maximè conturbat, cui loco respondere posse vix videor, quodd elogium recitasti de testamento Cn. Egnatii, patris, hominis honestissimi videlicet & sapientissimi, idcirco se exheredasse filium, quodd is ob Oppianici damnationem pecuniam accepisset. De cuius hominis levitate & inconstantia plura non dicam. Hoc testamentum ipsum, quod recitas, ejusmodi est, ut ille, quum eum filium exheredaret, quem oderat, ei filio coheredes homines alienissimos conjungeret, quem diligebat. Sed tu, Atti, consideres, censeo, diligenter, utrùm censorum iudiciû grave velis esse, an Egnatii. Si Egnatii: leve est, quodd censores de ceteris subscripserunt: ipsum enim Cn. Egnatium, quem tu gravem esse vis, ex senatu ejecerunt: sin autem censorum: hunc Egnatium, quem pater censoriâ subscriptione exheredavit, censores in senatu, quum patrem ejicerent, retinuerunt.

XLIX. At enim senatus universus iudicavit, illud corruptum esse iudiciû. Quomodo? suscepit causam. An. potuit

rem delatam ejusmodi repudiare ? quum tribunus plebis , populo concitato , rem pene ad manus revocasset : quum vir optimus , & homo innocentissimus , pecuniâ circumventus esse diceretur : quum invidiâ flagraret ordo senatorius : potuit nihil decerni ? potuit illa concitatio multitudinis sine summo periculo reipublicæ repudiari ? At quid est decretum ? quàm sapienter ? quàm diligenter ? *Si qui sunt , quorum operâ factum sit , ut judicium publicum corrumperetur.* Utrum videtur senatus id factum judicare ; an , si factum sit , molestè graviterque ferre ? si ipse A. Cluentius sententiam de judiciis rogaretur , aliam non diceret , atque ii dixerunt , quorum sententiis Cluentium condemnatum esse dicitis.

137. Sed quæro a vobis , num istam legem ex isto senatusconsulto L. Lucullus consul , homo sapientissimus , tulerit ? num anno post M. Lucullus , & C. Cassius , in quos tum consules designatos idem illud senatus decreverit ? non tulerunt : & quod tu Aviti pecuniâ factum esse arguis , neque id ullâ vel tenuissimâ suspitione confirmas , factum est primò illorum æquitate , & sapientiâ consulum , ut id , quod senatus decreverat , ad illud invidiæ præsens incendium restringendum , id postea perferendum ad populum non arbitrarentur :

ipse deinde populus Romanus , qui L. Quintii tribuni plebis fictis querimoniis antea concitatus , rem illam & rogationem flagitarat , idem C. Junii filii , pueri parvuli , lacrymis commotus , maximo clamore & concursu totam illam legem & quæstionem repudiavit. Ex quo intelligi potuit id , quod sæpe dictum est : ut mare , quod suâ naturâ tranquillum sit , ventorum vi agitari atque turbari ; sic & populum Romanum suâ sponte esse placatum , hominum seditiosorum vocibus , ut violentissimis tempestatibus , concitari.

L. Est etiam reliqua permagna auctoritas , quam ego turpiter pene præterii : mea enim esse dicitur. Recitavit ex oratione nescio quâ Attius , quam meam esse dicebat , cohortationem quamdam judicum ad honestè judicandum , & commemoracionem tum illorum judiciorum , quæ probata non essent , tum illius ipsius judicii Juniani : perinde quasi ego non ab initio hujus defensionis dixerim , invidiosum illud fuisse judicium ; aut , quum de infamia judiciorum , quæ probata non essent , disputarem , potuerim illud , quod tam popolare esset , in illo tempore præterire.

139. Ego verò , si quid ejusmodi dixi , neque cognitum commemoravi , neque pro testimonio dixi , & illa oratio potius temporis mei , quàm judicii & auctori-



PRO A. CLUENTIO. 85

tatis fuit. Quum enim accusarem, & mihi initio proposuissem, ut animos & populi Romani & judicium commoverem, quumque omnes offensiones judiciorum non ex mea opinione, sed ex hominum rumore proferrem, istam rem, quæ tam populariter esset agitata, præterire non potui. Sed errat vehementer, si quis in orationibus nostris, quas in judiciis habuimus, auctoritates nostras consignatas se habere arbitrat: omnes enim illæ orationes causarum & temporum sunt, non hominum ipsorum ac patronorum. Nam, si causæ ipsæ pro se loqui possent, nemo adhiberet oratorem: nunc adhibemur, ut ea dicamus; non quæ nostrâ auctoritate constituentur; sed quæ ex re ipsa, causaque ducantur. Hominem ingeniosum, M. Antonium, aiunt solitum esse dicere, *idcirco se nullam umquam orationem scripsisse, ut, si quid aliquando, quod non opus esset, ab se esset dictum, posset se negare dixisse*: perinde quasi, quid a nobis dictum, aut actum sit, id nisi litteris mandaverimus, hominum memoriâ non comprehendatur.

LI. Ego verò in isto genere libentius quum multorum, tum hominis eloquentissimi & sapientissimi, L. Crassi, auctoritatem sequor, qui quum Cn. Plancum defenderet, accusante M. Bruto, homine in dicendo vehementi & callido, quum

Brutus, duobus recitatoribus constitutis, ex duabus ejus orationibus capita alterna, inter se contraria, recitanda curasset, quod in dissuasione rogationis ejus, quæ contra coloniam Narbonensem ferebatur, quantum potest, de auctoritate senatûs detrahit; in suasionem legis Serviliæ summis ornat senatum laudibus: & multa in equites Romanos quum ex ea oratione asperius dicta recitasset, quod animi illorum judicium in Crassum incenderentur; aliquantum esse commotus dicitur.

141. Itaque in respondendo primum exposuit utriusque rationem temporis, ut oratio ex re & causa habita videretur: deinde, ut intelligere posset Brutus, quem hominem, & non solum quâ eloquentiâ, verum etiam quo lepore, & quibus facetiis præditum lacessisset; tres & ipse excitavit recitatores cum singulis libellis, quos M. Brutus, pater illius accusatoris, de jure civili reliquit. Eorum initia quum recitarentur, ea, quæ vobis nota esse arbitror: *Fortè evenit, ut ruri in Privernate essemus, ego, & Brutus filius: fundum Privernatem flagitabat. In Albano eramus ego, & Brutus filius: Albanum poscebat. In Tiburte fortè quum assedissemus ego, & Brutus filius: Tiburtem fundum requirebat: Brutum autem, hominem sapientem, quod filii nequitiam videret, quæ*

*PRO A. CLUENTIO. 87*

prædia ei relinqueret, testificari dicebas voluisse: quòd si potuisset honestè scribere, se in balneis cum id ætatis filio fuisse, non præteriisset: eas se tamen ab eo balneas non ex libris patris, sed ex tabulis, & ex censu quærere. Crassus tum ita Brutum ultus est, ut illum recitationis suæ pœniteret: molestè enim fortasse tulerat, se in iis orationibus reprehensum, quas de republica habuisset; in quibus forsitan magis requiratur constantia.

142. Ego autem illa recitata esse non molestè fero: neque enim ab illo tempore, quod tum erat, neque ab ea causa, quæ tum agebatur, aliena fuerunt: neque mihi quidquam oneris suscepi, quum ista dixi, quòd minùs honestè hanc causam, & liberè possem defendere. Quòd si velim confiteri, me causam A. Cluentii nunc cognoscere, antea fuisse in illa opinione populari; quis tandem id possit reprehendere? præsertim, Iudices, quum a vobis quoque ipsis hoc impetrare sit æquissimum, quod ego & ab initio petivi, & nunc peto, ut, si quam huc graviolem de illo iudicio opinionem attulistis, hanc, causâ perspectâ, atque omni veritate cognitâ, deponatis.

LII. Nunc, quoniam ad omnia, quæ abs te dicta sunt, T. Atti, de Oppianici damnatione respondi: confiteare necesse

est , te opinionem multum fefellisse , quod existimaris , me causam A. Cluentii non facto ejus , sed lege defensurum. Nam hoc persæpe dixisti , tibi sic renuntiari , me habere in animo causam hanc præsidio legis defendere. Itane est ? ab amicis videlicet imprudentes prodimur ; & est nescio quis de iis , quos amicos nobis arbitramur , qui nostra consilia ad adversarios deferat. Quisnam tibi hoc renuntiavit ? quis tam improbus fuit ? cui ego autem narraui ? nemo , ut opinor , in culpa est : sed nimirum tibi istuc lex ipsa renuntiavit. Sed num tibi ita defendisse videor , ut tota in causa mentionem ullam fecerim legis ? num secus hanc causam defendissem , ac si lege Avitus teneretur ? certe , ut hominem confirmare oportet , nullus est locus a me purgandi istius invidiosi criminis prætermissus.

144. Quid ergo est ? quæret fortasse quispiam , displiceatne mihi , legum præsidio a capite periculum propulsare. Mihi verò , Judices , non displicet : sed utor instituto meo. In hominis honesti pudentisque judicio , non solum meo consilio uti consuevi ; sed multum etiam ejus , quem defendo , & consilio , & voluntati obtempero. Nam , ut hæc ad me causa delata est : qui leges eas , ad quas adhibemur , & in quibus versamur , nosse de-

**PRO A. CLUENTIO. 89**

berem : dixi Avito statim , de eo , *Qui coisset , quò quis condemnaretur* , illum esse liberum ; teneri autem nostrum ordinem. Atque ille me orare & obsecrare cœpit , ut ne sese lege defenderem. Quum ego , quæ mihi viderentur , dicerem ; traduxit me ad suam sententiam : affirmabat enim lacrymans , non se cupidiorum esse civitatis retinendæ , quàm existimationis.

145. Morem homini gessi : & tamen idcirco feci ; ( neque enim id semper facere debemus ) quòd videbam , per se , ipsam causam copiosissimè sine lege posse defendi. Videbam , in hac defensione , quâ jam sum usus , plus dignitatis ; in illa , quâ me hic uti noluit , minùs laboris futurum. Quòd si nihil aliud esset actum , nisi ut hanc causam obtinerem ; lege recitatâ , perorassem.

LIII. Neque me illa oratio commoveret , quòd ait Attius , indignum esse facinus , si senator judicio quemquam circumvenerit , legibus eum teneri : si eques Romanus hoc idem fecerit , non teneri. Ut tibi concedam , hoc indignum esse ( quod cujusmodi sit , jam videro ) tu mihi concedas necesse est , multò esse indignius , in ea civitate , quæ legibus contineatur , discedi a legibus. Hoc enim vinculum est hujus dignitatis , quâ fruimur in republica ; hoc fundamentum libertatis , hic fons

æquitatis : mens , & animus , & consilium , & sententia civitatis , posita est in legibus. Ut corpora nostra sine mente ; sic civitas sine lege , suis partibus , ut nervis , ac sanguine , & membris , uti non potest. Legum ministri , magistratus : legum interpretes , judices : legum denique idcirco omnes servi sumus , ut liberi esse possimus.

147. Quid est , Q. Naso , cur tu in hoc loco sexto sedeas ? quæ vis est , quâ abs te hi judices , tali dignitate præditi , coercantur ? vos autem , Judices , quamobrem ex tam magna multitudine civium tam pauci de hominum fortunis sententiam fertis ? quo jure Attius , quæ voluit , dixit ? cur mihi tamdiu potestas dicendi datur ? quid sibi autem illi scribæ , quid lictores , quid ceteri , quos apparere huic quæstioni video , volunt ? opinor hæc omnia lege fieri , totumque hoc judicium ( ut antea dixi ) quasi mente quadam regi legis , & administrari. Quid ergo est ? hæc quæstio sola ita gubernatur ? quid M. Plætorii , & C. Flamini inter sicarios ? quid C. Orchinii peculatûs ? quid mea de pecuniis repetundis ? quid C. Aquilii , apud quem nunc de ambitu causa dicitur ? quid reliquæ quæstiones ? circumspicite omnes reipublicæ partes : omnia legum imperio & præscripto fieri videbitis. Si quis apud me

PRO A. CLUENTIO. 91

te, T. Atti, reum velit facere; clames, te lege pecuniarum repetundarum non teneri: neque hæc tua recusatio confessio sit captæ pecuniæ; sed laboris, sed periculi non legitimi declinatio.

LIV. Nunc, quid agatur, & quid abs te juris constituatur, vide. Jubet lex ea, quâ lege hæc quæstio constituta est, judicem quæstionis, hoc est, Q. Viconium, cum iis iudicibus, qui ei obvenierint (vos appellat, Iudices) quærere de veneno. In quem quærere? infinitum est. *Quicumque fecerit, vendiderit, emerit, habuerit, dederit.* Quid eadem lex statim adjungit? Recita. *Deque ejus capite quærato.* Cujus? qui coierit? convenerit? non ita est. Quid ergo est? Dic. *Qui tribunus militum legionibus quatuor primis, quive quæstor, tribunus plebis.* Deinceps omnes magistratus nominavit. *Quive in senatu sententiam dixit, dixerit.* Quid tum? *Qui eorum coit, coierit, convenit, convenerit, quò quis judicio publico condemnaretur.* Qui eorum: quorum? Videlicet, qui suprâ scripti sunt: quid interest, utro modo scriptum sit? Etsi est apertum, tamen ipsa lex docet. Ubi enim omnes mortales alligat, ita loquitur: *Qui venenum malum fecit, fecerit:* omnes viri, mulieres, liberi, servi in iudicium vocantur. Si item de coitione voluisset: adjunxisset,

*Quive coierit. Nunc ita est, Deque ejus capite quærito; qui magistratum habuerit, quive in senatu sententiam dixerit: qui eorum coierit, coierit.*

149. Num is est Cluentius? certè non est. Quis ergo est Cluentius? qui tamen defendi causam suam lege nolit. Itaque abjicio legem: morem Cluentio gero: tibi tamen, Atti; pauca, quæ ab hujus causa sejuncta sunt, respondebo: est enim quiddam in hac causa, quod Cluentius ad se; est aliquid, quod ego ad me putem pertinere: hic suâ putat interesse, se re ipsâ, & gesto negotio, non lege defendi: ego autem meâ existimo interesse, me nulla in disputatione ab Attio videri esse superatum: non enim mihi hæc causa sola dicenda est: omnibus hic labor meus propositus est, quicumque hac facultate defensionis contenti esse possunt: nolo, quemquam eorum, qui adsunt, existimare, me, quæ de lege ab Attio dicta sunt, si reticuerim, comprobare. Quamobrem, Cluenti, de te tibi obsequor; neque ego legem recito, neque hoc loco pro te dico: sed ea, quæ a me desiderari arbitror, non relinquam.

LV. Iniquum tibi videtur, Atti, esse, non iisdem legibus omnes teneri. Primum (ut id iniquissimum esse confitear) hujusmodi est, ut commutatis eis opus sit



legibus, non ut iis, quæ sunt, non pareamus. Deinde quis umquam hoc senator accusavit, ut, quum altiore gradum dignitatis, beneficio populi Romani esset consecutus, eò se putaret durioribus legum conditionibus uti non oportere? Quàm multa sunt commoda, quibus caremus: quàm multa molesta ac difficilia, quæ subimus? atque hæc omnia tantum honoris & amplitudinis commodis compensantur. Converte nunc te ad equestrem ordinem, atque in ceteros ordines; easdem vitæ conditiones non perferent: putant enim minùs multos sibi laqueos legum, & conditionum, ac judiciorum propositos esse oportere, qui in summum locum civitatis aut non potuerunt adscendere, aut non petiverunt.

151. Atque, ut omittam leges alias omnes, quibus nos tenemur; ceteri autem sunt ordines liberati: hanc ipsam legem, *Ne quis iudicio circumveniretur*, C. Gracchus tulit: eam legem pro plebe, non in plebem tulit. Postea L. Sulla, homo a populi causa remotissimus, tamen, quum ejus rei quæstionem hac ipsa lege constitueret, quâ vos hoc tempore judicatis, populum Romanum, quem ab hoc genere liberum acceperat, alligare novo quæstionis genere ausus non est. Quod si fieri posse existimasset; pro illo

odio , quod habuit in equestrem ordinem ; nihil fecisset libentius , quàm omnem illam acerbitatem proscriptionis suæ , questus in veteres iudices , in hanc unam quæstionem contulisset.

152. Nec nunc quidquam agitur ( mihi credite , Iudices , & prospicite id , quod providendum est ) nisi , ut equester ordo in hujusce legis periculum includatur. Neque hoc agitur ab omnibus , sed a paucis : nam ii senatores , qui se faciliè tuentur integritate & innocentia , quales ( ut verè dicam ) vos estis , & ceteri , qui sine cupiditate vixerunt , equites ordini senatorio dignitate proximos , concordia conjunctissimos esse cupiunt : sed ii , qui se volunt posse omnia , neque præterea quidquam esse aut in homine ullo , aut in ordine ; hoc uno metu se putant equites Romanos in potestatem suam redacturos , si constitutum est , ut de iis , qui rem judicarent , hujusmodi judicia fieri possint. Vident enim auctoritatem hujus ordinis confirmari : vident judicia comprobari : hoc metu proposito , evellere se aculeum severitatis vestræ posse confidunt. Quis enim de homine audeat , paulò majoribus opibus prædito , verè & fortiter judicare ; quum videat , sibi de eo , quòd coierit , aut consenserit , causam esse dicendam ?

· LVI. O viros fortes , equites Roma-

nos ! qui homini clarissimo ac potentissimo , M. Drufo , tribuno plebis restiterunt , quum ille nihil aliud ageret cum illa cuncta , quæ tum erat , nobilitate , nisi uti , qui res judicassent , hujusmodi quæstionibus in iudicium vocarentur. Tunc C. Flavius Pusio , Cn. Titinnius , C. Mæcenæ , illa robora populi Romani , ceterique hujuscemodi ordinis , non fecerunt idem , quod nunc Cluentius , ut aliquid culpæ suscipere se putarent , recusando : sed apertissimè repugnarunt , quum hæc recusarent , & palam fortissimè , atque honestissimè dicerent , se potuisse iudicio populi Romani in amplissimum locum pervenire , si sua studia ad honores petendos conferre voluissent ; sese vidisse , in ea vita qualis splendor inesset , quanta ornamenta , quæ dignitas : quæ se non contempsisse , sed ordine suo , patrumque suorum , contentos fuisse , & vitam illam tranquillam & quietam , remotam a procellis invidiarum , & hujuscemodi iudiciorum amfractu , sequi maluisse.

154. Aut sibi ad honores petendos ætatem integram restitui oportere : aut , quoniam id non posset , eam conditionem vitæ , quam secuti , petitionem reliquissent , manere : iniquum esse , eos , qui honorum ornamenta , propter periculorum multitudinem , prætermisissent , populi benefi-

ciis esse privatos , judiciorum novorum periculis non carere : senatorem hoc queri non posse , propterea quòd eâ conditione propositâ petere cœpisset ; quòdque permulta essent ornamenta , quibus eam mitigare molestiam posset : locus , auctoritas , domi splendor , apud exteras nationes nomen & gratia , toga prætexta , sella curulis , insignia , fasces , exercitus , imperia , provinciæ : quibus in rebus quum summum rectè factis majores nostri præmium , tum plura peccatis pericula proposita esse voluerunt. Illi non hoc recusabant , eâ ne lege accusarentur , quâ nunc Avitus accusatur , quæ tunc erat Sempronia , nunc est Cornelia : intelligebant enim , eâ lege equestrem ordinem non teneri : sed ne novâ lege alligarentur , laborabant. Avitus ne hoc quidem umquam recusavit , quominus vel eâ lege rationem vitæ suæ redderet , quâ non teneretur. Quæ si vobis conditio placet : omnes id agamus , ut hæc quàm primùm in omnes ordines quæstio perferatur.

LVII. Interea quidem , per deos immortales ! quoniam omnia comoda nostra , jura , libertatem , salutem denique legibus obtinemus , a legibus non recedamus : simul & illud quàm sit indignum , cogitemus , populum Romanum aliud nunc agere : vobis rempublicam & fortunas suas

*PRO A. CLUENTIO. 97*

suas commisisse : ipsum sine cura esse : non metuere , ne lege eâ , quam numquam ipse jusserit , & quæstione , quâ se solum liberumque esse arbitretur , per paucos iudices adstringatur.

156. Agit enim sic causam T. Attius , adolescens bonus & disertus , omnes cives legibus teneri omnibus : vos attenditis , & auditis silentio , sicut facere debetis. A. Cluentius , eques Romanus , causam dicit eâ lege , quâ lege senatores , & ii , qui magistratum habuerunt , soli tenentur : mihi per eum recusare , & in arce legis præsidia constituere defensionis meæ non licet. Si obtinuerit causam Cluentius ( sicuti vestrâ æquitate nixi confidimus ) existimabunt , id quod erit , obtinuisse propter innocentiam , quoniam ita defensus sit : in lege autem , quam attingere noluerit , præsidii nihil fuisse.

157. Hic nunc est quiddam , quod ad me pertineat , de quo antè dixi , quod ego populo Romano præstare debeam , quoniam is meæ vitæ status est , ut omnis mihi cura atque opera posita sit in omnium periculis defendendis. Video ; quanta , & quàm periculosa , & quàm infinita quæstio tentetur ab accusatoribus , quum eam legem , quæ in nostrum ordinem scripta sit , in populum Romanum transferre conentur : qua in lege est , qui

*coierit* : quod quàm latè pateat , videtis. *Convenerit* : æquè infinitum & incertum est. *Consenserit* : hoc verò quum incertum & infinitum , tum obscurum & occultum est. *Falsumve testimonium dixerit* : quis de plebe Romana testimonium dixit umquam , cui non hoc periculum , T. Attio auctore , paratum esse videatis ? nam dicturum quidem certè , si hoc iudicium plebi Romanæ propositum sit , neminem umquam esse confirmo.

158. Sed hoc polliceor omnibus , si cui fortè hac lege negotium faceissetur , qui lege non teneatur , si is uti me defensore voluerit , me ejus causam legis præsidio defensurum ; & vel his iudicibus , vel eorum similibus , facillè probaturum , & omni me defensione usurum esse legis : quâ nunc ut utar , ab eo , cujus voluntati mihi obtemperandum est , non conceditur.

LVIII. Non enim debeo dubitare ; Iudices , quin , si qua ad vos causa hujusmodi delata sit ejus , qui lege non teneatur ; etiam si is invidiosus , aut multis offensus esse videatur , etiam si eum oderitis , etiam si inviti absoluturi sitis , tamen absolvatis ; & religioni potius vestræ , quàm odio pareatis.

159. Est enim sapientis iudicis , cogitare , tantum sibi a populo Romano esse permissum , quantum commissum & cre-

ditum sit; & non solum sibi potestatem datam, verum etiam fidem habitam esse meminisse: posse, quem oderit, absolvere; quem non oderit, condemnare; & semper non quid ipse velit, sed quid lex & religio cogat, cogitare: animadvertere, quâ lege reus citetur, de quo reo cognoscat, quæ res in quæstione versetur. Quum hæc sunt videnda, tum verò illud est hominis magni, Judices, atque sapientis, quum illam, judicandi causâ, tabellam sumpserit, non se putare esse solum, neque sibi, quodcumque concupierit, licere; sed habere in consilio legem, religionem, æquitatem, fidem: libidinem autem, odium, invidiam, metum, cupiditatesque omnes amovere: maximèque æstimare conscientiam mentis suæ, quam a diis immortalibus accepimus; quæ a nobis divelli non potest; quæ si optimorum consiliorum atque factorum testis in omni vita nobis erit, sine ullo metu & summa cum honestate vivemus.

160. Hæc si T. Attius aut cognovisset; aut cogitasset; profectò ne conatus quidem esset dicere, id quod verbis multis egit, judicem, quod ei videatur, statuere, & non devinctum legibus esse oportere: quibus de rebus mihi pro Cluentii voluntate, nimium; pro reipublicæ dignitate, parum; pro vestra prudentia,

fatis dixisse videor. Reliqua perpauca sunt ; quæ , quia vestræ quæstionis erant , idcirco illi statuerunt sibi fingenda esse , & proferenda , ne omnium turpissimi reperirentur , si in judicium nihil , præter invidiam , attulissent.

LIX. Atque , ut existimetis , necessario me de his rebus , de quibus jam dixerim , pluribus egisse verbis , attendite reliqua : profectò intelligetis , ea , quæ paucis demonstrari potuerunt , brevissimè esse defensa. Cn. Decio Samniti , ei , qui proscriptus est , injuriam in calamitate ejus ab hujus familia factam esse dixistis. Ab nullo ille liberalius , quàm a Cluentio tractatus est : hujus illum opes in rebus ejus incommodis sublevarunt : atque hoc quum ipse , tum omnes ejus amici , necessarii-que cognoverunt. Ancarii , & Paceni pastoribus , hujus villicum vim & manus attulisse. Quum quædam in collibus ( ut solet ) controversia pastorum esset orta ; Aviti villici rem domini , & privatam possessionem defenderunt : quum esset expostulatio facta , causa illis demonstrata ; sine judicio controversiaque discessum est.

162. P. Ælii testamento propinquus exheredatus quum esset , heres hic alienior institutus est. P. Ælius Aviti merito fecit : neque hic in testamento faciendo





interfuit ; idque testamentum ab hujus inimico Oppianico est obsignatum. Florio legatum ex testamento , infitiatum esse : non est ita : sed quum H-S xxx scripta essent , pro H-S ccc , neque ei satis cautum videretur ; voluit , eum aliquid acceptum referre liberalitati suæ : primò debere negavit : post sine controversia solvit. Cœlii cujusdam Samnitis uxorem post bellum ab hoc esse repetitam. Mulierem quum emitteret de sectoribus , quo tempore eam primùm liberam esse audivit , sine judicio reddidit Cœlio.

163. Ennium esse quemdam , cujus bona teneat Avitus. Est hic Ennius e-gens quidam , calumniator , mercenarius Oppianici , qui permultos annos quievit ; deinde aliquando cum servo Aviti furti egit ; nuper ab ipso Avito petere cœpit. Hic illo privato judicio ( mihi credite ) nobis iisdem fortasse patronis , calumniam non effugiet. Atque etiam , ut nobis renuntiatur , hominem multorum hospitem A. Binnium quemdam , cauponem , de via Latina , subornatis ; qui sibi a Cluentio , servisque ejus , in taberna sua manus allatas esse dicat. Quo de homine , nihil etiam nunc dicere nobis est necesse. Si invitaverit , id quod solet , sic hominem accipiemus , ut molestè ferat , se de via decessisse. Habetis , Judices , quæ in to-

tam vitam de moribus A. Cluentii, quem illi invidiosum reum volunt esse, annos octo meditati accusatores collegerunt: quàm levia, genere ipso! quàm falsa, re! quàm brevia, responso!

LX. Cognoscite nunc id, quod ad vestrum jusjurandum pertinet, quod vestri iudicii est, quod vobis oneris imposuit ea lex, quâ coacti huc convenistis, de criminibus veneni: ut omnes intelligant, quàm paucis verbis hæc causa perorari potuerit, & quàm multa a me dicta sint, quæ ad hujus voluntatem maximè, ad vestrum iudicium minimè pertinerent.

165. Objectum est, C. Vibium Capacem ab hoc A. Cluentio veneno esse sublatum. Opportunè adest homo summâ fide, & omni virtute præditus, L. Plætorius, senator, qui illius Capacis hospes fuit, & familiaris: apud hunc ille Romæ habitavit, apud hunc ægrôtavit, hujus domi est mortuus. At heres est Cluentius. Intestatum dico esse mortuum, possessionemque ejus bonorum, prætoris edicto, huic illius sororis filio, adolescenti pudentissimo, & in primis honesto, equiti Romano datam, Numerio Cluentio, quem videtis.

\*166. Alterum veneficii crimen, Oppiano huic adolescenti, quum ejus in nuptiis, more Larinatum, multitudo homi-

num pranderet , venenum Aviti consilio paratum : id quum daretur in mulso , Balbutium quemdam , ejus familiarem , interceptisse , bibisse , statimque esse mortuum. Hæc ego si sic agerem , tamquam mihi crimen esset diluendum , hæc pluribus verbis dicerem , quæ nunc paucis percurrit oratio mea.

167. Quid umquam Avitus in se admisit , ut hoc tantum ab eo facinus non abhorreere videatur ? quid autem magnopere Oppianicum metuebat , quum ille verbum omnino in hac ipsa causa nullum facere potuerit ; huic autem accusatores , matre vivâ , deesse non possent ? quod jam intelligetis. An ut de causa ejus periculi nihil decederet , ad causam novum crimen accederet ? Quod autem tempus veneni dandi , illo die ? in illa frequentia ? per quem porro datum ? unde sumptum ? quæ deinde interceptio poculi ? cur non de integro autem datum ? Multa sunt , quæ dici possunt : sed non committam , ut videar non dicendo voluisse dicere : res enim jam se ipsa defendat.

168. Nego , illum adolescentem , quem statim epoto poculo mortuum esse dixistis , omnino illo die esse mortuum : magnum & impudens mendacium. Perspici-te cetera : dico , illum quum ad illud prandium crudior venisset , & , ut ætas illa

fert, sibi tum non pepercisset; aliquot dies ægrotasse, & ita esse mortuum. Quis huic rei testis est? idem, qui sui luctus, pater; pater, inquam, illius adolescentis: quem propter animi dolorem, pertenuis suspicio potuisset ex illo loco testem in A. Cluentium constituere; is hunc suo testimonio sublevat: quod recita. Tu autem, nisi molestum est, paulisper exsurge, & perfer hunc dolorem commemorationis necessariæ: in qua ego diutius non morabor, quoniam, quod fuit viri optimi, fecisti, uti ne cui innocenti mœror tuus calamitatem & falsum crimen afferret.

*TESTIMONIUM Balbutii patris.*

LXI. Unum etiam mihi reliquum ejusmodi crimen est, Judices, ex quo illud perspicere possitis, quod a me initio orationis meæ dictum est; quidquid mali per hos annos A. Cluentius viderit, quidquid hoc tempore habeat sollicitudinis ac negotii, id omne a matre esse conflatum. Oppianicum veneno necatum esse, quod ei datum sit in pane per M. Asellium quemdam, familiarem illius, idque Aviti consilio factum esse, dicitis. In quo primum illud quæro, quæ causa Avito fuerit, cur interficere Oppianicum vellet. Inimicitias enim inter ipsos fuisse confiteor: sed homines, inimicos suos morte affici volunt, vel quòd metuunt, vel quòd oderunt.

170. Quo tandem igitur Avitus metu adductus, tantum in se facinus suscipere conatus est? quid erat, quòd jam Oppianicum pœnâ affectum pro maleficiis, ejectum e civitate, quisquam timeret? quid metuebat? ut oppugnaretur a perdito? an ne accusaretur a condemnato? an ne exfulis testimonio læderetur? Sin autem, quòd oderat Avitus, idcirco illum vitâ frui noluit; adeone erat stultus, ut illam, quam tum ille vivebat, vitam esse arbitraretur, damnati, exfulis, deserti ab omnibus? quem propter animi importunitatem, nemo recipere tecto, nemo audire, nemo alloqui, nemo respicere vellet? hujus igitur vitæ Avitus invidebat?

171. Hunc si acerbè & penitus oderat; non eum quàm diutissime vivere velle debebat? huic mortem maturabat inimicus, quod illi unum in malis perfugium erat calamitatis? qui si quid animi ac virtutis habuisset (ut multi sæpe fortes viri in ejusmodi dolore) mortem sibi ipse conscisset: huic quamobrem id vellet inimicus offerre, quod ipse sibi optare deberet? Nam nunc quidem quid tandem illi mali mors attulit? nisi fortè ineptiis ac fabulis ducimur, ut existimemus illum apud inferos impiorum supplicia perferre, ac plures illic offendisse inimicos, quàm hîc reliquisse: a socrûs, ab uxorum, a

fratris, a liberum poenis actum esse præcipitem in sceleratorum sedem, atque regionem. Quæ si falsa sunt, id quod omnes intelligunt, quid ei tandem aliud mors eripuit, præter sensum doloris?

LXII. Age verò, venenum per quem datum? per M. Afellium. Quid huic cum Avito? nihil; atque adeo, quod ille Oppianico familiarissimè est usus, potius etiam similtas. Eine igitur, quem sibi offensiozem, Oppianico familiarissimum sciebat esse, potissimum & suum scelus, & illius periculum committebat? cur deinde tu, qui pietate ad accusandum excitatus es, hunc Afellium esse inultum tam diu sinis? cur non Aviti exemplo usus es, ut per illum, qui attulisset venenum, de hoc præjudicaretur?

173. Jam verò illud quàm non probabile, quàm inusitatum, Judices, quàm novum, in pane datum venenum? Faciliùsne potuit, quàm in poculo? latentius potuit, abditum aliqua in parte panis, quàm si totum colliquefactum in potione esset? celerius potuit comestum quàm epotum, in venas atque in omnes partes corporis permanare? faciliùs fallere in pane, si esset animadversum, quàm in poculo, quum ita confusum esset, ut secerni nullo modo posset?

174. At repentinâ morte periit. Qued

sì esset ita factum, tamen ea res, propter multorum ejusmodi mortem, satis firmam veneni suspicionem non haberet: si esset suspiciosum, tamen ad alios potius, quàm ad Avitum pertineret. Verùm in eo ipso homines impudentissimè mentiuntur. Id ut intelligatis, & mortem ejus, & quemadmodum, post mortem, in Avitum sit crimen à matre quæsitum, cognoscite.

175. Quum vagus & exsul erraret, atque undique exclusus Oppianicus, in Falernum se ad C. Quintilium contulisset; ibi primum in morbum incidit, ac satis vehementer diuque ægrotavit. Quum esset unà Sassia, & Statio Albio quodam, colono, homine valente, qui simul esse solebat, familiarius uteretur, quàm vir dissolutissimus, incolumi fortunâ, pati posset; & jus illud matrimonii castum atque legitimum damnatione viri sublatum arbitraretur; Nicostratus quidam, fidelis Oppianici servulus, percuriosus & minimè mendax, multa dicitur renuntiare domino solitus esse. Interea Oppianicus quum jam convalesceret, neque in Falerno improbitatem coloni diutius ferre posset, & huc ad urbem profectus esset (solebat enim extra portam aliquid habere conducti) cecidisse ex equo dicitur, & homo infirmâ valetudine latus offendisse ve-

hèmenter , & , posteaquam ad urbem cum febris venerit , paucis diebus esse mortuus. Mortis ratio , Judices , ejusmodi est , ut aut nihil habeat suspicionis , aut , si quid habet , id intra parietes in domestico scelere versetur.

LXIII. Post mortem ejus Sassia statim moliri nefaria mulier cœpit insidias filio : quæstionem habere de viri morte constituit : emit de A. Rupilio , quo erat usus Oppianicus medico , Stratonem quemdam , quasi ut idem faceret , quod Avitus in emendo Diogene fecerat. De hoc Stratone , & de assecla quodam servo suo , quæsituram esse dixit : præterea servum illum Nicostratum , quem nimium loquacem fuisse , ac nimium domino fidelem arbitrabatur , ab hoc adolescente Oppianico in quæstionem postulavit. Hic quum esset illo tempore puer , & illa quæstio de patris sui morte constitui diceretur : etsi illum servum , & sibi benevolum esse , & patri fuisse arbitrabatur ; nihil tamen est ausus recusare. Advocantur amici , & hospites Oppianici , & ipsius mulieris multi , homines honesti , atque omnibus rebus ornati : tormentis omnibus vehementissimis quæritur. Quum essent animi servorum & spe & metu tentati , ut aliquid in quæstione dicerent : tamen ( ut arbitror ) auctoritate advocato-



rum, & vi tormentorum adducti, in veritate manserunt, neque se quidquam scire dixerunt.

177. Quæstio illo die de amicorum sententia dimissa est. Satis longo intervallo post iterum advocantur: habetur de integro quæstio: nulla vis tormentorum acerrimorum prætermittitur: averfari advocati, & jam vix ferre posse: furere crudelis atque importuna mulier, sibi nequaquam, ut sperasset, ea, quæ cogitasset, procedere. Quum jam tortor, atque essent tormenta ipsa defessa, neque tamen illa finem facere vellet: quidam ex advocatis, homo & honoribus populi ornatus, & summâ virtute præditus, intelligere se dixit, non id agi, ut verum inveniretur; sed ut aliquid falsi dicere cogerentur. Hoc postquam ceteri comprobarent; ex omnium sententia constitutum est, satis videri esse quæsitum.

178. Redditur Oppianico Nicostratus: Larinum ipsa proficiscitur cum suis, mœrens, quòd jam certè incolumem filium fore putabat, ad quem non modò verum crimen, sed ne ficta quidem suspicio perveniret: & cui non modò aperta inimicorum oppugnatio, sed ne occultæ quidem matris insidiæ nocere potuissent. Larinum postquam venit: quæ a Stratone illo venenum antea viro suo datum, sibi

persuasum esse simulasset, instructam ei continuè & ornatam, Larini medicinæ exercendæ causâ, tabernam dedit.

LXIV. Unum, alterum, tertium annum Sassia quiescebat; ut velle, atque optare aliquid calamitatis filio potiùs, quàm id istruere & moliri videretur. Tum interim Hortensio, Metello consulibus, ut hunc Oppianicum aliud agentem, ac nihil ejusmodi cogitantem, ad hanc accusationem detraheret, invito despondit ei filiam suam, illam, quam ex genere susceperat; ut eum nuptiis alligatum simul, & testamenti spe devinctum, possit habere in potestate. Hoc ipso ferè tempore Strato ille medicus domi furtum fecit, & cædem ejusmodi. Quum esset in ædibus armarium, in quo sciret esse nummorum aliquantum, & auri: noctu duos servos dormientes occidit, in piscinamque dejecit: ipse armarii fundum exsecuit, & H-S\* & auri quinque pondo abstulit, uno ex servis puero non grandi conscio.

180. Furto postridie cognito, omnis suspicio in eos servos, qui non comparebant, commovebatur. Quum exsectio illa fundi in armario animadvertèretur, quærebant homines, quonam modo fieri potuisset. Quidam ex amicis Sassiae recordatus est, se nuper in auctione quadam vidisse in rebus minutis aduncam ex

*PRO A. CLUENTIO. III*

omni parte dentium, & tortuosam venire ferrulam, quâ illud potuisse ita circumsecari videretur. Ne multa: perquiritur a coactoribus: invenitur ea ferrula ad Stratone[m] pervenisse. Hoc initio suspicionis orto, & apertè insimulato Stratone, puer ille conscius pertimuit: rem omnem dominæ indicavit: homines in piscina inventi sunt: Strato in vincula coniectus est: atque etiam in taberna ejus nummi, nequaquam omnes, reperiuntur.

181. Constituitur quæstio de furto: nam quid quisquam suspicari aliud potest? An hoc dicitis, armario expilato, pecuniâ ablatâ, non omni recuperatâ, occisis hominibus, institutam esse quæstionem de morte Oppianici? cui probatis? quid est, quod minùs verisimile proferre potuistis? Deinde ut omittam cetera, triennio post mortem Oppianici de ejus morte quærebatur? Atque etiam incensa odio pristino, Nicostratum eundem illum tum sine causa in quæstionem postulavit. Oppianicus primò recusavit: posteaquam illa abducturam se filiam, mutaturam esse testamentum minaretur; mulieri crudelissimæ servum fidelissimum, non in quæstionem tulit, sed planè ad supplicium dedit.

LXV. Post triennium igitur agitata denique quæstio de viri morte habebatur: & de quibus servis habebatur? Nova,

credo , res objecta , novi quidam homines in suspicionem vocati sunt : de Stratonem , & de Nicostrato. Quid ? Romæ quæsitum de istis hominibus non erat ? Itane tandem ? mulier jam non morbo , sed scelere furiosa , quum quæstionem habuisset Romæ , quum de T. Annii , L. Rutilii , P. Saturii , & ceterorum honestissimorum virorum sententiâ constitutum esset , satis quæsitum videri , eadem de re triennio post , iisdem de hominibus , nullo adhibito , non dicam viro , ne colonum fortè adfuisse dicatis , sed bono viro , in filii caput quæstionem habere conata est.

183. An hoc dicitis ? mihi enim venit in mentem , quid dici possit , tametsi adhuc non esset dictum : quum haberetur de furto quæstio , Stratonem aliquid de veneno esse confessum ? Hoc uno modo , Judices , sæpe multorum improbitate depressa veritas emergit , & innocentiae defensio interclusa respirat : quòd aut ii , qui ad fraudem callidi sunt , non tantum audent , quantum excogitant ; aut illi , quorum eminet audacia , atque projecta est , a consiliis malitiæ deferuntur : quòd si aut confidens astutia , aut callida esset audacia , vix ullo obsisti modo posset. Utrùm furtum factum non est ? At nihil clarius Larini fuit. An ad Stratonem sus-

*PRO A. CLUENTIO. 113*

picio non pertinuit ? At is & ex ferrula insimulatus, & a puero confcio est indicatus. An id actum non est in quærendo ? Quæ fuit alia igitur causa quærendi ? An, id quod dicendum vobis est, & quod tum Sassia dictitabat, quum de furto quæreretur, tum Strato iisdem in tormentis dixit de veneno ?

184. En hoc illud est, quod antè dixi : mulier abundat audaciâ ; consilio & ratione deficitur : nam tabellæ quæstionis plures proferuntur, quæ recitatæ, vobisque editæ sunt, illæ ipsæ, quas tum obsignatas esse dixit : in quibus tabellis de furto littera nulla invenitur. Non venit in mentem, primam orationem Stratonis conscribere de furto ; post aliquid adungere dictum de veneno, quod non percunctatione quæsitus, sed dolore expressum videretur.

185. Quæstio de furto est, veneni jam suspicione, superiore quæstione, sublatâ ; quod ipsum hæc eadem mulier indicarat : quæ ut Romæ de amicorum sententia statuerat satis esse quæsitus, postea per triennium maximè ex omnibus servis Stratonem illum dilexerat, in honore habuerat, commodis omnibus affecerat. Quum igitur de furto quæreretur, & eo furto, quod ille sine controversia fecerat : tum ille de eo, quod quærebat, verbum nullum fecit ? de veneno statim dixit ? de

furto , si non eo loco , quo debuit , ne in extrema quidem , aut media , aut in aliqua denique parte quæstionis , verbum fecit ullum ?

LXVI. Jam videtis , illam nefariam mulierem , Judices , eâdem manu , quâ , si detur potestas , interficere filium cupiat , hanc fictam quæstionem conscripsisse. Atque istam ipsam quæstionem dicite , quis obsignavit ? unum aliquem nominate : neminem reperietis , nisi fortè ejusmodi hominem , quem ego proferri malim , quàm neminem nominari.

186. Quid ais , T. Atti ? tu periculum capitis , tu indicium sceleris , tu fortunas alterius litteris conscriptas in judicium afferas ; neque earum auctorem litterarum , neque obsignatorem , neque testem ullum nominabis ? & , quam tu pestem innocentissimo filio ex matris sinu deprompseris , hanc hi tales viri comprobabunt ? Esto , in tabellis nihil est auctoritatis : quid ? ipsa quæstio , judicibus : quid ? amicis hospitibusque Oppianici , quos adhibuerat antea : quid ? huic tandem ipsi tempori , cur non reservata est ? quid istis hominibus factum est , Stratone , & Nicostrato ?

187. Quæro abs te , Oppianice , servo tuo Nicostrato quid factum esse dicas : quem tu , quum hunc brevi tempore accusaturus esses , Romam deducere , dare

*PRO A. CLUENTIO. 115*

potestatem indicandi, incolumem denique servare quæstioni, servare his iudicibus, servare huic tempori debuisti. Nam Stratonem quidem, Iudices, in crucem actum esse exsectâ scitote linguâ; quod nemo est Larinatum, qui nesciat. Timuit mulier amens non suam conscientiam, non odium municipum, non famam omnium; sed, quasi non omnes ejus sceleris testes essent futuri, sic metuit, ne condemnaretur extremâ servuli voce morientis.

188. Quod hoc portentum, dii immortales? quod tantum monstrum in ullis locis? quod tam infestum scelus & immane, aut unde natum esse dicamus? Jam enim videtis profectò, Iudices, non sine necessariis me, ac maximis causis, principio orationis meæ de matre dixisse: nihil est enim mali, nihil sceleris, quod illa non ab initio filio voluerit, optaverit, cogitaverit, effecerit. Mitto illam primam libidinis injuriam: mitto nefarias generi nuptias: mitto cupiditate matris expulsam ex matrimonio filiam; quæ nondum ad hujusce vitæ periculum, sed ad commune familiæ dedecus pertinebant: nihil de alteris Oppianici nuptiis queror: quarum illa quum obsides filios ab eo mortuos accepisset, tum denique in familiæ luctum, atque in privignorum funus nupsit. Prætereo, quòd Aurium Meli-

num , cuius illa quondam focrus , paulò antè uxor fuisset , quum Oppianici esse operâ proscriptum occisumque cognosceret, eam sibi domum sedemque conjugii delegit , in qua quotidie superioris viri mortis indicia & spolia fortunarum videret.

189. Illud primum queror , de illo scelere , quod nunc denique patefactum est , Fabriciani veneni : quod jam tum recens , suspiciosum ceteris , huic incredibile , nunc verò apertum jam omnibus , ac manifestum videtur. Non est profectò de illo veneno celata mater : nihil est ab Oppianico sine consilio mulieris cogitatum : quod nisi esset , certè postea , deprehensâ re , non illa ut ab improbo viro discessisset , sed ut a crudelissimo hoste fugisset , domumque illam , in perpetuum , scelere omni affluentem , reliquisset. Non modò id non fecit , sed ab illo tempore nullum locum prætermisit , in quo non instrueret insidias aliquas , ac dies omnes ac noctes totâ mente mater de pernicië filii cogitaret. Quæ primùm , ut istum confirmaret Oppianicum accusatorem filio suo , donis , muneribus , collocatione filiaë , spe hereditatis obstrinxit.

LXVII. Itaque apud ceteros , novis inter propinquos susceptis inimiciis , sæpe fieri divortia , atque affinitatum discidia videmus ; hæc mulier satis firmum accusato-



rem filio suo fore neminem putavit, nisi qui in matrimonium sororem ejus antè duxisset: ceteri novis affinitatibus adducti, veteres inimicitias sæpe deponunt; illa sibi ad confirmandas inimicitias affinitatis conjunctionem pignori fore putavit.

191. Neque in eo solum diligens fuit, ut accusatorem filio suo compararet; sed etiam cogitavit, quibus eum rebus armaret: hinc enim illæ sollicitationes servorum & minis & promissis: hinc illæ infinitæ crudelissimæque de morte Oppianici quæstiones; quibus finem aliquando non muliebris modus, sed amicorum auctoritas fecit. Ab eodem scelere illæ triennio post habitæ Larini quæstiones: ejusdem amentiae falsæ conscriptiones quæstionum: ex eodem furore etiam illa conscelerata exsectio linguae: totius denique hujus ab illa est & inventa, & adornata comparatio criminis.

192. Atque his rebus quum instructum accusatorem filio suo Romam ipsa misisset, paulisper, conquirendorum & conducendorum testium causâ, Larini est commorata: postea autem, quum appropinquare hujus judicium ei nuntiatum est, confestim huc advolavit, ne aut accusatoribus diligentia, aut pecunia testibus deesset; aut ne fortè mater hoc sibi optatissimum spectaculum hujus fardium,

atque luctûs , & tanti squaloris amitteret.

LXVIII. Jam verò quod iter Romam ejus mulieris fuisse existimatis ? quod ego , propter vicinitatem Aquinatum & Venafrorum , ex multis audiivi & comperi : quos concursus in his oppidis ? quantos & virorum & mulierum gemitus esse factos ? mulierem quamdam Larino , atque illam usque a mari supero Romam proficisci , cum magno comitatu , & pecunia , quò faciliùs circumvenire judicio capitis , atque opprimere filium posset.

193. Nemo erat illorum , pene dicam , quin expiandum illum locum esse arbitraretur , quacumque illa iter fecisset : nemo , quin terram ipsam violari , quæ mater est omnium , vestigiis consceleratae matris putaret. Itaque nullo in oppido consistendi potestas ei fuit : nemo ex tot hospitibus inventus est , qui non contagionem adspectûs fugeret : nocti se potiùs ac solitudini , quàm ulli aut turbæ , aut hospiti committebat.

194. Nunc verò quid agat , quid molitur , quid denique quotidie cogitet , quem ignorare nostrum putat ? quos appellarit , quibus pecuniam promiserit , quorum fidem pretio labefactare conata sit , tenemus : quin etiam nocturna sacrificia , quæ putat occultiora esse , scelertasque ejus preces , & nefaria vota co-

gnovimus ; quibus illa etiam deos immortales de suo scelere testatur , neque intelligit , pietate , & religione , & justis precibus , deorum mentes , non contaminatâ superstitione , neque ad scelus perficiendum cæsis hostiis posse placari : cujus ego furorem atque crudelitatem deos immortales a suis aris atque templis aspernatos esse confido.

LXIX. Vos , Judices , quos huic A. Cluentio quosdam alios deos ad omne vitæ tempus fortuna esse voluit , hujus importunitatem matris a filii capite depellite : multi sæpe in judicando peccata liberum , parentum misericordiæ concesserunt : vos , ne hujus honestissimè actam vitam matris crudelitati condonetis , rogamus : præsertim quum ex altera parte totum municipium videre possitis. Omnes scitote , Judices ( incredibile dictu est ; sed a me verissimè dicitur ) omnes Latrunces , qui valuerunt , venisse Romam , ut hunc studio frequentiaque suâ , quantum possent , in tanto ejus periculo sublevarent. Pueris illud , hoc tempore , & mulieribus , oppidum scitote esse traditum , idque in præsentia , in communi Italiæ pace , domesticis copiis esse tutum : quos tamen ipsos æquè , & eos , quos præsentibus videtis , hujus expectatio judicii dies noctesque sollicitat.

196. Non illi vos de unius municipis fortunis arbitrantur, sed de totius municipii statu, dignitate, commodisque omnibus sententias esse laturos: summa est enim, Judices, hominis in communem municipii rem diligentia, in singulos municipes benignitas, in omnes homines iustitia, & fides: præterea nobilitatem illam inter suos, locumque a majoribus traditum sic tuetur, ut majorum gravitatem, constantiam, gratiam, liberalitatem assequatur. Itaque iis eum verbis publicè laudant, ut non solum testimonium suum, iudiciumque significant, verum etiam curam animi, ac dolorem: quæ dum laudatio recitatur, vos quæso, qui eam detulistis, assurgite. *LAUDATIO CLUENTII, ex decurionum Larinatium decreto.*

197. Ex lacrymis horum, Judices; existinare potestis, omnes hæc decuriones decrevisse lacrymantes. Age verò, vicinorum quantum studium, quàm incredibilis benevolentia, quanta cura est? non illi in libellis laudationum decreta miserunt, sed homines honestissimos, quos nossemus omnes, huc frequentes adesse, & hunc præsentem laudare voluerunt. Adfuit Frentani, homines nobilissimi, Marrucini item pari dignitate: Teano Apulo, atque Luceriâ equites Romanos, honestissimos homines, laudatores videtis:

videtis : Boviano , totoque ex Samnio quum laudationes honestissimæ missæ sunt , tum homines amplissimi , nobilissimique venerunt. Jam qui in agro Larinati prædia , qui negotia , qui res pecuarias habent , honesti homines , & summo splendore præditi , difficile dictu est , quàm sint solliciti , quàm laborent. Non multi mihi ab uno sic diligi videntur , ut hic ab his universis.

LXX. Quàm non abesse ab hujus judicio L. Volusienum , summo splendore hominem ac virtute præditum , vellem : quàm vellem præsentem posse P. Helvidium Rufum , equitem Romanum , omnium ornatissimum , nominare : qui , quum hujus causâ , dies noctesque vigilaret , & quum me hanc causam doceret ; in morbum gravem periculosumque incidit ; in quo tamen non minùs de capite hujus , quàm de sua vita laborat. Cn. Tudicius senatoris , viri optimi & honestissimi , par studium in testimonio , & laudatione cognoscetis. Eadem spe , sed majore verecundiâ , de te , P. Volumni , quoniam judex es in A. Cluentium , dicimus. Et , ne longum sit , omnium vicinorum summam esse in hunc benevolentiam confirmamus.

199. Horum omnium studium , curam , diligentiam , meumque unâ laborem , qui

totam hanc causam, vetere instituto, solus peroravi, vestramque simul, Judices, æquitatem & mansuetudinem una mater oppugnat. At quæ mater? quam cæcam crudelitatem, & scelere ferri videtis: cujus cupiditatem nulla umquam turpitudine retardavit: quæ vitiis animi in deterrimas partes jura hominum convertit omnia: cujus ea stultitia est, ut eam nemo hominem; ea vis, ut nemo feminam; ea crudelitas, ut nemo matrem appellare possit: atque etiam nomina necessitudinum, non solum naturæ nomen, & jura mutavit; uxor generi, noverca filii, filiæ pellex: eò jam denique adducta est, ut sibi, præter formam, nihil ad similitudinem hominis reservarit.

200. Quare, Judices, si scelus odistis, prohibete aditum matris a filii sanguine: date parenti hunc incredibilem dolorem ex salute, ex victoria liberum: patimini, matrem, ne orbata filio lætetur, victam potius vestrâ æquitate discedere. Sin autem, id quod vestra natura postulat, pudorem, bonitatem, virtutemque diligitis: levate hunc aliquando supplicem vestrum, Judices, tot annos in falsa invidia periculisque versatum; qui nunc primum post illam flammam, aliorum facto & cupiditate excitatam, spe vestræ æquitatis erigere animum, & paulum respirare a me

tu cœpit; cui posita sunt in vobis omnia; quem servatum esse plurimi cupiunt, servare soli vos potestis. Orat vos Avitus, Judices, & flens obsecrat, ne se invidia, quæ in judiciis valere non debet; ne matri, cujus vota & preces a vestris mentibus repudiare deberis; ne Oppiano, homini nefario, condemnato jam & mortuo, condonetis.

LXXI. Quòd si qua calamitas hunc in hoc judicio affligerit innocentem: ne iste miser, Judices, si, id quod difficile factu est, in vita remanebit, sæpe, & multum queretur, deprehensum esse illud quondam Fabricianum venenum: quod si tum indicatum non esset; non huic ærumnosissimo venenum illud fuisset, sed multorum medicamentum laborum: postremò etiam fortassis mater exsequias illius funeris profecuta, mortem se filii lugere simulasset: nunc verò quid erit profectum, nisi ut hujus ex mediis mortis insidiis vita ad luctum reservata; mors sepulcro patris privata esse videatur?

202. Satis diu fuit in miseriis, Judices: satis multos annos ex invidia laboravit: nemo huic tam iniquus, præter parentem, fuit, cujus animum non jam expletum esse putemus: vos, qui æqui estis omnibus, qui, ut quisque crudelissimè oppugnatur, eum lenissimè subleva-

gis, conservate A. Cluentium : restituite incolumem municipio : amicis, vicinis ; hospitibus, quorum studia videtis, reddite : vobis in perpetuum, liberisque vestris obstringite : vestrum est hoc, Judices, vestræ dignitatis, vestræ clementiæ : rectè hoc repetitur a vobis, ut virum optimum atque innocentissimum, plurimisque mortalibus carum atque jucundissimum, his aliquando calamitatibus liberetis ; ut omnes intelligant, in concionibus esse invidiæ locum, in judiciis veritati,







DE LEGE AGRARIA  
IN SENATU.  
ORATIO DECIMA QUINTA;

Quæ prima contra Rullum.

*Anno urbis 690. Ciceronis 44. P. Servilius Rullus, tribunus plebis, qui cum collegis magistratum de more inierat quarto Idus Decembris, legem agrariam promulgaverat. Cicero, inito consulatu Calendis Januariis, contra auctorem legis primam in senatu orationem habuit; cujus pars tantum exstat, in qua disputat contra venditionem rerum publicarum, agrorum emptionem, & deductionem coloniarum.*

*Hac oratione Plutarchus Rullum ita perterritum fuisse ait, ut nihil contra diceret. At quum idem consul in concionem vocaret, Cicero*

*populo Romano disceptatore uti non dubitavit ; & quum senatum se sequi jussisset , progressus in concionem , secundam ad populum orationem de lege agraria dixit , in qua legem Serviliam antiquandam esse suadet , quod per eam Rullus , simulatione largitionis , tyrannidem constituat , quum & in decemviris creandis libertatem populo eripiat , & in agrorum venditione atque emptione , coloniarumque deductione , tyrannicam potestatem ipsis permittat.*

*Tertia de lege agraria sequitur oratio brevissima ad populum , quâ Cicero se defendit contra accusationem tribunorum , qui ipsum gratificantem Sullanarum assignationum possessoribus , agrariæ legi obsistere criminati erant. Fabricius.*

*Has orationes , & eas quæ sequuntur , pro Rabirio , & in Catilinam , & quæ aliæ interierunt , de Othone , de proscriptorum liberis , de abdicatione provinciæ , Cicero*

DE LEGE AGRARIA. 127

*Epist. ad Atticum 2 , 1. vocat  
Consulares : quarum primæ effecerunt , ut legem agrariam , hoc est ,  
alimenta sua abdicaverint Tribus ,  
ut scribit Plinius , 7 , 30.*

*Desunt permulta.*

1. **Q**UÆ res apertè petebatur , ea nunc occultè cuniculis oppugnatur : dicent enim decemviri , id quod & dicitur a multis , & sæpe dictum est , post eosdem consules , regis Alexandri testamento , regnum illud , populi Romani esse factum. Dabitis igitur Alexandriam clam petentibus iis , quibus apertissimè pugnantibus restitistis ? Hæc , per deos immortales ! utrùm esse vobis consilia siccorum , an vinolentorum somnia ; & utrùm cogitata sapientum , an optata furiosorum videntur ?

2. Videte nunc , proximo capite , ut impurus helluo turbet rempublicam ; ut a majoribus nostris possessiones relictas disperdat , & dissipet ; ut sit non minùs in populi Romani patrimonio nepos , quàm in suo. Perscribit in sua lege vectigalia , quæ decemviri vendant , hoc est , proscribit auctionem publicorum bonorum : agros emi vult , qui dividantur : quærit pecuniam. Videlicet excogitabit

aliquid, atque afferet: nam superioribus capitibus dignitas populi Romani violabatur: nomen imperii in commune odium orbis terræ vocabatur: urbes pacatæ, agri fociorum, regum status decemviris donabantur: nunc præsens, certa, pecunia numerata quæritur.

3. Exspecto, quid tribunus plebis vigilans & acutus excogitet. Veneat, inquit, silva Scantia. Utrum tandem hanc silvam in relictis possessionibus, an in censorum pascuis invenisti? si quid est, quod indagaris, inveneris, ex tenebris erueris, quamquam iniquum est, consume tamen sanè, quoniam commodum est, quoniam quidem tu attulisti: silvam verò tu Scantiam vendas, nobis consulibus, atque hoc fenatu? tu ullum vectigal attingas? tu populi Romani subsidia belli? tu ornamenta pacis eripias? Tum verò hòc me inertiores consulibus judicabo, quàm illos fortissimos viros, qui apud majores nostros fuerunt; quòd quæ vectigalia, illis consulibus, populo Romano parta sunt, ea, me consule, ne retineri quidem potuisse judicabuntur.

II. Vendit Italiæ possessiones ex ordine omnes: sanè est in eo diligens; nullam enim prætermittit: persequitur in tabulis censoriis totam Siciliam: nullum ædificium, nullos agros relinquit. Audis-

tis auctionem populi Romani proscriptam a tribuno plebis, constitutam in mensem Januarium : & , credo , non dubitatis , quin idcirco hæc , ærarii causâ , non vendiderint ii , qui armis & virtute pepererunt , ut esset , quod nos , largitionis causâ , venderemus.

5. Videte nunc , quoad fecerit iter apertius , quàm antea : nam superiore parte legis quemadmodum Pompeium oppugnarent , a me indicati sunt : nunc jam se ipsi indicabunt. Jubent venire agros Attalensium , atque Olympenorum : hos populo Romano Servilii , fortissimi viri , victoria adjunxit : deinde agros in Macedonia regios , qui partim T. Flaminini , partim L. Pauli , qui Persen vicit , virtute parti sunt : deinde agrum optimum & fructuosissimum Corinthium , qui L. Mummi imperio ac felicitate ad vestigalia populi Romani adjunctus est : post autem agros in Hispania apud Carthaginem novam , duorum Scipionum eximiâ virtute possessos : tum verò ipsam veterem Carthaginem vendunt , quam P. Africanus nudatam testis ac mœnibus , sive ad notandam Carthaginensium calamitatem , sive ad testificandam nostram victoriam , sive ad oblatam aliquam religionem , ad æternam hominum memoriam consecravit.

6. His insignibus atque infulis imperii

F v.

venditis , quibus ornatam vobis majores vestri rempublicam tradiderunt , jubent eos agros venire , quos rex Mithridates in Paphlagonia , Ponto , Cappadociaque possederit. Num obscurè videntur , propè hastâ præconis , insectari Cn. Pompeii exercitum , qui venire jubeant eos ipsos agros , in quibus ille etiam nunc bellum gerat , atque versetur ?

III. Hoc verò cujusmodi est , quòd ejus auctionis , quam constituunt , locum sibi nullum definiunt ? nam decemviris , quibus in locis ipsis videatur , vendendi potestas lege permittitur. Censoribus vectigalia locare , nisi in conspectu populi Romani non licet : his vendere vel in ultimis terris licebit ? At hoc etiam nequissimi homines , consumptis patrimoniis , faciunt , ut , in atriiis auctionariis potius , quàm in triviis , aut in compitis auctionentur : hic permittit suâ lege decemviris , ut in quibus commodum sit tenebris , ut in qua velint solitudine , bona populi Romani possint divendere.

8. Jam illa omnibus in provinciis , regnis , liberis populis quàm acerbâ , quàm formidolosâ , quàm quæstuosâ concursatio decemviralis futura sit non videtis ? Hereditatum obeundarum causâ , quibus vos legationes dedistis , qui & privati , & privatam ad negotium exierunt , non maximis

## DE LEGE AGRARIA 131

opibus, neque summâ auctoritate præditi, tamen auditis profectò, quàm graves eorum adventus sociis vestris esse soleant.

9. Quamobrem quid putatis impendere hac lege omnibus gentibus terroris & mali, quum mittantur in orbem terrarum decemviri summo cum imperio, summa cum avaritia, infinitaque omnium rerum cupiditate? quorum quum adventus graves, quum fasces formidolosi, tum verò iudicium ac potestas erit non ferenda: licebit enim, quod videbitur, publicum iudicare; quod judicarint, vendere: etiam illud, quod homines sancti non facient, ut pecuniam accipiant, ne vendant; tamen id iis ipsum per legem licebit: hinc vos quas spoliationes, quas pactiones, quam denique in omnibus locis nundinationem juris ac fortunarum fore putatis? Etenim quod superiore parte legis præfinitum fuit, Sullâ & Pompeio consulibus, id rursus liberum, infinitumque fecerunt.

IV. Jubet eosdem decemviros omnibus agris publicis pergrande vestigal imponere, ut iidem possint & liberare agros, quos commodum sit, & quos ipsis libeat, publicare: quo in iudicio perspicui non potest, utrùm severitas acerbior, an benignitas quæstuosior sit futura. Sunt tamen in tota lege exceptiones duæ, non tam iniquæ, quàm suspiciosæ:

F vj

excipit in vectigali imponendo agrum Recentoricum Siciliensem ; in vendendis agris , eos agros , de quibus cautum sit fœdere : hi sunt in Africa , qui ab Hiempsale possidentur.

11. Hic quæro , si Hiempfali fatis est cautum fœdere , & Recentoricus ager privatus est , quid attinuerit excipi ? sin & fœdus illud habet aliquam dubitationem , & ager Recentoricus dicitur nonnumquam esse publicus ; quem putet existimaturum , duas causas in orbe terrarum repertas , quibus gratis parceret ? Nunc quisnam tam abstrusus usquam nummus videtur , quem non architecti hujusce legis olfecerint ? provincias , civitates liberas , socios , amicos , reges denique exhauriunt : admovent manus vectigalibus populi Romani : non est fatis.

12. Audite , audite vos , qui amplissimo populi senatûsque judicio exercitus habuistis , & bella gessistis. *Quod ad quemque pervenit , pervenerit , ex præda , ex manubiis , ex auro coronario , quod neque consumptum in monumento , neque in ærarium relatum sit , id ad decemviros referri jubet.* Hoc capite multa sperant : in omnes imperatores , heredesque eorum quæstionem suo judicio comparant : sed maximam pecuniam se a Fausto ablaturus arbitrantur : quam causam suscipere jurati judices no-



luerunt, hanc isti decemviri susceperunt: idcirco a iudicibus fortasse prætermittam esse arbitrantur, quod sit ipsis reservata.

13. Deinde etiam in reliquum tempus diligentissimè sancit, ut quod quisque imperator habeat pecuniæ, protinus ad decemviros deferat. Hic tamen excipit Pompeium; simillimè, ut mihi videtur, atque in illa lege, quâ peregrini Româ ejiciuntur, Glaucippus excipitur: non enim hac exceptione unus afficitur beneficio, sed unus privatur injuriâ. Sed cui manubias remittit, hujus vectigalia invadit: jubet enim pecuniam, si qua post nos consules ex novis vectigalibus recipiatur, hac uti decemviros. Quasi verò non intelligamus, hæc eos vectigalia, quæ Cn. Pompeius adjunxerit, vendere cogitare.

V. Videtis jam, Patres conscripti, omnibus rebus & modis constructam & coacervatam pecuniam decemviralem. Minuetur hujus pecuniæ invidia: consumetur enim in agrorum emptionibus. Optimè. Quis ergo emet agros istos? iidem decemviri: tu Rulle (missos enim facio ceteros) emes, quos voles: vendas quos voles: utrumque horum facies, quanti voles. Cavet enim vir optimus, ne emat ab invito: quasi verò non intelligamus, ab invito emere, injuriosum esse; ab non invito, quæstuosum. Quantum tibi agri vendet,

ut alios omittam, focer tuus? &, si ego ejus æquitatem animi probè novi, vendet non invitus. Facient idem ceteri libenter, ut possessionis invidiam pecuniâ commutent: accipiant, quod cupiunt: dent, quod retinere vix possunt.

15. Nunc prospicite omnium rerum infinitam atque intolerandam licentiam. Pecunia coacta est ad agros emendos: ii porò ab invitis non ementur. Si consenserint possessores non vendere, quid futurum est? referetur pecunia? non licet: exigetur? vetat. Verum esto: nihil est, quod non emi possit, si tantum des, quantum velit venditor. Spolietur orbem terrarum, vendamus vectigalia, effundamus ærarium, ut, locupletatis aut invidiæ, aut pestilentiaë possessoribus, agri tamen emanent.

16. Quid tum? quæ erit in istos agros deductio? quæ totius rei ratio, atque descriptio? Deducentur, inquit, coloniæ. Quot? quorum hominum? in quæ loca? quis enim non videt, in coloniis esse hæc omnia considerata? Tibi nos, Rulle, & istis tuis, harum omnium rerum machinatoribus, totam Italiam inermem tradituros existimasti, quam præsidiis confirmaretis? coloniis occuparetis? omnibus vinclis devinctam & constrictam teneretis? Ubi enim cavetur, ne in Janiculo

coloniam constituatis? ne urbem hanc urbe aliâ premere, atque urgere possitis? Non faciemus, inquit. Primum nescio: deinde timeo: postremò non committam, ut vestro beneficio potius, quàm nostro consilio salvi esse possimus.

VI. Quòd verò totam Italiam vestris colonis complere voluistis, id cujusmodi esset, neminemne nostrum intellecturum existimavistis? Scriptum est enim: *Quæ in municipia, quasque in colonias decemviri velint, deducant colonos, quos velint: & iis agros assignent, quibus in locis velint*: ut, quum totam Italiam militibus suis occuparint, vobis non modò dignitatis retinendæ, sed ne libertatis quidem recuperandæ spes relinquatur. Atque hæc a me suspicionibus & conjecturâ coarguuntur.

18. Jam omnis omnium tolletur error: jam apertè ostendent, sibi nomen hujusreipublicæ, sedem urbis atque imperii; denique hoc templum Jovis optimi maximi, atque hanc arcem omnium gentium displicere. Capuam deduci colonos vohunt: illam urbem huic urbi rursus opponere, illuc opes suas deferre, & imperii nomen transferre cogitant: qui locus, propter ubertatem agrorum, abundantiamque rerum omnium, superbiam & crudelitatem genuisse dicitur; ibi nostri

coloni , delecti ad omne facinus , a decemviris collocabuntur. Et , credo , qua in urbe homines , in veteri dignitate fortunaque nati , copiam rerum moderatè ferre non potuerunt , in ea isti vestri satellites modestè insolentiam suam continebunt.

19. Majores nostri Capuâ magistratus , senatum , consilium commune , omnia denique insignia reipublicæ sustulerunt , neque aliud quidquam nisi inane nomen Capuæ reliquerunt ; non crudelitatis ( quid enim illis fuit clementius , qui etiam externis hostibus victis sua sæpissime reddiderunt ? ) sed consilio : quòd videbant , si quod reipublicæ vestigium illis mœnibus contineretur , urbem ipsam imperio domicilium præbere posse. Vos hæc , nisi evertere rempublicam cuperetis , ac vobis novam dominationem comparare , credo , quàm perniciofa essent , non videretis ?

VII. Quid enim cavendum est in coloniis deducendis ? si luxuries Annibalem ipsum Capuana corripit : si superbia nata inibi esse ex Campanorum fastidio videtur : si præsidium non præponitur huic urbi ista colonia , sed opponitur ? At quemadmodum armatur ? dii immortales ! nam bello Punico , quidquid potuit Capua , potuit ipsa per sese : nunc omnes urbes , quæ circum Capuam sunt , a colonis

per eosdem decemviros occupabuntur : hanc enim ob causam permittit ipsa lex, *in omnia quæ velint, oppida, colonos ut decemviri deducant, quos velint.* Atque his colonis agrum Campanum, & Stellatam campum dividi jubet.

21. Non queror diminutionem vectigalium, non flagitium hujus jacturæ atque damni: prætermitto illa, quæ nemo est, quin gravissimè, & verissimè conqueri possit, nos caput patrimonii publici, pulcherrimam populi Romani possessionem, subsidium annonæ, horreum belli, sub signo claustrisque reipublicæ positum vectigal, servare non potuisse: eum denique nos agrum P. Rullo concessisse, qui ager ipse per sese & Sullanæ dominationi & Gracchorum largitioni restitisset: non dico, solum hoc in republica vectigal esse, quod, amissis aliis, remaneat; intermissis, non conquiescat; in pace niteat, in bello non obsolescat; militem sustentet, hostem non pertimescat: prætermitto omnem hanc orationem, & concioni reservo: de periculo salutis, ac libertatis loquor.

22. Quid enim existimatis integrum vobis in republica fore, aut in vestra libertate, ac dignitate retinenda, quum Rullus, atque ii, quos multò magis, quàm Rullum, timetis, cum omni egentium atque improborum manu, cum omnibus co-

piis , cum omni argento , & auro , Capuam , & urbes circa Capuam occuparint ? His ego rebus , P. C. resistam vehementer , atque acriter : neque patiar , homines ea , me consule , expromere , quæ contra rempublicam diu cogitarint. Errastis , Rulle , vehementer , & tu , & nonnulli collegæ tui , qui sperastis , vos contra consulem , veritate , non ostentatione popularem , posse in evertenda republica populares existimari. Lacesso vos ; in concionem voco ; populo Romano disceptatore uti volo.

VIII. Etenim , ut circumspiciamus omnia , quæ populo grata atque jucunda sunt , nihil tam popolare , quàm pacem , quàm concordiam , quàm otium reperiemus : sollicitam mihi civitatem suspicione , suspensam metu , perturbatam vestris legibus , & concionibus , & seditionibus tradidistis : spem improbis ostendistis , timorem bonis injecistis : fidem de foro , dignitatem de republica sustulistis.

24. Hoc motu , atque hac perturbatione animorum , atque rerum , quum populo Romano vox & auctoritas consulis repente in tantis tenebris illuxerit : quum ostenderit , nihil esse metuendum , nullum exercitum , nullam manum , nullas colonias , nullam venditionem vectigalium , nullum imperium novum , nullum

regnum decemvirale , nullam alteram Romam , neque aliam sedem imperii , nobis consulibus , futuram , summamque tranquillitatem pacis ; atque otii : verendum , credo , nobis erit , ne vestra ista præclara lex Agraria magis popularis esse videatur.

25. Quum verò scelera consiliorum vestrorum , fraudemque legis , & insidias , quæ ipsi populo Romano a popularibus tribunis plebis fiant , ostendero , pertimescam , credo , ne mihi non liceat contra vos in concione consistere ; præsertim quum mihi deliberatum & constitutum sit , ita gerere consulatum , quo uno modo geri graviter & liberè potest , ut neque provinciam , neque honorem , neque ornamentum aliquod , aut commodum , neque rem ullam , quæ a tribuno plebis impediri possit , appetiturus sim.

26. Dicit frequentissimo senatu consul , Kalendis Januarii , sese , si status hic rei publicæ maneat , neque aliud negotium exstiterit , quod honestè subterfugere non possit , in provinciam non iturum. Sic me in hoc magistratu geram , Patres conscripti , ut possim tribunum plebis reipublicæ iratum coërcere ; mihi iratum , contemnere.

IX. Quamobrem , per deos immortales ! colligite vos , Tribuni plebis : deferite eos , a quibus , nisi prospicitis , brevè

tempore deferemini : conspirete nobiscum : consentite cum bonis : communem rempublicam communi studio atque amore defendite. Multa sunt occulta reipublicæ vulnera , multa nefariorum civium pernicioſa consilia : nullum externum periculum est ; non rex , non gens ulla , non natio pertimescenda est : inclusum malum , intestinum , ac domesticum est : huic pro se quisque nostrum mederi , atque hoc omnes sanare velle debemus.

27. Erratis , si senatum probare ea ; quæ dicuntur a me , putatis , populum autem esse in alia voluntate. Omnes qui se incolumes volunt , sequentur auctoritatem consulis , soluti a cupiditatibus , liberi a delictis , cauti in periculis , non timidi in contentionibus. Quod si quis vestrum spe ducitur , se posse turbulentâ ratione honori velificari suo ; primum , me consule , id sperare desistat ; deinde habeat me ipsum sibi documento , quem equestri ortum loco consulem videt , quæ vitæ via facillimè viros bonos ad honorem dignitatemque perducatur. Quod si vos vestrum mihi studium , P. C. ad communem dignitatem defendendam profitemini , perficiam profectò id , quod maximè respublica desiderat , ut hujus ordinis auctoritas , quæ apud majores nostros fuit , eadem nunc longo intervallo reipublicæ restituta esse videatur.



---

# DE LEGE AGRARIA

## AD POPULUM.

### ORATIO DECIMA SEXTA;

Quæ secunda contra Rullum,

I. **E**ST hoc in more positum, Quirites, institutoque majorum, ut ii, qui beneficio vestro imagines familiæ suæ consecuti sunt, eam primam habeant concionem, quâ gratiam beneficii vestri cum suorum laude conjungant: qua in oratione nonnulli aliquando digni majorum loco reperiuntur: plerique autem hoc perficiunt, ut tantum majoribus eorum debitum esse videatur, unde etiam quod posteris solveretur, redundaret. Mihi, Quirites, apud vos de meis majoribus dicendi facultas non datur: non quòd non tales fuerint, quales nos illorum sanguine creatos, disciplinisque institutos videtis; sed quòd laude populari, atque honoris vestri luce caruerunt.

2. De me autem ipso, vereor, ne arrogantis sit apud vos dicere; ingrati, tacere: nam &, quibus studiis hanc dignitatem consecutus sim, memetipsum com-

memorare , perquam grave est ; & silere de tantis vestris beneficiis nullo modo possum. Quare adhibebitur a me certa ratio , moderatioque dicendi , ut , quid a vobis acceperim , commemorem : quare dignus vestro summo honore , singularique judicio sim , ipse modicè dicam , si necesse erit ; vos eosdem existimatu-  
 putem , qui judicavistis.

3. Me perlongo intervallo propè memoriae , temporumque nostrorum , primum hominem novum , consulem fecistis ; & eum locum , quem nobilitas praesidiis firmatum atque omni ratione obval-  
 latum tenebat , me duce , rescidistis ; virtutisque in posterum patere voluistis : neque me tantummodo consulem , quod est ipsum per sese amplissimum , sed ita fecistis , quomodo pauci nobiles in hac civitate consules facti sunt , novus ante me nemo.

II. Nam profectò si recordari volueritis , de novis hominibus reperietis eos , qui sine repulsa consules facti sunt , diuturno labore , atque aliquà occasione esse factos , quum multis annis pòst petissent , quàm praetores fuissent , aliquantò seriùs , quàm per aetatem , ac per leges liceret ; qui autem anno suo petierint , sine repulsa non esse factos : me esse unum ex omnibus novis hominibus , de quibus me-

minisse possumus , qui consulatum petierim , quum primùm licitum sit ; consul factus sim , quum primùm petierim ; ut vester honos ad mei temporis diem petitus , non ad alienæ petitionis occasionem interceptus , nec diuturnis precibus efflagitatus , sed dignitate impetratus esse videatur.

4. Est illud amplissimum , quod paulò antè commemoravi , Quirites , quòd hoc honore ex novis hominibus primum me , multis pòst annis , affecistis ; quòd primà petitione ; quòd anno meo : sed tamen magnificentius atque ornatius esse illo nihil potest , quòd meis comitiis non tabelam vindicem tacitæ libertatis , sed vocem vivam præ vobis indicem vestrarum erga me voluntatum ac studiorum tulistis , Itaque me non extrema tribus suffragiorum , sed primi illi vestri concursus ; neque singulæ voces præconum , sed unâ voce universus populus Romanus consulem declaravit.

5. Hoc ego tam insigne , tam singulare vestrum beneficium , Quirites , quum ad animi mei fructum atque lætitiā duco esse permagnum , tum ad curam sollicitudinemque multò majus. Versantur enim , Quirites , in animo meo multæ & graves cogitationes , quæ mihi nullam partem neque diurnæ , neque nocturnæ quietis

impertiunt : primùm tuendi consulatûs ; quæ quum omnibus est difficilis & magna ratio , tum verò mihi , præter ceteros : cui errato nulla venia ; rectè factò exigua laus , & ab invitis expressa proponitur : non , dubitanti fidele consilium ; non , laboranti certum subsidium nobilitatis ostenditur.

III. Quòd si solus in discrimen aliquod adducerer , ferrem , Quirites , animo æquiore : sed mihi videntur certi homines , si qua in re me non modò consilio , verùm etiam casu lapsum esse arbitrabuntur , vos universos , qui me antetuleritis nobilitati , vituperaturi : mihi autem , Quirites , omnia potius perpetienda esse ducò , quàm non ita gerendum consulatum , ut in omnibus meis factis atque consiliis vestrum de me factum consiliumque laudetur. Accedit etiam ille mihi summus labor , ac difficillima ratio consulatûs gerendi , quòd non eadem , quàm superioribus consulibus , lege & conditione utendum esse decrevi ; qui aditum hujus loci conspectumque vestrum partim magno-perè fugerunt , partim non vehementer secuti sunt. Ego autem non solùm hoc in loco dicam , ubi est id dictu facillimum ; sed in ipso senatu , in quo esse locus huic voci non videbatur , popularem me futurum esse consulem , primâ meâ illâ oratione Kalendis Januarii dixi, . . .

7. Neque

*DE LEGE AGRARIA.* 145

7. Neque enim ullo modo facere possem, ut, quum me intelligam, non hominum potentium studio, non excellentibus gratiis paucorum, sed universi populi Romani judicio consulem ita factum, ut nobilissimis hominibus longè præponerem, non & in hoc magistratu, & in omni vita essem popularis. Sed mihi ad hujusce verbi vim, & interpretationem vehementer opus est vestrâ sapientiâ: versatur enim magnus error, propter insidiosas nonnullorum simulationes; qui quum populi non solum commoda, verum etiam salutem oppugnant, & impediunt, oratione assequi volunt, ut populares esse videantur.

8. Ego qualem Kalendis Januarii acceperim rempublicam, Quirites, intelligo, plenam sollicitudinis, plenam timoris; in qua nihil erat mali, nihil adversi, quod non boni metuerent, improbi expectarent: omnia turbulenta consilia contra hunc reipublicæ statum, & contra vestrum otium partim iniri, partim, nobis consulibus designatis, inita esse dicebantur: sublata erat de foro fides, non ictu aliquo novæ calamitatis, sed suspitione, ac perturbatione judiciorum, infirmatione rerum judicatarum: novæ dominationes, extraordinaria, non imperia, sed regna, quæri putabantur.

*Tomus V.*

G

IV. Quæ quum ego non solum suspi-  
 carer , sed planè cernerem ( neque enim  
 obscure gerebantur ) dixi in senatu , in  
 hoc magistratu me popularem consulem  
 futurum. Quid enim est tam populare ,  
 quàm pax ? quâ non modò ii , quibus na-  
 tura sensum dedit , sed etiam tecta atque  
 agri mihi lætari videntur. Quid tam po-  
 pulare , quàm libertas ? quam non solum  
 ab hominibus , verum etiam a bestiis ex-  
 peti , atque omnibus rebus anteponi vi-  
 detis. Quid tam populare , quàm otium ?  
 quod ita jucundum est , ut & vos , &  
 majores vestri , & fortissimus quisque  
 vir , maximos labores suscipiendos putet ,  
 ut aliquando in otio possit esse , præser-  
 tim in imperio ac dignitate : qui idcirco  
 etiam majoribus nostris præcipuam lau-  
 dem gratiamque debemus , quod eorum  
 labore est factum , ut impune in otio esse  
 possemus. Quare qui possum non esse  
 popularis , quum videam hæc omnia ,  
 Quirites , pacem externam , libertatem  
 propriam generis ac nominis vestri , otium  
 domesticum , denique omnia , quæ vobis  
 cara , atque ampla sunt , in fidem , &  
 quodam modo in patrocinium mei consu-  
 latûs esse collata ?

10. Neque enim , Quirites , illud vo-  
 bis jucundum aut populare debet videri ,  
 largitio aliqua promulgata , quæ verbis

ostentari potest, re verâ fieri, nisi exhausto ærario, nullo pacto potest: neque verò illa popularia sunt existimanda, judiciorum perturbationes, rerum judicatarum infirmitates, restitutio damnatorum; qui civitatum afflictarum, perditis jam rebus, extremi exitiorum solent esse exitus: neque si qui agros populo Romano pollicentur, si aliud quiddam obscure moliuntur, aliud spe ac specie simulationis ostentant, populares existimandi sunt.

V. Nam verè dicam, Quirites, genus ipsum legis agrariæ vituperare non possum: venit enim mihi in mentem, duos clarissimos, ingeniosissimos, amantissimos plebis Romanæ viros, Tib. & C. Gracchos, plebem in agris publicis constituisse, qui agri a privatis antea possidebantur: non sum autem ego is consul, qui, ut plerique, nefas esse arbitrer, Gracchos laudare, quorum consiliis, sapientiâ, legibus, multas esse video rei publicæ partes constitutas.

II. Itaque, ut initio mihi, designato consuli, nuntiabatur, legem agrariam tribunos plebis designatos conscribere; cupiebam, quod cogitarent, cognoscere: etenim arbitrabar, quoniam eodem anno gerendi nobis essent magistratus, esse aliquam oportere inter nos reipublicæ bene administrandæ societatem.

12. Quum familiariter me in eorum sermonem insinuarem, ac darem; celabar, excluderem: & quum ostenderem, si lex utilis plebi Romanæ mihi videretur, auctorem me, atque adiutorem futurum; tamen aspernabantur hanc liberalitatem meam; negabant, me adduci posse, ut ullam largitionem probarem: finem feci offerendi mei, ne fortè mea seculitas, aut insidiosa, aut impudens videretur. Interea non desistebant clam inter se convenire, privatos quosdam adhibere, ad suos cœtus occultos noctem adjungere, & solitudinem: quibus in rebus, quanto in metu fuerimus, ex vestra sollicitudine, in qua illis temporibus fuistis, facile assequi conjecturâ poteritis.

13. Ineunt tandem magistratus tribuni plebis: concio tandem expectata P. Rulli, quod & princeps erat agrariæ legis, & truculentiùs se gerebat, quàm ceteri. Jam designatus, alio vultu, alio vocis sono, alio incessu esse meditabatur: vestitu obsoletiore, corpore inculto & horrido, capillatior, quàm antè, barbâque majore: ut oculis & adspectu denuntiare omnibus vim tribunitiam, & minitari reipublicæ videretur. Legem hominis, concionemque expectabam. Lex initio nulla proponitur: concionem in primis advocari jubet: summa cum expectatio



ne concurritur : explicat orationem sanè longam , & verbis valde bonis. Unum erat , quod mihi vitiosum videbatur ; quòd tanta ex frequentia inveniri nemo potuit , qui intelligere posset , quid diceret : hoc ille utrùm insidiarum causâ fecerit , an hoc genere eloquentiæ delectetur , nescio. Tamen , si qui acutiores in concione steterant , de lege agraria nesciò quid voluisse eum dicere suspicabantur. Aliquando tandem , me designato , lex in publicum proponitur : concurrunt jussu meo plures uno tempore librarii : descriptam legem ad me afferunt.

VI. Omni hoc vobis ratione confirmare possum , Quirites , hoc animo me ad legendam legem cognoscendamque venisse , ut , si eam vobis accommodatam atque utilem esse intelligerem , auctor ejus atque adiutor essem : non enim naturâ , neque discidio , neque odio penitus insito , bellum nescio quod habet susceptum consulatus cum tribunatû ; quia persæpe seditiosis atque improbis tribunis plebis boni & fortes consules obstiterunt , & quia vis tribunitia nonnumquam libidini restitit consulari. Non potestatum dissimilitudo , sed animorum disjunctio dissensionem facit.

15. Itaque hoc animo legem sumpsî in manus , ut eam cuperem esse aptam ves-

tris commodis, & ejusmodi, quam consul, re, non oratione, popularis, & honestè & libenter posset defendere. Atque ego a primo capite legis usque ad extremum, reperio, Quirites, nihil aliud cogitatum, nihil aliud susceptum, nihil aliud actum, nisi uti decem reges, ærarii, vectigalium, provinciârum omnium, totius reipublicæ, regnorum, liberorum populorum, orbis denique terrarum domini constituerentur, legis agrariæ simulatione atque nomine. Sic confirmo, Quirites, hac lege agrariâ, pulchrâ atque populari, dari vobis nihil, condonari certis hominibus omnia: ostentari populo Romano agros, eripi etiam libertatem: privatorum pecunias augeri, publicas exhauriri: denique, quod est indignissimum, per tribunum plebis, quem majores præsidem libertatis custodemque esse voluerunt, reges in civitate constitui.

16. Quæ quum exposuero, si falsa vobis videbuntur esse, sequar auctoritatem vestram; mutabo meam sententiam: sin insidias fieri libertati vestræ, simulatione largitionis, intelligetis; nolitote dubitare, plurimo sudore & sanguine majorum vestrorum partam, vobisque traditam libertatem, nullo vestro labore, consule ad jutore, defendere.

## DE LEGE AGRARIA. 151

VII. Primum caput est legis agrariæ ; quò , ut illi putant , tentamini leviter , quò animo libertatis vestræ diminutionem ferre possitis. Jubet enim *tribunum plebis* , qui eam legem tulerit , creare *decemviros per tribus septemdecim* , ut , quem novem tribus fecerint , is *decemvir* sit. Hic quæro , quàm ob causam initium rerum , ac legum suarum hinc duxerit , ut populus Romanus suffragio privaretur : toties legibus agrariis curatores constituti sunt , triumviri , quinquéviri , decemviri : quæro a populari tribuno plebeio , ecquando , nisi per xxxv tribus creati sint. Etenim quum omnes potestates , imperia , curationes ab universo populo Romano proficisci convenit , tum eas profectò maxime ; quæ constituuntur ad populi fructum aliquem , & commodum ; in quo & universi deligant , quem populo Romano maxime confuturum putent , & unusquisque studio & suffragio suo viam sibi ad beneficium impetrandum munire possit. Hoc tribuno plebis potissimum venit in mentem , populum Romanum universum privare suffragiis ; paucas tribus , non certâ conditione juris , sed fortis beneficio , fortuito , ad usurpandam libertatem vocare.

18. *Item* , inquit , eodemque modo , capite altero , ut comitiis pontificis maximi.

G iv

Ne hoc quidem vidit , majores nostros tam fuisse populares , ut , quod per populum creari fas non erat propter religionem sacrorum , in eo tamen , propter amplitudinem sacerdotii , voluerint populo supplicari : atque hoc idem de ceteris sacerdotiis Cn. Domitius , tribunus plebis , vir clarissimus , tulit ; quòd populus per religionem sacerdotia mandare non poterat , ut minor pars populi vocaretur : ab ea parte qui esset factus , is a collegio cooptaretur.

19. Videte , quid intersit inter Cn. Domitium , tribunum plebis , hominem nobilissimum , & P. Rullum , qui tentavit , ut opinor , patientiam vestram , quum se nobilem esse diceret. Domitius , quod per cæremonias populi fieri non poterat , ratione affecutus est , ut id , quoad posset , quoad fas esset , quoad liceret , populi ad partes daret : hic , quod populi proprium semper fuit , quod nemo imminuit , nemo immutavit , quin ii , qui populo agros essent assignaturi , antè acciperent a populo beneficium , quàm darent , id totum eripere vobis , atque e manibus extorquere conatus est. Ille , quod dari populo nullo modo poterat , tamen quodammodo dedit : hic , quod adimi nullo pacto poterat potestate , quadam ratione eripere conatur.

VIII. Quæret quispiam, in tanta injuria, tantaque impudentia quid spectarit. Non defuit consilium: fides erga plebem Romanam, æquitas in vos, libertatemque vestram, vehementer defuit. Jubet enim, comitia decemviris habere creandis eum, qui legem tulerit. Hoc dicam planius: Jubet Rullus, homo non cupidus, neque appetens, habere comitia Rullum. Nondum reprehendo: video fecisse alios: illud, quod nemo fecit, de minore parte populi, quò pertineat, videte. Habebit comitia: volet eos renunciare, quibus regia potestas hac lege quaeritur: universo populo neque ipse committit, neque illi horum consiliorum auctores committi rectè putant posse.

21. Sortietur tribus idem Rullus: homo felix educet, quas volet, tribus: quos novem tribus decemviros fecerint, ab eodem Rullo educæ, hos omnium rerum (ut jam ostendam) dominos habebimus: atque ii, ut grati ac memores beneficii esse videantur, aliquid se novem tribuum notis hominibus debere confitebuntur: reliquis verò sex & xx tribubus, nihil erit, quod non putent posse suo jure denegare. Quos tandem igitur decemviros creari vult se primum. Qui licet leges enim sunt veteres, neque eæ consulares, si quid interesse hoc arbitra-

mini , sed tribunitiæ , vobis , majoribusque vestris vehementer gratæ atque jucundæ. Licinia est lex , atque altera Æbutia : quæ non modò eum , qui tulerit de aliqua curatione , ac potestate , sed etiam collegas ejus , cognatos , affines excipit , ne eis ea potestas , curatiove mandetur. Etenim , si populo consulis , remove te a suspitione alicujus tui commodi : fac fidem , te nihil , nisi populi utilitatem & fructum , quærere : sine ad alios potestatem , ad te gratiam beneficii tui pervenire : nam hoc quidem vix est liberi populi , vix vestrorum animorum , ac magnificentiæ.

IX. Quis legem tulit ? Rullus. Quis majorem partem populi suffragiis privavit ? Rullus. Quis comitiis præfuit ? Rullus. Quis tribus , quas voluit , vocavit , nullo custode sortitus ? quis decemviros , quos voluit , renuntiavit ? idem Rullus. Quem principem renuntiavit ? Rullum. Vix , mehercule , servis hoc eum suis , non vobis , omnium gentium dominis , probaturum arbitrarer. Optimæ leges igitur hac lege sine ulla exceptione tollentur. Idem legis sibi suâ lege curationem petet : idem , majore parte populi suffragiis spoliata , comitia habebit : quos volet , atque in iis se ipsum renuntiabit : & videlicet collegas suos , adscriptores le-

gis agrariæ non repudiabit, a quibus ei locus primus invidiæ in indice & in præscriptione legis concessus est; ceteri fructus omnium rerum, qui in spe legis hujus positi sunt, communi cautione, atque æquâ ei parte retinentur.

23. At videte hominis diligentiam, si aut Rullum cogitasse, aut si Rullo potuisse in mentem venire arbitramini. Viderunt ii, qui hæc machinabantur, si vobis ex omni populo deligendi potestas esset data, quæcumque res esset, in qua fides, integritas, virtus, auctoritas quæreretur, vos eam sine dubitatione ad Cn. Pompeium principem delaturos. Etenim, quem unum ex cunctis delegissetis, ut eum omnibus omnium gentium bellis terrâ & mari præponeretis; certè in decemviris faciendis, sive fides haberetur, sive honos; & committi huic optimè, & ornari hunc justissimè posse intelligebant.

24. Itaque excipitur hac lege non adolescentia, non legitimum aliquod impedimentum, non potestas, non magistratus ullus aliis negotiis ac legibus impeditus; reus denique, quod minus decemvir fieri possit, non excipitur. Cn. Pompeius excipitur, ne cum P. Rullo, taceo de ceteris, decemvir fieri possit. Præsentem eum profiteri jubet, quod nulla alia in lege umquam fuit; ne in his quidem ma-

gistratibus, quorum certus ordo est. Timebat enim, Pompeius ne si adesset, ferri non posset: aut, ne, si accepta lex esset, illum sibi collegam adscriberetis, custodem ac vindicem cupiditatum.

X. Hic, quoniam video vos hominis dignitate, & contumeliâ legis esse commotos; renovabo illud, quod initio dixi, regnum comparari, libertatem vestram hac lege funditus tolli. An vos aliter existimabatis, quum ad omnia vestra pauci homines cupiditatis oculos adjecissent, non eos in primis id acturos, ut ex omni custodia vestræ libertatis, ex omni potestate, curatione, patrocinio vestrorum commodorum Cn. Pompeius depelleretur? Viderunt, & vident, si per imprudentiam vestram, negligentiam meam, legem incognitam acceperitis, fore, uti postea, cognitis insidiis, quum decemviros crearitis, tum vitiis omnibus, & sceleribus legis, Cn. Pompeii præsidium opponendum putetis. Et hoc parvum argumentum vobis erit, a certis hominibus dominationem, potestatemque omnium rerum quæri, quum videatis eum, quem custodem vestræ libertatis fore videant, expertem fieri dignitatis?

26. Cognoscite nunc, quæ potestas decemviris, & quanta detur. Primum lege curiatâ decemviros ornat. Jam hoc



inauditum, & planè novo more uti curiata lege magistratus detur, cui nullis comitiis antè sit datus. Eam legem ab eo prætore, qui sit primus factus, ferri jubet. At quomodo? Ut ii decemviratum habeant, quos plebs designaverit. Oblitus est, nullos a plebe designari. Et is orbem terrarum constringit novis legibus, qui, quid in secundo capite scriptum est, non meminit in tertio? Atque hic perspicuum est, quid juris a majoribus acceperitis, quid ab hoc tribuno plebis vobis relinquatur.

XI. Majores de singulis magistratibus bis vos sententiam ferre voluerunt: nam quum centuriata lex censoribus ferebatur, quum curiata ceteris patriciis magistratibus; tum iterum de iisdem judicabatur, ut esset reprehendendi potestas, si populum beneficii sui pœniteret. Nunc, quia prima illa comitia tenetis, centuriata, & tributa; curiata tantum auspiorum causâ remanserunt. Hic autem tribunus plebis, quia videbat, potestatem neminem injussu populi, aut plebis posse habere, curiatis ea comitiis, quæ vos non sinitis, confirmavit; tributa, quæ vestra erant, sustulit. Ita, quum majores binis comitiis voluerint vos de singulis magistratibus judicare; hic homo popularis ne unam quidem populo comitiorum potestatem reliquit.

28. Sed videte hominis religionem , & diligentiam. Vidit , & perspexit , sine curiata lege decemviros habere potestatem non posse , quoniam per novem tribus essent constituti. Jubet ferre de his legem curiatam : prætori imperat : quàm id ipsum absurdè , nihil ad me attinet : jubet enim , *qui primus sit prætor factus , cum legem curiatam ferre : sin is ferre non possit ; qui postremus sit : ut aut lusisse in tantis rebus , aut profectò nescio quid spectasse videatur.* Verùm hoc quod est aut ita perversum , ut ridiculum , aut ita malitiosum , ut obscurum sit , relinquamus : ad religionem hominis revertamur. Videt sine lege curiata nihil agi per decemviros posse.

29. Quid postea , si ea lata non erit ? Attendite ingenium. *Tum ii decemviri , inquit , eodem jure sint , quo qui optimâ lege.* Si hoc fieri potest , ut in hac civitate , quæ longè jure libertatis ceteris civitatibus antecellit , quisquam nullis comitiis imperium , aut potestatem assequi possit ; quid attinet tertio capite legem curiatam ferre jubere , quoniam quarto permittas , ut sine lege curiata idem juris habeant , quod haberent , si optimâ lege a populo essent creati ? Reges constituuntur , non decemviri , Quirites : ùque ab his initiis fundamentisque nas-

cuntur , ut non modò quum gerere cœperint , sed etiam quum constituentur , omne vestrum jus , potestas , libertasque tollatur.

XII. At videte , quàm diligenter retineat jus tribunitiæ potestatis. Consulibus legem curiatam ferentibus , a tribunis plebis sæpe est intercessum. Neque tamen nos id querimus , esse hanc tribunorum plebis potestatem : tantummodo , si quis eâ potestate temerè est usus , existimamus. Hic tribunus plebis lege curiatâ , quam prætor ferat , adimit intercedendi potestatem. Atque hoc quum in eo reprehendendum est , quòd per tribunum plebis tribunitia potestas minuitur ; tum in eo deridendum , quòd consuli , si legem curiatam non habet , attingere rem militarem non licet : hic , qui vetat intercedendi potestatem , etiam si intercessum sit , tamen eamdem constituit , quam , si lata esset lex : ut non intelligam , quare aut hic vetet intercedere , aut quemquam intercessurum putet ; quum intercessio stultitiam intercessoris significatura sit , non rem impeditura.

31. Sint igitur decemviri neque veris comitiis , hoc est , populi suffragiis , neque illis ad speciem , atque ad usurpationem vetustatis , per xxx lictores , auspiciorum causâ , adumbratis , constituti. Videte

nunc , eos , qui a vobis nihil potestatis acceperint , quantò majoribus ornamentis afficiat , quàm omnes nos affecti sumus , quibus vos amplissimas potestates dedistis. Jubet ad auspicia , coloniarum deducendarum causâ , decemviros habere pullarios. *Eodem jure* , inquit , *quo habuerunt tresviri lege Semproniâ*. Audes etiam , Rulle , mentionem facere legis Semproniæ ? nec te ea lex ipsa commonet , tres viros illos xxxv tribuum suffragio esse creatos ? Et , quum tu a Tib. Gracchi æquitate ac pudore longissimè remotus sis ; id quod dissimillimâ ratione factum sit , eodem jure putas esse oportere ?

XIII. Dat præterea potestatem , verbo prætoriam , re verâ regiam : definit in quinquennium , facit sempiternam : tantis enim confirmat opibus & copiis , ut invitis eripi nullo modo possit : deinde ornat apparitoribus , scribis , librariis , præconibus , architectis ; præterea mulis , tabernaculis , centuriis , suppellectili : sumptum haurit ex ærario , suppeditat a sociis : janitores ex equestri loco ducentos in annos singulos , stipatores corporis constituit ; eosdem ministros , & satellites potestatis. Formam adhuc habetis , Quirites , & speciem ipsam tyrannorum : insignia videtis potestatis , nondum ipsam potestatem. Dixërit enim fortasse quispiam ,

Quid me ista lædunt, scriba, licitor, præco, pullarius? Omnia sunt hæc hujusmodi, Quirites, ut ea qui habeat sine vestris suffragiis; aut rex non ferendus, aut privatus furiosus esse videatur.

33. Perspicite, quanta potestas permittatur: non privatorum insaniam, sed intolerantiam regum esse dicetis. Primum permittitur infinita potestas innumerabilis pecuniæ conficiendæ de vestris vestigalibus, non fruendis, sed alienandis: deinde orbis terrarum, gentiumque omnium datur cognitio sine consilio, pœna sine provocatione, animadversio sine auxilio.

34. Judicare per quinquennium, vel de consulibus, vel de ipsis tribunis plebis poterunt; de illis interea nemo judicabit: magistratus his gerere licebit; causam dicere non licebit: emere agros, a quibus volent, vel quos volent, quàm volent magno, poterunt: colonias deducere novas, renovare veteres, totam Italiam suis coloniis ut complere liceat, permittitur: omnes provincias obeundi, liberos populos agris multandi, regnorum vel dandorum summa potestas datur, quum velint: Romæ esse, quum commodum sit: quacumque velint summo imperio, judicioque omnium rerum vagari ut liceat, conceditur: interea dissolvant judicia publica: de consiliis ab-

12. Quum familiariter me in eorum sermonem insinuarem, ac darem; celabar, excluderem: & quum ostenderem, si lex utilis plebi Romanæ mihi videretur, auctorem me, atque adiutorem futurum; tamen aspernabantur hanc liberalitatem meam; negabant, me adduci posse, ut ullam largitionem probarem: finem feci offerendi mei, ne fortè mea seculitas, aut insidiosa, aut impudens videretur. Interea non desistebant clam inter se convenire, privatos quosdam adhibere, ad suos cœtus occultos noctem adjungere, & solitudinem: quibus in rebus, quanto in metu fuerimus, ex vestra sollicitudine, in qua illis temporibus fuistis, facile assequi conjecturâ poteritis.

13. Ineunt tandem magistratus tribuni plebis: concio tandem expectata P. Rulli, quod & princeps erat agrariæ legis, & truculentiùs se gerebat, quàm ceteri. Jam designatus, alio vultu, alio vocis sono, alio incessu esse meditabatur: vestitu obsoletiore, corpore inculto & horrido, capillatior, quàm antè, barbâque majore: ut oculis & adspectu denuntiare omnibus vim tribunitiam, & minitari reipublicæ videretur. Legem hominis, concionemque expectabam. Lex initio nulla proponitur: concionem in primis advocari jubet: summa cum expectatio,

esse voluerunt. Hæc lege tribunitiâ decemviri vendent. Accedet eò mons Gaurus; accedent salicta ad Minturnas; adjungetur etiâ illa via vendibilis Herculanea, multarum deliciarum, & magnæ pecuniæ: per multa alia, quæ senatus propter angustias ærarii vendenda censuit, consules propter invidiam non vendiderunt.

37. Verùm hæc fortasse propter pudorem in lege reticentur. Sed illud magis est cavendum & pertimescendum, quod audaciæ decemvirali, corrupendarum tabularum publicarum, fingendorumque senatusconsultorum, quæ facta numquam sunt, quum ex eo numero, qui per eos annos consules fuerunt, multi mortui sint, magna potestas permittitur: nisi fortè nihil est æquum vos de eorum audacia suspicari, quorum cupiditati nimium angustus orbis terrarum esse videatur.

XV. Habetis unum venditionis genus, quod magnum videri vobis intelligo: sed attendite animos ad ea, quæ consequuntur: hunc quasi gradum quemdam, atque aditum ad cetera factum intelligetis. *Qui agri, quæ loca, quæ ædificia.* Quid est præterea? multa in Mancipiis, in pecore, auro, argento, ebore, veste, suppellectili, ceteris rebus. Quid dicam? invidiosum putasset hoc fore, si omnia

nominasset ? non metuit invidiam. Quid ergo ? longum putavit , & timuit , ne quid præteriret : adscripsit , *aliudve quid* : quâ brevitate rem nullam esse exceptam videris. Quidquid ergo sit extra Italiam , quod publicum populi Romani factum sit , L. Sullâ , Q. Pompeio consulibus , aut postea , id decemviros jubet vendere.

39. Hoc capite , Quirites , omnes gentes , nationes , provincias , regna , decemvirum ditioni , judicio , potestatique permissa , & condonata esse dico. Primum enim hoc quæro , qui tandem locus usquam sit , quem non possint decemviri dicere publicum populi Romani esse factum : nam , quum idem possit judicare , qui dixerit ; quid est , quod non liceat ei dicere , cui liceat eidem judicare ? Commodum erit Pergamum , Smyrnam , Tralles , Ephesum , Miletum , Cizycum , totam denique Asiam , quæ post L. Sullam , Q. Pompeium consules , recuperata sit , populi Romani factam esse dicere.

40. Utrum oratio ad ejus rei disceptationem deerit : an , quum idem & disse-ret , & judicabit , impelli non poterit , ut falsum judicet ? an , si condemnare Asiam nolet , terrorem damnationis , & minas non , quanti volet , æstimabit ? Quid ? quod disputari contra nullo pacto potest , quoniam statutum a vobis est , &



judicatum, quam hereditatem jam crevimus, regnum Bithyniæ, quod certè publicum est populi Romani factum? num quid causæ est, quin omnes agros, urbes, stativa, portus, totam denique Bithyniam decemviri vendituri sint?

XVI. Quid Mytilenæ? quæ certè vestræ, Quirites, belli lege, ac victoriæ jure factæ sunt: urbs & naturâ, & situ, & descriptione ædificiorum, & pulchritudine, in primis nobilis: agri jucundi & fertiles: nempe eodem capite inclusi continentur. Quid Alexandria, cunctaque Ægyptus? ut occultè latet? ut recondita est? ut furtim tota decemviris traditur? Quis enim vestrûm hoc ignorat, dici, illud regnum testamento regis Alexandri, populi Romani esse factum? Hic ego consul populi Romani non modò nihil judico, sed ne, quid sentiam, quidem profero: magna enim mihi res non modò ad statuendum, sed etiam ad dicendum videtur esse. Video, qui testamentum factum esse confirmet: auctoritatem senatûs exstare hereditatis aditæ sentio, tum, quando Alexandro mortuo legatos Tyrum misimus, qui ab illo pecuniam depositam nobis recuperarent.

42. Hæc L. Philippum sæpe in senatu confirmasse memoriâ teneo: eum, qui regnum illud teneat hoc tempore, neque

genere , neque animo regio esse , inter omnes ferè video convenire. Dicitur contrà , nullum esse testamentum : non oportere populum Romanum omnium regnorum appetentem videri : demigraturos in illa loca nostros homines , propter agrorum bonitatem & omnium rerum copiam.

43. Hac tanta de re P. Rullus cum ceteris decemviris , collegis suis , judicabit ? & verum judicabit ? nam utrumque ita magnum est , ut nullo modo neque concedendum , neque ferendum sit. Volet esse popularis : populo Romano adjudicabit. Ergo idem ex sua lege vendet Alexandriam , vendet Ægyptum : urbis copiosissimæ , pulcherrimorumque agrorum iudex , arbiter , dominus , rex denique opulentissimi regni reperietur. Non summet sibi tantum , non appetet ; judicabit Alexandriam regis esse : a populo Romano abjudicabit.

XVII. Primum populi Romani hereditatem decemviri judicent , quum vos volueritis de privatis hereditatibus centumviros judicare ? deinde quis aget causam populi Romani ? ubi res ista agatur ? qui sunt isti decemviri , quos perspicimus regnum Alexandriae Ptolemæo gratis adjudicaturos ? Quodd si Alexandria petebatur ; cur non eosdem cursus hoc

tempore, quos, L. Cottâ, L. Torquato consulibus, cucurrerunt? cur non apertè, ut antea? cur non item, ut cum decreto, & palam regionem illam petierunt? an quietis iis, qui per cursum rectum regnum tenere non potuerunt, nunc tetrìs tenebris & caligine se Alexandriam perventuros arbitrati sunt?

45. Atque illud circumspicite vestris mentibus, unâque \*\*\*\* Legatos nostros, homines auctoritate tenui, qui rerum privatarum causâ legationes liberas obeunt, tamen exteræ nationes ferre vix possunt: grave est enim nomen imperii, atque id etiam in levi personâ pertimescitur, propterea quòd vestro, non suo nomine, quum hinc egressi sunt, abutuntur. Quid censetis, quum isti decemviri cum imperio, cum fascibus, cum illa delecta finitorum juventute per orbem terrarum vagabuntur? quo tandem animo, quo metu, quo periculo miseras nationes futuras?

46. Est in imperio terror; patientur: est in adventu sumptus; ferent: imperabitur aliquid muneris; non recusabunt. Illud verò quantum est, Quirites, quum is decemvir, qui aliquam in urbem aut expectatus, ut hospes, aut repentè, ut dominus, venerit, illum ipsum locum, quò venerit, illam ipsam sedem hospita-

lem , in quam erit deductus , publicam populi Romani esse dicet ? quanta calamitas populi , si dixerit ? quantus ipsi quæstus , si negarit ? Atque iidem , qui hæc appetunt , queri nonnumquam solent , omnes terras Cn. Pompeio , atque omnia maria esse permessa. Simile verò est , multa committi , & condonari omnia ? labori , & negotio præponi , an prædæ , & quæstui ? mitti ad socios liberandos , an ad opprimendos ? denique , si quis est honos singularis , nihilne interest , utrùm populus Romanus eum , cui velit , deferat ; an is impudenter populo Romano per legis fraudem surripiatur ?

XVIII. Intellexistis , quot res , & quantas decemviri , legis permissu , vendituri sint. Non est satis : quum sese sociorum , quum exterarum nationum , quum regum sanguine implerint ; incidant nervos populi Romani , adhibeant manus vestigalibus vestris , irrumpant in ærarium : sequitur enim caput , quo capite non permittit quidem , si fortè desit pecunia , quæ tanta ex superioribus recipi potest , ut deesse non debeat ; sed planè , quasi ea res vobis salutis futura sit , ita cogit , atque imperat , ut decemviri vestra vestigalia vendant nominatim.

48. Quam tu mihi ex ordine recita de legis scripto populi Romani auctionem :  
quam

quam mehercule ego præconi huic ipsi luctuosam & acerbam prædicationem futuram puto. *Auctio.* Ut in suis rebus, ita in republica luxuriosus est nepos, qui prius silvas vendat, quàm vineas. Italiam percensuisti: perge in Siciliam. *Auctionis pars ea, quæ ad Siciliam pertinet.* Nihil est in hac provincia, quod aut in oppidis, aut in agris majores nostri proprium nobis reliquerint, quin id venire jubeat.

49. Quod partum recenti victoriâ majores vobis in sociorum urbibus, ac finibus, & vinculum pacis, & monumentum belli reliquerunt, id vos ab illis acceptum, hoc auctore, vendetis? Hic mihi parumper mentes vestras, Quirites, commovere videor, dum patefacio vobis, quas isti penitus abstrusas insidias se posuisse arbitrentur contra Cn. Pompeii dignitatem: & mihi, quæso, ignoscite, si appello talem virum sæpius: vos mihi prætori biennio antè, Quirites, hoc eodem in loco personam hanc imposuistis; ut, quibuscumque rebus possem, illius absentis dignitatem vobiscum unà tuerer: feci adhuc, quæ potui, neque familiaritate illius adductus, nec spe honoris atque amplissimæ dignitatis; quam ego, etsi libente illo, tamen absente illo per vos consecutus sum. Quamobrem quum intelligam, hanc totam ferè legem ad il-

lius opes evertendas, tamquam machinam, comparari; & resistam consiliis hominum, & perficiam profectò, quod ego video comparari, ut id vos universi non solum videre, verum etiam tenere possitis.

XIX. Jubet venire, quæ Attalensium, quæ Phaselitum, quæ Olympenorum fuerint, agrumque Agerensem, & Orindicum, & Gedusanum: hæc P. Servilii imperio & victoriâ, clarissimi viri, vestra facta sunt. Adjungit agros Bithyniæ regios, quibus nunc publicani fruuntur: deinde Attalicos agros in Chersoneso: in Macedonia, qui regis Philippi, sive Persæ fuerunt; qui item a censoribus locati sunt, & certissimum vectigal.

§ I. Adscribit idem auctioni Corinthios agros, optimos, & fertiles; & Cyrenenses, qui Appionis fuerunt; & agros in Hispania propter Carthaginem novam; & in Africa ipsam veterem Carthaginem vendit: quam videlicet P. Africanus non propter religionem sedium illarum, ac vetustatis, de consilii sententia, consecravit, sed ut ipse locus eorum, qui cum hac urbe de imperio certarunt, vestigia calamitatis ostenderet. Sed non fuit tam diligens, quàm est Rullus: aut fortasse emptorem ei loco reperire non potuit. Verum inter hos agros regios, captos ve-

teribus bellis, virtute summorum imperatorum, adjungit regiones agros Mithridatis, qui in Paphlagonia, qui in Ponto, qui in Cappadocia fuerunt, ut eos decemviri vendant.

§2. Itane verò? non legibus datis, non auditis verbis imperatoris, nondum denique bello confecto, quum rex Mithridates, amisso exercitu, regno expulsus, tamen in ultimis terris aliquid etiam nunc moliatur, atque ab invicta Cn. Pompeii manu, Mœotide, & illis paludibus, & itinerum angustius, atque altitudine montium defendatur: quum imperator in bello versetur: in locis autem illis etiam nunc belli nomen reliquum sit: eos agros, quorum adhuc penes Cn. Pompeium omne judicium & potestas, more majorum, debet esse, decemviri vendent? Et, credo, P. Rullus (is enim sic se gerit, ut sibi jam decemvir designatus esse videatur) ad eam auctionem potissimum proficiscetur.

XX. Is videlicet antequam veniat in Pontum, litteras ad Cn. Pompeium mittet; quarum ego jam exemplum ab istis compositum esse arbitror. *P. Servilius Rullus, tribunus plebis, decemvir, S. D. Pompeio, Cn. F.* Non credo adscripturum esse, *Magno*: non enim videtur, id quod imminere lege conatur, concessu-

rum verbo. *Te volo curare, ut mihi Sino-  
pe præstò sis, auxiliumque adducas, dum  
eos agros, quos tuo labore cepisti, ego meâ  
lege vendam.* An Pompeium non adhibe-  
bit? in ejus provincia vendet manubias  
imperatoris? ponite ante oculos vobis  
Rullum in Ponto, inter vestra atque hos-  
tium castra, hastâ positâ, cum suis for-  
mosis finitoribus auctionantem.

54. Neque in hoc solum inest contu-  
melia, quæ vehementer & insignis est,  
& nova, ut ulla res parta bello, non-  
dum legibus datis, etiam tum imperatore  
bellum administrante, non modò venie-  
rit, verùm etiam locata sit. Plus spectant  
homines certè, quàm contumeliam: spe-  
rant, si concessum sit inimicis Cn. Pom-  
peii, cum imperiò, cum judicio omnium  
rerum, cum infinita potestate, cum in-  
numerabili pecunia, non solum aliis in  
locis vagari, verùm etiam ad ipsius exer-  
citus pervenire; aliquid illi insidiarum  
fieri, aliquid de ejus exercitu, copiis,  
gloriâ, detrahi posse: putant, si quam  
spem in Cn. Pompeio exercitus habeat,  
aut agrorum, aut aliorum commodorum,  
hanc non habiturum, quum viderit, ea-  
rum rerum omnium potestatem ad de-  
cemviros esse translatam.

55. Patior non molestè, tam stultos  
esse, qui hæc sperent; tam impudentes,



qui conentur : illud queror , tam me ab iis esse contemptum , ut hæc portenta , me consule , potissimum cogitarent. Atque in omnibus his agris ædificiisque vendendis , permittitur decemviris , *ut vendant , quibuscumque in locis videatur.* O perturbatam rationem ! ô libidinem refrenandam ! ô consilia dissoluta , atque perditâ !

XXI. Vestigalia locare nusquam licet , nisi in hac urbe , hoc ex loco , hac vestrum frequentiam : venire vestras res proprias , & in perpetuum a vobis alienari , in Paphlagoniæ tenebris , atque in Cappadociæ solitudine licebit ? L. Sulla quum bona indemnatorum civium funestâ illâ auctione suâ venderet , & se prædam suam diceret vendere , tamen ex hoc loco vendidit ; nec , quorum oculos offendeat , eorum ipsorum conspectum fugere ausus est : decemviri vestra vestigalia non modò ne vobis quidem arbitris , sed ne præcone quidem publico teste vendent ?

56. Sequitur , *Omnes agros extra Italiam* , infinito ex tempore , non , ut antea , ab Sulla & Pompeio consulibus. Cognitio decemvirum , privatus sit , an publicus : sicque agro pergrande vestigal imponitur. Hoc quantum iudicium , quàm intolerandum , quàm regium sit , quem

præterit ? posse , quibuscumque locis velint , nullâ disceptatione , nullo consilio , privata publicare , publica liberare ?

57. Excipitur hoc capite ager in Sicilia Recentoricus : quem ego excipi , & propter hominum necessitudinem , & propter æquitatem , Quirites , sæpe vehementer gaudeo. Sed quæ hæc impudentia ? qui agrum Recentoricum possident , vetustate possessionis se , non jure ; misericordiâ senatûs , non agri conditione defendunt : nam illum agrum publicum esse fatentur : se moveri possessionibus , amicissimis sedibus , ac diis penatibus negant oportere. At , si est privatus ager Recentoricus , quid eum excipis ? sin autem publicus ; quæ est ista æquitas , ceteros , etiam si privati sint , permittere ut publici judicentur ; hunc excipere nominatim , qui publicus esse fateatur ? Ergo eorum ager excipitur , qui apud Rullum aliâ ratione valuerunt : ceteri agri omnes , qui ubique sunt , sine ullo delectu , sine populi Romani notione , sine iudicio senatûs , decemviris addicentur.

XXII. Atque etiam est alia , superiore capite , quo omnia veneunt , quæstiosa exceptio , quæ teget eos agros , de quibus fœdere cautum est. Audivit , hanc rem non a me , sed ab aliis agitari sæpe in senatu , nonnumquam ex hoc loco ,

pōssidere agros in ora maritima regem Hiempſalem ; quos P. Africanus populo Romano adjudicarit ; & tamen poſtea per C. Cottam conſulem , cautum eſſe fœdere. Hoc quia vos fœdus non juſſeritis , vetetur Hiempſal ; ut ſatis firmum ſit , & ratum. Quid ? cujuſmodi eſt illud ? tollitur veſtrum judicium : fœdus totum excipitur : comprobatur. Quòd minuit auſtioneſ decemviralem , laudo : quòd regi amico cavet , non reprehendo : quòd non gratis ſit , indico. Volitat enim ante oculos iſtorum Jubæ regis filius , adoleſcens non minùs bene nummiatus , quàm bene capillatus.

59. Vix jam videtur locus eſſe , qui tantos acervos pecuniæ capiat : auget , addit , accumulatur : *Aurum , argentum ex præda , ex manubiis , ex coronario , ad quoscumque pervenit , neque relatum eſt in publicum , neque in monumento conſumptum* , id profiteri apud decemviros , & ad eos referre jubet. Hoc capite etiam quæſtionem de clariffimis viris , qui populi Romani bella geſſerunt , judiciumque de pecuniis repetundis , ad decemviros tranſlatum videtis. Horum erit judicium , quantæ cujuſque manubiæ fuerint , quid relatum , quid reſiduum ſit. In poſterum verò lex hæc imperatoribus veſtris conſtituitur , ut , *quicumque de provincia deceſſe-*

*rit, apud eosdem decemviros, quantum habeat prædæ, manubiarum, auri coronarii, profiteatur.*

60. Hic tamen vir optimus eum, quem amat, excipit, Cn. Pompeium. Unde iste amor tam improvisus, ac tam repentinus? qui honore decemviratûs excluditur prope nominatim: cujus iudicium, legumque datio, captorum agrorum ipsius virtute cognitio tollitur: cujus non in provinciam, sed in ipsa castra decemviri cum imperio, infinita pecunia, maxima potestate, & iudicio rerum omnium, mittuntur: cui jus imperatorium, quod semper omnibus imperatoribus est conservatum, soli eripitur: is excipitur unus, ne manubias referre debeat. Utrûm tandem hoc capite honos haberi homini, an invidia quæri videtur?

XXIII. Remittit hoc Rullo Cn. Pompeius: beneficio isto legis, benignitate decemvirali nihil utitur: nam si est æquum, prædas ac manubias suas imperatores, non in mōnumenta deorum immortalium, neque in urbis ornamenta conferre, sed ad decemviros, tamquam ad dominos, deportare: nihil sibi appetit præcipuè Pompeius, nihil: vult se in communi, atque in eodem, quo ceteri, jure versari. Sin est iniquum, Quirites, si turpe, si intolerandum, hos decemvi-

tos, portitores omnibus omnium pecuniis constitui, qui non modò reges, atque exterarum nationum homines, sed etiam imperatores nostros excutiant; non mihi videntur honoris causâ excipere Pompeium, sed metuere, ne ille eandem contumeliam, quam ceteri, ferre non possit: Pompeius autem hoc animo sit, ut, quidquid vobis placeat, sibi ferendum putet; quod vos ferre non poteritis, id profectò perficiat, ne diutius inviti ferre cogamini.

62. Verumtamen cavet, ut, *Si quæ pecunia post nos consules ex novis vectigalibus recipiatur, eâ decemviri utantur*: nova porrò vectigalia videt ea fore, quæ Pompeius adjunxerit. Ita remissis manubiis, vectigalibus ejus virtute partis se frui putat oportere. Parta sit pecunia, Quirites, decemviris tanta, quanta sit in terris; nihil prætermisum sit: omnes urbes, agri, regna denique, postremò etiam vectigalia vestra, venierint: accesserint in cumulum manubiæ vestrorum imperatorum: quantæ, & quàm immanes divitiæ decemviris in tantis auctionibus, tot judiciis, tam infinita potestate rerum omnium quærantur, videtis.

XXIV. Cognoscite nunc alios imensos atque intolerabiles quæstus, ut intelligatis ad certorum hominum impor-

tunam avaritiam hoc populare legis Agrariæ nomen esse quæsitum. Hac pecuniâ jubet agros emi, quò deducamini. Non consuevi homines appellare asperius, Quirites, nisi lacesitus. Velim fieri posset, ut a me sine contumelia nominarentur ii, qui se decemviros sperant futuros: jam videretis, quibus hominibus omnium rerum, & vendendarum, & emendarum potestatem permetteretis.

64. Sed, quod ego nondum statuo mihi esse dicendum, vos tamen id potestis cum animis vestris cogitare. Unum hoc certè videor mihi verissimè posse dicere; tum, quum haberet hæc respublica Luscinós, Calatinos, Acidinos, homines non solum honoribus populi, rebusque gestis, verum etiam patientiâ paupertatis ornatos; & tum, quum erant Catones, Philippi, Lælii, quorum sapientiam, temperantiamque in publicis, privatisque, forensibus, domesticisque rebus perspexeratis; tamen hujuscemodi res commissa nemini est, ut idem judicaret, & venderet, & hoc faceret per quinquennium toto in orbe terrarum: idemque agros vectigales populi Romani abalienaret; & quum summam tantæ pecuniæ nullo teste sibi ipse ex sua voluntate fecisset, tum denique emeret, a quibus vellet, quod videretur. Committite vos nunc, Quiri-

## DE LEGE AGRARIA. 179

tes , his hominibus hæc omnia , quos odorari hunc decemviratum suspicamini : reperietis , partem esse eorum , quibus ad habendum ; partem , quibus ad consumendum nihil satis esse videatur.

XXV. Hic ego jam illud , quod expeditissimum sit , ne disputo quidem , Quirites , non esse hanc vobis a majoribus relictam consuetudinem , ut emanent agri a privatis , quò plebs publicè deducatur : omnibus legibus , agris publicis privatos esse deductos : hujuscemodi me aliquid ab hoc horrido ac truce tribuno plebis expectasse : hanc verò emendi & vendendi quæstuosissimam ac turpissimam mercaturam , alienam actione tribunitiâ , alienam dignitate populi Romani semper putavi.

66. Libet agros emi. Primùm quæro ; quos agros ? & quibus in locis ? nolo suspensam & incertam plebem Romanam obscurâ spe , & cæcâ expectatione pendere. Albanus ager est , Setinus , Privernas , Fundanus , Vescinus , Falernus , Linternus , Cumanus , Casinas. Audio. Ab alia porta , Capenas , Faliscus , Sabinus , Reatinus , Venafranus , Allifanus , Trebulanus. Habes tantam pecuniam , quâ hosce omnes agros , & ceteros horum similes non modò emere , verùm etiam coacervare possis : cur eos non

H vj

definis , neque nominas , ut saltem deliberare plebs Romana possit , quid intersit suâ , quid expediat , quantum tibi in emendis , & in vendendis rebus commitendum putet ? Definio , inquit , Italiam. Satis certa regio : etenim quantulum interest , utrùm in Mafici radices , an in Italiam , aliôve deducamini ?

67. Age verò , non definis locum : quid ? naturam agri ? Verò , inquit , *qui arari , aut coli possit*. Qui possit arari , inquit , aut coli : non qui aratus , aut cultus sit. Utrùm hæc lex est , an tabula Neratianæ auctionis ? in qua scriptum fuisse aiunt : *Jugera CC , in quibus olivetum fieri potest : jugera CCC , ubi institui vineæ possunt*. Hoc tu emes istâ innumerabili pecuniâ , quod arari , aut coli possit ? Quod solum tam exile & macrum est , quod aratro perstringi non possit ? aut quod est tam asperum saxetum , in quo agricolarum cultus non elaboret ? Idcirco , inquit , agros nominare non possum , quia tangam nullum ab invito. Hoc quoque multò est quæstuosius , quàm si ab invito fumeret : inibitur enim ratio quæstûs de vestra pecunia : & tum denique ager emetur , quum idem expedierit emptori & venditori.

XXVI. Sed videte vim legis agrariæ. Ne ù quidem , qui publicos possident ,



decident de possessione , nisi erunt deducti optimâ conditione , & pecuniâ maximâ. Conversa ratio. Antea , quum erat a tribuno plebis mentio legis agrariæ facta , continuò qui agros publicos , aut qui possessiones invidiosas tenebant , pertimescebant. Hæc lex eos homines fortunis locupletat , invidiâ liberat. Quàm multos enim , Quirites , existimatis esse , qui latitudinem possessionum tueri , qui invidiam Sullanorum agrorum ferre non possint ? qui vendere cupiant , emptorem non reperiant ? perdere jam denique illos agros ratione aliquâ velint ? Qui paulò antè , diem noctemque , tribunitium nomen horrebant , vestram vim metuebant , mentionem legis agrariæ pertimescebant ; ii nunc etiam ultro rogabuntur , atque orabuntur , ut agros partim publicos , partim plenos invidiæ , plenos periculi , quanti ipsi velint , decemviris tradant. Atque hoc carmen hic tribunus plebis non vobis , sed sibi intus canit.

69. Habet focerum , virum optimum , qui tantum agri in illis reipublicæ tenebris occupavit , quantum concupivit. Huic subvenire vult succumbenti jam , oppresso , Sullanis oneribus gravi , suâ lege , ut liceat illi invidiam deponere , pecuniam condere. Et vos non dubitatis , quin vectigalia vestra vendatis , plurimo majore

tum vestrorum sanguine & sudore quaesita, ut Sullanos possessores divitiis augeatis, periculo liberetis?

70. Nam ad hanc emptionem decemviralem duo genera agrorum spectant, Quirites: eorum unum, propter invidiam, domini fugiunt; alterum, propter vastitatem. Sullanus ager, a certis hominibus latissimè continuatus, tantam habet invidiam, ut veri ac fortis tribuni plebis stridorem unum perferre non possit: hic ager omnis, quoquo pretio coemptus erit, tamen ingenti pecuniâ vobis inducetur. Alterum genus agrorum, propter sterilitatem incultum, propter pestilentiam vastum atque desertum, emetur ab iis, qui eos vident sibi esse, si non vendiderint, relinquendos. Et nimirum istud est, quod ab hoc tribuno plebis dictum est in senatu; urbanam plebem nimium in republica posse: *exhauriendam esse*: hoc enim verbo est usus; quasi de aliqua sentina, ac non de optimorum civium genere loqueretur.

XXVII. Vos verò, Quirites, si me audire vultis, retinete istam possessionem gratiæ, libertatis, suffragiorum, dignitatis, urbis, fori, ludorum, festorum dierum, ceterorum omnium commodorum: nisi fortè mavultis, relictis his rebus, atque hac luce reipublicæ, in Sipontina

siccitate , aut in Salapinorum pestilentiae finibus , Rullo duce , collocari : aut dicat , quos agros empturus sit : ostendat & quid , & quibus daturus sit. Ut verò , quum omnes urbes , agros , vectigalia , regna vendiderit , tum arenam aliquam , aut paludes emat ; id vos potestis , quaeso , concedere ? Quamquam illud est egregium , quòd hac lege antè omnia veniunt , antè pecuniae coguntur & coaccervantur , quàm gleba una ematur : deinde emi jubet : ab invito vetat.

72. Quæro , si , qui velint vendere , non fuerint , quid pecuniae fiet ? Referre in ærarium lex vetat : exigi prohibet. Igitur pecuniam omnem decemviri tenebunt : vobis ager non emetur : vectigalibus abalienatis , fociis vexatis , regibus atque omnibus gentibus exinanitis , illi pecunias habebunt , vos agros non habebitis. Facile , inquit , adducentur pecuniae magnitudine , ut velint vendere. Ergo ea lex est , quâ nostra vendamus , quanti possimus : aliena emamus , quanti possesores velint.

73. Atque in hos agros , qui hac lege empti sint , colonias ab iis decemviris deduci jubet ? Quid ? omnisne ejusmodi locus est , ut nihil intersit reipublicae colonia deducatur in eum locum , necne ? an est locus , qui coloniam postulet ? est ,

qui planè recuset? Quo in genere, sicut in ceteris reipublicæ partibus, est operæ pretium diligentiam majorum recordari; qui colonias sic idoneis in locis contra suspicionem periculi collocarunt, ut esse non oppida Italiæ, sed propugnacula imperii viderentur. Hi deducunt colonias in eos agros, quos emerint.

74. Etiamne si reipublicæ non expediat? *Et in quæ loca præterea videbitur.* Quid igitur est causæ, quin coloniam in Janiculum possint deducere; & suum præsidium in capite atque cervicibus vestris collocare? Tu non definias, quò colonias, in quæ loca, quò numero colonorum deduci velis? tu occupes locum, quem idoneum ad vim tuam judicaris? compleas numero? confirmes præsidio, quo velis? populi Romani vectigalibus atque omnibus copiis ipsum populum Romanum coërceas? opprimas? redigas in istam decemviralem ditionem ac potestatem?

XXVIII. Ut verò totam Italiam suis præsidiis obsidere atque occupare cogitet, quæso, Quirites, cognoscite. Permittit decemviris, ut in omnia municipia, in omnes colonias totius Italiæ colonos deducant, quos velint; iisque colonis agrum dari jubet. Num obscurè majores opes, quàm libertas vestra pati potest,

## DE LEGE AGRARIA. 185

& majora præsidia quæruntur ? num obscurè regnum constituitur ? num obscurè libertas vestra tollitur ? Nam quum iidem omnem pecuniam , maximam multitudinem , id est , totam Italiam suis opibus obsidebunt ; iidem vestram libertatem suis præsidiis & coloniis interclusam tenebunt : quæ spes tandem , quæ facultas recuperandæ vestræ libertatis relinquetur ?

76. At enim ager Campanus hac lege dividetur , orbis terræ pulcherrimus ; & Capuam colonia deducetur , urbem amplissimam atque ornatissimam : atque quid ad hæc possumus dicere ? De comodo vestro prius dicam , Quirites : deinde ad amplitudinem & dignitatem revertar : ut , si quis agri , aut oppidi bonitate delectetur , ne quid exspectet : si quem rei dignitas commovet , ut huic simulatæ largitioni resistat.

77. Ac primùm de oppido dicam , si quis est fortè , quem Capua magis , quàm Roma delectat. Quinque millia colonorum Capuam scribi jubet : ad hunc numerum quingenos sibi singuli sument. Quæso , nolite vosmetipsos consolari : verè & diligenter considerate : num vobis , aut vestri similibus , integris , quietis , otiosis hominibus , in hoc numero locum fore putatis ? Si est omnibus vobis , aut majori vestrum parti : quamquam me ves-

ter honos vigilare dies atque noctes , & intentis oculis omnes reipublicæ partes intueri jubet ; tamen paulisper , si ita commodum vestrum feret , connivebo : sed si quinque hominum millibus , ad vim , facinus , cædemque delectis , locus atque urbs , quæ bellum facere atque instruere possit , quæritur ; tamenne patiemini , vestro nomine contra vos firmari opes ? armari præsidia ? urbes , agros , copias comparari ?

78. Nam agrum quidem Campanum , quem vobis ostentant , ipsi concupiverunt : deducunt suos , quorum nomine ipsi teneant , & fruantur : coëment præterea : ista dena jugera continuabunt. Nam , si dicent per legem id non licere : ne per Corneliam quidem licet : at videmus ( ut longinqua mittamus ) agrum Prænestinum a paucis possideri : neque istorum pecuniis quidquam aliud deesse video , nisi ejusmodi fundos , quorum subsidio familiarum magnitudines , & Cumanorum ac Puteolanorum prædiorum sumptus sustentare possint. Quodd si vestrum commodum spectat ; veniat , & coram mecum de agri Campani divisione disputet.

XXIX. Quæsi ex eo Kalendis Januarii , quibus hominibus , & quemadmodum illum agrum esset distributurus : res-

pondit , a Romulia tribu se initium esse facturum. Primum , quæ est ista superbia & contumelia , ut populi pars amputetur , ordo tribuum negligatur ? antè rusticis detur ager , qui habent , quàm urbanis , quibus ista agri spes & jucunditas ostenditur ? aut , si hoc ab se dictum negat , & satisfacere omnibus vobis cogitat ; proferat : in jugera dena describat : a Suburana usque ad Arniensem nomina vestra proponat. Si non modò dena jugera dari vobis , sed ne constipari quidem tantum numerum hominum posse in agrum Campanum intelligetis ; tamenne vexari rempublicam , contemni majestatem populi Romani , deludi vosmetipsos diutius a tribuno plebis patiemini ?

80. Quòd si posset ager iste ad vos pervenire ; nonne eum tamen in patrimonio vestro remanere malletis ? unumne fundum pulcherrimum populi Romani , caput vestræ pecuniæ , pacis ornamentum , subsidium belli , fundamentum vestigalium , horreum legionum , solatium annonæ , desperire patiemini ? An obliti estis , Italico bello , amissis ceteris vestigalibus , quantos agri Campani fructibus exercitus alueritis ? An ignoratis , cetera illa magnifica populi Romani vectigalia , perlevi sæpe momento fortunæ , inclinatione temporis pendere ? Quid nos

Asiæ portus , quid Syriæ rura , quid omnia transmarina vectigalia juvabunt , tenuissimâ suspicione prædonum , aut hostium injectâ ?

81. At verò hoc agri Campani vectigal quum ejusmodi est , ut domi sit , & omnibus præsidiis oppidorum tegatur : tum neque bellis infestum , nec fructibus varium , nec cœlo ac loco calamitosum esse solet. Majores nostri non solum id , quod a Campanis ceperant , non imminuerunt , verum etiam , quod ei tenebant , quibus adimi jure non poterat , coëmerunt. Qua de causa nec duo Gracchi , qui de plebis Romanæ commodis plurimum cogitaverunt , nec L. Sulla , qui omnia sine ulla religione , quibus voluit , est dilargitus , agrum Campanum attingere ausus est. Nullus exstitit , qui ex ea possessione rempublicam demoveret , ex qua nec Gracchorum benignitas eam , nec Sullæ dominatio dejecisset.

XXX. Quem agrum nunc prætereuntes vestrum esse dicitis , & quem per iter qui faciunt , externi homines , vestrum esse audiunt ; is quum erit divisus , neque erit , neque vester esse dicetur. At qui homines possidebunt ? Primò quidem acres , ad vim prompti , ad seditionem parati , qui simulac decemviri concrepue- rint , armati in cives , & expediti ad cæ-



dem esse possint : deinde ad paucos , opibus & copiis affluentes , totum agrum Campanum perferri videbitis. Vobis interea , qui illas a majoribus pulcherrimas vectigalium sedes armis captas accepistis , gleba nulla de paternis atque avitis possessionibus relinquetur : ac tantum interit inter vestram & privatorum diligentiam , quòd , quum a majoribus nostris P. Lentulus , qui princeps senatûs , in ea loca missus esset , ut privatos agros , qui in publicum Campanum incurrebant , pecuniâ publicâ coëmeret , dicitur renuntiasse , nullâ se pecuniâ fundum cujusdam emere potuisse ; eumque , qui nollet vendere , ideo negasse se adduci posse , uti venderet , quòd , quum plures fundos haberet , ex illo solo fundo numquam malum nuntium audisset.

83. Itane verò ? privatum hæc causa commovit : populus Romanus ne agrum Campanum privatis gratis , Rullo rogante , tradat , non commovebit ? Atqui idem populus Romanus de hoc vectigali potest dicere , quod ille de suo fundo dixisse dicitur. Asia multos annos vobis fructum , Mithridatico bello , non tulit : Hispaniarum vectigal temporibus Sertorianis nullum fuit : Siciliæ civitatibus bello fugitivorum M'. Aquilius etiam mutuum frumentum dedit : at ex hoc vecti-

gali numquam malus nuntius auditus est. Cetera vectigalia belli difficultatibus affliguntur : hoc vectigali etiam belli difficultates sustentantur.

XXXI. Deinde in hac assignatione agrorum , ne illud quidem dici potest , quod in ceteris , agros desertos a plebe , atque a cultura hominum liberorum esse non oportere. Sic enim dico : si Campanus ager dividatur , exturbari & expelli plebem ex agris , non constitui & collocari. Totus enim ager Campanus colitur & possidetur a plebe , & a plebe optima & modestissima : quod genus hominum optimè moratum , optimorum & aratorum & militum , ab hoc plebicola tribuno funditus ejicitur. Atque illi miseri , nati in illis agris , & educati , glebis subigendis exercitati , quò se subito conferant , non habebunt : his robustis , & valentibus , & audacibus decemvirum satellitibus agri Campani possessio tota tradetur : & , ut vos nunc de vestris majoribus prædicatis , Hunc agrum nobis majores nostri reliquerunt ; sic vestri posterius de vobis prædicabunt , Hunc agrum patres nostri acceptum a patribus suis perdididerunt.

85. Equidem existimo , si jam campus Martius dividatur , & unicuique vestrum , ubi consistat , bini pedes assignentur ; ta-

men promiscuè toto, quàm propriè parvâ frui parte malletis. Quare, etiam si ad vos esset singulos aliquid ex hoc agro perventurum, qui vobis ostenditur, aliis comparatur; tamen honestiùs eum vos universi, quàm singuli possideretis. Nunc verò, quum ad vos nihil pertineat, sed paretur aliis, eripiat vobis: nonne acerrimè, tamquam armato hosti, sic huic legi, pro vestris agris resistetis?

86. Adjungit Stellatam campum agro Campano; & in eo duodena describit in singulos homines jugera. Quasi verò paulum differat ager Campanus ac Stellatis. Et multitudo, Quirites, quæritur, quâ illa omnia oppida compleantur. Nam dixi antea, lege permitti, ut, quæ velint municipia, quas velint veteres colonias, colonis suis occupent. Calenum municipium complebunt: Theanum oppriment: Atellam, Cumas, Neapolin, Pompeios, Nuceriam suis præsidiis devincient: Puteolos verò, qui nunc in sua potestate sunt, suo jure libertateque utuntur, totos novo populo atque adventitiis copiis occupabunt.

XXXII. Tunc illud Campanæ vexillum coloniae, vehementer huic imperio timendum, Capuam a decemviris inferetur: tunc contra hanc Romam, communem patriam omnium nostrum, illa alte-

ra Roma quæretur. In id oppidum homines nefarii rempublicam nostram transferre conantur, quo in oppido majores vestri nullam omnino rempublicam esse voluerunt: qui tres solum urbes in terris omnibus, Carthaginem, Corinthum, Capuam statuerunt posse imperii gravitatem ac nomen sustinere. Deleta Carthago est, quod quum hominum copiis, tum ipsâ naturâ ac loco, succincta portubus, armata muris, excurrere ex Africa, imminere ita fructuosissimis insulis populi Romani videbatur. Corinthi vestigium vix relictum est: erat enim posita in angustiis atque in faucibus Græciæ, sic, ut terrâ claustra locorum teneret, & duo maria maximè navigationi diversa pene conjungeret, quum pertenui discrimine separentur. Hæc, quæ procul erant a conspectu imperii, non solum affligerunt, sed etiam, ne quando recreata exsurgere atque erigere se possent, funditus, ut dixi, sustulerunt.

88. De Capua multum est & diu consultum: exstant litteræ, Quirites, publicæ: sunt senatusconsulta complura. Statuerunt homines sapientes, si agrum Campanis ademissent; magistratus, senatum, publicum ex illa urbe consilium sustulissent; imaginem reipublicæ nullam reliquissent; nihil fore, quod Capuam time-

remus,

remus. Itaque hoc perscriptum in monumentis veteribus reperietis, ut esset urbs, quæ res eas, quibus ager Campanus coleretur, suppeditare posset: ut esset locus comportandis, condendisque fructibus: ut aratores, cultu agrorum defessi, urbis domiciliis uterentur; idcirco illa ædificia non esse deleta.

XXXIII. Videte quantum interval- lum sit interjectum inter majorum nostro- rum consilia, & inter istorum hominum dementiam. Illi Capuam, receptaculum aratorum, nundinas rusticorum, cellam atque horreum Campani agri esse volue- runt: hi, expulsis aratoribus, effusis ac dissipatis fructibus vestris, eandem Ca- puam sedem novæ reipublicæ constituunt; molem contra veterem rempublicam com- parant. Quòd si majores nostri existimas- sent, quemquam in tam illustri imperio, & tam præclara populi Romani discipli- na, M. Bruti, aut P. Rulli similem futu- rum (hos enim nos duos adhuc vide- mus, qui hanc rempublicam Capuam to- tam transferre vellent) profectò nomen illius urbis non reliquissent.

90. Verùm arbitrabantur, Corintho & Carthagini, etiam si senatum & magis- tratum sustulissent, agrumque civibus ade- missent, tamen non defore, qui illa re- stituerent, atque, qui antè omnia com- mutarent, quàm nos audire possemus;

hîc verò in oculis senatûs populique Romani nihil posse exsistere, quod non antè exstingui atque opprimi posset, quàm planè exortum ac natum esset. Neque verò ea res fefellit homines, divinâ mente & consilio præditos: nam post Q. Fulvium, Q. Fabium consules, quibus consulibus Capua devicta atque capta est, nihil est in ea urbe contra hanc rempublicam, non dico factum, sed nihil omnino est cogitatum. Multa postea bella gesta cum regibus, Philippo, Antiocho, Persa, Pseudophilippo, Aristonico, Mithridate, & ceteris: multa præterea bella gravia Carthaginiensium, Corinthium, Numantinum: multæ in hac republica seditiones domesticæ, quas prætermitto: bella cum sociis, Fregellanum, Marsicum: quibus omnibus domesticis externisque bellis Capua non modò non obfuit, sed opportunissimam se nobis præbuit, & ad bellum instruendum, & ad exercitus ornandos, & testis ac sedibus suis recipiendos.

91. Homines non inerant in urbe, qui malis concionibus, turbulentis senatusconsultis, iniquis imperiis rempublicam miscerent, & rerum novarum causam aliquam quærerent: neque enim concionandi potestas erat cuiquam, nec consilii capiendi publici: non gloriæ cupiditate efferebantur, propterea quòd, ubi honos publicè non est, ibi gloriæ cupiditas esse.

non potest : non contentione , non ambitione discordes : nihil enim supererat , de quo certarent : nihil , quod contrà peterent : nihil , ubi dissiderent. Itaque illam Campanam arrogantiam atque intolerandam ferociam , ratione & consilio majores nostri ad inertissimum & desidiosissimum otium perduxerunt. Sic & crudelitatis infamiam effugerunt , quòd urbem ex Italia pulcherrimam non sustulerunt : & multum in posterum providerunt , quòd , nervis urbis omnibus exsectis , urbem ipsam solutam ac debilitatam reliquerunt.

XXXIV. Hæc consilia majorum M. Bruto , ut antea dixi , reprehendenda , & P. Rullo visa sunt : neque te , Rulle , omnia illa M. Bruti , atque auspicia , a simili furore deterrent. Nam & ipse , qui deduxit , & qui magistratum Capuæ , ab illo creati , ceperunt , & qui aliquam partem illius deductionis , honoris , muneris attigerunt , omnes acerbissimas impiorum pœnas pertulerunt. Et quoniam Bruti , atque temporis illius feci mentionem , commemorabo id quod egomet vidi , quum venissem Capuam , coloniam deductam L. Considio , & Sext. Saltio ( quemadmodum ipsi loquebantur ) prætoribus ; ut intelligatis , quantam locus ipse afferat superbiam ; quæ paucis diebus , quibus illò colonia deducta fuit , perspicui atque intelligi potuit.

93. Nam primum, id quod dixi, quum ceteris in coloniis duumviri appellentur, hi se prætores appellari volebant. Quibus primus annus hanc cupiditatem attulisset, nonne arbitramini paucis annis fuisse consulum nomen appetituros? Deinde anteibant lictores, non cum bacillis, sed, ut hic prætoribus anteeunt, cum fascibus duobus: erant hostiæ majores in foro constitutæ, quæ ab his prætoribus de tribunali, sicut a nobis consulibus de consilii sententia probatæ, ad præconem & ad tibicinem immolabantur: deinde patres conscripti vocabantur. Jam verò vultum Considii videre, ferendum vix erat. Quem hominem vegrandi macie torridum, Romæ contemptum atque abjectum videbamus, hunc Capuæ Campano supercilio, ac regio spiritu quum videremus, Magios, Blossios mihi videbar illos videre, ac Jubellios.

94. Jam verò qui metus erat tunicatorum illorum? & in Albana, & Seplasia, quæ concursatio percunctantium, quid prætor edixisset? ubi cœnaret? quid enuntiaisset? Nos autem, hinc Româ qui veneramus, jam non hospites, sed peregrini atque advenæ nominabamur.

XXXV. Hæc qui prospexerint, majores nostros dico, Quirites, non eos in deorum immortalium numero venerandos a nobis & colendos putatis? Quid



enim viderunt ? hoc , quod nunc vos ; quæso , perspicite atque cognoscite. Non ingenerantur hominibus mores tam a stirpe generis , ac seminis , quam ex iis rebus , quæ ab ipsa natura loci , & a vitæ consuetudine suppeditantur ; quibus alimur , & vivimus. Carthaginieneses , fraudulentis & mendaces , non genere , sed naturâ loci , quod , propter portus suos , multis & variis mercatorum & advenarum sermonibus , ad studium fallendi , studio quæstûs vocabantur. Ligures , montani , duri atque agrestes : docuit ager ipse , nihil ferendo , nisi multâ culturâ , & magno labore quæsitum. Campani , semper superbi bonitate agrorum , & fructuum magnitudine , urbis salubritate , descriptione , pulchritudine. Ex hac copia , atque omnium rerum affluentia , primum illa nata sunt ; arrogantia , quâ a majoribus nostris alterum Capua consulem postulavit ; deinde ea luxuries , quæ ipsum Annibalem , armis etiam tum invictum , voluptate vicit.

96. Huc isti decemviri quum numerum colonorum ex lege Rulli deduxerint : centum decuriones , decem augures , sex pontifices constituerint : quos illorum animos , quos impetus , quam ferociam fore putatis ? Romam in montibus positam , & convallibus , coenaculis sublatam atque suspensam , non optimis viis , angustissimis semitis , præ sua Capua , pla-

nissimo in loco explicata, ac præ illis semitis irridebunt atque contemnent: agros verò, Vaticanum, & Pupiniam cum suis optimis atque uberibus campis conferendos scilicet non putabunt: oppidorum autem finitimorum illam copiam cum hac per risum, ac per jocum contendunt: Labicos, Fidenas, Collatiam, ipsum hercle Lanuvium, Ariciam, Tusculum, cum Calibus, Theano, Neapoli, Puteolis, Cumis, Pompeiis, Nuceria comparabunt.

97. Quibus illi rebus elati & inflati, fortasse non continuò, sed certè, si paulum assumpserint vetustatis ac roboris, non continebuntur: progredientur longius, efferentur. Singularis homo privatus, nisi magnâ sapientiâ præditus, vix facile sese regionibus officii, magnis in fortunis & copiis, continet; nedum isti, ab Rullo, & Rulli similibus conquisiti atque electi coloni, Capuæ, in domicilio superbiæ, atque in sedibus luxuriæ collocati, non statim conquisituri sint aliquid sceleris & flagitii: immo verò etiam hoc magis, quàm illi veteres germanique Campani, quòd in vetere fortuna illos natos, & educatos, nimix tamen rerum omnium copix depravabant; hi ex summa egestate, in eandem rerum abundantiam traducti, non solum copiâ, verum etiam insolentiâ commovebuntur.

XXXVI. Hæc tu, P. Rulle, M. Bru-

## DE LEGE AGRARIA. 199

ti sceleris vestigia , quàm monumenta  
majorum sapientiæ sequi maluisti : hæc tu  
cum istis tuis actoribus excogitasti , ut  
vetera vectigalia venderetis , & expila-  
retis nova : urbi Capuam ad certamen  
dignitatis opponeretis : ut sub vestrum  
jus , jurisdictionem , potestatem , urbes ,  
nationes , provincias , liberos populos ,  
reges , terrarum denique orbem subjun-  
geretis : ut , quum omnem pecuniam ex  
æratio exhausissetis , ex vectigalibus rede-  
gissetis , ab omnibus regibus , gentibus ,  
imperatoribus coëgissetis , tamen omnes  
vobis pecunias ad nutum vestrum pende-  
rent : ut iidem partim invidiosos agros a  
Sullanis possessoribus , partim desertos ac  
pestilentes , a vestris necessariis , & a vo-  
bismetipsis emptos , quanti velletis popu-  
lo Romano induceretis : ut omnia muni-  
cipia , coloniasque Italiæ novis colonis oc-  
cuparetis : ut quibuscumque in locis vobis  
videretur , ac quàm multis videretur , co-  
lonias collocaretis.

99. Ut omnem rempublicam vestris  
militibus , vestris urbibus , vestris præsi-  
diis cingeretis , atque oppressam tenere-  
tis : ut ipsum Cn. Pompeium , cujus præ-  
sidio sapissimè populus Romanus contra  
acerrimos hostes , & contra improbissi-  
mos cives victor exstitit , proscribere , at-  
que horum conspectu privare possetis :  
ut nihil auro & argento violari , nihil nu-

mero, & suffragiis declarari, nihil vi ac manu perfringi posset, quod non vos oppressum atque ereptum teneretis: ut volitaretis interea per gentes, per regna omnia cum imperio summo, cum iudicio infinito, cum omni pecunia: ut veniretis in castra Cn. Pompeii, atque ipsa castra, si commodum vobis esset, venderetis: ut interea magistratus reliquos, legibus omnibus soluti, sine metu iudiciorum, sine periculo petere possetis: ut nemo ad populum Romanum vos adducere, nemo producere, non senatus cogere, non consul coërcere, non tribunus plebis retinere posset.

100. Hæc ego vos concupiisse pro vestra stultitia, atque intemperantia non miror: sperasse, me consule, assequi posse, demior. Nam quum omnium consulum gravis in republica custodienda cura ac diligentia debet esse, tum eorum maximè, qui non in cunabulis, sed in campo sunt consules facti: nulli populo Romano pro me majores mei sponderunt: mihi creditum est: a me petere quod debeo, me ipsum appellare debetis. Quemadmodum, quum petebam, nulli me vobis auctores generis mei commendarunt; sic, si quid deliquero, nullæ sunt imagines, quæ me a vobis deprecentur.

XXXVII. Quare, modò ut vita sup-

petat, quamquam ego sum is, qui eam possim ab istorum scelere insidiisque defendere, polliceor hoc vobis, Quirites, bonâ fide: rempublicam vigilantî hominî, non timîdo; diligenti, non ignavo commisistis. Ego is consul, qui concionem metuam? qui tribunum plebis perhorrescam? qui sæpe, & sine causa tumultuer? qui timeam, ne mihi in carcere habitandum sit, si tribunus plebis duci jussisset? Ego nondum vestris armis armatus, insignibusque amplissimis ornatus, imperio, auctoritate, non horruî in hunc locum progredi, vobisque auctoribus improbitati hominis resistere: nunc verear, ne respublica tantis munita præsiidiis, ab istis vinci, aut opprimi possit? Si antea timuisssem; hac concione, hoc populo, certè non vererer. Quis enim umquam tam secundâ concione legem agrariam suasit, quàm ego dissuasi? si hoc dissuadere est, ac non disturbare, ac pervertere.

102. Ex quo intelligi, Quirites, potest, nihil esse tam popolare, quàm id, quod ego vobis in hunc annum consul popularis affero, pacem, tranquillitatem, otium. Quæ nobis designatis timebatis, ea ne accidere possent, consilio meo ac ratione provisâ sunt: non modò vos eritis in otio, qui semper esse volueritis, verùm etiam istos quibus otiosi negotium

facessimus, otiosissimos reddam. Etenim illis honores, potestates, divitiæ, ex tumultu atque ex dissensionibus civium comparari solent: vos, quorum gratia in suffragiis consistit, libertas in legibus, honos in judiciis & æquitate magistratûs, & res familiares in pace, omni ratione otium tenere debetis.

103. Nam, si ii, qui propter desidiam in otio vivunt, tamen in sua turpi inertia capiunt voluptatem: sub ipso otio, quo vos fortunam regitis, si hunc statum, quem habetis, esse meliorem non ignoratis, non ut quæsitum, sed vitâ partum otium tenueritis. Quod ego & concordia, quam mihi constitui cum collega, invitissimis iis hominibus, quos in consulatu inimicos esse & animis & corporis actibus providi: omnibus prospexi sanè, & revocavi: idem tribunis plebis denuntiavi, quid turbulenti, me consule, conflarent. Summum & firmissimum est illud communibus fortunis præsidium, Quirites, ut, quales vos hodierno die maximâ concione mihi pro salute vestra præbuisstis, tales reliquis temporibus reipublicæ præbeatis. Pro certo polliceor hoc vobis atque confirmo, me esse perfecturum, ut jam tandem illi, qui honori inviderunt meo, tamen vos universos in consule deligendo plurimum vidisse fateantur.

---

# DE LEGE AGRARIA AD POPULUM.

## ORATIO DECIMA SEPTIMA

Quæ tertia contra Rullum.

I. **C**OMMODIUS fecissent tribuni plebis, Quirites, si, quæ apud vos de me deferunt, ea coram potius, me præsentem, dixissent: nam & æquitatem vestræ disceptationis, & consuetudinem superiorum, & jus suæ potestatis retinuissent. Sed quoniam adhuc præsens certamen contentionemque fugerunt, nunc, si videtur eis, in meam concionem prodeant, &, quod provocati a me venire noluerunt, revocati saltem revertantur.

2. Video quosdam, Quirites, strepitum significare nescio quid, & non eosdem vultus, quos proximâ meâ concione præbuerunt, in hanc concionem mihi retulisse. Quare a vobis, qui nihil de me credidistis, ut eam voluntatem, quam semper habuistis erga me, retineatis, peto: a vobis autem, quos leviter immutatos esse sentio, parvam exigui temporis usuram bonæ de me opinionis postulo, ut

eam, si quæ dixero, vobis probabo, perpetuò retineatis; sin aliter, hoc ipso in loco depositam atque abjectam relinquatis.

3. Completi sunt animi, auresque vestrae, Quirites, me gratificantem septem tyrannis, ceterisque Sullanarum assignationum possessoribus, agrariæ legi & commodis vestris obsistere. Hæc si qui crediderunt, illud prius crediderint necesse est, hac lege agrariâ, quæ promulgata sit, adimi Sullanos agros, vobisque dividi, aut denique minui privatorum possessiones, ut in eas vos deducamini. Si ostendo, non modò non adimi cuicumque glebam de Sullanis agris, sed etiam genus id agrorum, certo capite legis impudentissimè confirmari atque sanciri: si doceo, agris his, qui a Sulla sunt dati, sic diligenter Rullum suâ lege consulere, ut faciliè appareat, eam legem, non a vestrorum commodorum patrono, sed a Valgii genero esse conscriptam: num quid est causæ, Quirites, quin illâ criminatione, quâ in me absentem usus est, non solum meam, sed etiam vestram diligentiam, prudentiamque depexerit?

II. Caput est legis XL, de quo ego consultò, Quirites, neque apud vos antè feci mentionem, ne aut refricare obduc-tam jam reipublicæ cicatricem viderer,



aut aliquid alienissimo tempore novæ diffensionis commoverè. Neque verò nunc ideo disputabo, quòd hunc statum reipublicæ non magnopere defendendum putem; præsertim qui otii & concordiaë patronum me in hunc annum reipublicæ professus sim; sed ut doceam Rullum posthac in his saltem tacere rebus, in quibus de se & de suis factis taceri velit.

5. Omnium legum iniquissimam, dissimillimamque legis, esse arbitror eam, quam L. Flaccus, interrex, de Sulla tulit, *ut omnia, quæcumque ille fecisset, essent rata*. Nam quum ceteris in civitatibus, tyrannis institutis, leges omnes extinguantur atque tollantur, hic reipublicæ tyrannum lege constituit. Est invidiosa lex, sicut dixi: verumtamen habet excusationem: non enim videtur hominis lex esse, sed temporis.

6. Quid, si est hæc multò impudentior? Nam Valeriâ lege, Corneliisque legibus eripitur, quum datur: conjungitur impudens gratificatio cum acerba injuria: sed tamen habet in illis legibus spem nonnullam ille, cui ademptus est; aliquem scrupulum, cui datus est. Rulli cautio est hæc, *Quæ post C. Marium, Cn. Papirium, consules*. Quàm procul a suspicione fugit, quòd eos consules, qui adversarii Sullæ maximè fuerunt, potissi-

mum nominavit ? Si enim Sullam dictatorem nominasset ; perspicuum fore , & invidiosum , arbitratus est. Sed quem vestrum tam tardo ingenio fore putavit , cui post eos consules , Sullam dictatorem fuisse , in mentem venire non posset ?

7. Quid ergo ait Marianus tribunus plebis , qui nos Sullanos in invidiam rapit ? *Quæ post Marium & Carbonem consules agri , ædificia , lacus , stagna , loca , possessiones , cælum & mare prætermisit , cetera complexus est. Publicè data , assignata , vendita , concessa sunt. A quo , Rulle ? Post Marium & Carbonem consules , quis assignavit ? quis dedit ? quis concessit , præter Sullam ? Ea omnia eo jure sint. Quo jure ? labefactat videlicet nescio quid : nimium acer , nimium vehemens tribunus plebis Sullana rescindit. Ut quæ optimo jure privata sint. Etiamne meliore , quàm paterna & avita ? meliore.*

8. At hoc Valeria lex non dicit : Corneliæ leges non fanciunt : Sulla ipse non postulat. Si isti agri partem aliquam juris , aliquam similitudinem propriæ possessionis , aliquam spem diuturnitatis attingunt ; nemo est tam impudens istorum , quin agi secum præclare arbitretur. Tu verò , Rulle , quid quæris ? quod habent , ut habeant ? quis vetat ? ut privatum ? at

## *DE LEGE AGRARIA. 207*

ita latum est , ut melior tui soceri fundus Irpinus sit , sive ager Irpinus ( totum enim possidet ) quàm meus paternus avitusque fundus Arpinas.

9. Id enim caves : optimo enim jure ea sunt profectò prædia , quæ optimâ conditione sunt. Libera , meliore jure sunt , quàm serva : capite hoc , omnia , quæ serviebant , non servient. Soluta meliore in causa sunt , quàm obligata : eodem capite obligata omnia , si modò Sullana sunt , liberantur. Immunia , commodiore conditione sunt , quàm illa , quæ pensitant. Ego Tusculanis pro aqua Crabra vectigal pendam , quia a municipio fundum accepi : si a Sulla mihi datus esset , Rulli lege non penderem.

III. Video vos , Quirites , sicuti res ipsa cogit , commoveri vel legis , vel orationis impudentiâ : legis , quæ jus melius Sullanis prædiis constituat , quàm paternis ; orationis , quæ ejusmodi causâ insimulare quemquam audeat , rationes Sullæ nimium vehementer defendere. At si illa solum sanciret , quæ a Sulla essent data , tacerem ; modò ipse se Sullanum esse confiteretur. Sed non modò illis cavet ; verum etiam aliud quoddam genus donationis inducit : & is , qui a me Sullanas possessiones defendi criminatur , non eas solum sancit ; verum ipse novas

assignationes instituit , & repentinus Sulla nobis exoritur.

11. Nam attendite , quantas concessionibus agrorum hic noster objurgator uno verbo facere conetur. *Quæ data , donata , concessa , vendita.* Patior : audio. Quid deinde ? *possessa.* Hæc tribunus plebis promulgare ausus est , ut , quod quisque post Marium & Carbonem consules possidet , id eo jure teneret , quo qui optimo privatum ? Etiamne si vi ejecit ? etiamne si clam , si precario venit in possessionem ? Ergo hac lege jus civile , causæ possessionum , prætorum interdicta tollentur.

12. Non mediocris res , neque parvum sub hoc verbo furtum , Quirites , latet. Sunt enim multi agri lege Corneliâ publicati , nec cuiquam assignati , neque venditi , qui a paucis hominibus impudentissimè possidentur : his cavet , hos defendit , hos privatos facit : hos , inquam , agros , quos Sulla nemini dedit , Nullus non vobis assignare vult , sed eis condonare , qui possident. Causam quæro , cur ea quæ majores vobis in Italia , Sicilia , duabus Hispaniis , Macedonia , Asia quæsiverunt , venire patiamini , quum ea , quæ vestra sunt , condonari possessoribus eadem lege videatis.

13. Jam totam legem intelligetis , quum

ad paucorum dominationem scripta sit ,  
tum ad Sullanæ assignationis rationes esse  
accommodatissimam. Nam focer hujus  
vir multum bonus est : neque ego nunc  
de illius bonitate , sed de generi impu-  
dientia disputo : ille enim , quod habet ,  
retinere vult ; neque se Sullanum esse  
dissimulat.

IV. Hic , ut ipse habeat quod non  
habet , quæ dubia sunt , per vos sancire  
vult : & , quum plus appetat , quàm ip-  
se Sulla ; quibus ego rebus resisto ; Sul-  
lanas res defendere criminor. Habet a-  
gros nonnullos , inquit , focer meus de-  
sertos atque longinquos ; vendet eos meâ  
lege , quanti volet : habet incertos , ac  
nullo jure possessos ; confirmabuntur op-  
timo jure : habet publicos ; reddam pri-  
vatos : denique eos fundos , quos in agro  
Casinati optimos & fructuosissimos conti-  
nuavit , quum usque eò vicinos proscri-  
beret , quoad oculis confirmando ex mul-  
tis prædiis unam fundi regionem formam-  
que perfecerit ; quos nunc cum aliquo  
metu tenet , sine ulla cura possidebit.

15. Et quoniam , qua de causâ , &  
quorum causâ ille hoc promulgavit , of-  
tendi ; doceat ipse , num ego quem pos-  
sessorem defendam , quum agrariæ legi  
resisto. Silvam Scantiam vendis : respu-  
blica possidet : defendo. Campanum a-

grum dividis : vos estis in possessione : non cedo. Deinde Italiæ, Siciliae, ceterarumque provinciarum possessiones, venales ac proscriptas hac lege video : vestra sunt prædia, vestrae possessiones : resistam, atque repugnabo ; neque patiar, a quoquam populum Romanum de suis possessionibus, me consule, demoveri : præsertim quum vobis nihil quærat.

16. Hoc enim vos in errore versari diutius non oportet. Num quis vestrum ad vim, ad facinus, ad cædem accommodatus est ? nemo. Atqui ei generi hominum, mihi credite, Campanus ager, & præclara illa Capua servatur : exercitus contra vos, contra libertatem vestram, contra Cn. Pompeium constituitur : contra hanc urbem, Capua : contra vos, manus hominum audacissimorum : contra Cn. Pompeium, decem duces comparantur. Veniant coram, & quoniam me in vestram concionem, vobis flagitantibus, convocaverunt, differant.





PRO C. RABIRIO,  
PERDUELLIONIS REO,  
AD QUIRITES.

ORATIO DECIMA OCTAVA:

*Anno urbis 653. L. Saturnino, tribuno plebis, seditionem in rep. movente, senatusconsultum factum erat, ut coff. C. Marius sextum, & L. Valerius Flaccus viderent ne quid resp. detrimenti caperet. Itaque Saturninus & Glaucia statim fuerant interfecti: caput autem Saturnini C. Rabirius, senator, per convivia circumtulisse dicebatur. Quare postea, Cicerone consule, accusatus fuit a T. Labieno, tribuno plebis, cujus patruus Q. Labienus cum Saturnino occisus fue-*

*rat. De hac causa Cicero in Pisōnem hæc habet : Ego in C. Rabirio , perduellionis reo , quadraginta annis ante me consulem interpositam senatûs auctoritatem sustinui contra invidiam , atque defendi. De hac eadem in Oratore : Jus omne retinendæ majestatis Rabirii causâ continebatur : ergo in omni genere amplificationis exarsimus.*

I. **E**T S I , Quirites , non est meæ consuetudinis , initio dicendi rationem reddere , qua de causa quemque defendam , propterea quòd cum omnibus civibus in eorum periculis semper satis justam mihi causam necessitudinis esse duxi : tamen in hac defensione capitis , famæ , fortunarumque omnium C. Rabirii , proponenda ratio videtur esse officii mei ; propter ea quòd , quæ justissima mihi causa ad hunc defendendum esse visa est , eadem vobis ad absolvendum debet videri.

2. Nam me quum amicitiae vetustas , tum dignitas hominis , tum ratio humanitatis , tum meæ vitæ perpetua consuetudo , ad C. Rabirium defendendum est adhortata : tum verò , ut id studiosissimè



facerem, salus reipublicæ, consulare officium, consulatus denique ipse, mihi unâ vobiscum cum salute reipublicæ commendatus, coëgit. Non enim C. Rabirium culpa delicti, non invidia, vitæque turpitudine, non denique veteres, justæ, gravesque inimiciæ civium, in discrimen capitis vocaverunt: sed ut illud summum auxilium majestatis atque imperii, quod nobis a majoribus est traditum, de reipublica tolleretur; ut nihil posthac auctoritas senatûs, nihil consulare imperium, nihil consensio bonorum contra pestem ac perniciem civitatis valeret; idcirco in his rebus evertendis unius hominis senectus, infirmitas, solitudoque tentata est.

3. Quamobrem, si est boni consulis, quum cuncta auxilia reipublicæ labefacta, convellique videat; ferre opem patriæ, succurrere saluti, fortunisque communibus, implorare civium fidem, suam salutem posteriorem salute communi ducere; est etiam bonorum & fortium civium, quales vos omnibus reipublicæ temporibus exististis, intercludere omnes seditionum vias, munire præsidia reipublicæ, summum in consulibus imperium, summum in senatu consilium, putare: eâ qui secutus sit, laude potius & honore, quam pœnâ & supplicio, dignum judicare. Quamobrem labor in hoc defen-

dendo præcipuè meus est : studium verò conservandi hominis commune mihi vobiscum esse debet.

II. Sic enim existimare debetis, Quirites, post hominum memoriam rem nullam majorem, magis periculofam, magis ab omnibus vobis providendam, neque a tribuno plebis susceptam, neque a consule defensam, neque ad populum Romanum esse delatam. Agitur enim nihil aliud in hac causa, Quirites, quàm ut nullum sit posthac in republica publicum consilium; nulla bonorum consensus contra improborum furorem & audaciam; nullum extremis reipublicæ temporibus perfugium & præsidium salutis.

5. Quæ quum ita sint, primùm, quod in tanta dimicatione capitis, famæ, fortunarumque omnium fieri necesse est, ab Jove Optimo Maximo, ceterisque diis deabusque immortalibus, quorum ope & auxilio multò magis hæc reipublica, quàm ratione hominum & consilio gubernatur, pacem ac veniam peto; precorque ab iis, ut hodiernum diem, & ad hujus salutem conservandam, & ad rempublicam constituendam, illuxisse patiantur. Deinde vos, Quirites, quorum potestas proximè ad deorum immortalium numen accedit, oro atque obsecro, quoniam uno tempore vita C. Rabirii, hominis miser-

rimi atque innocentissimi, salus reipublicæ, vestris manibus suffragiisque permittitur, adhibeatis in hominis fortunis misericordiam, in reipublicæ salute sapientiam, quam soletis.

6. Nunc, quoniam, T. Labiene, diligentiae meae temporis angustiis obstitisti, meque, ex comparato & constituto spatio defensionis, in semihoræ curriculum coëgisti, parebitur, &, quod iniquissimum est, accusatoris conditioni; &, quod miserrimum, inimici potestati. Quamquam in hac præscriptione semihoræ, patroni mihi partes reliquisti; consulis, admissi: propterea quod ad defendendum propemodum satis erit hoc mihi temporis, verum ad conquerendum parum.

7. Nisi fortè de locis religiosis, ac de lucis, quos ab hoc violatos esse dixisti, pluribus verbis tibi respondendum putas: quo in crimine nihil est umquam abs te dictum, nisi a C. Macro objectum esse crimen id C. Rabirio. In quo ego demorror, meminisse te, quid objecerit C. Rabirio Macer inimicus; oblitum esse, quid æqui & jurati judices judicarint.

III. An de peculatu facto, an de tabulario incenso, longa oratio est expro-menda? quo in crimine propinquus C. Rabirii judicio clarissimo C. Curius pro virtute sua est honestissimè liberatus: ipse

verò Rabirius non modò in iudicium horum criminum , sed ne in tenuissimam quidem suspicionem verbo est umquam vocatus. An de sororis filio diligentius respondendum est ? quem ab hoc necatum esse dixisti , quum ad iudicii moram familiaris funeris excusatio quæreretur. Quid enim est tam verisimile , quàm cariorem huic sororis maritum , quàm sororis filium fuisse ? atque ita cariorem , ut alter vitâ crudelissimè privaretur , quum alteri ad prolationem iudicii biduum quæreretur ? An de servis alienis contra legem Fabiam retentis , aut de civibus Romanis contra legem Porciam verberatis , aut necatis , plura dicenda sunt , quum tanto studio C. Rabirius totius Apuliæ , singulari voluntate Campaniæ vicinitatis ornetur ? quumque ad ejus propulsandum periculum non modò homines , sed propè regiones ipsæ concurrerint , aliquantò etiam latius excitatæ , quàm ipsius vicinitatis nomen ac termini postulabant ?

9. Nam quid ego ad id longam orationem comparem , quod est in eadem multæ irrogatione præscriptum , hunc nec suæ , nec alienæ pudicitiae pepercisse ? Quin etiam suspicor , eò mihi semihoram a Labieno præstitutam esse , ut ne plura de pudicitia dicerem. Ergo ad hæc crimina , quæ patroni diligentiam deside-  
rant ,

rant, intelligis mihi semihoram istam nimium longam fuisse: illam alteram partem de nece Saturnini, nimis exiguam atque angustam esse voluisti; quæ non oratoris ingenium, sed consulis auxilium implorat & flagitat.

10. Nam de perduellionis judicio, quod a me sublatum esse criminari soles, meum crimen est, non Rabirii: quod utinam, Quirites, ego id aut primus, aut solus ex hac republica sustulissem! utinam quod ille crimen esse vult, proprium testimonium meæ laudis esset! Quid enim optari potest, quod ego mallet, quàm me in consulatu meo carnificem de foro, crucem de campo sustulisse? Sed ista laus primum est majorum nostrorum, Quirites, qui, expulsis regibus, nullum in libero populo vestigium crudelitatis regiae retinuerunt: deinde multorum virorum fortium, qui vestram libertatem non acerbitate suppliciorum infestam, sed lenitate legum munitam esse voluerunt.

IV. Quamobrem uter nostrum tandem, Labiene, popularis est? tune, qui civibus Romanis in concione ipsa carnificem, qui vincla adhiberi putas oportere; qui in campo Martio, comitiis centuriatis, auspiciato in loco, crucem ad civium supplicium defigi & constitui jubes: an ego, qui funestari concionem contagione

carnificis veto ? qui expiandum forum populi Romani ab illis nefarii sceleris vestigiis esse dico ? qui castam concionem , sanctum campum , inviolatum corpus , omnium civium Romanorum integrum jus libertatis defendo servari oportere ?

12. Popularis verò tribunus plebis , custos defensorque juris & libertatis ! Porcia lex virgas ab omnium civium Romanorum corpore amovit : hic misericors flagella retulit. Porcia lex libertatem civium licitori eripuit : Labienus homo popularis , carnifici tradidit. C. Gracchus legem tulit , ne de capite civium Romanorum injussu vestro judicaretur : hic popularis a duumviris , injussu vestro , non judicari de cive Romano , sed indictâ causâ civem Romanum capitis condemnari coëgit.

13. Tu mihi etiam legis Porciæ , tu C. Gracchi , tu horum libertatis , tu cujusdam denique hominis popularis mentionem facis , qui non modò suppliciis inusitatis , sed etiam verborum inauditâ crudelitate , violare libertatem hujus populi , tentare mansuetudinem , commutare disciplinam conatus es ? Namque hæc tua , quæ te hominem clementem popularemque delectant , *I licitor , colliga manus* : quæ non modò hujus libertatis , mansuetudinisque non sunt , sed ne Romuli quidem , aut Numæ Pompilii ; sed

Tarquinius, superbissimi atque crudelissimi regis, ista sunt cruciatus carmina; quæ tu, homo lenis ac popularis, libentissime commemoras, *Caput obnubito, arbori infelici suspendito*: quæ verba, Quirites, jampridem in hac republica non solum tenebris vetustatis, verum etiam luce libertatis oppressa sunt.

V. An verò, si actio ista popularis esset, & si ullam partem æquitatis haberet, aut juris, C. Gracchus eam reliquisset? Scilicet tibi graviolem dolorem patruî tui mors attulit, quàm C. Graccho, fratris: & tibi acerbior ejus patruî mors est, quem numquam vidisti, quàm illi, ejus fratris, quicum concordissime vixerat: & similis viri tu ulcisceris patruî mortem, atque ille persequeretur fratris sui, si istâ ratione agere voluisset: & par desiderium sui reliquit apud populum Romanum Labienus iste, patruus vester, quisquis fuit, ac Tib. Gracchus reliquerat? An pietas tua major, quàm Gracchi? an animus? an consilium? an opes? an auctoritas? an eloquentia? quæ si in illo minima fuissent, tamen præ tuis facultatibus maxima putarentur.

15. Quum verò his rebus omnibus C. Gracchus omnes vicerit: quantum intervallum tandem inter te atque illum interjectum putas? Sed moreretur prius acerbissimâ morte millies Gracchus;

quàm in ejus concione carnifex consisteret : quem non modò foro , sed etiam cœlo hoc , ac spiritu censoriæ leges , atque urbis domicilio carere voluerunt. Hic se popularem dicere audet , me alienum a commodis vestris ; quum iste omnes & suppliciorum , & verborum acerbitates , non ex memoria vestra , ac patrum vestrorum , sed ex annalium monumentis , atque ex regum commentariis conquisierit : ego omnibus meis opibus , omnibus consiliis , omnibus dictis atque factis repugnarim & restiterim crudelitati ! Nisi fortè hanc conditionem vobis esse vultis , quam servi , si libertatis spem propositam non haberent , ferre nullo modo possent.

16. Misera est ignominia judiciorum publicorum , misera multatio bonorum , miserum exsilium ; sed tamen in omni calamitate retinetur aliquod vestigium libertatis : mors denique si proponitur , in libertate moriamur : carnifex verò , & obductio capitis , & nomen ipsum crucis , absit non modò a corpore civium Romanorum , sed etiam a cogitatione , oculis , auribus : harum enim omnium rerum , non solum eventus atque perpessio , sed etiam conditio , expectatio , mentio ipsa denique , indigna cive Romano , atque homine libero est. An verò servos nostros horum suppliciorum



omnium metu , dominorum benignitas  
unâ vindictâ liberabit : nos a verberibus ,  
ab unco , a crucis denique terrore ; ne-  
que res gestæ , neque acta ætas , neque  
nostri honores vindicabunt ?

17. Quamobrem fateor , atque etiam ,  
T. Labiene , profiteor , & præ me fero ,  
te ex illa crudeli , importuna , non tribu-  
nitia actione , sed regia , meo consilio ,  
virtute , auctoritate esse depulsum. Qua  
tu in actione , quamquam omnia exem-  
pla majorum , omnes leges , omnem auc-  
toritatem senatûs , omnes religiones at-  
que auspiciorum publica jura neglexisti ;  
tamen a me hæc in hoc tam exiguo meo  
tempore non audies : liberum tempus  
nobis dabitur ad istam disceptationem.  
Nunc de Saturnini crimine , ac de clarissi-  
mi patruî tui morte dicemus.

VI. Arguis occisum esse a C. Rabirio  
L. Saturninum : & id C. Rabirius mul-  
torum testimoniis , Q. Hortensio copio-  
sissimè defendente , antea falsum esse  
docuit. Ego autem , si mihi esset inte-  
grum , susciperem hoc crimen , agnosce-  
rem , confiterer. Utinam hanc mihi fa-  
cultatem causa concederet , ut possem  
hoc prædicare , C. Rabirii manu L. Sa-  
turninum , hostem populi Romani , inter-  
fectum ! Nihil me clamor iste commo-  
vet , sed consolatur , quum indicat esse  
quosdam cives imperitos , sed non mul-

tos : numquam , mihi credite , populus Romanus hic , qui silet , consulem me fecisset , si vestro clamore perturbatum iri arbitraretur. Quantò jam levior est acclamatio ! quin continetis vocem , indicem stultitiæ vestræ , testem paucitatis ?

19. Libenter , inquam , confiterer , si verè possem , aut etiam si mihi esset integrum , C. Rabirii manu L. Saturninum esse occisum ; & id facinus pulcherrimum esse arbitrarer : sed , quoniam id facere non possum , confitebor id , quod ad laudem minùs valebit , ad crimen non minùs. Confiteor , interficiendi Saturnini causâ , C. Rabirium arma cepisse. Quid est , Labiene ? quam a me graviores confessionem , aut quod in hunc majus crimen expectas ? Nisi verò interesse aliquid putas inter eum , qui hominem occidit , & eum , qui cum telo occidendi hominis causâ fuit. Si interfici Saturninum nefas fuit ; arma sumpta esse contra Saturninum sine scelere non possunt : si arma jure sumpta concedis ; interfectum jure concedas necesse est. \*\*\*

*Paucula quædam deesse videntur.*

VII. Fit senatusconsultum , ut C. Marius , L. Valerius consules , adhiberent tribunos plebis & prætores , quos eis videretur ; operamque darent , ut imperium populi Romani majestafque conservaretur. Adhibent omnes tribunos plebis præter Saturninum , omnes prætores præ-

ter Glauciam : qui rempublicam salvam esse vellent arma capere , & se sequi jubent. Parent omnes : ex ædificiis armamentariisque publicis arma populo Romano , C. Mario consule distribuentur. Hic jam , ut omittam cetera , de te ipso , Labiene , quæro : quum Saturninus Capitolium teneret armatus , esset unà C. Glaucia , C. Sauscius , etiam ille ex compedibus atque ergastulo Gracchus : addam ( quoniam ita vis ) eodem Q. Labienum , patrum tuum : in foro autem C. Marius , & L. Valerius Flaccus consules , post cunctus senatus , atque ille senatus , quem etiam vos ipsi , qui hos patres conscriptos , qui nunc sunt , in invidiam vocatis , quò facilius de hoc senatu detrahere possitis , laudare consuevistis : quum equester ordo ; at quorum equitum Romanorum , dii immortales ! patrum nostrorum , atque ejus ætatis , quæ tum magnam partem reipublicæ , atque omnem dignitatem judiciorum tenebat : quum omnes omnium ordinum homines , qui in salute reipublicæ salutem suam repositam esse arbitrabantur , arma cepissent : quid tandem C. Rabirio faciendum fuit ?

21. De te ipso , inquam , Labiene , quæro : quum ad arma consules ex senatusconsulto vocavissent : quum armatus M. Æmilius , princeps senatûs in comi-

tio constitisset ; qui , quum ingredi vix posset , non ad insequendum sibi tarditatem pedum , sed ad fugiendum , impedimento fore putabat : quum denique Q. Scævola , confectus senectute , perditus morbo , mancus , & membris omnibus captus ac debilis , hastili nixus , & animi vim , & infirmitatem corporis ostenderet : quum L. Metellus , Servius Galba , C. Serranus , P. Rutilius , C. Fimbria , Q. Catulus , omnesque , qui tum erant , consulares , pro salute communi arma cepissent : quum omnes prætores , cuncta nobilitas ac juventus accurreret , Cn. & L. Domitii , L. Crassus , Q. Mucius , C. Claudius , M. Drusus : quum omnes Octavii , Metelli , Julii , Cassii , Catones , Pompeii : quum L. Philippus , L. Scipio , quum M. Lepidus , quum D. Brutus , quum hic ipse P. Servilius , quo tu imperatore , Labiene , meruisti : quum hic Q. Catulus , admodum tum adolescens , quum hic C. Cusio , quum denique omnes clarissimi viri cum consulibus essent : quid tandem C. Rabirium facere convenit ? utrum inclusum atque abditum latere in occulto , atque ignaviam suam , tenebrarum ac parietum custodiis tegere ; an in Capitolium pergere , atque ibi se cum tuo patruo , & ceteris , ad mortem , propter vitæ turpitudinem , confugientibus , congregare ? an cum Mario ,

Scauro, Catulo, Metello, Scævola, cum bonis denique omnibus coire non modò salutis, verùm etiam periculi societatem?

VIII. Tu denique, Labiene, quid faceres tali in re, ac tempore? quum ignaviæ ratio te in fugam atque in latebras impelleret; improbitas & furor L. Saturnini in Capitolium arcefferet; consules ad patriæ salutem ac libertatem vocarent: quam tandem auctoritatem, quam vocem, cujus sectam sequi, cujus imperio parere potissimùm velles? Patruus, inquit, meus cum Saturnino fuit. Quid? pater quicum? quid? propinqui vestri, equites Romani? quid? omnis præfectura, regio, vicinitas vestra? quid? ager Picenus universus, utrùm tribunitiū furorem, an consularem auctoritatem secutus est?

23. Equidem hoc affirmo, quod tu nunc de tuo patruo prædicas, neminem umquam adhuc de sese esse confessum: nemo est, inquam, inventus tam profligatus, tam perditus, tam ab omni non modò honestate, sed etiam simulatione honestatis relictus, qui se in Capitolio fuisse cum Saturnino fateretur. At fuit vester patruus. Fuerit: & fuerit nullâ desperatione rerum suarum, nullis domesticis vulneribus coactus: induxerit eum L. Saturnini familiaritas, ut amicitiam patriæ præponeret: idcircone oportuit C. Rabirium desciscere a republica? non compa-

rere in illa armata multitudine bonorum? consulum voci atque imperio non obedire? Atqui videmus, hæc in rerum natura tria fuisse; ut aut cum Saturnino esset, aut cum bonis, aut lateret. Latere, mortis erat instar turpissimæ; cum Saturnino esse, furoris & sceleris: virtus, & honestas, & pudor cum consulibus esse co-gebat. Hoc tu igitur in crimen vocas, quod cum iis fuerit C. Rabirius, quos amentissimus fuisset, si oppugnasset; turpissimus, si reliquisset?

IX. At C. Decianus, de quo tu sæpe commemoras, quia, quum hominem omnibus insignem notis turpitudinis, P. Furium, accusaret summo studio bonorum omnium, queri est ausus in concione de morte Saturnini, condemnatus est: & Sex. Titius, quod habuit imaginem L. Saturnini domi suæ, condemnatus est. Statuerunt equites Romani illo iudicio, improbum civem esse, & non retinendum in civitate, qui hominis, hostilem in modum seditiosi, imagine aut mortem ejus honestaret, aut desideria imperitorum misericordiâ commoveret, aut suam significaret imitandæ improbitatis voluntatem.

25. Itaque mihi mirum videtur, unde hanc tu, Labiene, imaginem, quam habes, inveneris: nam Sex. Titio dam-nato, qui istam habere auderet, inventus est nemo. Quod tu si audisses, aut si

per ætatem scire potuisses : numquam profectò istam imaginem , quæ domi posita , pestem atque exsilium Sex. Titio attulisset , in rostra , atque in concionem attulisses ; nec tuas umquam rationes ad eos scopulos appulisses , ad quos Sex. Titii afflictam navem , & in quibus C. Deciani naufragium fortunarum videres. Sed in his rebus omnibus imprudentiâ laberis : causam enim suscepisti antiquiorem memoriâ tuâ ; quæ causa antè mortua est , quàm tu natus esses : qua in causa tute profectò fuisses , si per ætatem esse potuisses , eam causam in iudicium vocas.

26. An non intelligis , primùm quos homines , & quales viros mortuos summi sceleris arguas ? deinde quot ex iis , qui vivunt , eodem crimine in summum capitis periculum arceffas : Nam si C. Rabirius fraudem capitalem admisit , quoddam arma contra L. Saturninum tulit ; huic quidem afferet aliquam deprecationem periculi ætas illa , quâ tum fuit : Q. verò Catulum , patrem hujus , in quo summa sapientia , eximia virtus , singularis humanitas fuit ; M. Scaurum , illâ gravitate , illo consilio , illâ prudentiâ ; duos Mucios , L. Crassum , M. Antonium , qui tum extra urbem cum præsidio fuit ; quorum in hac civitate longè maxima consilia , atque ingenia fuerunt : ceteros pari digni-

tate præditos , custodes gubernatoresque reipublicæ , quemadmodum mortuos defendemus ? Quid de illis honestissimis viris , atque optimis civibus , equitibus Romanis dicemus , qui tum unà cum senatu salutem reipublicæ defenderunt ? quid de tribunis ærariis , ceterorumque ordinum omnium hominibus , qui tum arma pro communi libertate ceperunt ?

X. Sed quid ego de iis omnibus , qui consulari imperio paruerunt , loquor ? de ipsorum consulum fama quid futurum est ? L. Flaccum , hominem quum semper in republica , tum in magistratibus gerendis , in sacerdotio , cæremoniisque , quibus præerat , diligentissimum , nefarii sceleris ac parricidii mortuum condemnabimus ? adjungemus ad hanc labem ignominiamque mortis , etiam C. Marii nomen ? C. Marium , quem verè patrem patriæ , parentem , inquam , vestræ libertatis , atque hujusce reipublicæ possumus dicere , sceleris ac parricidii nefarii mortuum condemnabimus ?

28. Etenim , si C. Rabirio , quòd iit ad arma , crucem T. Labienus in campo Martio defigendam putavit : quod tandem excogitabitur in eum supplicium , qui vocavit ? Ac , si fides Saturnino data est , quod abs te sæpissime dicitur : non eam C. Rabirius , sed C. Marius dedit ; idemque violavit , si in fide non stetit. Quæ



fides, Labiene, quî potuit sine senatus-consulto dari? Adeone hospes hujusce urbis, adeone ignarus es disciplinæ, consuetudinisque nostræ, ut hæc nescias? ut peregrinari in aliena civitate, non in tua magistratum gerere videare?

29. Quid jam ista C. Mario, inquit; nocere possunt, quoniam sensu & vitâ caret? Itane verò? tantis in laboribus C. Marius, periculisque vixisset, si nihil longius, quàm vitæ termini postulabant, spe atque animo de se, & gloriâ suâ cogitasset? At credo, quum innumerabiles hostium copias in Italia fudisset, atque obsidione rempublicam liberasset, omnia sua secum unâ moritura arbitrabatur. Non est ita, Quirites: neque quisquam nostrum in reipublicæ periculis cum laude ac virtute versatur, quin spe posteritatis, fructuque ducatur. Itaque quum multis aliis de causis virorum bonorum mentes divinæ mihi atque æternæ videntur esse, tum maximè quòd optimi & sapientissimi cujusque animus ita præsentit in posterum ut nihil nisi sempiternum spectare videatur.

30. Quapropter equidem & C. Marii, & ceterorum virorum, sapientissimorum ac fortissimorum civium, mentes, quæ mihi videntur ex hominum vita ad deorum religionem & sanctimoniam demigrasse, testor, me pro illorum fama,

gloria, memoria, non secus, ac pro patriis fanis atque delubris propugnandum putare: ac, si pro illorum laude mihi arma capienda essent, non minùs strenuè caperem, quàm illi pro communi salute ceperunt. Etenim, Quirites, exiguum nobis vitæ curriculum natura circumscripsit, immensum gloriæ.

XI. Quare, si eos, qui jam de vita decesserunt, ornabimus: justiore nobis mortis conditionem relinquemus. Sed, si illos, Labiene, quos jam videre non possumus, negligis: ne his quidem, quos vides, consuli putas oportere? Neminem esse dico ex iis omnibus, qui illo die Romæ fuerint, quem tu diem in iudicium vocas, pubesque tum fuerit, quin arma ceperit, quin consules secutus sit: omnes n̄, quorum tu ex ætate conjecturam facere potes, quid tum fecerint, abs te rei capitis, C. Rabirii nomine, citantur. At occidit Saturninum Rabirius. Utinam fecisset! non supplicium deprecarer, sed præmium postularem. Etenim, si Scevæ, servo Q. Crotonis, qui occidit L. Saturninum, libertas data est: quod equiti Romano præmium dari par fuisset? &, si C. Marius, quod fistulas, quibus aqua suppeditabatur Jovis Optimi Maximi templis ac sedibus præcidi imperarat, quod in clivo Capitolino improborum civium...

*Desunt non pauca.*



I N

# L. CATILINAM PRIMA,

I N S E N A T U.

ORATIO DECIMA NONA.

*L. Sergius Catilina depulsus consularu, conjunctionis, cujus ipse dux erat, conscios in domum M. Porcii Læcæ convocarat nocte eâ, quæ posterum diem Nonarum Novembrium consecuta est. Ipsi duci dies exeundi, ceteris manendi conditio, descriptio totam per urbem cædis & incendiorum constituta fuerat; repertique erant duo equites Romani, qui sese illâ ipsâ nocte Ciceronem in suo lectulo interfecturos pollicerentur. His vixdum etiam cœtu illo dimisso per Fulviam cognitis, Cicero domum suam majoribus præidiis*

*munivit , senatumque ad sextum Idus Novembris in ædem Jovis Statoris vocavit. Venit eodem Catilina , primamque hanc in eum orationem Cicero consul dixit : quã quidem oratione ostendit patefacta jam esse omnibus scelerata Catilinæ in rempublicam consilia ; ipsique suadet vel potiùs imperat , ut ex urbe exeat , quod & civitatem liberet metu , & ipse se liberiùs hostem populo Romano profiteri queat.*  
FABRICIUS

**Q**UOUSQUE tandem abutere , Catilina , patientiã nostrã ? quamdiu etiam furor iste tuus nos eludet ? quem ad finem sese effrenata jactabit audacia ? Nihilne te nocturnum præsidium palatii , nihil urbis vigiliæ , nihil timor populi , nihil concursus bonorum omnium , nihil hic munitissimus habendi senatûs locus , nihil horum ora vultusque moverunt ? Patere tuã consilia non sentis ? constrictam jam omnium horum conscientiã teneri conjurationem tuam non vides ? quid proximã , quid superiore nocte egeris , ubi fueris , quos convocaveris , quid consilii ceperis , quem nostrum ignorare arbitraris ?

2. O tempora, ô mores ! Senatus hæc intelligit, consul videt : hic tamen vivit. Vivit ? immo verò etiam in senatum venit : fit publici consilii particeps : notat & designat oculis ad cædem unumquemque nostrum : nos autem, viri fortes, satisfacere reipublicæ videmur, si istius furorem ac tela vitemus.

3. Ad mortem te, Catilina, duci, jussu consulis, jampridem oportebat : in te conferri pestem istam, quam tu in nos omnes jamdiu machinaris. An verò vir amplissimus, P. Scipio, pontifex maximus, Tib. Gracchum, mediocriter labefactantem statum reipublicæ, privatus interfecit : Catilinam verò, orbem terræ cæde atque incendiis vastare cupientem, nos consules perferemus ? Nam illa nimis antiqua prætereo, quòd Q. Servilius Ahala Sp. Melium, novis rebus studentem, manu suâ occidit. Fuit, fuit ista quondam in hac republica virtus, ut viri fortes acrioribus suppliciis civem perniciosum, quàm acerbissimum hostem coërcerent. Habemus enim senatusconsultum in te, Catilina, vehemens & grave : non deest reipublicæ consilium, non auctoritas hujus ordinis : nos, nos, dico apertè, consules desumus.

II. Decrevit quondam senatus, ut L. Opimius consul videret, ne quid respu-

blica detrimenti caperet : nox nulla intercessit ; interfectus est propter quasdam seditionum suspiciones C. Gracchus , clarissimo patre , avo , majoribus : occisus est cum liberis M. Fulvius , consularis. Simili senatusconsulto , C. Mario , & L. Valerio consulibus , permessa est respublica : num unum diem postea L. Saturninum , tribunum plebis , & C. Servillum prætorem , mors ac poena reipublicæ remorata est ? At nos vicesimum jam diem patimur hebescere aciem horum auctoritatis : habemus enim hujuscemodi senatusconsultum , verumtamen inclusum in tabulis , tamquam in vagina reconditum ; quo ex senatusconsulto confestim interfectum esse te , Catilina , convenit. Vivis : & vivis non ad deponendam , sed ad confirmandam audaciam. Cupio , Patres conscripti , me esse clementem : cupio in tantis reipublicæ periculis me non dissolutum videri : sed jam me ipsum inertiae , nequitiaeque condemno.

5. Castra sunt in Italia contra rempublicam , in Etruriæ faucibus collocata : crescit in dies singulos hostium numerus : eorum autem imperatorem castrorum , ducemque hostium , intra mœnia , atque adeo in senatu videmus , intestinam aliquam quotidie perniciem reipublicæ molientem. Si te jam , Catilina , comprehendi , si te in-

terfici jussero ; credo , erit verendum mihi , ne non hoc potius omnes boni serius a me , quàm quisquam crudelius factum esse dicat. Verùm ego hoc , quòd jampridem factum esse oportuit , certa de causa nondum adducor ut faciam : tum denique interficere , quum jam nemo tam improbus , tam perditus , tam tui similis inveniri poterit , qui id non jure factum esse fateatur. Quamdiu quisquam erit , qui te defendere audeat , vives ; & vives ita , ut nunc vivis , multis meis , & firmis præsidiis obsessus , ne commovere te contra rempublicam possis : multorum te etiàm oculi & aures non sentientem , sicut adhuc fecerunt , speculabuntur , atque custodient.

III. Etenim quid est , Catilina , quod jam amplius exspectes , si neque nox tenebris obscurare coetus nefarios , nec privata domus parietibus continere vocem conjurationis tuæ potest ? si illustrantur , si erumpunt omnia ? Muta jam istam mentem : mihi crede : obliviscere cædis , atque incendiorum : teneris undique : luce sunt clariora nobis tua consilia omnia ; quæ etiam mecum licet recognoscas.

7. Meministine , me ante diem XII Kalendas Novembris dicere in senatu , fore in armis certo die , qui dies futurus esset ante diem VI Kalendas Novembris , C.

Mallium, audaciæ satellitem atque administrum tuæ? num me fefellit, Catilina, non inodò res tanta, tam atrox, tam incredibilis, verùm, id quod multò magis est admirandum, dies? Dixi ego idem in senatu, cædem te optimatum contulisse in ante diem v Kalendas Novembris, tum quum multi principes civitatis Româ non tam sui conservandi, quàm tuorum consiliorum reprimendorum causâ profugerunt: num infiriari potes, te illo ipso die meis præsiidiis, meâ diligentia circumclusum, commovere te contra rempublicam non potuisse, quum tu discessu ceterorum, nostrâ tamen, qui remansissemus, cæde contentum te esse dicebas?

8. Quid? quum te Præneste Kalendis ipsis Novembris occupaturum nocturno impetu esse confideres; sensistine, illam coloniam meo jussu, meis præsiidiis, custodiis, vigiliisque esse munitam? nihil agis, nihil moliris, nihil cogitas, quod ego non modò audiam, sed etiam videam, planèque sentiam.

IV. Recognosce tandem mecum illam superiorem noctem: jam intelliges multò me vigilare acrius ad salutem, quàm te ad perniciem reipublicæ. Dico te priori nocte venisse inter falcarios (non agam obscure) in M. Læcæ domum: convenisse eodem complures ejusdem amentia, scele-



risque socios : num negare audes ? quid taces ? convincam , si negas : video enim esse hîc in senatu quosdam , qui tecum unâ fuere.

9. O dii immortales ! ubinam gentium sumus ? in qua urbe vivimus ? quam rempublicam habemus ? Hîc , hîc sunt , in nostro numero , Patres conscripti , in hoc orbis terræ sanctissimo gravissimoque consilio , qui de meo , nostrumque omnium interitu , qui de hujus urbis , atque adeo orbis terrarum exitio cogitent : hosce ego video consul , & de republica sententiam rogo ; & , quos ferro trucidari oportebat , eos nondum voce vulnero. Fuiſti igitur apud Læcam illâ nocte , Catilina : distribuisti partes Italiæ : statuisti quò quemque proficisci placeret : delegisti quos Romæ relinqueres , quos tecum educeres : descripsisti urbis partes ad incendia : confirmasti , te ipsum jam esse exiturum : dixisti paululum tibi esse etiam tum moræ , quòd ego viverem. Reperti sunt duo equites Romani , qui te istâ curâ liberarent , & sese illâ ipsâ nocte paulò ante lucem me meo in lectulo interfecturos pollicerentur.

10. Hæc ego omnia , vix dum etiam cœtu vestro dimisso , comperi : domum meam majoribus præſidiis munivi , atque firmavi : exclusi eos , quos tu manè ad

me salutatum miseras, quum illi ipsi venissent, quos ego jam multis ac summis viris ad me id temporis venturos esse prædixeram.

V. Quæ quum ita sint, Catilina, perge quod cœpisti; egredere aliquando ex urbe; patent portæ; proficiscere: nimum diu te imperatorem illa tua Malliana castra desiderant: educ tecum etiam omnes tuos; si minùs, quàm plurimos: purga urbem. Magno me metu liberabis, dummodo inter me atque te murus intersit: nobiscum versari jam diutius non potes: non feram, non patiar, non sinam.

II. Magna diis immortalibus est habenda, atque huic ipsi Jovi Statori, antiquissimo custodi hujus urbis gratia, quòd hanc tam tetram, tam horribilem, tamque infestam reipublicæ pestem toties jam effugimus. Non est sapius in uno homine salus summa periclitanda reipublicæ. Quamdiu mihi, consuli designato, Catilina, insidiatus es, non publico me præsidio, sed privatâ diligentia defendi. Quum proximis comitiis consularibus me consulem in campo, & competitores tuos interficere voluisti, compressi tuos nefarios conatus amicorum præsidio, & copiis, nullo tumultu publicè concitato: denique quotiescumque me petisti, per me tibi obstiti; quamquam videbam, perniciem meam cum ma-

gna calamitate reipublicæ esse conjunctam : nunc jam apertè rempublicam universam petis. Tempia deorum immortalium , tecta urbis , vitam omnium civium , Italiam denique totam , ad exitium & vastitatem vocas. \*

12. Quare , quoniam id , quod est primum , & quod est hujus imperii , disciplinæque majorum proprium , facere nondum audeo ; faciam id , quod est ad severitatem lenius , & ad communem salutem utilius. Nam , si te interfici jussero , residebit in republica reliqua conjuratorum manus : sin tu ( quod te jamdudum hortor ) exieris , exhaurietur ex urbe tuorum comitum magna & perniciofa sentina reipublicæ. Quid est , Catilina ? num dubitas id , me imperante , facere , quod jam tuâ sponte faciebas ? Exire ex urbe consul hostem jubet : interrogas me , num in exsilium ? non jubeo : sed si me consulis , suadeo.

VI. Quid enim , Catilina , est , quod te jam in hac urbe delectare possit ? in qua nemo est , extra istam conjurationem perditorum hominum , qui te non metuat ; nemo , qui te non oderit. Quæ nota domesticæ turpitudinis non inusta vitæ tuæ est ? quod privatarum rerum dedecus non hæret infamiæ ? quæ libido ab oculis , quod facinus a manibus umquam tuis , quod flagitium a toto corpore absuit ? cui tu ado-

lescentulo, quem corruptelarum illecebris irretisses, non aut ad audaciam, ferrum, aut ad libidinem, facem prætulisti?

14. Quid verò? nuper quum morte superioris uxoris, novis nuptiis domum vacuum fecisses, nonne etiam alio incredibili scelere hoc scelus cumulaſti? quod ego prætermitto, & facile patior sileri, ne in hac civitate tanti facinoris immanitas aut exstitisse, aut non vindicata esse videatur. Prætermitto ruinas fortunarum tuarum, quas omnes impendere tibi proximis idibus senties: ad illa venio, quæ non ad privatam ignominiam vitiorum tuorum, non ad domesticam tuam difficultatem ac turpitudinem, sed ad summam rempublicam, atque ad omnium nostrum vitam salutemque pertinent.

15. Potestne tibi hæc lux, Catilina, aut hujus cœli spiritus esse jucundus, quum scias, horum esse neminem, qui nesciat, te pridie Kalendas Januarias, Lepido, & Tullo consulibus, stetisse in comitio cum telo? manum, consulum, & principum civitatis interficiendorum causâ, paravisse? sceleri ac furori tuo non mentem aliquam, aut timorem tuum, sed fortunam populi Romani obstitisse? Ac jam illa omitto: neque enim sunt aut obscura, aut non multa postea commissa. Quoties tu me designatum, quoties me  
consulem

consulem interficere conatus es? quot ego tuas petitiones ita coniectas, ut vitari posse non viderentur, parvâ quadam declinatione, &, ut aiunt, corpore effugi? Nihil agis, nihil assequeris, nihil moliris, quod mihi latere valeat in tempore: neque tamen velle ac conari desistis. Quoties jam tibi extorta est sica ista de manibus? quoties verò excidit casu aliquo, & elapsa est? tamen eâ carere diutius non potes; quæ quidem quibus abs te initiata sacris, ac devota sit, nescio, quòd eam necesse putas consulis in corpore defigere.

VII. Nunc verò, quæ tua est ista vita? sic enim jam tecum loquar, non ut odio permotus esse videar, quo debeo, sed ut misericordiâ, quæ tibi nulla debetur. Venisti paulò antè in senatum: quis te ex hac tanta frequentia, ex tot tuis amicis ac necessariis salutavit? Si hoc post hominum memoriam contigit nemini, vocis exspectas contumeliam, quum sis gravissimo iudicio taciturnitatis oppressus? Quid, quòd adventu tuo ista subsellia vacua facta sunt? quòd omnes consulares, qui tibi persæpe ad cædem constituti fuerunt, simulatque assedisti, partem istam subselliorum nudam atque inanem reliquerunt.

17. Quo tandem animo hoc tibi ferendum putas ? Servi mehercle mei si me isto pacto metuerent , ut te metuunt omnes cives tui , domum meam relinquendam putarem : tu tibi urbem non arbitraris ? & , si me meis civibus injuriâ suspectum tam graviter , atque offensum viderem ; carere me adspectu civium , quàm infestis oculis omnium conspici mallet : tu quum conscientia scelerum tuorum agnoscas odium omnium justum , & jam tibi diu debitum , dubitas , quorum mentes sensusque vulneras , eorum adspectum praesentiamque vitare ? Si te parentes timerent , atque odissent tui , neque eos ullâ ratione placare posses ; ut opinor , ab eorum oculis aliquò concederes : nunc te patria , quæ communis est omnium nostrum parens , odit ac metuit ; & jamdiu de te nihil judicat , nisi de parricidio suo cogitare : hujus tu neque auctoritatem verere , neque judicium sequere , neque vim pertimesces ?

18. Quæ tecum , Catilina , sic agit , & quodammodo tacita loquitur : Nullum aliquot jam annis facinus exstitit , nisi per te : nullum flagitium sine te : tibi uni multorum civium necesse , tibi vexatio direptioque sociorum , impunita fuit ac libera : tu non solum ad negligendas leges , ac

quæstiones; verùm etiam ad evertendas perfringendasque valuisti. Superiora illa, quamquam ferenda non fuerunt; tamen, ut potui, tuli: nunc verò me totam esse in metu propter te unum; quidquid increpuerit, Catilinam timeri; nullum videri contra me consilium iniri posse, quod a tuo scelere abhorreat; non est ferendum. Quamobrem discede, atque hunc mihi timorem eripe: si est verus, ne opprimar; sin falsus, ut tandem aliquando timere desinam.

VIII. Hæc si tecum, ut dixi, patria loquatur, nonne impetrare debeat, etiam si vim adhibere non possit? Quid? quòd tu te ipse in custodiam dedisti? quid? quòd, vitandæ suspicionis causâ, apud M. Lepidum te habitare velle dixisti? a quo non receptus, etiam ad me venire ausus es; atque, ut domi meæ te asservarem, rogasti: quum a me quoque id responsum tulisses, me nullo modo posse iisdem parietibus tutò esse tecum, qui magno in periculo essem, quòd iisdem mœnibus contineremur, ad Q. Metellum prætorem venisti: a quo repudiatus, ad sodalem tuum, virum optimum, M. Marcellum demigrasti: quem tu videlicet & ad custodiendum te, diligentissimum, & ad suspicandum, sagacissimum, & ad vindicandum, for-

tissimum fore putasti. Sed quàm longè videtur a carcere atque a vinculis abesse debere, qui se ipsum jam dignum custodiâ judicaverit ?

20. Quæ quum ita sint, Catilina, dubitas, si hic emori æquo animo non potes, abire in aliquas terras, & vitam istam multis suppliciis justis debitisque ereptam, fugæ solitudinique mandare ? Refer, inquis, ad senatum (id enim postulas) &, si hic ordo placere sibi decreverit, te ire in exilium, obtemperaturum te esse dicis. Non referam id, quod abhorret a meis moribus ; & tamen faciam, ut intelligas, quid hi de te sentiant. Egredere ex urbe, Catilina : libera rempublicam metu : in exilium, si hanc vocem exspectas, proficiscere. Quid est, Catilina ? ecquid attendis ? ecquid animadvertis horum silentium ? patiuntur, tacent : quid exspectas auctoritatem loquentium, quorum voluntatem tacitorum perspicis ?

21. At si hoc idem huic adolescenti optimo, P. Sextio, si fortissimo viro, M. Marcello dixissem ; jam mihi consuli hoc ipso in templo, jure optimo senatus vim & manus intulisset : de te autem, Catilina, quum quiescunt, probant : quum patiuntur, decernunt : quum tacent, clamant ; neque hi solum, quorum tibi auc-



toritas est videlicet cara, vita vilissima ; sed etiam illi equites Romani, honestissimi atque optimi viri, ceterique fortissimi cives, qui circumstant senatum ; quorum tu & frequentiam videre, & studia perspicere, & voces paulò antè exaudire potuisti : quorum ego vix abs te jamdiu manus, ac tela contineo ; eosdem faciliè adducam, ut te hæc, quæ jampridem vastare studes, relinquentem, usque ad portas prosequantur.

I X. Quamquam quid loquor ? te ut ulla res frangat ? tu ut umquam te corrigas ? tu ut ullam fugam meditare ? ut ullum te exsilium cogites ? utinam tibi istam mentem dii immortales duint ! tametsi video, si meâ voce perterritus ire in exsilium animum induxeris, quanta tempestas invidiæ nobis, si minùs in præsens tempus, recenti memoriâ scelerum tuorum, ac in posteritatem impendeat. Sed est tanti, dummodo ista privata sit calamitas, & a reipublicæ periculis sejungatur. Sed tu ut vitiis tuis commoveare, ut legum pœnas pertimescas, ut temporibus reipublicæ cedas, non est postulandum : neque enim is es, Catilina, ut te aut pudor a turpitudine, aut metus a periculo, aut ratio a furore revocarit.

23. Quamobrem, ut sæpe jam dixi,  
L iij

proficiscere : ac , si mihi inimico , ut prædicas , tuo conflare vis invidiam ; rectà perge in exsilium : vix feram sermones hominum , si id feceris : vix molem istius invidiæ , si in exsilium ieris jussu consulis , sustinebo : sin autem servire meæ laudi & gloriæ mavis , egredere cum importuna sceleratorum manu : confer te ad Mallium : concita perditos cives : secerne te a bonis : infer patriæ bellum : exsulta impio latrocinio , ut a me non ejectus , ad alienos ; sed invitatus , ad tuos isse videaris.

24. Quamquam quid ego te invitem , a quo jam sciam esse præmissos , qui tibi ad forum Aurelium præstolarentur armati ? sciam pactam & constitutam esse cum Mallio diem ? a quo etiam aquilam illam argenteam , quam tibi , ac tuis omnibus perniciosam esse confido & funestam futuram , cui domi tuæ sacrarium scelerum tuorum constitutum fuit , sciam esse præmissam ? Tu ut illâ diutius carere possis , quam venerari , ad cædem proficiscens , solebas ? a cujus altaribus sæpe istam dexteram impiam ad necem civium transtulisti ?

X. Ibis tandem aliquando , quò te jampridem tua ista cupiditas effrenata ac furiosa rapiebat : neque enim tibi hæc res

affert dolorem, sed quamdam incredibilem voluptatem: ad hanc te amentiam natura peperit, voluntas exercuit, fortuna servavit: numquam tu non modò otium, sed ne bellum quidem, nisi nefarium concupisti: nactus es ex perditis, atque ab omni non modò fortuna, verùm etiam spe derelictis, conflata improborum manum.

26. Hic tu quâ lætitiâ perfruere? quibus gaudiis exultabis? quanta in voluptate bacchabere, quam in tanto numero tuorum neque audies virum bonum quemquam, neque videbis? Ad hujus vitæ studium meditati illi sunt, qui feruntur, labores tui: jacere humi, non modò ad obsidendum stuprum, verùm etiam ad facinus obeundum: vigilare, non solùm insidiantem somno maritorum, verùm etiam bonis otiosorum. Habes ubi ostentes illam præclaram tuam patientiam famis, frigoris, inopiæ rerum omnium; quibus te brevi tempore confectum esse senties. Tantum profeci tum, quum te a consulatu repuli, ut exsul potius tentare, quàm consul vexare rempublicam posses; atque ut id, quod esset a te sceleratè susceptum, latrocinium potius, quàm bellum nominaretur.

XI. Nunc, ut a me, Patres conscripti, quamdam propè justam patriæ queri-

moniam detester ac deprecet ; percipite ; quæso, diligenter, quæ dicam, & ea penitus animis vestris mentibusque mandate. Etenim, si mecum patria, quæ mihi vitâ meâ multò est carior, si cuncta Italia, si omnis respublica loquatur : M. Tulli, quid agis ? tune eum, quem esse hostem comperisti ; quem ducem belli futurum vides ; quem expectari imperatorem in castris hostium sentis, auctorem sceleris, principem conjurationis, evocantorem fervorum, & civium perditorum, exire patieris, ut abs te non emissus ex urbe, sed immissus in urbem esse videatur ? Nonne hunc in vincula duci, non ad mortem rapi, non summo supplicio mactari imperabis ?

28. Quid tandem impedit te ? morsne majorum ? at persæpe etiam privati in hac republica perniciosos cives morte multarunt. An leges, quæ de civium reorum supplicio rogatæ sunt ? at numquam in hac urbe ii, qui a republica defecerunt, civium jura tenuerunt. An invidiam posteritatis times ? præclaramverò populo Romano refert gratiam, qui te, hominem per te cognitum, nullâ commendatione majorum, tam maturè ad summum imperium per omnes honorum gradus extulit, si propter invidiam, aut alicujus periculi

metum, salutem civium tuorum negligis. Sed, si quis est invidiæ metus, num est vehementius severitatis ac fortitudinis invidia, quàm inertiae ac nequitiae pertimescenda? an, quum bello vastabitur Italia, vexabuntur urbes, tecta ardebunt; tum te non existimas invidiæ incendio conflaturum?

XII. His ego sanctissimis reipublicæ vocibus, & eorum hominum, qui idem sentiunt, mentibus, pauca respondebo. Ego, si hoc optimum factu judicarem, Patres conscripti, Catilinam morte multari; unius usuram horæ gladiatori isti ad vivendum non dedissem. Etenim, si summi viri, & clarissimi cives, Saturnini, & Gracchorum, & Flacci, & superiorum complurium sanguine non modò se non contaminarunt, sed etiam honestarunt; certè verendum mihi non erat, ne quid, hoc paricidâ civium interfecto, invidiæ mihi in posteritatem redundaret. Quòd si ea mihi maximè impenderet; tamen hoc animo semper fui, ut invidiam virtute partam, gloriam, non invidiam putarem.

30. Quamquam nonnulli sunt in hoc ordine, qui aut ea, quæ imminet, non videant; aut ea, quæ vident, dissimulent: qui spem Catilinæ mollibus sententiis aluerunt, conjurationemque nascentem

non credendo corroboraverunt : quorum auctoritatem secuti multi, non solum improbi, verum etiam imperiti, si in hunc animadvertissem, crudeliter, & regiè factum esse dicerent. Nunc intelligo, si iste, quò intendit, in Malliana castra pervenerit, neminem tam stultum fore, qui non videat conjurationem esse factam; neminem tam improbum, qui non fateatur. Hoc autem uno interfecto, intelligo hanc reipublicæ pestem paulisper reprimi, non in perpetuum comprimi posse. Quòd si se ejecerit, secumque suos eduxerit, & eodem ceteros undique collectos naufragos aggregaverit : exstinguetur, atque delebitur non modò hæc tam adulta reipublicæ pestis, verum etiam stirps ac semen malorum omnium.

XIII. Etenim jamdiu, Patres conscripti, in his periculis conjurationis, insidiisque versamur : sed nescio quo pacto omnium scelerum, ac veteris furoris & audaciæ maturitas in nostri consulatûs tempus erupit. Quòd si ex tanto latrocinio iste unus tolletur; videbimur fortasse ad breve quoddam tempus curâ & metu esse relevati : periculum autem residebit, & erit inclusum penitus in venis atque in visceribus reipublicæ. Ut sæpe homines ægri morbo gravi, quum æstu febrique jac-

tantur, si aquam gelidam biberint, primò relevari videntur; deinde multò graviùs vehementiùsque affliguntur: sic hic morbus, qui est in republica, relevatus istius poenâ, vehementius vivis reliquis ingravescet.

32. Quare, Patres conscripti, secedant improbi, secernant se a bonis, unum in locum congregentur; muro denique, id quod sæpe jam dixi, secernantur a nobis: desinant insidiari domi suæ consuli, circumstare tribunal prætoris urbani, obsidere cum gladiis curiam, malleolos & facces ad inflammandam urbem comparare: sit denique inscriptum in fronte uniuscujusque civis, quid de republica sentiat. Polliceor hoc vobis, Patres conscripti, tantam in nobis consulibus fore diligentiam, tantam in vobis auctoritatem, tantam in equitibus Romanis virtutem, tantam in omnibus bonis consensionem, ut Catilinæ profectio omnia patefacta, illustrata, oppressa, vindicata esse videatis.

33. Hisce ominibus, Catilina, cum summa reipublicæ salute, & cum tua peste ac pernicie, cumque eorum exitio, qui se tecum omni scelere parricidioque junxerunt, proficiscere ad impium bellum, ac nefarium. Tum tu, Jupiter, qui iisdem,

quibus hæc urbs, auspiciis a Romulo es constitutus ; quem Statorem hujus urbis atque imperii verè nominamus : hunc , & hujus socios a tuis aris ceterisque templis , a tectis urbis , ac mœnibus , a vita , fortunisque civium omnium arcebis : & homines inimicos bonorum , hostes patriæ , latrones Italiæ , scelerum fœdere inter se , ac nefariâ societate conjunctos , æternis suppliciis vivos mortuosque mactabis.







I N

L. CATILINAM SECUNDA;

A D Q U I R I T E S .

O R A T I O V I G E S I M A :

*Quum Catilina , consulis oratione fractus , nocte sequenti cum trecentis armatis , licloribus & fascibus , imperii insignibus , adhibitis , ex urbe Fesulas in castra Mallii centurionis , qui & ipse inter conjuratos erat , profectus esset , postridie Cicero , quum senatum habiturus esset , orationem hanc ad populum e rostris habuit , in qua orator gratulatur populo & reipublicæ , quod Catilina ex urbe sit profectus ; atque ad confirmandos animos bonorum civium , & infringendos conjuratos , utriusque partis copias inter se comparat. Fabricius.*

1. <sup>88</sup>ANDEM aliquando, Quirites, L. Catilinam, furem audaciâ, scelus anhelantem, pestem patriæ nefariè molientem, vobis, atque huic urbi ferrum flammamque minitantem, ex urbe vel eiecimus, vel emisimus, vel ipsum egredientem verbis profecuti sumus. Abiit, excessit, evasit, erupit: nulla jam perniciēs a monstro illo atque prodigio mœnibus ipsis intra mœnia comparabitur. Atque hunc quidem unum hujus belli domestici ducem sine controversia vicimus: non enim jam inter latera nostra sica illa verfabitur: non in campo, non in foro, non in curia; non denique intra domesticos parietes pertimescemus: loco ille motus est, quum est ex urbe depulsus: palam jam cum hoste, nullo impediēte, bellum justum geremus. Sine dubio perdidimus hominem, magnificēque vicimus, quum illum ex occultis insidiis in apertum latrocinium conjecimus.

2. Quodd verò non cruentum mucronem, ut voluit, extulit, quodd vivis nobis egressus est, quodd ei ferrum e manibus extorsimus, quodd incolumes cives, quodd stantem urbem reliquit: quanto tandem illum mœrore afflictum esse & profligatum putatis? Jacet ille nunc prostratusque est, & se perculsum atque abjectum esse

sentit, & retorquet oculos profectò sæpe ad hanc urbem ; quam ex suis faucibus ereptam esse luget : quæ quidem lætari mihi videtur, quòd tantam pestem evomuerit, forasque projecerit.

II. At si quis est talis, quales esse omnes oportebat, qui in hoc ipso, in quo exultat & triumphat oratio mea, me vehementer accuset, quòd tam capitalem hostem non comprehenderim potius, quàm emiserim ; non est ista mea culpa, Quirites, sed temporum. Interemptum esse L. Catilinam, & gravissimo supplicio affectum, jampridem oportebat ; idque a me & mos majorum, & hujus imperii severitas, & respublica postulabat : sed quàm multos fuisse putatis, qui, quæ ego deferrem, non crederent ? quàm multos, qui propter stultitiam non putarent ? quàm multos, qui etiam defenderent ? quàm multos, qui propter improbitatem faverent ? Ac si, sublato illo depelli a vobis omne periculum judicarem ; jam pridem ego L. Catilinam non modò invidiæ meæ, verùm etiam vitæ periculo sustulissem. Sed quum viderem, ne vobis quidem omnibus re etiam tum probatâ, si illum, ut erat meritis, morte multassem, fore, ut ejus socios invidiâ oppressus persequi non possem ; rem huc deduxi, ut tum palam pugnare possetis, quum hostem apertè videretis.

4. Quem quidem ego hostem, Quirites, quàm vehementer foris esse timendum putem, licet hinc intelligatis, quòd illud etiam molestè fero, quòd ex urbe parum comitatus exierit. Utinam ille omnes secum suas copias eduxisset ! Tongillum mihi eduxit, quem amare in prætexta calumniâ cœperat : Publicium & Munatium, quorum æs alienum contractum in popina nullum reipublicæ mœtum afferre poterat : reliquit quos viros ? quanto alieno ære, quàm valentes, quàm nobiles ?

III. Itaque ego illum exercitum, præ Gallicanis legionibus, & hoc delectu, quem in agro Piceno, & Gallico Q. Metellus habuit, & his copiis, quæ a nobis quotidie comparantur, magnoperè contemno ; collectum ex senibus desperatis, ex agresti luxuria, ex rusticis decoctoribus ; ex iis, qui vadimonia deferere, quàm illum exercitum, maluerunt : quibus ego non modò si aciem exercitus nostri, verùm etiam si edictum prætoris ostendero, concident. Hos, quos video volitare in foro, quos stare ad curiam, quos etiam in senatum venire ; qui nitent unguentis, qui fulgent purpurâ, mallem secum suos milites eduxisset : qui si hîc permanent, mementote non tam exercitum illum esse nobis, quàm hos, qui exercitum deseruerunt, pertimescendos.

6. Atque hoc etiam sunt timendi magis, quod, quid cogitent, me scire sentiunt: neque tamen permoventur. Video, cui Apulia sit attributa, qui habeat Etruriam, qui agrum Picenum, qui Gallicum, qui sibi has urbanas insidias cædis atque incendiorum depoposcerit: omnia superioris noctis consilia ad me perlata esse sentiunt: patefeci in senatu hesterno die: Catilina ipse pertimuit, profugit: hi quid expectant? næ illi vehementer errant, si illam meam pristinam lenitatem perpetuam sperant futuram.

IV. Quod expectavi, jam sum affectus, ut vos omnes factam esse apertè conjurationem contra rempublicam videretis: nisi verò si quis est, qui Catilinæ similes cum Catilina sentire non putet. Non est jam lenitati locus; severitatem res ipsa flagitat: unum etiam nunc concedam: exeant, proficiscantur, ne patiantur desiderio sui Catilinam miserum tabescere: demonstrabo iter: Aureliâ viâ profectus est: si accelerare volent, ad vesperam consequentur.

7. O fortunatam rempublicam, si quidem hanc sentinam hujus urbis ejecerit! Uno mehercule Catilinâ exhausto, relevata mihi & recreata respublica videtur. Quid enim mali, aut sceleris fingi, aut excogitari potest, quod non ille concepe-

rit ? quis totâ Italiâ veneficus , quis gladiator , quis latro , quis sicarius , quis parricida , quis testamentorum subjector , quis circumscriptor , quis ganeo , quis nepos , quis adulter , quæ mulier infamis , quis corruptor juventutis , quis corruptus , quis perditus inveniri potest , qui se cum Catilina non familiarissimè vixisse fateatur ? Quæ cædes per hosce annos sine illo facta est ? quod nefarium stuprum non per illum ?

8. Jam verò quæ tanta in ullo umquam homine juventutis illecebra fuit , quanta in illo ? qui alios ipse amabat turpissimè , aliorum amoris flagitiosissimè serviebat : aliis fructum libidinum , aliis mortem parentum , non modò impellendo , verùm etiam adjuvando , pollicebatur. Nunc verò quàm subitò non solùm ex urbe , verùm etiam ex agris ingentem numerum perditorum hominum collegerat ? nemo non modò Romæ , sed nec ullo in angulo totius Italiæ oppressus ære alieno fuit , quem non ad hoc incredibile sceleris fœdus adsciverit.

V. Atque , ut ejus diversa studia in dissimili ratione perspicere possitis , nemo est in ludo gladiatorio paulò ad facinus audacior , qui se non intimum Catilinæ esse fateatur : nemo in scena levior , & nequior , qui se non ejusdem propè

sodalem fuisse commemoret. Atque idem tamen , stuprorum & scelerum exercitatione assuefactus ; frigore , & fame , & siti , ac vigiliis perferendis , fortis ab istis prædicabatur , quum industriæ subsidia , atque instrumenta virtutis , in libidine , audaciaque consumeret.

10. Hunc verò si sui fuerint comites secuti : si ex urbe exierint desperatorum hominum flagitiosi greges ? ô nos beatos , ô rempublicam fortunatam ; ô præclaram laudem consulatûs mei ! Non enim jam sunt mediocres hominum libidines , non humanæ audaciæ , ac tolerandæ : nihil cogitant , nisi cædes , nisi incendia , nisi rapinas : patrimonia sua profuderunt : fortunas suas obligurierunt : res eos jampridem , fides deficere nuper cœpit : eadem tamen illa , quæ erat in abundantia , libido permanet. Quòd si in vino & alea comestationes solum , & scorta quærerent , essent illi quidem desperandi , sed tamen essent ferendi : hoc verò quis ferre possit , inertes homines fortissimis viris insidiari , stultissimos prudentissimis , ebrios sobriis , dormientes vigilantibus ? qui mihi accubantes in conviviis , complexi mulieres impudicas , vino languidi , conferti cibo , fertis redimiti ; unguentis obliiti , debilitati stupris , eructant sermonibus suis cædem bonorum , atque urbis incendia.

11. Quibus ego confido impendere factum aliquod; & pœnas jamdiu improbitati, nequitiae, sceleri, libidini debitas, aut instare jam planè, aut certè jam appropinquare. Quos si meus consulatus, quoniam sanare non potest, sustulerit; non breve nescio quod tempus, sed multa secula propagarit reipublicæ. Nulla est enim natio, quam pertimescamus: nullus rex, qui bellum populo Romano facere possit: omnia sunt externa, unius virtute, terrâ, marique pacata: domesticum bellum manet: intus insidiæ sunt, intus inclusum periculum est: intus est hostis: cum luxuria nobis, cum amentia, cum scelere certandum est. Huic ego me bello ducem profiteor, Quirites: suscipio inimicitias hominum perditorum: quæ sanari poterunt, quacumque ratione sanabo: quæ ressecanda erunt, non patiar ad perniciem civitatis manare. Proinde aut exeant, aut quiescant: aut, si & in urbe, & in eadem mente permanent; ea, quæ merentur, expectent.

VI. At etiam sunt, Quirites, qui dicant, a me in exilium ejectum esse Catilinam. Quod ego si verbo assequi possem, istos ipsos ejicerem, qui hæc loquuntur. Homo enim videlicet timidus, & permodestus vocem consulis ferre non potuit: simul atque ire in exilium iussus



est, paruit, quievit. Hesterno die, quum domi meæ pene interfectus essem, senatum in ædem Jovis Statoris convocavi: rem omnem ad patres conscriptos detuli: quò quum Catilina venisset; quis eum senator appellavit? quis salutavit? quis denique ita adspexit, ut perditum civem, ac non potius ut importunissimum hostem? Quin etiam principes ejus ordinis partem illam subselliorum, ad quam ille accesserat, nudam atque inanem reliquerunt.

13. Hic ego vehemens ille consul, qui verbo cives in exilium ejicio, quæsi vi a Catilina, an nocturno conventu apud M. Læcam fuisset, necne. Quum ille homo audacissimus, conscientiam convictus, primò reticuisset; patefeci cetera: quid eâ nocte egisset, ubi fuisset, quid in proximam constituisset, quemadmodum esset ei ratio totius belli descripta, edocui: quum hæsitaret, quum teneretur; quæsi vi, quid dubitaret eò proficisci, quò jam pridem pararat; quum arma, quum seculares, quum fascēs, quum tubas, quum signa militaria, quum Aquilam illam argenteam, cui ille etiam sacrarium scelerum domi suæ fecerat, scirem esse præmissam. In exilium ejiciebam, quem jam ingressum esse in bellum videbam? Etenim, credo, Mallius iste centurio, qui in

agro Fesulano castra posuit , bellum populo Romano suo nomine indixit : & illa castra nunc non Catilinam ducem exspectant : & ille ejectus in exsilium , se Massiliam , ut aiunt , non in hæc castra conferet.

VII. O conditionem miseram , non modò administrandæ , verùm etiam conservandæ reipublicæ ! Nunc , si L. Catilina , consiliis , laboribus , periculis meis circumclusus ac debilitatus , subito pertimuerit , sententiam mutaverit , deseruerit suos , consilium belli faciendi abjecerit , ex hoc cursu sceleris , & belli , iter ad fugam , atque in exsilium converterit : non ille a me spoliatus armis audaciæ , non obstupefactus ac perterritus meâ diligentia , non de spe conatuque depulsus , sed indemnatus , innocens , in exsilium ejectus a consule , vi & minis esse dicetur : & erunt , qui illum , si hoc fecerit , non improbum , sed miserum ; me non diligentissimum consulem , sed crudelissimum tyrannum existimari velint.

15. Est mihi tanti , Quirites , hujus invidiæ falsæ atque iniquæ tempestatem subire , dummodo a vobis hujus horribilis belli ac nefarii periculum depellatur : dicatur sanè ejectus esse a me , dummodo eat in exsilium : sed mihi credite , non est iturus. Numquam ego a diis immortalibus optabo , Quirites , invidiæ meæ le-

vandæ causâ , ut L. Catilinam ducere exercitum hostium , atque in armis volitare audiat ; sed triduo tamen audietis ; multoque magis illud timeo , ne mihi sit invidiosum aliquando , quòd illum emiserim potius , quàm quòd ejecerim : sed quum sint homines , qui illum , quum profectus sit , ejectum esse dicant , iidem , si interfectus esset , quid dicerent ?

16. Quamquam isti , qui Catilinam Massiliam ire dicunt , non tam hoc queruntur , quàm verentur. Nemo est istorum tam misericors , qui illum non ad Mallium , quàm ad Massilienses ire mallet. Ille autem , si mehercule hoc quod agit , numquam antè cogitasset , tamen latrocinantem se interfici mallet , quàm exulem vivere. Nunc verò , quum ei nihil adhuc præter ipsius voluntatem cogitationemque acciderit , nisi quòd vivis nobis Româ profectus est ; optemus potius , ut eat in exilium , quàm queramur.

VIII. Sed cur tamdiu de uno hoste loquimur ; & de eo hoste , qui jam fatetur se esse hostem ; & quem , quia , quod semper volui , murus interest , non timeo : de his , qui dissimulant , qui Romæ remanent , qui nobiscum sunt , nihil dicimus ? quos quidem ego , si ullo modo fieri posset , non tam ulcisci studeo , quàm sanare , & ipsos placare reipublicæ ; ne-

que, id quare fieri non possit, si me audire volent, intelligo. Exponam enim vobis, Quirites, ex quibus generibus hominum istæ copiæ comparentur: deinde singulis medicinam consilii atque orationis meæ, si quam potero, afferam.

18. Unum genus est eorum, qui magno in ære alieno, majores etiam possessiones habent; quarum amore adducti, dissolvi nullo modo possunt. Horum hominum species est honestissima; sunt enim locupletes: voluntas verò, & causa impudentissima. Tu agris, tu ædificiis, tu argento, tu familiâ, tu rebus omnibus ornatus & copiosus sis; & dubites de possessione detrahere, acquirere ad fidem? Quid enim exspectas? bellum? quid? ergo in vastatione omnium, tuas possessiones sacrosanctas futuras putas? an tabulas novas? errant, qui istas a Catilina exspectant: meo beneficio tabulæ novæ proferentur, verum auctionariæ: neque enim isti, qui possessiones habent, aliâ ratione ullâ salvi esse possunt. Quod si maturius facere voluissent, neque (id quod stultissimum est) certare cum usuris fructibus prædiorum; & locupletioribus his, & melioribus civibus uteremur. Sed hosce homines minimè puto pertimescendos, quòd aut deduci de sententia possunt; aut, si permanebunt, magis mihi videntur

videntur vota facturi contra rempublicam, quàm arma laturi.

IX. Alterum genus est eorum, qui quamquam premuntur ære alieno, dominationem tamen expectant: rerum potiri volunt: honores, quos quietâ republicâ desperant, perturbatâ consequi se posse arbitrantur. Quibus hoc præcipiendum videtur, unum scilicet & idem, quod ceteris omnibus, ut desperent, se id, quod conantur, consequi posse: primùm omnium me ipsum vigilare, adesse, providere reipublicæ: deinde magnos animos esse in bonis viris, magnam concordiam, maximam multitudinem; magnas præterea militum copias: deos denique immortales huic invicto populo, clarissimo imperio, pulcherrimæ urbi, contra tantam vim sceleris, præsentem auxilium esse luros. Quòd si jam sint id, quod cum summo furore cupiunt, adepti; nunc illi in cinere urbis, & sanguine civium, quæ mente consceleratâ ac nefariâ concupierunt, se consules, ac dictatores, aut etiam reges sperant futuros? non vident id se cupere, quod si adepti fuerint, fugitivo alicui, aut gladiatori concedi sit necesse?

20. Tertium genus est ætate jam affectum, sed tamen exercitatione robustum: quo ex genere est ipse Mallius, cui nunc Catilina succedit. Hi sunt homines

ex iis coloniis , quas Sulla constituit : quas ego universas , civium esse optimorum , & fortissimorum virorum sentio : sed tamen hi sunt coloni , qui se insperatis repentinisque pecuniis sumptuosius insolentiùsque jactarunt : hi dum ædificant , tamquam beati : dum prædiis , lecticis , familiis magnis , conviviis apparatus delectantur , in tantum æs alienum inciderunt , ut , si salvi esse velint , Sulla sit iis ab inferis excitandus : qui etiam nonnullos agrestes , homines tenues atque egentes , in eandem illam spem rapinarum veterum impulerunt. Quos ego utroque , Quirites , in eodem genere prædatorum , direptorumque pono. Sed eos hoc moneo , desinant furere , ac proscriptiones & dictaturas cogitare : tantus enim illorum temporum dolor inustus est civitati , ut jam ista non modò homines , sed ne pecudes quidem mihi passuræ esse videantur.

X. Quartum genus est sanè varium , & mistum , & turbulentum : qui jam pridem premuntur ; qui numquam emergent : qui partim inertia , partim malè gerendo negotio , partim etiam sumptibus , in vetere ære alieno vacillant : qui vadiumis , judiciis , proscriptionibus bonorum defatigati , permulti & ex urbe , & ex agris se in illa castra conferre dicunt.

tur. Hosce ego non tam milites acres, quàm infitiatores lentos esse arbitror: quí homines primùm si stare non possunt; corruant; sed ita, ut non modò civitas, sed ne vicini quidem proximi sentiant: nam illud non intelligo, quamobrem, si vivere honestè non possunt, perire turpiter velint; aut cur minore dolore perituros se cum multis, quàm si soli pereant, arbitrentur.

22. Quintum genus est parricidarum; sicariorum, denique omnium facinororum; quos ego a Catilina non revo-co: nam neque divelli ab eo possunt; & pereant sanè in latrocinio, quoniam sunt ita multi, ut eos capere carcer non possit. Postremum autem genus est, non solùm numero, verùm etiam genere ipso, atque vitâ; quod proprium est Catilinæ, de ejus delectu, immo verò de complexu ejus, ac sinu: quos pexo capillo, nitidos, aut imberbes, aut bene barbatos videtis: manicatis, & talaribus tunicis; velis amictos, non togis: quorum omnis industria vitæ, & vigilandi labor in antelucanis cœnis expromitur.

23. In his gregibus omnes aleatores, omnes adulteri, omnes impuri, impudique versantur: hi pueri tam lepidi ac delicati, non solùm amare, & amari, neque cantare, & saltare, sed etiam si-

cas vibrare , & spargere venena didicerunt : qui nisi exeunt , nisi pereunt , etiamsi Catilina perierit , scitote hoc in republica seminarium Catilinarium futurum. Verumtamen quid sibi isti miseri volunt ? num suas secum mulierculas sunt in castra duſuri ? quemadmodum autem illis carere poterunt , his præſertim jam noctibus ? qui autem pacto illi Apenninum , atque illas pruinas ac nives perferent ? nisi idcirco ſe faciliùs hiemem toleraturos putant , quòd nudi in conviviiſ saltare didicerunt. O bellum magnoperè pertimeſcendum , quum hanc ſit habiturus Catilina ſcortorum cohortem prætoriam.

XI. Inſtruite nunc , Quiriteſ , contra haſ tam præclaras Catilinæ copias veſtra præſidia , veſtroſque exercitus : & primum gladiator ſilli conſecto & ſaucio , conſules , imperatoresque veſtros opponite : deinde contra illam naufragorum ejectam ac debilitatam manum , florem totius Italiæ ac robur educite : jam verò urbes coloniarum ac municipiorum reſpondebunt Catilinæ tumuliſ ſilveſtribus. Neque verò ceteras copias , ornamenta , præſidia veſtra , cum illius latroniſ inopia atque egeſtate conferre debeo.

25. Sed , ſi , omiſſiſ hiſ rebus omnibus , quibus noſ ſuppeditamus , eget ille , ſenatu , equitibus Romanis , popu-



lō ; urbe , ærario , vectigalibus ; cunctā Italiā , provinciis omnibus , exteris nationibus : si , inquam , his rebus omissis , ipsas causas ; quæ inter se confligunt , contendere velimus ; ex eo ipso , quàm valde illi jaceant , intelligere possumus. Ex hac enim parte pudor pugnat , illinc petulantia : hinc pudicitia , illinc stuprum : hinc fides , illinc fraudatio : hinc pietas , illinc scelus : hinc constantia , illinc furor : hinc honestas , illinc turpitudine : hinc continentia , illinc libido : denique æquitas , temperantia , fortitudo , prudentia , virtutes omnes , certant cum iniquitate , cum luxuria , cum ignavia , cum temeritate , cum vitiis omnibus : postremò copiam cum egestate , bona ratio cum perdita , mens sana cum amentia , bona denique spes cum omnium rerum desperatione confligit. In hujusmodi certamine ac proelio , nonne , etiam si hominum studia deficient , dii ipsi immortales cogent ab his præclarissimis virtutibus , tot & tanta vitia superari ?

XII. Quæ quum ita sint , Quirites , vos , quemadmodum jam antea dixi , vestra tecta custodiis vigiliisque defendite : mihi , ut urbi sine vestro motu , ac sine ullo tumultu , satis esset præsidii , consultum ac provisum est. Coloni omnes , municipesque vestri , certiores a me

## 270 · ORATIO II.

facti de hac nocturna excursione Catilinæ, facile urbes suas, finesque defendent: gladiatores, quam sibi ille maximam manum, & certissimam fore putavit, quamquam meliore animo sunt, quam pars patriciorum, potestate tamen nostrâ continebuntur. Q. Metellus, quem ego prospiciens hoc, in agrum Gallicanum Picenumque præmisi, aut opprimet hominem, aut omnes ejus motus conatusque prohibebit: reliquis autem de rebus constituendis, maturandis, agendis, jam ad senatum referemus, quem vocari videtis.

27. Nunc illos, qui in urbe remanserunt, atque adeo qui contra urbis salutem, omniumque vestrûm, in urbe a Catilina relictî sunt, quamquam sunt hostes, tamen quia nati sunt cives, monitos etiam atque etiam volo. Mea lenitas adhuc si cui solutior visa est, hoc exspectavit, ut id, quod latebat, erumperet: quod reliquum est, jam non possum oblivisci, meam hanc esse patriam, me horum esse consulem: mihi aut cum his vivendum, aut pro his esse moriendum: nullus est portæ custos; nullus insidiator viæ: si qui exire volunt, consulere sibi possunt: qui verò in urbe se commoverit, cujus ego non modò factum, sed inceptum ullum conatumve contra pa-

triam deprehendero ; sentiet in hac urbe esse consules vigilantes , esse egregios magistratus , esse fortem senatum , esse arma , esse carcerem , quem vindicem nefariorum ac manifestorum scelerum majores nostri esse voluerunt.

XIII. Atque hæc omnia sic agentur , Quirites , ut res maximæ minimo motu , pericula summa nullo tumultu , bellum intestinum ac domesticum , post hominum memoriam crudelissimum ac maximum , me uno togato duce & imperatore sedetur : quod ego sic administrabo , Quirites , ut , si ullo modo fieri poterit , ne improbus quidem quisquam in hac urbe pœnam sui sceleris sufferat. Sed si vis manifestæ audaciæ , si impendens patriæ periculum me necessariò de hac animi lenitate deduxerint ; illud profectò perficiam , quod in tanto , & tam insidioso bello vix optandum videtur , ut ne quis bonus intereat , paucorumque pœnâ vos jam omnes salvi esse possitis.

29. Quæ quidem ego neque meâ prudentiâ , neque humanis consiliis fretus polliceor vobis , Quirites ; sed multis , & non dubiis deorum immortalium significationibus : quibus ego ducibus in hanc spem sententiamque sum ingressus : qui jam non procul , ut quondam solebant , ab extero hoste , atque longinquo , sed

272 *ORATIO II.*

hic præsentes suo numine atque auxilio  
sua templa , atque urbis tecta defendunt :  
quos vos , Quirites , precari , venerari ,  
atque implorare debetis , ut , quam ur-  
bem pulcherrimam florentissimamque esse  
voluerunt , hanc omnibus hostium copiis ,  
terrâ marique superatis , a perditissimo-  
rum civium nefario scelere defendant.





I N

L. CATILINAM TERTIA ;  
A D Q U I R I T E S .

ORATIO VIGESIMA PRIMA:

*Tertio Nonas Decembris , Cicero ;  
senatu dimisso , progressus in concio-  
nem , populo , qui frequens aderat ,  
exponit quem in modum a se pate-  
facta atque oppressa conjuratio fue-  
rit , quidque super eà re decretum  
sit a senatu. Deinde commemoratis  
prodigiis , quibus hæc conjuratio  
a diis immortalibus præsignificata  
fuerat , populum hortatur , ut de-  
cretæ ab senatu supplicationis dies  
lætus celebret , rerumque ab se in  
consulatu gestarum ne patiatur ex-  
stingui memoriam , in qua firmissi-  
mum sibi futurum sit contra im-*

M v

*probos præsidium. Ad extremum pollicetur se in suscepta defensione reipublicæ constantem fore. FABRICIUS.*

I. **R**EMPUBLICAM, Quirites, vitamque omnium vestrûm, bona, fortunas, conjuges, liberosque vestros, atque hoc domicilium clarissimi imperii, fortunatissimam pulcherrimamque urbem, hodierno die, deorum immortalium summo erga vos amore, laboribus, consiliis, periculisque meis, ex flamma atque ferro, ac pene ex faucibus fati ereptam, & vobis conservatam ac restitutam videtis.

2. Et, si non minùs nobis jucundi atque illustres sunt ii dies, quibus conservamur, quàm illi, quibus nascimur; quòd salutis certa lætitia est, nascendi incerta conditio; & quòd sine sensu nascimur, cum voluptate servamur: profectò, quoniam illum, qui hanc urbem condidit, Romulum, ad deos immortales benevolentiam; famamque sustulimus; esse apud vos posterosque vestros in honore debet is, qui eandem hanc urbem conditam amplificatamque servavit. Nam totius urbis templis, delubris, tectis, ac mœnibus subjectos propè jam ignes, circumdatosque restinximus; iidemque gladios

in rempublicam destriictos retudimus , mucronesque eorum a jugulis vestris rejecimus. Quæ quoniam in senatu illustrata , patefacta , compertaque sunt per me , vobis jam exponam breviter , Quirites , ut & quanta , & quàm manifesta , & quâ ratione investigata , & comprehensa sint , vos , qui & ignoratis , & expectatis , scire possitis.

3. Principiò , ut Catilina paucis antè diebus erupit ex urbe , quum sceleris sui socios , hujusce nefarii belli acerrimos duces Romæ reliquisset ; semper vigilavi , & providi , Quirites , quemadmodum in tantis , & tam absconditis insidiis salvi esse possemus.

II. Nam tum , quum ex urbe Catilinam ejiciebam ( non enim jam vereor hujus verbi invidiam , quum illa magis sit timenda , quòd vivus exierit ) sed tum , quum illum exterminari volebam ; aut reliquam conjuratorum manum simul exituram , aut eos , qui restitissent , infirmos sine illo ac debiles fore putabam.

4. Atque ego , ut vidi , quos maximo furore & scelere esse inflammatos sciebam , eos nobiscum esse , & Romæ remansisse ; in eo omnes dies noctesque consumpsi , ut ; quid agerent , quid molirentur , sentirem ac viderem : ut , quoniam auribus vestris , propter incredibi-

lem magnitudinem sceleris , minorem fidem faceret oratio mea , rem ita comprehenderem , ut tum demum animis salutis vestrae provideretis , quum oculis maleficio ipsum videretis. Itaque ut comperi , legatos Allobrogum , belli Transalpini , & tumultus Gallici excitandi causa , a P. Lentulo esse sollicitatos , eosque in Galliam ad suos cives , eodem itinere , cum litteris mandatisque , ad Catilinam esse missos , comitemque iis adjunctum Vulturcium , atque huic datas esse ad Catilinam litteras : facultatem mihi oblatam putavi , ut , quod erat difficillimum , quodque ego semper optabam a diis immortalibus , tota res non solum a me , sed etiam a senatu , & a vobis manifestò deprehenderetur.

5. Itaque hesterno die L. Flaccum , & C. Pomptinum , praetores , fortissimos atque amantissimos reipublicae viros , ad me vocavi : rem omnem exposui : quid fieri placeret , ostendi. Illi autem , qui omnia de republica praecleara atque egregia sentirent , sine recusatione , ac sine ulla mora negotium susceperunt , & quum advesperasceret , occultè ad pontem Milvium pervenerunt ; atque ibi in proximis villis ita bipartitò fuerunt , ut Tiberis inter eos , & pons interesset. Eodem autem & ipsi sine cuiusquam suspitione ,



multos fortes viros eduxerunt, & ego ex præfectura Reatina complures delectos adolescentes, quorum operâ utor assiduè in reipublicæ præsidio, cum gladiis miseram. Interim tertiâ ferè vigiliâ exactâ, quum jam pontem Milvium magno comitatu legati Allobrogum ingredi inciperent, unâque Vulturcius, sit in eos impetus: educuntur & ab illis gladii, & a nostris: res erat prætoribus nota solis: ignorabatur a ceteris.

III. Tum interventu Pomptini atque Flacci, pugna, quæ erat commissa, fedatur: litteræ, quæcumque erant in eo comitatu, integris signis, prætoribus traduntur: ipsi comprehensi, ad me, quum jam dilucesceret, deducuntur. Atque horum omnium scelerum improbissimum machinatorem Cimbrum Gabinium, statim ad me, nihildum suspicantem, vocavi. Deinde item arcessitur L. Statilius, & post eum Cethegus: tardissimè autem Lentulus venit, credo, quòd litteris dandis, præter consuetudinem, proximâ nocte vigilarat.

7. Quum verò summis ac clarissimis hujus civitatis viris, qui, auditâ re, frequentes ad me manè convenerant, litteras a me prius aperiri, quàm ad senatum referrem, placeret; ne, si nihil esset inventum, temere a me tantus tumultus

injectus civitati videretur ; negavi me esse facturum , ut de periculo publico , non ad consilium publicum rem integram deferrem. Etenim , Quirites , si ea , quæ erant ad me delata , reperta non essent ; tamen ego non arbitrabar in tantis reipublicæ periculis mihi esse nimiam diligentiam pertimescendam. Senatum frequentem celeriter , ut vidistis , coëgi. Atque interea statim , admonitu Allobrogum , C. Sulpicium prætorem , fortem virum , misi , qui ex ædibus Cethegi , si quid telorum esset , efferret : ex quibus illè maximum sicarum numerum , & gladiatorum extulit.

IV. Introduxi Vulturcium sine Gallis : fidem ei publicam , jussu senatûs , dedi : hortatus sum , ut ea , quæ sciret , sine metu indicaret. Tum ille , quum vix se ex magno timore recreasset , dixit , a P. Lentulo se habere ad Catilinam mandata & litteras , ut servorum præsidio uteretur , & ad urbem quamprimum cum exercitu accederet : id autem eo consilio , ut , quum urbem omnibus ex partibus , quemadmodum descriptum distributumque erat , incendiissent , cædemque infinitam civium fecissent , præstò esset ille , qui & fugientes exciperet , & se cum urbanis ducibus conjungeret.

9. Introducti autem Galli , iusjurandum sibi , & litteras a P. Lentulo , Cethego ,

Statilio ad suam gentem datas esse dixerunt ; atque ita sibi ab his , & a L. Cassio esse præscriptum , ut equitatum in Italiam quàm primùm mitterent : pedestres sibi copias non defuturas : Lentulum autem sibi confirmasse , ex fati Sibyllinis aruspicumque responsis , se esse tertium illum Cornelium , ad quem regnum hujus urbis , atque imperium pervenire esset necesse : Cinnam ante se , & Sullam fuisse : eundemque dixisse , fatalem hunc esse annum ad interitum hujus urbis atque imperii , qui esset decimus annus post virginum abolitionem , post Capitolii autem incensionem vicesimus. Hanc autem Cethego cum ceteris controversiam fuisse dixerunt , quòd Lentulo & aliis , Saturnalibus cædem fieri , atque urbem incendi placeret ; Cethego nimium id longum videri.

V. Ac , ne longum sit , Quirites , tabellas proferri jussimus , quæ a quoque dicebantur datæ. Primùm ostendimus Cethego signum : cognovit : nos linum incidimus : legimus : erat scriptum ipsius manu ; Allobrogum senatui , & populo , sese , quæ eorum legatis confirmasset , esse facturum : orare , ut item illi facerent , quæ sibi legati eorum recepissent. Tum Cethegus , qui paulò antè aliquid de gladiis , ac sicis , quæ apud ipsum erant deprehensæ , respondisset , dixissetque , se

semper bonorum ferramentorum studio-  
sum fuisse : recitatis litteris debilitatus at-  
que abjectus , conscientia convictus , re-  
pentè conticuit. Introductus Statilius , co-  
gnovit manum , & signum suum. Recita-  
tæ sunt tabellæ in eandem ferè senten-  
tiam : confessus est.

11. Tum ostendi tabellas Lentulo : &  
quæsiui , cognosceretne signum. Annuit.  
Est verò , inquam , signum quidem no-  
tum , imago avi tui , clarissimi viri , qui  
amavit unicè patriam , & cives suos ; quæ  
quidem te a tanto scelere etiam muta re-  
vocare debuit. Leguntur eadem ratione  
ad senatum Allobrogum populumque lit-  
teræ : si quid de his rebus dicere vellet ,  
feci potestatem. Atque ille primò quidem  
negavit : post autem aliquantò , toto jam  
indicio exposito atque edito , surrexit :  
quæsiuit a Gallis , quid sibi esset cum iis ;  
quamobrem domum suam venissent : item-  
que a Vulturcio : qui quum illi breviter ,  
constanterque respondissent , per quem ad  
eum , quotiesque venissent ; quæsis-  
sentque ab eo , nihilne secum esset de fati-  
Sibyllinis locutus : tum ille subito , sce-  
lere demens , quanta conscientia vis esset ,  
ostendit : nam , quum id posset infitiri ,  
repentè præter opinionem omnium con-  
fessus est : ita eum non modò ingenium  
illud , & dicendi exercitatio , quæ sem-

per valuit, sed etiam propter vim sceleris manifesti atque deprehensi, impudentia, quâ superabat omnes; improbitasque defecit.

12. Vulturcius verò subito proferri literas, atque aperiri jussit, quas sibi a Lentulo ad Catilinam datas esse dicebat. Atque ibi vehementissimè perturbatus Lentulus, tamen & signum suum, & manum cognovit: erant autem scriptæ sine nomine, sed ita: *Qui sim, ex eo, quem ad te misi, cognosces: cura, ut vir sis, & cogita, quem in locum sis progressus; & vide, quid jam tibi sit necesse: cura, ut omnium tibi auxilia adjungas, etiam infimorum.* Gabinius deinde introductus, quum primò impudenter respondere cœpisset, ad extremum nihil ex iis, quæ Galli insimulabant, negavit.

13. Ac mihi quidem, Quirites, quum illa certissima sunt visa argumenta atque indicia sceleris, tabellæ, signa, manus, denique uniuscujusque confessio; tum multò illa certiora, color, oculi, vultus, taciturnitas: sic enim obstupuerant, sic terram intuebantur, sic furtim nonnumquam inter se adspiciebant, ut non jam ab aliis indicari, sed indicare se ipsi viderentur.

VI. Indiciis expositis, atque editis, Quirites, senatum consului, de summa re-

publica quid fieri placeret. Dictæ sunt a principibus acerrimæ ac fortissimæ sententiæ, quas senatus sine ulla varietate est consecutus. Et quoniam nondum est perscriptum senatûs consultum, ex memoria vobis, Quirites, quid senatus censuerit, exponam.

14. Primùm mihi gratiæ verbis amplissimis aguntur, quòd virtute, consilio, providentiâ meâ, respublica periculis sit maximis liberata: deinde L. Flaccus, & C. Pomptinus prætores, quòd eorum operâ forti fidelique usus essem, meritò ac jure laudantur: atque etiam viro forti, collegæ meo, laus impertitur, quòd eos, qui hujus conjurationis participes fuissent, a suis & reipublicæ consiliis removisset: atque ita censuerunt, ut P. Lentulus, quum se præturâ abdicasset, tum in custodiam traderetur: itemque uti C. Cethegus, L. Stai-tilius, P. Gabinius, qui omnes præsentés erant, in custodiam traderentur: atque idem hoc decretum est in L. Cassium, qui sibi procurationem incendendæ urbis depoposcerat: in M. Cæparium, cui, ad sollicitandos pastores, Apuliam esse attributam erat indicatum: in P. Furium, qui est ex his colonis, quos Fesulas L. Sulla deduxit: in Q. Magium Chilonem, qui unâ cum hoc Furio semper erat in hac Allobrogum sollicitatione versatus: in

P. Umbrenum, libertinum hominem, a quo primum Gallos ad Gabinium perductos esse constabat. Atque eâ lenitate senatus est usus, Quirites, ut ex tanta conjuratione, tantaque vi ac multitudine domesticorum hostium, novem hominum perditissimorum poenâ, republicâ conservatâ, reliquorum mentes sanari posse arbitraretur.

15. Atque etiam supplicatio diis immortalibus, pro singulari eorum merito, meo nomine decreta est, Quirites: quod mihi primum post hanc urbem conditam togato contigit: & his decreta verbis est, *Quodd urbem incendiis, cæde cives, Italiam bello liberassent.* Quæ supplicatio si cum ceteris conferatur, Quirites, hoc intersit; quod ceteræ benè gestâ, hæc una, conservatâ republicâ, constituta est. Atque illud, quod faciendum primum fuit, factum atque transactum est. Nam P. Lentulus, quamquam patefactus indicibus & confessionibus suis, judicio senatûs, non modò prætoris jus, verum etiam civis amiserat; tamen magistratu se abdicavit; ut, quæ religio C. Mario, clarissimo viro, non fuerat, quò minùs C. Glauciam, de quo nihil nominatim erat decretum, prætorem occideret, eâ nos religione in privato P. Lentulo puniendo liberaremur.

VII. Nunc, quoniam, Quirites, scele-

ratissimi periculosissimique belli nefarios duces captos jam & comprehensos tenetis, existimare debetis, omnes Catilinæ copias, omnes spes, atque opes, his depulsis urbis periculis, concidisse. Quem quidem ego quum ex urbe pellebam, hoc providebam animo, Quirites, remoto Catilina, nec mihi esse P. Lentuli somnum, nec L. Cassii adipem, nec Cethegi furiosam temeritatem pertimescendam. Ille erat unus timendus ex his omnibus, sed tamdiu, dum mœnibus urbis continebatur: omnia norat, omnium aditus tenebat; appellare, tentare, sollicitare poterat, audebat: erat ei consilium ad facinus aptum; consilio autem neque lingua, neque manus deerat. Jam ad certas res conficiendas certos homines delectos ac descriptos habebat: neque vèrò quum aliquid mandaverat, confectum putabat: nihil erat, quod non ipse obiret, occurreret, vigilaret, laboraret: frigus, sitim, famem ferre poterat.

17. Hunc ego hominem tam acrem, tam paratum, tam audacem, tam callidum, tam in scelere vigilantem, tam in perditis rebus diligentem, nisi ex domesticis insidiis in castrense latrocinium compulsem (dicam id, quod sentio, Quirites) non facile hanc tantam molem mali a cervicibus vèstris depulsem. Non ille vobis Saturna-



lia constituisset, neque tanto antè exitium ac fati diem reipublicæ denuntiasset; neque commisisset, ut signum, ut litteræ suæ testes denique manifesti sceleris deprehenderentur: quæ nunc, illo absente, sic gesta sunt, ut nullum in privata domo furtum umquam sit tam palam inventum, quàm hæc tanta in rempublicam conjuratio manifestò inventa atque deprehensa est. Quòd si Catilina in urbe ad hanc diem remansisset: quamquam, quoad fuit, omnibus ejus consiliis occurri, atque obstiti, tamen, ut levissimè dicam, dimicandum nobis cum illo fuisset, neque nos umquam, dum ille in urbe hostis fuisset, tantis periculis rempublicam, tantâ pace, tanto otio, tanto silentio, liberassemus.

VIII, Quamquam hæc omnia, Quirites, ita sunt a me administrata, ut deorum immortalium nutu atque consilio & gesta, & provisa esse videantur: idque quum conjecturâ consequi possumus, quòd vix videtur humani consilii tantarum rerum gubernatio esse potuisse; tum verò ita præsentibus his temporibus opem & auxilium nobis tulerunt, ut eos pene oculis videre possemus. Nam, ut illa omittam, visas nocturno tempore ab occidente facies, ardoremque cœli, ut fulminum jactus, ut terræ motus relinquam, ut omittam cetera, quæ tam multa, nobis consulibus,

facta sunt, ut hæc, quæ nunc fiunt, canere dii immortales viderentur: hoc certè, Quirites, quod sum dicturus, neque præmittendum, neque relinquendum est.

19. Nam profectò memoriâ tenetis, Cottâ, & Torquato consulibus, complures in Capitolio turres de cælo esse percussas, quum & simulacra deorum immortalium depulsa sunt, & statuæ veterum hominum dejectæ, & legum æra liquefacta: tactus est etiam ille, qui hanc urbem condidit, Romulus: quem inauratum in Capitolio parvum atque lactentem, uberibus lupinis inhiantem, fuisse meministis. Quo quidem tempore quum aruspices ex tota Etruria convenissent, cædes, atque incendia, & legum interitum, & bellum civile, ac domesticum, & totius urbis atque imperiî occasum appropinquare dixerunt, nisi dii immortales omni ratione placati, suo numine propè fata ipsa flexissent.

20. Itaque illorum responsis tunc & ludi decem per dies facti sunt, neque res ulla, quæ ad placandum deos pertineret, prætermissa est: iidemque jusserunt, simulacrum Jovis facere majus, & in excelso collocare, & contrà, atque ante fuerat, ad orientem convertere; ac se sperare dixerunt, si illud signum, quod videtis, solis ortum, & forum curiamque conspiceret, fore, ut ea consilia, quæ clam

essent inita contra salutem urbis atque imperii, illustrarentur, ut a senatu populoque Romano perspicui possent. Atque illud ita collocandum consules illi locaverunt: sed tanta fuit operis tarditas, ut neque a superioribus consulibus, neque a nobis ante hodiernum diem collocaretur.

IX. Hic quis potest esse, Quirites, tam aversus a vero, tam præceps, tam mente captus, qui neget, hæc omnia, quæ videmus, præcipuèque hanc urbem, deorum immortalium nutu atque potestate administrari? Etenim quum esset ita responsum, cædes, incendia, interitumque reipublicæ comparari, & ea per cives, quæ tum propter magnitudinem scelerum nonnullis incredibilia videbantur: ea non modò cogitata a nefariis civibus, verum etiam suscepta esse sensitis. Illud verò nonne ita præsens est, ut nutu Jovis Optimi Maximi factum esse videatur, ut, quum hodierno die manè per forum meo jussu & conjurati, & eorum indices in ædem Concordiæ ducerentur, eo ipso tempore signum statueretur? quo collocato, atque ad vos, senatumque converso, omnia & senatus, & vos, quæ erant contra salutem omnium cogitata, illustrata, & patefacta vidistis.

22. Quo etiam majore sunt isti odio, supplicioque digni, qui non solum vestris

domicilijs atque tectis, sed etiam deorum templis atque delubris sunt funestos ac nefarios ignes inferre conati : quibus ego si me restitisse dicam, nimium mihi sumam, & non sim ferendus : ille, ille Jupiter restitit : ille Capitolium, ille hæc templa, ille hanc urbem, ille vos omnes salvos esse voluit : diis ego immortalibus ducibus hanc mentem, Quirites, voluntatemque suscepi, atque ad hæc tanta indicia perveni. Jam verò illa Allobrogum sollicitatio, sic a Lentulo ceterisque domesticis hostibus, tanta res, tam dementer credita & ignotis, & barbaris, commissæque litteræ numquam essent profectò, nisi a diis immortalibus huic tantæ audaciæ consilium esset ereptum. Quid verò ? ut homines Galli ex civitate malè pacata, quæ gens una restat, quæ populo Romano bellum facere & posse, & non nolle videatur, spem imperii & rerum amplissimarum ultro sibi a patriciis hominibus oblatam negligerent, vestramque salutem suis opibus anteponerent, id non divinitus factum esse putatis ? præsertim qui nos non pugnando, sed tacendo superare potuerunt ?

X. Quamobrem, Quirites, quoniam ad omnia pulvinaria supplicatio decreta est, celebratote illos dies cum conjugibus ac liberis vestris. Nam multi sæpe honores diis immortalibus justî habiti sunt, ac debiti,

biti, sed profectò justiores numquam : erepti enim estis ex crudelissimo ac miserrimo interitu, & erepti sine cæde, sine sanguine, sine exercitu, sine dimicatione : togati, me uno togato duce, & imperatore, vicistis.

24. Etenim recordamini, Quirites, omnes civiles dissensiones, neque solum eas, quas audistis, sed & has, quas vosmetipsi meministis, & vidistis. L. Sulla P. Sulpicium oppressit : ex urbe ejecit C. Marium, custodem hujus urbis ; multosque fortes viros partim ejecit ex civitate, partim interemit. Cn. Octavius, consul, armis ex urbe collegam suum expulit : omnis hic locus acervis corporum, & civium sanguine redundavit. Superavit postea Cinna cum Mario : tum verò, clarissimis viris interfectis, lumina civitatis extincta sunt. Ultus est hujus victoriæ crudelitatem postea Sulla : ne dici quidem opus est, quantâ deminutione civium, & quantâ calamitate reipublicæ. Dissensit M. Lepidus a clarissimo & fortissimo viro Q. Catulo : attulit non tam ipsius interitus reipublicæ luctum, quàm ceterorum.

25. Atque illæ dissensiones erant hujusmodi, Quirites, quæ non ad delendam, sed ad commutandam rempublicam pertinerent : non illi nullam esse rempublicam, sed in ea, quæ esset, se esse principes ;

neque hanc urbem conflagrare , sed se in hac urbe florere voluerunt. Atque illæ tamen omnes dissensiones , quarum nulla exitium reipublicæ quæsit , ejusmodi fuerunt , ut non reconciliatione concordiæ , sed interneceione civium dijudicatæ sint. In hoc autem uno post hominum memoriam maximo , crudelissimoque bello , quale bellum nulla umquam barbaria cum sua gente gessit , quo in bello lex hæc fuit a Lentulo , Catilina , Cassio , Cethego constituta , ut omnes , qui salvâ urbe salvi esse possent , in hostium numero ducerentur , ita me gessi , Quirites , ut omnes salvi conservaremini : & , quum hostes vestri tantum civium superfuturum putassent , quantum infinitæ cædi restitisset ; tantum autem urbis , quantum flamma obire non potuisset : & urbem , & cives integros incolumesque servavi.

XI. Quibus pro tantis rebus , Quirites , nullum ego a vobis præmium virtutis , nullum insigne honoris , nullum monumentum laudis postulo , præterquam hujus diei memoriam sempiternam : in animis ego vestris omnes triumphos meos , omnia ornamenta honoris , monumenta gloriæ , laudis insignia , condi & collocari volo : nihil me mutum potest delectare , nihil tacitum , nihil denique hujusmodi , quod etiam minus digni assequi possint. Memoriam vestrâ , Quirites , nostræ res alentur , sermonibus

crescent, litterarum monumentis inveterascent, & corroborabuntur: eamdemque diem intelligo, quam spero æternam fore, & ad salutem urbis, & ad memoriam consulatûs mei, propagatam esse: unoque tempore in hac republica duos cives exstitisse, quorum alter fines vestri imperii, non terræ, sed cœli regionibus terminaret; alter ejusdem imperii domicilium, sedemque servaret.

XII. Sed, quoniam earum rerum, quas ego gessi, non est eadem fortuna atque conditio, quæ illorum, qui externa bella gesserunt; quod mihi vivendum sit cum illis, quos vici ac subegi; isti hostes aut interfectos, aut oppressos reliquerunt: vestrum est, Quirites, si ceteris rectè sua facta profunt, mihi mea ne quando obsint, providere: mentes enim hominum audacissimorum sceleratæ ac nefariæ ne vobis nocere possent, ego providi; ne mihi noceant, vestrum est providere. Quamquam, Quirites, mihi quidem ipsi nihil jam ab istis noceri potest: magnum enim est in bonis præsidium, quod mihi in perpetuum comparatum est; magna in republica dignitas, quæ me semper tacita defendet; magna vis est conscientiæ, quam qui negligent, quum me violare volent, se ipsi indicabunt.

28. Est etiam in nobis is animus, Qui-  
N ij

rites, ut non modò nullius audaciæ cedamus, sed etiam omnes improbos ultro semper laceffamus. Quòd si omnis impetus domesticorum hostium depulsus a vobis, se in me unum converterit, vobis erit providendum, Quirites, quâ conditione posthac eos esse velitis, qui se pro salute vestra obtulerint invidiæ, periculisque omnibus. Mihi quidem ipsi quid est, quod jam ad vitæ fructum possit acquiri, præsertim quum neque in honore vestro, neque in gloria virtutis, quidquam videam altius, quò quidem mihi libeat adscendere?

29. Illud perficiam profectò, Quirites, ut ea, quæ gessi in consulatu, privatus tuear, atque ornem; ut, si qua est invidia in conservanda republica suscepta, lædat invidos, mihi valeat ad gloriam: denique ita me in republica tractabo, ut meminerim semper quæ gesserim, curemque, ut ea virtute, non casu, gesta esse videantur. Vos, Quirites, quoniam jam nox est, veneramini illum Jovem, custodem hujus urbis, ac vestrum, atque in vestra tecta discedite; & ea, quamquam jam periculum est depulsum, tamen æquè ac priori nocte, custodiis, vigiliisque defendite: id ne vobis diutius faciendum sit, atque ut in perpetua pace esse possitis, providebo.





I N

L. CATILINAM QUARTA,

I N S E N A T U.

ORATIO VIGESIMA SECUNDA.

*Nonis Decembris Cicero , vocato senatu , retulit quid de conjuratis , qui in custodiam traditi erant , fieri placeret. D. Junius Silanus , consul designatus , extremum in eos supplicium decrevit , eique multi assensi sunt. At Cæsar , designatus prætor , censuit eos , publicatis bonis , in vinculis per municipia habendos. Cicero de duabus sententiis ita disputat , ut non obscure in severiorem Silani inclinet. Quoniam autem multi erant , qui ipsi Ciceroni metuentes , mitiorem sententiam secuturi videbantur , eos*

N iij

*orat obtestaturque , ut omni aliâ cogitatione omissâ , nihil aliud ; quàm publicam salutem dignitatemque sibi in decernendo proponant. FABRICIUS.*

I. **V**IDEO , Patres conscripti , in me omnium vestrûm ora atque oculos esse conversos : video vos non solum de vestro , ac reipublicæ , verum etiam , si id depulsum sit , de meo periculo esse sollicitos. Est mihi jucunda in malis , & grata in dolore , vestra erga me voluntas : sed eam , per deos immortales ! quæso , deponite , atque obliti salutis meæ , de vobis , ac de liberis vestris cogitate. Mihi si hæc conditio consulatûs data est , ut omnes acerbitates , omnes dolores , cruciatûsque perferrem ; feram non solum fortiter , sed etiam libenter , dummodo meis laboribus , vobis populoque Romano dignitas , salusque pariat.

2. Ego sum ille consul , Patres conscripti , cui non forum , in quo omnis æquitas continetur ; non campus , consularibus auspiciis consecratus ; non curia , summum auxilium omnium gentium ; non domus , commune perfugium ; non lectus ,

ad quietem datus ; non denique hæc sedes honoris , sella curulis , umquam vacua mortis periculo , atque insidiis fuit. Ego multa tacui , multa pertuli , multa concessi , multa meo quodam dolore , in vestro timore , sanavi. Nunc , si hunc exitum consulatus mei dii immortales esse voluerunt , ut vos , Patres conscripti , populumque Romanum ex cæde misera , conjuges , liberosque vestros , virginesque Vestales ex acerbissima vexatione ; templa atque delubra , hanc pulcherriam patriam omnium nostrum ex foedissima flamma ; totam Italiam ex bello & vastitate eriperem : quæcumque mihi uni proponetur fortuna , subeatur. Etenim , si P. Lentulus suum nomen , inductus a vatibus , fatale ad perniciem reipublicæ fore putavit ; cur ego non læter meum consulatum ad salutem reipublicæ propè fatalem exstitisse ?

II. Quare , Patres conscripti , consulite vobis , prospicite patriæ , conservate vos , conjuges , liberos , fortunasque vestras : populi Romani nomen , salutemque defendite : mihi parcere , ac de me cogitare desinite. Nam primùm debeo sperare , omnes deos , qui huic urbi præsident , pro eo mihi , ac mereor , relaturos gratiam esse : deinde , si quid obti-

gerit , æquo animo , paratoque moriar : neque enim turpis mors forti viro potest accidere , neque immatura consulari , nec misera sapienti. Nec tamen ego sum ille ferreus , qui fratris carissimi , atque amantissimi præsentis mœrore non movear , horumque omnium lacrymis , a quibus me circumfessum videtis : neque meam mentem non dñm sæpe revocat examinata uxor , abjecta metu filia , & parvulus filius , quem mihi videtur amplecti respublica tamquam obsidem consulatûs mei ; neque ille , qui expectans hujus exitum diei , adstat in conspectu meo gener : moveor his rebus omnibus , sed in eam partem , ut salvi sint vobiscum omnes , etiam si vis aliqua me oppresserit , potius , quàm & illi , & nos unâ reipublicæ peste pereamus.

4. Quare , Patres conscripti , incumbite ad reipublicæ salutem , circumspicite omnes procellas , quæ impendent , nisi providetis. Non Tib. Gracchus , qui iterum tribunus plebis fieri voluit ; non C. Gracchus , qui agrarios concitare conatus est ; non L. Saturninus , qui C. Memmium occidit , in discrimen aliquod , atque in vestræ severitatis judicium adducitur : tenentur ii , qui ad urbis incendium , ad vestram omnium cædem , ad

Catilinam accipiendum , Romæ restiterunt : tenentur litteræ , signa , manus , denique uniuscujusque confessio : sollicitantur Allobroges : servitia excitantur : Catilina arcessitur : id est initum consilium , ut , interfectis omnibus , nemo ne ad deplorandum quidem reipublicæ nomen , atque ad lamentandam tanti imperii calamitatem relinquatur.

III. Hæc omnia indices detulerunt ; rei confessi sunt , vos multis jam judiciis judicastis : primum , quod mihi gratias egistis singularibus verbis ; & meâ virtute atque diligentia , perditorum hominum patefactam esse conjurationem decrevistis : deinde quod P. Lentulum , ut se abdicaret præturâ , coëgistis : tum quod eum , & ceteros , de quibus judicastis , in custodiam dando censuistis : maximèque quod meo nomine supplicationem decrevistis , qui honos togato habitus antè me est nemini : postremo hesterno die præmia legatis Allobrogum , Titoque Vulturcio dedistis amplissima : quæ sunt omnia ejusmodi , ut ii , qui in custodiam nominatim dati sunt , sine ulla dubitatione a vobis damnati esse videantur.

6. Sed ego institui referre ad vos , Patres conscripti , tamquam integrum , & de facto , quid judicetis ; & de pœna , quid

N v.

cenſeatis. Illa prædicam , quæ ſunt conſulis. Ego magnum in republica verſari furorem , & nova quædam miſceri , & concitari mala jampridem videbam : ſed hanc tantam , tam exitioſam haberi conjurationem a civibus , numquam putavi. Nunc , quidquid eſt , quocumque veſtræ ſe mentes inclinant , atque ſententiæ , ſtatuendum vobis ante noctem eſt. Quantum facinus ad vos delatum ſit , videtis : huic ſi paucos putatis affines eſſe , vehementer erratis. Latius opinione diſſeminatum eſt hoc malum : manavit non ſolum per Italiam , verum etiam tranſcendit Alpes , & obſcurè ſerpens , multas jam provincias occupavit : id opprimi ſuſtento , ac prolatando , nullo pacto poteſt : quacumque ratione placet , celeriter vobis vindicandum eſt.

IV. Video duas adhuc eſſe ſententias : unam D. Silani , qui cenſet , eos , qui hæc delere conati ſunt , morte eſſe multandos : alteram C. Cæſaris , qui mortis pœnam removet , ceterorum ſuppliciorum omnes acerbitates amplectitur. Uterque & pro ſua dignitate , & pro rerum magnitudine in ſumma ſeveritate verſatur. Alter eos , qui nos omnes , qui populum Romanum vitâ privare conati ſunt , qui delere imperium , qui populi Romani no-

men extinguere , punctum temporis frui vitâ , & hoc communi spiritu , non putat oportere ; atque hoc genus pœnæ sæpe in improbos cives in hac republica esse usurpatum recordatur : âlter intelligit , mortem a diis immortalibus non esse supplicii causâ constitutam ; sed aut necessitatem naturæ , aut laborum ac miseriarum quietem esse : itaque eam sapientes numquam inviti , fortes etiam sæpe libenter oppetiverunt : vincula verò , & ea sempiterna , certè ad singularem pœnam nefarii sceleris inventa sunt ; quæ municipiis dispertiri jubet. Habere videtur ista res iniquitatem , si imperare velis ; difficultatem , si rogare : decernatur tamen , si placet : ego enim fuscipiam , & , ut spero , reperiam , quid id , quod salutis omnium causâ statueritis , non putet esse suæ dignitatis recusare.

8. Adjungit gravem pœnam municipibus , si quis eorum vincula ruperit : horribiles custodias circumdat , & digna scelere hominum perditorum sancit , ne quis eorum pœnam , quos condemnat , aut per senatum , aut per populum levare possit : eripit etiam spem , quæ sola hominem in miseriis consolari solet : bona præterea publicari jubet : vitam solam relinquit nefariis hominibus ; quam si eripuisset , mul-

tos uno dolore dolores animi atque corporis, & omnes scelerum pœnas ademisset. Itaque, ut aliqua in vita formido improbis esset posita, apud inferos ejusmodi quædam illi antiqui supplicia impiis constituta esse voluerunt; quòd videlicet intelligebant, his remotis, non esse mortem ipsam pertimescendam.

V. Nunc, Patres conscripti, ego meâ video quid intersit: si eritis secuti sententiam C. Cæsaris; quoniam hanc is in republica viam, quæ popularis habetur, secutus est, fortasse minùs erunt, hoc auctore & cognitore hujusce sententiæ, mihi populares impetus pertimescendi: sin illam alteram; nescio, an amplius mihi negotii contrahatur: sed tamen meorum periculorum rationes utilitas reipublicæ vincat. Habemus enim a C. Cæsare, sicut ipsius dignitas, & majorum ejus amplitudo postulabat, sententiam, tamquam obsidem perpetuæ in rempublicam voluntatis: intellectum est, quid intersit inter lenitatem concionatorum, & animum verè popularem, salutem populi consulentem.

10. Video de istis, qui populares haberi volunt, abesse non neminem, ne de capite videlicet civium Romanorum sententiam ferat: is & nudiustertius in cus-



todiam cives Romanos dedit, & supplicationem mihi decrevit, & indices hesterno die maximis præmiis affecit. Jam hoc nemini dubium est, qui reo custodiam, quæsitore gratulationem, indici præmium decrevit, quid de tota re & causa judicarit. At verò C. Cæsar intelligit, legem Semproniam esse de civibus Romanis constitutam; qui autem reipublicæ sit hostis, eum civem esse nullo modo posse; denique ipsum latorem legis Semproniae, jussu populi pœnas reipublicæ dependisse: idem etiam ipsum Lentulum largitorem, & prodigum, non putat, quum de perniciæ populi Romani, exitio hujus urbis, tam acerbè, tamque crudeliter cogitarit, appellari posse popularem. Itaque homo mitissimus, atque lenissimus non dubitat P. Lentulum æternis tenebris vinculisque mandare, & sancit in posterum, ne quis hujus supplicio levando se jactare, & in perniciæ populi Romani posthac popularis esse possit: adjungit etiam publicationem bonorum, ut omnes animi cruciatus, & corporis, etiam egestas ac mendicitas consequatur.

VI. Quamobrem sive hoc statueritis; dederitis mihi comitem ad concionem, populo Romano carum atque jucundum: sive Silani sententiam sequi malueritis;

facile me , atque vos a crudelitatis vituperatione defendetis ; atque obtinebo , eam multò leviorē fuisse. Quamquam , Patres conscripti , quæ potest esse in tanti sceleris immanitate puniēda crudelitas ? ego enim de meo sensu iudico. Nam ita mihi salvâ republicâ vobiscum perfrui liceat , ut ego , quòd in hac causa vehementior sum , non atrocitate animi moveor ( quis enim est me mitior ? ) sed singulari quadam humanitate , & misericordiâ. Videor enim hanc mihi urbem videre , lucem orbis terrarum , atque arcem omnium gentium , subito uno incendio concidentem : cerno animo sepulta in patria miseros atque insepultos acervos civium : versatur mihi ante oculos aspectus Cethegi , & furor , in vestra cæde bacchantis.

12. Quam verò mihi proposui regnantem Lentulum , sicut ipse se ex fati sperasse confessus est ; purpuratum esse hunc Gabinium ; cum exercitu venisse Catilinam : tum lamentationem matrum familiarum , tum fugam virginum atque puerorum , ac vexationem virginum Vestalium perhorresco : & , quia mihi vehementer hæc videntur misera atque miseranda , idcirco in eos , qui ea perficere voluerunt , me severum vehementemque præbeo. Ete-

nim quæro , si quis paterfamiliâs , liberis suis a servo interfectis , uxore occisâ , incensâ domo , supplicium de servo non quàm acerbissimum sumpserit ; utrùm is clemens , ac misericors , an inhumanissimus & crudelissimus esse videatur ? mihi verò importunus ac ferreus , qui non dolore ac cruciatu nocentis , suum dolorem cruciatumque lenierit. Sic nos in his hominibus , qui nos , qui conjuges , qui liberos nostros trucidare voluerunt ; qui singulas uniuscujusque nostrum domos , & hoc universum reipublicæ domicilium delere conati sunt ; qui id egerunt , ut gentem Allobrogum in vestigiis hujus urbis , atque in cinere deflagrati imperii collocarent ; si vehementissimi fuerimus , misericordes habebimur : sin remissiores esse voluerimus , summæ nobis crudelitatis in patriæ , civiumque perniciæ fama subeunda est.

13. Nisi verò cuipiam L. Cæsar , vir fortissimus , & amantissimus reipublicæ , crudelior nudiustertius visus est , quum sororis suæ , feminæ electissimæ , virum præsentem , & audientem , vitâ privandum esse dixit ; quum avum jussu consulis interfectum , filiumque ejus impubere , legatum a patre missum , in carcere necatum esse dixit : quorum , quod simile factum ? quod initum delendæ reipublicæ

consilium? largitionis voluntas tum in republica versata est, & partium quædam contentio. Atque illo tempore hujus avus Lentuli, clarissimus vir, armatus Gracchum est persecutus: ille etiam grave tum vulnus accepit, ne quid de summa dignitate reipublicæ minueretur: hic ad evertenda fundamenta reipublicæ Gallos arcessivit, servitia concitavit, Catilinam evocavit, attribuit nos trucidandos Cethego, ceteros cives interficiendos Gabinio, urbem inflammandam Cassio, totam Italiam vastandam diripiendamque Catilinæ. Vereamini, censeo, ne in hoc scelere tam immani ac nefando nimis aliquid severè statuisse videamini; quum multò magis sit verendum, ne remissione pœnæ crudeles in patriam, quàm ne severitate animadversionis nimis vehementes in acerbissimos hostes fuisset videamur.

VII. Sed ea quæ exaudio, Patres conscripti, dissimulare non possum: jactantur enim voces, quæ perveniunt ad aures meas, eorum, qui vereri videntur, ut habeam satis præsidii ad ea, quæ vos statueritis hodierno die, transigenda. Omnia & provisâ, & parata, & constituta sunt, Patres conscripti, quum meâ summâ curâ atque diligentia, tum multò etiam majore populi Romani ad summum

imperium retinendum, & ad communes fortunas conservandas voluntate: omnes adsunt omnium ordinum homines, omnium denique ætatum: plenum est forum, plena templa circa forum, pleni omnes aditus hujus loci ac templi. Causa enim est post urbem conditam hæc inventa sola, in qua omnes sentirent unum atque idem, præter eos, qui quum sibi viderent esse pereundum, cum omnibus potius, quàm soli perire voluerunt.

15. Hosce ego homines excipio, & secerno libenter: neque enim in improborum civium, sed in acerbissimorum hostium numero habendos puto. Ceteri verò, dii immortales! quâ frequentia, quo studio, quâ virtute ad communem dignitatem salutemque consentiunt? Quid ego hic equites Romanos commemorem? qui vobis ita summam ordinis consilii que concedunt, ut vobiscum de amore reipublicæ certent; quos ex multorum annorum dissensione ad hujus ordinis societatem concordiamque revocatos, hodiernus dies vobiscum, atque hæc causa conjungit: quam conjunctionem si in consulatu confirmatam meo, perpetuam in republica tenuerimus; confirmo vobis, nullum posthac malum civile ac domesticum ad ullam reipublicæ partem esse venturum.

Pari studio defendendæ reipublicæ convenisse video tribunos ærarios, fortissimos viros: scribas item universos; quos quum casu hic dies ad ærarium frequentasset, video ab amore debitæ pecuniæ, ab expectatione fortis, ad communem salutem esse conversos. Omnis ingenuorum adest multitudo, etiam tenuissimorum. Quis est enim, cui non hæc templa, adspectus urbis, possessio libertatis, lux denique hæc ipsa, & hoc commune patriæ solum, quum sit carum, tum verò dulce atque jucundum?

VIII. Operæ pretium est, Patres conscripti, libertinorum hominum studia cognoscere; qui suâ virtute fortunam hujus civitatis consecuti, hanc verè suam patriam esse judicant; quam quidam hinc nati, & summo nati loco, non patriam suam, sed urbem hostium esse judicaverunt. Sed quid ego hujusce ordinis homines commemorem, quos privatæ fortunæ, quos communis respublica, quos denique libertas ea, quæ dulcissima est, ad salutem patriæ defendendam excitavit? servus est nemo, qui modò tolerabili conditione sit servitutis, qui non audaciam civium perhorrescat; qui non hæc stare cupiat; qui non tantum, quantum audet, & quantum potest, conferat ad communem salutem voluntatis.

17. Quare si quem veſtrūm fortè com-  
 movet hoc , quod auditum eſt , lenonem  
 quemdam Lentuli concurrare circum ta-  
 bernas , pretio ſperantem ſollicitari poſſe  
 animos egentium atque imperitorum ; eſt  
 id quidem cœptum atque tentatum ; ſed  
 nulli ſunt inventi tam aut fortunâ miſeri ,  
 aut voluntate perditī , qui non ipſum il-  
 lum ſellæ , atque operis , & quæſtūs quo-  
 tidiani locum ; qui non cubile , ac lectu-  
 lum illum ſuum ; qui denique non curſum  
 hunc otioſum vitæ ſuæ , ſalvum eſſe ve-  
 lint : multò verò maxima pars eorum ,  
 qui in tabernis ſunt ; immo verò ( id  
 enim potiùs eſt dicendum ) genus hoc  
 univerſum amantiffimum eſt otii : etenim  
 omne eorum instrumentum , omnis ope-  
 ra ac quæſtus , frequentiâ civium ſuſten-  
 tatur , alitur otio ; quorum ſi quæſtus ,  
 occluſis tabernis , minui ſolet , quid tan-  
 dem incenſis futurum eſt ? Quæ quum  
 ita ſint , Patres conſcripti , vobis populi  
 Romani præſidia non deſunt ; vos ne  
 populo Romano deeſſe videamini , pro-  
 videte.

IX. Habetis conſulem ex plurimis pe-  
 riculis , & inſidiis , atque ex media mör-  
 te , non ad vitam ſuam , ſed ad ſalutem  
 veſtram reſervatum : omnes ordines ad  
 conſervandam rempublicam mente , vo-

luntate , studio , virtute , voce , consentiunt : obseffa facibus & telis impiæ con-  
 jurationis , vobis supplex manus tendit  
 patria communis : vobis se , vobis vitam  
 omnium civium , vobis arcem , & Capi-  
 tolium , vobis aras Penatium , vobis il-  
 lum ignem Vestæ perpetuum ac sempi-  
 ternum , vobis omnia templa deorum ,  
 atque delubra , vobis muros , atque urbis  
 tecta commendat. Præterea de vestra vi-  
 ta , de conjugum vestrarum , ac libero-  
 rum anima , de fortunis omnium , de se-  
 dibus , de focis vestris , hodierno die vo-  
 bis judicandum est.

19. Habetis ducem , memorem vestri ,  
 oblitum sui ; quæ non semper facultas  
 datur : habetis omnes ordines , omnes  
 homines , universum populum Romanum ,  
 id quod in civili causa hodierno die pri-  
 mum videmus , unum atque idem sen-  
 tientem. Cogitate , quantis laboribus fun-  
 datum imperium , quantâ virtute stabili-  
 tam libertatem , quantâ deorum benigni-  
 tate auctas exaggeratasque fortunas una  
 nox quàm pene deleverit. Id ne umquam  
 posthac non modò confici , sed ne cogi-  
 tari quidem possit a civibus , hodierno  
 die providendum est. Atque hæc non ut  
 vos , qui mihi studio pene præcurritis ,  
 excitarem , locutus sum ; sed ut mea



vox , quæ debet esse in republica princeps , officio functa consulari videretur.

X. Nunc , Patres conscripti , antè quàm ad sententiam redeo , de me pauca dicam. Ego , quanta manus est conjuratorum , quam videtis esse permagnam , tantam me inimicorum multitudinem suscepisse video ; sed eam esse judico turpem , & infirmam & contemptam , & abjectam. Quòd si aliquando alicujus furore & scelere concitata manus ista plus valuerit , quàm vestra , ac reipublicæ dignitas ; me tamen meorum factorum atque consiliorum numquam , Patres conscripti , pœnitebit. Etenim mors , quam illi mihi fortasse minitantur , omnibus est parata : vitæ tantam laudem , quantâ vos me vestris decretis honestatis , nemo est assecutus. Ceteris enim semper bene gestæ , mihi uni conservatæ reipublicæ gratulationem decrevistis.

21. Sit Scipio clarus , ille , cujus consilio atque virtute Annibal in Africam redire , atque ex Italia decedere coactus est : ornetur alter eximiâ laude Africanus , qui duas urbes huic imperio infestissimas , Carthaginem , Numantiamque delevit : habeatur vir egregius , L. Paulus , ille , cujus currum rex potentissimus quondam & nobilissimus , Perses honestavit ;

sit in æterna gloria Marius , qui his Italiam obsidione & metu servitutis liberavit : anteponatur omnibus Pompeius , cujus res gestæ , atque virtutes , iisdem , quibus solis cursus , regionibus ac terminis continentur : erit profectò inter horum laudes aliquid loci nostræ gloriæ ; nisi fortè majus est patefacere nobis provincias , quò exire possimus , quàm curare , ut etiam illi , qui absunt , habeant , quò victores revertantur.

22. Quamquam est uno loco conditio melior externæ victoriæ , quàm domesticæ ; quòd hostes alienigenæ aut oppressi , serviunt , aut recepti , beneficio se obligatos putant : qui autem ex numero civium dementiâ aliquâ depravati hostes patriæ semel esse cœperunt , eos , quum a pernicië reipublicæ repuleris , nec vi coërcere , nec beneficio placare possis. Quare mihi cum perditis civibus æternum bellum susceptum esse video ; quod ego vestro , bonorumque omnium auxilio , memoriâque tantorum periculorum , quæ non modò in hoc populo , qui servatus est , sed etiam in omnium gentium sermonibus ac mentibus semper hærebit , a me , atque meis facilè propulsari posse confido : neque ulla profectò tanta vis reperiatur , quæ conjunctionem vestram ,

equitumque Romanorum, & tantam con-  
spirationem bonorum omnium perfringere  
& labefactare possit.

XI. Quæ quum ita sint, Patres con-  
scripti, pro imperio, pro exercitu, pro  
provincia, quam neglexi, pro triumpho,  
ceterisque laudis insignibus, quæ sunt a  
me, propter urbis vestræque salutis cus-  
todiam, repudiata, pro clientelis, hospi-  
tiisque provincialibus, quæ tamen urba-  
nis opibus non minore labore tueor,  
quàm comparo; pro his igitur omnibus  
rebus, & pro meis in vos singularibus  
studiis, proque hac, quam conspici-  
tis, ad conservandam rempublicam diligen-  
tia, nihil aliud a vobis, nisi hujus temporis,  
totiusque mei consulatûs memoriam pos-  
tulo; quæ dum erit vestris mentibus in-  
fixa, firmissimo me muro septum esse  
arbitror. Quòd si meam spem vis im-  
proborum fefellerit, atque superaverit;  
commendo vobis parvum meum filium;  
cui profectò satis erit præsidii, non so-  
lùm ad salutem, verùm etiam ad digni-  
tatem, si ejus, qui hæc omnia suo so-  
lius periculo conservaverit, illum esse fi-  
lium memineritis.

24. Quapropter de summa salute ves-  
tra, populique Romani, Patres conscri-  
pti, de vestris conjugibus ac liberis, de

312 *ORATIO IV.*

aris ac focus, de fanis ac templis, de totius urbis tectis ac sedibus, de imperio, de libertate, de salute Italiae, deque universa republica decernite diligenter, ut instituistis, ac fortiter. Habetis enim consulem, qui & parere vestris decretis non dubitet; & ea, quae statueritis, quoad vivet, defendere, & per se ipsum praestare possit,



*PRO*



## PRO L. MURENA.


### ORATIO VIGESIMA TERTIA.

*Comitiis consularibus, quæ consul Cicero habuit, D. Junius Silanus, & L. Licinius Murena consules designati sunt. Post comitia Murenæ de ambitu competitor ejus accusavit clari nominis jurisconsultus Ser. Sulpicius cum tribus subscriptoribus, M. Catone, probitate sensuque erga rempublicam insigni viro, Cn. Postumio, Ser. Sulpicio adolescente. Defendit eum Cicero, defensum jam a Q. Hortensio, & M. Crasso. Jucunda in primis oratio est: nam & jurisconsulti propter Sulpicium exagitantur; & Stoica disciplina, cui deditus erat Cato, facere lepidèque deluditur: adeo ut Cato, dignam consule gratiam*

Tomus V. . . . . O

*vitatem Ciceroni detrahens , dixerit id , quod in Plutarcho legimus : Dii boni ! quàm ridiculum consulem habemus ! MANUTIUS.*

*Habita videtur oratio ; Catilinâ jam bellum gerente , quum ejus socii in urbe relicti nondum deprehensi essent.*

I. UÆ precatus sum a diis immortalibus , Judices , more , institutoque majorum , illo die , quo auspicatò , comitiis centuriatis , L. Murenam consulem renuntiavi ; ut ea res mihi , magistratuique meo , populo , plebique Romanæ , bene ac feliciter eveniret : eadem precor ab iisdem diis immortalibus ob ejusdem hominis consulatum unâ cum salute obtinendum , & ut vestræ mentes , atque sententiæ cum populi Romani voluntatibus , suffragiisque consentiant , eaque res vobis , populoque Romano pacem , tranquillitatem , otium , concordiamque afferat. Quodd si illa solemnîs comitiorum precatio consularibus auspiciis consecrata , tantam habet in se vim & religionem , quantam reipublicæ dignitas postulat : idem ego sum precatus , ut eis quoque hominibus , quibus hic consulatus , me rogante , datus

esset, ea res faustè, feliciter, prosperè-  
que eveniret.

2. Quæ quum ita sint, Judices, & quum  
omnis deorum immortalium potestas, aut  
translata sit ad vos, aut certè communi-  
cata vobiscum: idem consul eum vestræ  
fidei commendat, qui antea diis immor-  
talibus commendavit; ut ejusdem homi-  
nis voce & declaratus consul, & defen-  
sus, beneficium populi Romani cum ves-  
tra, atque omnium civium salute tueatur.  
Et, quoniam in hoc officio studium meæ  
defensionis, ab accusatoribus, atque etiam  
ipsa susceptio causæ reprehensa est; ante-  
quam pro L. Murena dicere instituo, pro  
me ipso pauca dicam: non quò mihi po-  
tior, hoc quidem in tempore, sit officii  
mei, quàm hujus salutis defensio; sed ut,  
meo facto vobis probato, majore aucto-  
ritate ab hujus honore, famâ, fortunisque  
omnibus, inimicorum impetus propulsare  
possim.

II. Et primùm M. Catoni, vitam ad  
certam rationis normam dirigenti, & di-  
ligentissimè perpendenti momenta officio-  
rum omnium, de officio meo responde-  
bo. Negat fuisse rectum Cato, me &  
consulem, & legis ambitus latorem, & tam  
severè gestò consulatu, causam L. Mure-  
næ attingere: cujus reprehensio me vehe-  
menter movet, non solum ut vobis, Ju-

dicēs, quibus maximè debeo, verum etiam ut ipsi Catoni, gravissimo atque integerrimo viro, rationem facti mei probem. A quo tandem, M. Cato, est æquius consulem defendi, quàm a consule? Quis mihi in republica potest, aut debet esse conjunctior, quàm is, cui respublica a me uno traditur sustinenda, magnis meis laboribus & periculis sustentata? Quodd si in iis rebus repetendis, quæ mancipi sunt, is periculum iudicii præstare debet, qui se nexu obligavit; profectò etiam rectius in iudicio consulis designati, is potissimum consul; qui consulem declaravit, auctor beneficii populi Romani, defensorque periculi esse debebit.

4. Ac si, ut nonnullis in civitatibus fieri solet, patronus huic causæ publicè constitueretur, is potissimè honore affecto defensor daretur, qui eodem honore præditus non minùs afferret ad dicendum auctoritatis, quàm facultatis. Quodd si e portu solventibus, ii, qui jam in portum ex alto invehuntur, præcipere summo studio solent & tempestatum rationem, & prædonum, & locorum; quodd natura affert, ut eis faveamus, qui eadem pericula, quibus nos perfuncti sumus, ingrediuntur; quo tandem me animo esse oportet propè jam ex magna iactatione terram videntem, in hunc, cui video maximas rel-



publicæ tempestates esse subeundas? Quare, si est boni consulis, non solum videre, quid agatur, verum etiam providere, quid futurum sit; ostendam alio loco, quantum salutis communis intersit, duos consules in republica Kalendis Januarii esse. Quod si ita est, non tam me officium debuit ad hominis amici fortunas, quam respublica consulem ad communem salutem defendendam vocare....

III. Nam quod legem de ambitu tuli, certè ita tuli, ut eam, quam mihi met ipsi jampridem tulerim de civium periculis defendendis, non abrogarem. Etenim si largitionem factam esse confiterer, idque rectè factum esse defenderem, facerem improbè, etiam si alius legem tulisset: quum verò nihil commissum contra legem esse defendam, quid est, quod meam defensionem latio legis impediat?

6. Negat esse ejusdem severitatis, Catilinam, exitium reipublicæ intra mœnia molientem, verbis, & pene imperio, urbe expulisse; & nunc pro L. Murena dicere. Ego autem has partes lenitatis & misericordiæ, quas me natura ipsa docuit, semper egi libenter; illam verò gravitatis, severitatisque personam non appetivi; sed ab republica mihi impositam sustinui, sicut hujus imperii dignitas in summo periculo civium postulabat. Quod

si tum , quum respublica vim & severitatem desiderabat , vici naturam , & tam vehemens fui , quàm cogebar , non quàm volebam ; nunc , quum omnes me causæ ad misericordiam atque ad humanitatem vocent , quanto tandem studio debeo naturæ meæ , consuetudinique servire ? Ac de officio defensionis meæ , & de ratione accusationis tuæ , fortasse etiam alia in parte orationis dicendum nobis erit.

7. Sed me , Iudices , non minùs hominis sapientissimi atque ornatissimi , Ser. Sulpicii , conquestio , quàm Catonis accusatio commovebat , qui gravissimè & acerbissimè ferre dixit , me familiaritatis , necessitudinisque oblitum , causam L. Murenæ contra se defendere. Huic ego , Iudices , satisfacere cupio , vosque adhibere arbitros. Nam quum grave est verè accusari in amicitia , tum etiam si falsò accuseris , non est negligendum. Ego , Ser. Sulpici , me in petitione tua tibi omnia studia atque officia pro nostra necessitudine & debuisse confiteor , & præstitisse arbitror : nihil tibi , consulatum petenti , a me defuit , quod esset aut ab amico , aut a gratioso , aut a consule postulandum : abiit illud tempus : mutata ratio est : sic existimo , sic mihi persuadeo , me tibi contra honorem L. Murenæ , quantum tu a me postulare ausus sis , tantum

debuisse ; contra salutem , nihil debere. Neque enim si tibi tum , quum peteres consulatum , affui , idcirco nunc , quum Murenam ipsum petas , adjutor eodem pacto esse debeo. Atque hoc non modò non laudari , sed ne concedi quidem potest , ut amicis nostris accusantibus , non etiam alienissimos defendamus.

IV. Mihi autem cum Murena , Judices , & vetus & magna amicitia est , quæ in capitis dimicatione a Ser. Sulpicio non idcirco obruetur , quòd ab eodem in honoris contentione superata est. Quæ si causa non esset , tamen vel dignitas hominis , vel honoris ejus , quem adeptus est , amplitudo , summam mihi superbiæ crudelitatisque famam inussisset , si hominis , & suis & populi Romani ornamentis amplissimi , causam tanti periculi repudiasset. Neque enim jam mihi licet , neque est integrum , ut meum laborem hominum periculis sublevandis non impertiam. Nam quum præmia mihi tanta pro hac industria sint data , quanta antea nemini ; labores , per quos ea ceperis , quum adeptus sis , deponere , esset hominis & astuti , & ingrati.

9. Quòd si licet desinere , si te auctore possum , si nulla inertiae , nulla superbiæ turpitudine , nulla inhumanitatis culpa suscipitur ; ego verò libenter desino : sin au-

tem , fuga laboris desidiā , repudiatio supplicum superbiam , amicorum neglectio improbitatem coarguit ; nimirum hæc causa est ejusmodi , quam nec industrius , nec misericors , nec officiosus deferere possit. Atque hujusce rei conjecturam de tuo ipsius studio , Servi , facillimè ceperis. Nam si tibi necesse putas etiam adversariis amicorum tuorum de jure consulentibus respondere ; & , si turpe existimas , te advocato , illum ipsum , quem contra veneris , causâ cadere ; noli tam esse injustus , ut , quum tui fontes vel inimicis tuis pateant , nostros rivulos etiam amicis putes clausos esse oportere.

10. Etenim , si me tua familiaritas ab hac causa removisset , & , si hoc idem Q. Hortensio , M. Crasso , clarissimis viris , si item ceteris , a quibus intelligo tuam gratiam magni æstimari , accidisset ; in ea civitate consul designatus defensorem non haberet , in qua nemini umquam infimo majores nostri patronum deesse voluerunt. Ego verò , Judices , ipse me existimarem nefarium , si amico ; crudelem , si misero ; superbum , si consuli defuissem. Quare quod dandum est amicitiae , largè dabitur a me , ut tecum agam , Servi , non secus , ac si meus esset frater , qui mihi est carissimus , isto in loco : quodtribuendum est officio , fidei , religioni , id

ita moderabor , ut meminerim me contra amici studium pro amici periculo dicere.

V. Intellico , Iudices , tres totius accusationis partes fuisse , & earum unam in reprehensione vitæ , alteram in contentione dignitatis , tertiam in criminibus ambitûs esse versatam. Atque harum trium partium prima illa , quæ gravissima esse debebat , ita fuit infirma & levis , ut illos lex magis quædam accusatoria , quàm vera maledicendi facultas , de vita L. Murenæ dicere aliquid coëgerit. Objecta est enim Asia , quæ ab hoc non ad voluptatem & luxuriam expetita est , sed in militari labore peragrata : qui si adolescens patre suo imperatore non meruisset , aut hostem , aut patris imperium timuisse , aut a parente repudiatus videretur. An , quum sedere in equis triumphantium prætextati potissimum filii soleant , huic donis militaribus patris triumphum decorare fugiendum fuit , ut rebus communiter gestis pene simul cum patre triumpharet ?

- 12. Hic verò , Iudices , & fuit in Asia , & viro fortissimo , parenti suo , magno adjumento in periculis , solatio in laboribus , gratulationi in victoria fuit. Et , si habet Asia suspicionem luxuriæ quamdam , non Asiam numquam vidisse , sed in Asia continenter vixisse , laudandum est. Quamobrem non Asiæ nomen objiciendum Mu-

renæ fuit, ex qua laus familiæ, memoria generi, honos & gloria nomini constituta est; sed aliquod aut in Asia susceptum, aut ex Asia deportatum flagitium ac dedecus. Meruisse verò stipendia in eo bello, quod tum populus Romanus non modò maximum, sed etiam solum gerebat, virtutis; patre imperatore libentissimè meruisse, pietatis; finem stipendiorum, patris victoriam ac triumphum fuisse, felicitatis fuit: maledicto quidem idcirco nihil in hisce rebus loci est, quòd omnia laus occupavit.

VI. Saltatorem appellat L. Murenam Cato. Maledictum est, si verè objicitur, vehementis accusatoris; sin falsò, maledici conviciatoris. Quare quum istà sis auctoritate, non debes, M. Cato, arripere maledictum ex trivio, aut ex scurrarum aliquo convicio; neque temerè consulem populi Romani saltatorem vocare; sed conspiciere, quibus præterea vitiis affectum esse necesse sit eum, cui verè istud objici possit. Nemo enim ferè saltat sobrius, nisi fortè insanit; neque in solitudine, neque in convivio moderato atque honesto: tempestivi convivii, amoeni loci, multarum deliciarum comes est extrema saltatio. Tu mihi arripis id, quod necesse est omnium vitiorum esse postremum; relinquis illa, quibus remotis, hoc

vitium omnino esse non potest : nullum turpe convivium , non amor , non comisatio , non libido , non sumptus ostenditur : & , quum ea non reperiantur , quæ voluptatis nomen habent , quæque vitiosa sunt ; in quo ipsam luxuriam reperire non potes , in eo te umbram luxuriæ reperturum putas ?

14. Nihil igitur in vitam L. Murenæ dici potest : nihil , inquam , omnino , Judices. Sic a me consul designatus defenditur , ut ejus nulla fraus , nulla avaritia , nulla perfidia , nulla crudelitas , nullum petulans dictum in vita proferatur. Bene habet : jacta sunt fundamenta defensionis. Nondum enim nostris laudibus , quibus utar postea , sed propè inimicorum confessione , virum bonum , atque integrum hominem defendimus.

VII. Quo constituto , facilius est mihi aditus ad contentionem dignitatis : quæ pars altera fuit accusationis. Summam video esse in te , Servi Sulpici , dignitatem generis , integritatis , industriæ , ceterorumque ornamentorum omnium , quibus fretum ad consulatûs petitionem aggredi par est. Paria cognosco esse ista in L. Murena , atque ita paria , ut neque ipse dignitate vinci potuerit , neque te dignitate superarit. Contempsisti L. Murenæ genus , extulisti tuum. Quo loco si tibi hoc sumis ,

O vj

nisi qui patricius sit, neminem bono esse genere natum; facis ut rursus plebs in Aventinum sevocanda esse videatur: sin autem sunt amplæ & honestæ familiæ plebeïæ: & proavus L. Murenæ, & avus, prætores fuerunt; & pater quum amplissimè atque honestissimè ex prætura triumphasset, hoc faciliorem huic gradum consulatûs adipiscendi reliquit, quòd is jam patri debitus, a filio petebatur.

16. Tua verò nobilitas, Servi Sulpici, tametsi summa est, tamen hominibus literatis & historicis est notior; populo verò, & suffragatoribus obscurior. Pater enim fuit equestri loco; avus nullâ illustri laude celebratus. Itaque non ex sermone hominum recentî, sed ex annalium vetustate eruenda est memoria nobilitatis tuæ. Quare ego te semper in nostrum numerum aggregare soleo; quòd virtute industriâque perfecisti, ut, quum equitis Romani esses filius, summâ tamen amplitudine dignus putarere: nec mihi umquam minùs in Q. Pompeio, novo homine, & fortissimo viro, virtutis esse visum est, quàm in homine nobilissimo, M. Æmilio. Etenim ejusdem animi atque ingenii est, posteris suis, quod Pompeius fecit, amplitudinem nominis, quam non acceperit, tradere; &, ut Scaurus, memoriam propè intermortuam generis sui, virtute renovare.



VIII. Quamquam ego putabam, Judices, multis viris fortibus ne ignobilitas objiceretur generis, meo labore esse perfectum; qui non modò Curiis, Catonibus, Pompeiis, antiquis illis, fortissimis viris, novis hominibus, sed his recentibus, Mariis, & Didiis, & Cœliis commemorandis jacebant. Quum ego verò tanto intervallo claustra ista nobilitatis refregissem, ut aditus ad consulatum posthac, sicut apud majores nostros fuit, non magis nobilitati, quàm virtuti, pateret; non arbitrabar, quum ex familia veteri, & illustri consul designatus, ab equitis Romani filio, consule, defenderetur, de generis novitate accusatores esse dicturos. Etenim mihi ipsi accidit, ut cum duobus patriciis, altero improbissimo atque audacissimo, altero modestissimo atque optimo virò peterem: superavi tamen dignitate Catilinam, gratiâ Galbam. Quodd si id crimen homini novo esse deberet; profectò mihi neque inimici, neque invidi defuissent.

18. Omittamus igitur de genere dicere, cujus est magna in utroque dignitas: videamus cetera. Quæsturam unà petiit, & sum ego factus prior. Non est respondendum ad omnia: neque enim quemquam vestrùm fugit, quum multi pares dignitate fiant; unus autem primùm solus

possit obtinere, non eundem esse ordinem dignitatis, & renuntiationis: propterea quòd renuntiatio gradus habeat; dignitas autem sit persæpe eadem omnium. Sed quæstura utriusque propemodum pari momento fortis fuit. Habuit hic lege Titia provinciam tacitam, & quietam: tu illam, cui, quum quæstores sortiuntur, etiam acclamari solet, Ostiensem, non tam gratiosam & illustrem, quàm negotiosam & molestam. Consedit utriusque nomen in quæstura: nullum enim vobis fors campum dedit, in quo excurrere virtus, cognoscique posset.

IX. Reliqui temporis spatium in contentionem vocatur: ab utroque dissimilimâ ratione certatum est. Servius hic nobiscum hanc urbanam militiam respondendi, scribendi, cavendi, plenam sollicitudinis, ac stomachi, secutus est: jus civile didicit: multum vigilavit; laboravit: præstò multis fuit; multorum stultitiam perpessus est; arrogantiam pertulit; difficultatem exorbuit: vixit ad aliorum arbitrium, non ad suum. Magna laus, & grata hominibus, unum hominem elaborare in ea scientia, quæ sit multis profutura.

20. Quid Murena interea? fortissimo & sapientissimo viro, summo imperatori, legatus L. Lucullo fuit: qua in legatione duxit exercitum: signa contulit;

manum conseruit ; magnas copias hostium fudit : urbes partim vi , partim obsidione cepit : Asiam istam refertam , & eandem delicatam , sic obiit , ut in ea neque avaritiæ , neque luxuriæ vestigium reliquerit : maximo in bello sic est versatus , ut hic multas res & magnas sine imperatore gesserit , nullam sine hoc imperator. Atque hæc , quamquam præsentem L. Lucullo loquar , tamen , ne ab ipso , propter periculum nostrum , concessam videamur habere licentiam fingendi , publicis litteris testata sunt omnia ; quibus L. Lucullus tantum Murenæ laudis impertit , quantum neque ambitiosus imperator , neque invidus , tribuere alteri in communicanda gloria debuit.

21. Summa in utroque est honestas ; summa dignitas ; quam ego , si mihi per Servium liceat , pari , atque eadem in laude ponam : sed non licet : agitatur rem militarem : insectatur totam hanc legationem : assiduitatis , & operarum harum quotidianarum putat esse consulatum. Apud exercitum mihi fueris , inquit , tot annos ? forum non attigeris ? abfueris tamdiu ? & , quum longo intervallo veneris , cum iis , qui in foro habitaverunt , de dignitate contendas ? Primum ista nostra assiduitas , Servi , nescis , quantum interdum afferat hominibus fastidii , quantum satietatis : mi-

hi quidem vehementer expedit, positam in oculis esse gratiam; sed tamen ego mei satietatem magno meo labore superavi; & tu idem fortasse: verumtamen utrique nostrum desiderium nihil obfuisse.

22. Sed, ut, hoc omisso, ad studiorum atque artium contentionem revertamur; qui potest dubitari, quin ad consultatum adipiscendum, multò plus afferat dignitatis, rei militaris, quàm juris civilis gloria? Vigilas tu de nocte, ut tuis consultoribus respondeas; ille, ut eò, quò intendit, maturè cum exercitu perveniat: te gallorum; illum buccinarum cantus excuscat: tu actionem instituis; ille aciem instruit: tu caves, ne tui consultores; ille, ne urbes, aut castra capiantur: ille tenet, & scit, ut hostium copiae; tu, ut aquae pluviae arceantur: ille exercitatus est in propagandis finibus; tu in regendis: ac nimirum (dicendum est enim quod sentio) rei militaris virtus præstat ceteris omnibus.

X. Hæc nomen populo Romano, hæc huic urbi æternam gloriam peperit: hæc orbem terrarum parere huic imperio coëgit: omnes urbanæ res, omnia hæc nostra præclara studia, & hæc forensis laus, & industria, latent in tutela ac præsidio bellicæ virtutis: simulatque increpuit suspicio tumultus; artes illico nostræ conticescunt.

23. Et, quoniam mihi videris istam scientiam juris tamquam filiolarum osculari tuam, non patiar te in tanto errore versari, ut istud nescio quid, quod tanto opere didicisti, præclarum aliquid esse arbitrere. Aliis ego te virtutibus, continentiae, gravitatis, justitiae, fidei, ceteris omnibus, consulatu, & omni honore semper dignissimum judicavi: quòd quidem jus civile didicisti; non dicam, operam perdidisti: sed illud dicam, nullam esse in illa disciplina munitam ad consulatum viam: omnes enim artes, quæ nobis populi Romani studia conciliant, & admirabilem dignitatem, & pergratam utilitatem debent habere.

XI. Summa dignitas est in iis, qui militari laude antecellunt: omnia enim, quæ sunt in imperio, & in statu civitatis, ab iis defendi & firmari putantur: summa etiam utilitas; si quidem eorum consilio & periculo, quum republicâ, tum etiam nostris rebus perfrui possumus. Gravis etiam illa est, & plena dignitatis, dicendi facultas, quæ sæpe valuit in consule deligendo, posse consilio atque oratione, & senatûs, & populi, & eorum, qui res judicant, mentes permovere: quæritur consul, qui dicendo nonnumquam comprimat tribunitios furores, qui concitatum populum flectat, qui largitioni resistat.

Non mirum, si ob hanc facultatem homines sæpe etiam non nobiles consulatum consecuti sunt; præsertim quum hæc eadem res plurimas gratias, firmissimas amicitias, maxima studia pariat: quorum in isto vestro artificio, Sulpici, nihil est.

25. Primum dignitas in tam tenui scientia quæ potest esse? res enim sunt parvæ, propè in singulis litteris atque interpunctionibus verborum occupatæ. Deinde, etiam si quid apud majores nostros fuit in isto studio admirationis; id, enuntiatis vestris mysteriis, totum est contemptum & abjectum. Posset agi lege, necne, pauci quondam sciebant; fastos enim vulgò non habebant: erant in magna potentia qui consulebantur; a quibus etiam dies, tamquam a Chaldæis, petebantur. Inventus est scriba quidam, Cn. Flavius, qui cornicum oculos confixerit, & singulis diebus ediscendos fastos populo proposuerit, & ab ipsis cautis jurisconsultis eorum sapientiam compilarit. Itaque irati illi, quòd sunt veriti, ne, dierum ratione pervulgatâ & cognitâ, sine sua opera lege posset agi, notas quasdam composuerunt, ut omnibus in rebus ipsi interessent.

XII. Quum hoc fieri bellissimè posset: Fundus Sabinus meus est: immo meus: deinde judicium: noluerunt. *Fundus*, inquit, *qui est in agro, qui Sabinus vocatur.*

PRO L. MURENA. 331

Satis verbosè: cedo, quid postea? *Eum ego ex jure Quiritium meum esse aio. Quid tum? inde ego te ex jure manu' confertum voco.* Quid huic tam loquaciter litigioso responderet ille, unde petebatur, non habebat. Transit idem jurisconsultus, tibi-  
cinis Latini modo: *Unde tu me,* inquit, *ex jure manu' confertum vocasti, inde ibi ego te revoco.* Prætor interea, ne pul-  
chrum se ac beatum putaret, atque ali-  
quid ipse suâ sponte loqueretur, ei quo-  
que carmen compositum est, quum cete-  
ris rebus absurdum, tum verò nullo usu:  
*Utrisque superstitibus, præsentibus, istam  
viam dico: inite viam.* Præstò aderat sa-  
piens ille, qui inire viam doceret. *Redite  
viam:* eodem duce redibant. Hæc jam  
tum apud illos barbatos, ridicula, credo,  
videbantur: homines, quum rectè, atque  
in loco constitissent, juberi abire; ut, un-  
de abissent, eodem statim redirent. Iis-  
dem ineptiis fucata sunt illa omnia, *Quan-  
do te in jure conspicio:* & hæc, *Sed anne  
tu dicis causâ vindicaveris?* quæ dum  
erant occulta, necessariò ab eis, qui ea  
tenebant, petebantur; postea verò per-  
vulgata, atque in manibus jactata & ex-  
cussa, inanissima prudentiæ reperta sunt;  
fraudis autem, & stultitiæ plenissima.

27. Nam quum permulta præclarè le-  
gibus essent constituta, ea jurisconsulto-

rum ingeniis pleraque corrupta ac depravata sunt. Mulieres omnes propter infirmitatem consilii majores in tutorum potestate, esse voluerunt : hi invenerunt genera tutorum , quæ potestate mulierum continerentur. Sacra interire illi noluerunt : horum ingenio senes ad coemptiones faciendas , interimendorum factorum causâ , reperti sunt. In omni denique jure civili æquitatem reliquerunt , verba ipsa tenuerunt : ut , quia in alicujus libris , exempli causâ , id nomen invenerant , putarunt ; omnes mulieres , quæ coemptionem facerent , *Caias* vocari. Jam illud mihi quidem mirum videri solet , tot homines , tam ingeniosos , per tot annos etiam nunc statuere non potuisse , utrum *diem tertium* , an *perendinum* : *judicem* , an *arbitrum* : *rem* , an *litem* dici oporteret.

XIII. Itaque ( ut dixi ) dignitas in ista scientia consularis numquam fuit ; quæ tota ex rebus fictis , commentitiisque constaret : gratiæ verò multò etiam minores. Quod enim omnibus patet , & æquè promptum est mihi , & adversario meo , id esse gratum nullo pacto potest. Itaque non modò beneficii collocandi spem , sed etiam illud , quod aliquando fuit , *Licet consulere* , jam perdidistis. Sapiens existimari nemo potest in ea prudentia , quæ neque extra Romam usquam , neque Ro-



mæ , rebus prolatis , quidquam valet : peritus ideo haberi nemo potest , quòd in eo , quod sciunt omnes , nullo modo possunt inter se discrepare : difficilis autem res ideo non putatur , quòd & per paucis & minimè obscuris litteris continetur. Itaque , si mihi , homini vehementer occupatò , stomachum moveritis , tri-duo me jurisconsultum esse profitebor. Etenim quæ de scripto aguntur , scripta sunt omnia : neque tamen quidquam tam angustè scriptum est , quòd ego non possim , *Qua de re igitur* , addere. Quæ consuluntur autem , minimo periculo respondentur. Si id , quod oportet , responderis ; idem videre respondisse , quod Servius : sin aliter ; etiam controversum jus nosse , & tractare videre.

29. Quapropter non solum illa gloria militaris vestris formulis atque actionibus anteponenda est ; verum etiam dicendi consuetudo longè & multum isti vestræ exercitationi ad honorem antecellét. Itaque mihi videntur plerique initio multò hoc maluisse ; post , quum id assequi non potuissent , istuc potissimum sunt delapsi : ut aiant in Græcis artificibus , eos aulædos esse , qui citharædi fieri non potuerint ; sic nonnullos videmus , qui oratores evadere non potuerunt , eos ad juris studium devenire. Magnus dicendi labor , magna

res, magna dignitas, summa autem gratia: Etenim a vobis salubritas quædam; ab iis, qui dicunt, salus ipsa petitur. Deinde vestra responsa, atque decreta, & evertuntur sæpe dicendo, & sine defensione oratoris firma esse non possunt: in qua re si satis profecissem, parcius de ejus laude dicerem: nunc nihil de me dico, sed de iis, qui in dicendo magni sunt, aut fuerunt.

XIV. Duæ sunt artes, quæ possunt locare homines in amplissimo gradu dignitatis; una imperatoris, altera oratoris boni: ab hoc enim pacis ornamenta retinentur; ab illo belli pericula repelluntur. Ceteræ tamen virtutes ipsæ per se multum valent, justitia, fides, pudor, temperantia; quibus te, Servi, excellere omnes intelligunt: sed nunc de studiis ad honorem dispositis, non de insita cujusque virtute disputo. Omnia ista nobis studia de manibus excutuntur, simulatque aliquis motus novus bellicum canere cœpit. Etenim, ut ait ingeniosus poëta, & auctor valde bonus, præliis promulgatis, *Pellitur e medio* non solum ista vestra verbosa simulatio prudentiæ, sed etiam ipsa illa domina rerum, *sapientia: vi geritur res: spernitur orator*; non solum odiosus in dicendo, ac loquax, verum etiam *bonus: horridus miles amatur*. Vestrum verò studium totum jacet. *Non ex jure manu confertum, sed mage ferro, inquit, rem re-*

*petunt.* Quod si ita est, cedat, opinor, Sulpici, forum castris, otium militiæ, stilus gladio, umbra soli: sit denique in civitate ea prima res, propter quam ipsa est civitas omnium princeps.

31. Verùm hæc, Cato, nimum nos nostris verbis magna facere demonstrat; & oblitos esse, bellum illud omne Mithridaticum cum mulierculis esse gestum: quod ego longè secus existimo, Judices; deque eo pauca differam: neque enim causa in hoc continetur. Nam si omnia bella, quæ cum Græcis gessimus, contemnenda sunt; derideatur de rege Pyrrho triumphus M'. Curii: de Philippo, T. Flaminii: de Ætolis, M. Fulvii: de rege Perse, L. Pauli: de Pseudophilippo, Q. Metelli: de Corinthiis, L. Mummi. Sin hæc bella gravissima, victoriæque eorum bellorum gravissimæ fuerunt: cur Asiaticæ nationes, atque ille a te hostis contemnitur? Atqui ex veterum rerum monumentis vel maximum bellum populum Romanum cum Antiocho gessisse video; cujus belli victor L. Scipio, partâ cum Publio fratre gloriâ, quam laudem ille, Africâ oppressâ, cognomine ipso præ se ferebat, eandem hic sibi ex Asiæ nomine assumpsit.

32. Quo quidem in bello virtus enituit egregia M. Catonis, proavi tui: quò ille, quum esset, ut ego mihi statuo, talis, qua-

lem te esse video, numquam cum Scipione esset profectus, si cum mulierculis bellandum esse arbitraretur. Neque verò cum P. Africano senatus egisset, ut legatus fratri proficisceretur; quum ipse, paulò antè, Annibale ex Italia expulso, ex Africa ejecto, Carthagine oppressâ, maximis periculis rempublicam liberavisset, nisi illud grave bellum & vehemens putaretur.

XV. Atqui, si diligenter, quid Mithridates potuerit, & quid effecerit, & qui vir fuerit, considerâris; omnibus regibus, quibuscum populus Romanus bellum gessit, hunc regem nimirum antepones: quem L. Sulla, maximo & fortissimo exercitu, pugnâ excitatum, non rudis imperator, ut aliud nihil dicam, eum bello invectum totam in Asiam, cum pace dimisit: quem L. Murena, pater hujusce, vehementissimè vigilantissimèque vexatum, repressum magna ex parte, non oppressum reliquit: qui rex, sibi aliquot annis sumptis ad confirmandas rationes, & copias belli, tantum ipse opibus conatuque invaluit, ut se Oceanum cum Ponto, Sertorii copias cum suis conjuncturum putaret.

33. Ad quod bellum duobus consulibus ita missis, ut alter Mithridatem persequeretur, alter Bithyniam tueretur: alterius res & terrâ & mari calamitosæ, vehementer & opes regis, & nomen auxerunt:

L. Luculli verò res tantæ exstiterunt, ut neque majus bellum commemorari possit, neque majore consilio & virtute gestum. Nam, quum totius impetus belli ad Cyzicenorum mœnia constitisset, eamque urbem sibi Mithridates Asiæ januam fore putavisset, quâ effractâ & revulsâ, tota pateret provincia; perfecta ab Lucullo hæc sunt omnia, ut urbs fidelissimorum sociorum defenderetur, & omnes copiæ regis diuturnitate obsidionis consumerentur. Quid? illam pugnam navalem ad Tenedum, quum contento cursu, acerrimis ductibus, hostium classis Italiam spe atque animis inflata peteret, mediocri certamine, & parvâ dimicatione commissam arbitraris? Mitto prælia: prætereo oppugnationes oppidorum: expulsus regno tandem aliquando, tantum tamen consilio atque auctoritate valuit, ut se, rege Armeniorum adjuncto, novis opibus copiisque renovaret.

XVI. Ac, si mihi nunc de rebus gestis esset nostri exercitus, imperatorisque dicendum, plurima & maxima prælia commemorare possem: sed non id agimus. Hoc dico: si bellum hoc, si hic hostis, si ille rex contemnendus fuisset; neque tantâ curâ senatus & populus Romanus suscipiendum putasset, neque tot annos gessisset, neque tanta gloria L. Luculli, neque verò

ejus belli conficiendi curam tanto studio populus Romanus ad Cn. Pompeium detulisset : cujus ex omnibus pugnis , quæ sunt innumerabiles , vel acerrima mihi videtur illa , quæ cum rege commissa est , & summâ contentione pugnata : qua ex pugna quum se ille eripuisset , & Bosporum confugisset , quò exercitus adire non posset ; etiam in extrema fortuna & fuga nomen tamen retinuit regium. Itaque ipse Pompeius , regno possesso , ex omnibus oris , ac notis sedibus hoste pulso , tamen tantum in unius anima posuit , ut , quum omnia , quæ ille tenuerat , adierat , sperarat , victoriâ possideret , tamen non antè , quàm illum vitâ expulit , bellum confectum judicaret. Hunc tu hostem , Cato , contemnis , quo cum per tot annos , tot præliis , tot imperatores bella gesserunt ? cujus expulsi & ejecti vita tanti æstimata est , ut mortē ejus nuntiata , tum denique bellum confectum arbitraretur ? Hoc igitur in bello L. Murenam , legatum fortissimi animi , summi consilii , maximi laboris cognitum esse defendimus ; & hanc ejus operam non minùs ad consulatum adipiscendum , quàm hanc nostram forensē industriam , dignitatis habuisse.

XVII. At enim in præturæ petitione prior renunciatus est Servius. Pergitisne vos , tamquam ex syngrapha , agere cum

populo, ut, quem locum semel honoris cuiuspiam dederit, eundem reliquis honoribus debeat? Quod enim fretum, quem Euripum tot motus, tantas, tam varias habere putatis agitationes fluctuum, quantas perturbationes, & quantos æstus habet ratio comitiorum? Dies intermissus unus, aut nox interposita, sæpe perturbat omnia; & totam opinionem parva nonnumquam commutat aura rumoris. Sæpe etiam sine ulla aperta causa fit aliud atque existimamus, ut nonnumquam ita factum esse etiam populus admiretur; quasi verò non ipse fecerit.

36. Nihil est incertius vulgo, nihil obscurius voluntate hominum, nihil fallacius ratione totâ comitiorum. Quis L. Philippum summo ingenio, operâ, gratiâ, nobilitate, a M. Herennio superari posse arbitratus est? quis Q. Catulum, humanitate, sapientiâ, integritate antecellentem, a Cn. Manlio? quis M. Scaurum, hominem gravissimum, civem egregium, fortissimum senatorem, a Q. Maximo? Non modò horum nihil ita fore putatum est, sed ne quum esset factum quidem, quare ita factum esset, intelligi potuit. Nam ut tempestates sæpe certo aliquo cœli signo commoventur, sæpe improvisò nulla ex certa ratione, obscura aliqua ex causa excitantur: sic in hac comitiorum tempestate po-

pulari , sæpe intelligas , quo signo com-  
mota sit ; sæpe ita obscura est , ut casu ex-  
citata esse videatur ,

XVIII. Sed tamen , si est reddenda  
ratio ; duæ res vehementer in prætura de-  
sideratæ sunt , quæ ambæ in consulatu tum  
Murenæ profuerunt ; una , exspectatio  
muneris , quæ & rumore nonnullo , & stu-  
diis sermonibusque competitorum creve-  
rat ; altera , quod ii , quos in provincia  
ac legatione omnis & liberalitatis & vir-  
tutis suæ testes habuerat , nondum deces-  
serant. Horum utrumque ei fortuna ad  
consulatûs petitionem reservavit : nam &  
L. Luculli exercitus , qui ad triumphum  
convenerat , idem comes L. Murenæ  
præstò fuit ; & munus amplissimum , quod  
petitio præturæ desiderabat , prætura re-  
stituit.

38. Num tibi hæc parva videntur ad-  
jumenta & subsidia consulatûs ? voluntas  
militem , quæ quum per se valet multitu-  
dine , tum apud suos gratiâ ; tum verò in  
consule declarando multum etiam apud  
universum populum Romanum auctorita-  
tis habet suffragatio militaris : imperatores  
enim comitiis consularibus , non verborum  
interpretes deliguntur. Quare gravis est  
illa oratio , *Me faucium recreavit : me præ-  
dâ donavit : hoc duce castra cepimus , si-  
gna contulimus ; numquam iste plus militi*



*laboris imposuit, quàm sibi sumpsit ipse; quum fortis, tum etiam felix.* Hoc quanti putas esse ad famam hominum, ac voluntatem? etenim; si tanta illis comitiis religio est, ut adhuc semper omen valuerit prærogativum; quid mirum est; in hoc felicitatis famam sermonemque valuisset?

XIX. Sed, si hæc leviora ducis, quæ sunt gravissima, & hanc urbanam suffragationem militari anteponis: noli ludorum hujus elegantiam, & scenæ magnificentiam valde contemnere; quæ huic admodum profuerunt. Nam quid ego dicam, populum ac vulgus imperitorum ludis magnoperè delectari? minùs est mirandum: quamquam huic causæ id fatis est: sunt enim populi ac multitudinis comitia. Quare si populo ludorum magnificentia voluptati est, non est mirandum, eam L. Murenæ apud populum profuisse. Sed si nosmetipsi, qui & ab delectatione omni negotiis impedimur, & in ipsa occupatione delectationes alias multas habere possumus, ludis tamen oblectamur, & ducimur; quid tu admirare de multitudine indocta?

40. L. Otho, vir fortis, meus necessarius, equestri ordini restituit non solum dignitatem, sed etiam voluptatem. Itaque lex hæc, quæ ad ludos pertinet, est omnium gratissima, quòd honestissimo or-

dini cum splendore fructus quoque jucunditatis est restitutus. Quare delectant homines, mihi crede, ludi, etiam illos, qui dissimulant, non solum eos, qui fatentur: quod ego in mea petitione sensi: nam nos quoque habuimus scenam competitricem. Quod si ego, qui trinos ludos ædilis feceram, tamen Antonii ludis commovebar: tibi, qui casu nullos feceras, nihil hujus istam ipsam, quam irrides, argenteam scenam, adversatam putas? Sed hæc fanè sint paria omnia: sit par forensis opera militari: sit par militari suffragatio urbana: sit idem, magnificentissimos, & nullos umquam fecisse ludos: quid? in ipsa prætura nihilne existimas inter tuam, & istius sortem interfuisse?

XX. Hujus fors ea fuit, quam omnes tui necessarii tibi optabamus, juris dicendi: in qua gloriam conciliat magnitudo negotii; gratiam, æquitatis largitio: qua in sorte sapiens prætor, qualis hic fuit, offensionem vitæ æqualitate decernendi, benevolentiam adjungit lenitate audiendi. Egregia, & ad consulatum apta provincia, in qua laus æquitatis, integritatis, facilitatis, ad extremum ludorum voluptate concluditur.

42. Quid tua fors? tristis, atrox: quæstio peculatûs, ex altera parte, lacrymarum & squaloris, ex altera, plena cate-

narum , atque indicum. Cogendi iudices inviti , retinendi contra voluntatem : scriba damnatus , ordo totus alienus : Sullana gratificatio reprehensive ; multi viri fortes , & propè pars civitatis offensa est : lites severè æstimatæ : cui placet , obliviscitur ; cui dolet , meminit. Postremò tu in provinciam ire noluisti : non possum id in te reprehendere , quod in me ipso & prætor , & consul probavi. Sed tamen L. Murenæ provincia multas bonas gratias cum optima existimatione attulit : habuit proficiscens delectum in Umbria : dedit ei facultatem respublica liberalitatis ; quâ usus , multas sibi tribus , quæ municipiis Umbriæ conficiuntur , adjunxit : ipse autem in Gallia , ut nostri homines desperatas jam pecunias exigerent , æquitate diligentiaque perfecit. Tu interea Romæ scilicet amicis præstò fuisti : fateor : sed tamen illud cogita , nonnullorum amicorum studia minui solere in eos , a quibus provincias contemni intelligant.

XXI. Et , quoniam ostendi , Iudices ; parem dignitatem ad consulatûs petitionem , disparem fortunam provincialium negotiorum in Murena , atque in Sulpicio fuisse : dicam jam apertiùs , in quo meus necessarius fuerit inferior Servius , & ea dicam , vobis audientibus , amisso jam tempore , quæ ipsi soli , re integrâ , sæpe

dixi. Petere consulatum nescire te, Servi; persæpe tibi dixi: & in iis rebus ipsis, quas te magno & forti animo & agere & dicere videbam, tibi solitus sum dicere, magis te fortem senatorem mihi videri, quàm sapientem candidatum. Primùm accusandi terrores & minæ, quibus tu quotidie uti solebas, sunt fortis viri: sed & populi opinionem a spe adipiscendi avertunt, & amicorum studia debilitant. Nescio quo pacto semper hoc fit; neque in uno aut altero animadversum est, sed jam in pluribus; simulatque candidatus accusationem meditari visus est, ut honorem desperasse videatur.

44. Quid ergo acceptam injuriam persequi non placet? immo vehementer placet: sed aliud tempus est petendi, aliud persequendi: petitorum ego, præsertim consulatûs, magnâ spe, magno animo, magnis copiis & in forum, & in campum deduci volo: non placet mihi inquisitio candidati, prænuntia repulsæ: non testium potius, quàm suffragatorum comparatio: non minæ magis, quàm blanditiæ: non declamatio potius, quàm persalutatio: præsertim quum jam hoc novo more omnes ferè domos omnium concurrant, & ex vultu candidatorum conjecturam faciant, quantum quisque animi & facultatis habere videatur. Videsne tu illum trif-

tem? demissum? jacet, diffidit, abjecit hastas. Serpit hic rumor: *Scis tu illum accusationem cogitare? inquirere in competitores? testes quærere? alium faciam, quoniam sibi hic ipse desperat.* Ejusmodi candidatorum amici intimi debilitantur, studia deponunt, aut testatam rem abjiciunt, aut suam operam, & gratiam judicio, & accusationi reservant.

XXII. Accedit eodem, ut etiam ipse candidatus totum animum, atque omnem curam, operam, diligentiamque suam in petitione non possit ponere: adjungitur enim accusationis cogitatio, non parvares, sed nimirum omnium maxima: magnum est enim, te comparare ea, quibus possis hominem e civitate, præsertim non inopem, neque infirmum, exturbare; qui & per se, & per suos, & verò etiam per alienos defendatur: omnes enim ad pericula propulsanda concurrimus; & qui non apertè inimici sumus, etiam alienissimis, in capitis periculis, amicissimorum officia & studia præstamus.

46. Quare ego expertus & petendi, & defendendi, & accusandi molestiam, sic intellexi; in petendo, studium esse acerrimum; in defendendo, officium; in accusando, laborem. Itaque sic statuo, fieri nullo modo posse, ut idem accusationem, & petitionem consulatûs diligenter

adornet atque instruat : unum sustinere pauci possunt, utrumque nemo. Tu, quum te de curriculo petitionis deflexisses, animumque ad accusandum transtulisses, existimasti, te utrique negotio satisfacere posse? vehementer errasti. Quis enim dies fuit, posteaquam in istam accusandi denuntiationem ingressus es, quem tu non totum in ista ratione consumpseris?

XXIII. Legem ambitus flagitasti, quæ tibi non deerat : erat enim severissimè scripta Calpurnia : gestus est mos & voluntati, & dignitati tuæ : sed tota illa lex accusationem tuam, si haberes nocentem reum, fortasse armasset; petitioni verò refragata est. Pœna gravior in plebem tuâ voce efflagitata est : commoti animi sunt tenuiorum. Exsilium in nostrum ordinem : concessit senatus postulationi tuæ; sed non libenter duriores fortunæ communi conditionem, te auctore, constituit. Morbi excusationi pœna addita est : voluntas offensa multorum, quibus aut contra valetudinis commodum laborandum est, aut incommodo morbi etiam ceteri vitæ fructus relinquendi. Quid ergo? hæc quis tulit? is, qui auctoritati senatûs, voluntati tuæ paruit : denique is tulit, cui minimè proderant. Illa, quæ meâ summâ voluntate senatus frequens repudiavit, medio-criter adversata tibi esse existimas? con-

fusionem suffragiorum flagitasti, prorogationem legis Maniliæ, æquationem gratiæ, dignitatis, suffragiorum. Graviter homines honesti, atque in suis civitatibus & municipiis gratiosi tulerunt, a tali viro esse pugnatum, ut omnes & dignitatis, & gratiæ gradus tollerentur. Idem edititios iudices esse voluisti, ut odia occulta civium, quæ tacitis nunc discordiis continentur, in fortunas optimi cujusque erumperent.

48. Hæc omnia, tibi accusandi viam muniebant, adipiscendi obsepiebant. Atque ex omnibus illa plaga est injecta petitioni tuæ, non tacente me, maxima; de qua ab homine ingeniosissimo & copiosissimo, Hortensio, multa gravissimè dicta sunt; quò etiam mihi durior locus est dicendi datus; ut, quum ante me & ille dixisset, & vir summâ dignitate, & diligentia, & facultate dicendi, M. Crassus, ego in extremo non partem aliquam agerem causæ, sed de tota re dicerem, quod mihi videretur: itaque in iisdem rebus ferè verbor, & quod possum, Iudices, occurro vestræ satietati.

XXIV. Sed tamen, Servi, quam te securim putas injecisse petitioni tuæ, quum tu populum Romanum in eum metum adduxisti, ut pertimesceret, ne consul Catilina fieret, dum tu accusationem compara-

res , depositâ atque abjectâ petitione ! Etenim te inquirere videbant , tristem ipsum : mœstos amicos , observationes , testificationes , seductiones testium , secessionem subscriptorum animadvertabant : quibus rebus certè ipsi candidatorum vultus obscuriores videri solent. Catilinam interea alacrem atque lætum , stipatum choro juventutis , vallatum indicibus atque sicariis , inflatum quum spe militum , tum collegæ mei , quemadmodum dicebat ipse , promissis , circumfluente colonorum Arretinorum , & Fesulanorum exercitu : quam turbam dissimillimo ex genere , distinguebant homines percussi Sullani temporis calamitate : vultus erat ipsius plenus furoris , oculi sceleris , sermo arrogantiae : sic ut ei jam exploratus , & domi conditus consulatus videretur. Murenam contemnebat : Sulpicium accusatorem suum numerabat , non competitorem : ei vim denuntiabat : reipublicæ minabatur.

XXV. Quibus rebus , qui timor bonis omnibus injectus sit , quantaque desperatio reipublicæ , si ille factus esset , nolite a me commoneri velle ; vosmetipsi vobiscum recordamini : meministis enim , quum illius nefarii gladiatoris voces percrebuisent , quas habuisse in concione domestica dicebatur , quum miserorum fidelem de-



fenforem negasset inveniri posse, nisi eum, qui ipse miser esset: integrorum, & fortunatorum promissis faucios, & miseros credere non oportere: quare qui consumpta replere, erepta recuperare vellent, spectarent quid ipse deberet, quid possideret, quid auderet: minimè timidum, & valde calamitosum esse oportere eum, qui esset futurus dux & signifer calamitosorum.

§ 1. Tum igitur, his rebus auditis, meministis fieri senatusconsultum, referente me, ne postero die comitia haberentur, ut de his rebus in senatu agere possemus. Itaque postridie, frequenti senatu, Catilinam excitavi, atque eum de his rebus jussi, si quid vellet, quæ ad me allatæ essent, dicere. Atque ille, ut semper fuit apertissimus, non se purgavit, sed indicavit, atque induit: tum enim dixit, duo corpora esse reipublicæ; unum debile, infirmo capite; alterum firmum, sine capite: huic, quum ita de se meritum esset, caput, se vivo, non defuturum. Congemuit senatus frequens, neque tamen satis severè, pro rei indignitate, decrevit: nam partim ideo fortes in decernendo non erant, quia nihil timebant; partim, quia timebant. Tum erupit e senatu, triumphans gaudio, quem omnino vivum illinc exire non oportuerat, præsertim quum idem ille in eodem ordine paucis

diebus antè, Catoni, fortissimo viro, iudicium minitanti ac denuntianti, respondisset, si quod esset in suas fortunas incendium excitatum, id se non aquâ, sed ruinâ restincturum.

XXVI. His tum rebus commotus, & quòd homines jam tum conjuratos cum gladiis in campum deduci a Catilina sciebam, descendi in campum cum firmissimo præsidio fortissimorum virorum, & cum illa lata insignique lorica, non quæ me tegeret ( etenim sciebam Catilinam non latus, aut ventrem, sed caput & collum solere petere ) verùm ut omnes boni animadverterent, & quum in metu & periculo consulem viderent, id quod est factum, ad opem præsidiumque meum concurrerent. Itaque quum te, Servi, remissionem in petendo putarent, Catilinam & spe & cupiditate inflammatum viderent, omnes, qui illam ab republica pestem depellere cupiebant, ad Murenam se statim contulerunt.

53. Magna est autem comitiis consularibus repentina voluntatum inclinatio, præsertim quum incubuit ad virum bonum, & multis aliis adjumentis petitionis ornatum : qui quum honestissimo patre, atque majoribus, modestissimâ adolescentiâ, clarissimâ legatione, præturâ probatâ in jure, gratâ in munere, ornatâ in pro-

vincia, petisset diligenter, & ita petisset, ut neque minanti cederet, neque cuiquam minaretur; huic mirandum est magno adjumento Catilinæ subitam spem consulatûs adipiscendi fuisse?

54. Nunc mihi tertius ille locus est orationis de ambitûs criminibus, perpuratus ab iis, qui ante me dixerunt; a me, quoniam ita Murena voluit, retractandus: quo in loco Postumio, familiari meo, ornatissimo viro, de divisorum indicîis, & de deprehensis pecuniis; adolescenti ingenioso & bono, Ser. Sulpicio, de equitum centuriis; M. Catoni, homini in omni virtute excellenti, de ipsius accusatione, de senatusconsulto, de republica respondebo.

XXVII. Sed pauca, quæ meum animum repentè moverunt, priûs de L. Murenæ fortuna conquerar. Nam quum sæpe antea, Judices, & ex aliorum miseriis, & ex meis curis laboribusque quotidianis, fortunatos eos homines judicarem, qui remoti a studiis ambitionis, otium ac tranquillitatem vitæ secuti sunt; tum verò in his L. Murenæ tantis, tamque improvisis periculis ita sum animo affectus, ut non queam satis neque communem omnium nostrûm conditionem, neque hujus eventum fortunamque miserari: qui primûm dum ex honoribus continuis familiæ, ma-

jorumque suorum, unum adscendere gradum dignitatis conatus est, venit in periculum, ne & ea, quæ relicta, & hæc, quæ ab ipso parta sunt, amittat; deinde propter studium novæ laudis, etiam in veteris fortunæ discrimen adducitur.

56. Quæ quum sunt gravia, Judices, tum illud acerbissimum est, quod habet eos accusatores, non qui odio inimicitarum ad accusandum, sed qui studio accusandi ad inimicitias descenderent. Nam, ut omittam Servium Sulpicium, quem intelligo non injuriâ L. Murenæ, sed honoris contentione permotum; accusat paternus amicus, Cn. Postumius, vetus, ut ait ipse, vicinus, ac necessarius, qui necessitudinis causas complures protulit, similitatis nullam commemorare potuit: accusat Ser. Sulpicius, sodalis filii, cujus ingenio paterni omnes necessarii munitiores esse debebant: accusat M. Cato, qui quamquam a Murena nullâ re umquam alienus fuit, tamen eâ conditione nobis erat in hac civitate natus, ut ejus opes & ingenium præsidio multis etiam alienissimis, vix cuiquam inimico exitio esse deberet.

57. Respondebo igitur Postumio primum, qui nescio quo pacto mihi videtur prætorius candidatus in consularem, quasi desultorius in quadrigarum curriculum incurrere: cujus competitores si nihil deli-

querunt, dignitati eorum concessit, quum petere destitit : sin autem eorum aliquis largitus est ; expetendus amicus est, qui alienam potius injuriam, quàm suam persequatur. \*\*\*

*Ea omnia, quæ & Postumio, & Ser. Sulpicio, adolescenti, responsa sunt, desiderantur.*

XXVIII. Venio nunc ad M. Catonem, quod est firmamentum ac robur totius accusationis : qui tamen ita gravis est accusator & vehemens, ut multò magis ejus auctoritatem, quàm criminationem pertimescam. In quo ego accusatore, Judices, primùm illud deprecabor, ne quid L. Murenæ dignitas illius, ne quid expectatio tribunatûs, ne quid totius vitæ splendor & gravitas noceat : denique ne ea soli huic obsint bona M. Catonis, quæ ille adeptus est, ut multis prodesse posset. Bis consul fuerat P. Africanus, & duos terrores hujus imperii, Carthaginem, Numantiamque deleverat, quum accusavit L. Cottam : erat in eo summa eloquentia, summa fides, summa integritas, auctoritas tanta, quanta in ipso imperio populi Romani, quod illius operâ tenebatur. Sæpe hoc majores natu dicere audiavi, hanc accusatoris eximiam dignitatem plurimùm L. Cottæ profuisse : noluerunt sapientissimi homines, qui tum rem

illam judicabant, ita quemquam cadere in iudicio, ut nimiis adversarii viribus abjectus videretur.

59. Quid? Ser. Galbam (nam traditum memoriae est) nonne proavo tuo, fortissimo atque florentissimo viro, M. Catoni, incumbenti ad ejus perniciem, populus Romanus eripuit? Semper in hac civitate nimis magnis accusatorum opibus & populus universus, & sapientes, ac multum in posterum prospicientes iudices restiterunt. Nolo accusator in iudicium potentiam afferat, non vim majorem aliquam, non auctoritatem excellentem, non nimiam gratiam: valeant haec omnia ad salutem innocentium, ad opem impotentium, ad auxilium calamitosorum: in periculo verò, & in pernicië civium, repudientur. Nam si quis hoc fortè dicet, Catonem descensurum ad accusandum non fuisse, nisi priùs de causa judicasset; iniquam legem, Iudices, & miseram conditionem instituet periculis hominum, si existimabit, iudicium accusatoris in reum pro aliquo praeiudicio valere oportere.

XXIX. Ego tuum consilium, Cato, propter singulare animi mei de tua virtute iudicium, vituperare non audeo: nonnulla in re forsitan conformare, & leviter emendare possim. *Non multa peccas*, inquit ille fortissimo viro senior magister:

*sed, si peccas, te regere possum.* At ego te verissimè dixerim peccare nihil, neque ulla in re te esse hujusmodi, ut corrigendus potius, quàm leviter inflectendus esse videre: finxit enim te ipsa natura ad honestatem, gravitatem, temperantiam, magnitudinem animi, justitiam, ad omnes denique virtutes magnum hominem & excelsum: accessit his tot doctrina non moderata, nec mitis, sed ut mihi videtur, paulò asperior & durior, quàm aut veritas, aut natura patiatur. Et quoniam non est nobis hæc oratio habenda aut cum imperita multitudine, aut in aliquo conventu agrestium, audaciùs paulò de studiis humanitatis, quæ & mihi & vobis nota & jucunda sunt, disputabo.

61. In M. Catone, Judices, hæc bona, quæ videmus divina & egregia, ipsius scitote esse propria: quæ nonnumquam requirimus, ea sunt omnia non a natura, sed a magistro. Fuit enim quidam summo ingenio vir, Zeno, cujus inventorum æmuli Stoici nominantur. Hujus sententiæ sunt, & præcepta ejusmodi: Sapientem gratiâ numquam moveri, numquam cujusquam delicto ignoscere: neminem misericordem esse, nisi stultum & levem: viri non esse, neque exorari, neque placari: solos sapientes esse, si distortissimi sint, formosos; si mendicissimi, divites; si servitu-

tem serviant, reges : nos autem , qui sapientes non sumus , fugitivos , exsules , hostes , insanos denique esse dicunt : omnia peccata esse paria : omne delictum , scelus esse nefarium ; nec minùs delinquere eum , qui gallum gallinaceum , quum opus non fuerit , quàm eum , qui patrem suffocaverit : sapientem nihil opinari , nullius rei pœnitere , nulla in re falli , sententiam mutare numquam.

XXX. Hæc homo ingeniosissimus , M. Cato , auctoribus eruditissimis inductus , arripuit ; neque disputandi causâ , ut magna pars , sed ita vivendi. Petunt aliquid publicani ? cave quidquam habeat momenti gratia. Supplices aliqui veniunt , miseri & calamitosi ? sceleratus & nefarius fueris , si quidquam , misericordiâ adductus , feceris. Fatetur aliquis se peccasse , & ejus delicti veniam petit ? nefarium est facinus ignoscere. At leve delictum est ? omnia peccata sunt paria. Dixisti quippiam ? fixum & statutum est. Non re ductus es , sed opinione ? sapiens nihil opinatur. Errasti aliqua in re ? malè dici putat. Hac ex disciplina nobis illa sunt. Dixi in senatu me nomen consularis candidati delaturum. Iratus dixisti : numquam , inquit , sapiens irascitur. At temporis causâ : improbi , inquit , hominis est , mendacio fallere : mutare sententiam , turpe est : exorari , scelus : misereri , flagitium.



63. Nostri autem illi ( fatebor enim , Cato , me quoque in adolescentia , diffusum ingenio meo , quæsisse adjumenta doctrinæ ) nostri , inquam , illi a Platone , & Aristotele , moderati homines , & temperati , aiunt , apud sapientem valere aliquando gratiam : viri boni esse misereri : distincta esse genera delictorum , & disparēs pœnas : esse apud hominem constantem ignoscendi locum : ipsum sapientem sæpe aliquid opinari , quod nesciat : irasci nonnumquam : exorari eundem , & placari : quod dixerit , interdum , si ita rectius sit , mutare : de sententia decedere aliquando : omnes virtutes mediocritate quadam esse moderatas.

XXXI. Hos ad magistros si qua te fortuna , Cato , cum ista natura detulisset , non tu quidem vir melior esses , nec fortior , nec temperantior , nec justior ( neque enim esse potes ) sed paulò ad lenitatem propensior : non accusares nullis adductus inimiciis , nullâ lacessitus injuriâ , pudentissimum hominem , summâ dignitate atque honestate præditum : putares , quum in ejusdem anni custodia te atque L. Murenam fortuna posuisset , aliquo te , cum hoc , reipublicæ vinculo esse conjunctum : quod atrociter in senatu dixisti , aut non dixisses , aut seposuisses , aut mitiorem in partem interpretarere ,

65. Ac te ipsum ( quantum ego opinionione auguror ) nunc & animi quodam impetu concitatum, & vi naturæ atque ingenii elatum, & recentibus præceptorum studiis flagrantem jam usus flectet, dies leniet, ætas mitigabit. Etenim isti ipsi mihi videntur vestri præceptores & virtutis magistri, fines officiorum paulò longius, quàm natura vellet, protulisse; ut, quum ad ultimum animo contendissemus, ibi tamen, ubi oporteret, consisteremus. Nihil ignoveris: immo aliquid, non omnia. Nihil gratiæ causâ feceris: immo resistito gratiæ, quum officium & fides postulabit. Misericordiâ commotus ne sis: etiam; in dissolvenda severitate: sed tamen est laus aliqua humanitatis. In sententia permemento: verò; nisi sententiam sententia alia vicerit melior.

66. Hujuscemodi Scipio ille fuit, quem non pœnitebat facere idem, quod tu: habere eruditissimum hominem, & pæne divinum domi; cujus oratione & præceptis, quamquam erant eadem ista, quæ te delectant, tamen asperior non est factus, sed ( ut accepi a senibus ) lenissimus. Quis verò C. Lælio comior? quis jucundior, eodem ex studio isto? quis illo gravior? sapientior? Possùm de L. Philippo, de C. Gallo dicere hæc eadem: sed te domum jam deducam tuam. Quemquamne

existimas Catone, proavo tuo, commodiorem, comiorem, moderatiorem fuisse, ad omnem rationem humanitatis? de cujus præstanti virtute quum verè graviterque diceres, domesticum te habere dixisti exemplum ad imitandum. Est illud quidem exemplum tibi propositum domi, sed tamen naturæ similitudo illius ad te magis, qui ab illo ortus es, quàm ad unumquemque nostrum pervenire potuit; ad imitandum verò tam mihi propositum exemplar illud est, quàm tibi. Sed, si illius comitatem & facilitatem tuæ gravitati severitatisque adasperferis; non ista quidem erunt meliora, quæ nunc sunt optima, sed certè condita jucundiùs.

XXXII. Quare, ut ad id, quod institui, revertar, tolle mihi e causa nomen Catonis: remove, ac prætermitte auctoritatem, quæ in judiciis aut nihil valere, aut ad salutem debet valere: congregare mecum criminibus ipsis. Quid accusas, Cato? quid affers in iudicium? quid arguis? Ambitum accusas? non defendo. Me reprehendis, quòd idem defendam, quod lege punierim. Punivi ambitum, non innocentiam: ambitum verò ipsum vel tecum accusabo, si voles. Dixisti, senatusconsultum, me referente, esse factum, si mercede corrupti, obviam candidatis essent, si conducti sectarentur, si gladiato-

ribus vulgò locus tributim, & item prandia si vulgò essent data; contra legem Calpurniam factum videri. Ergo ita senatus judicat, contra legem facta hæc videri, si facta sint: decernit, quod nihil opus est, dum candidatis morem gerit: nam factum sit, necne, vehementer quaeritur: si factum sit, quin contra legem sit, dubitare nemo potest.

68. Est igitur ridiculum, quod est dubium, id relinquere incertum: quod nemini dubium potest esse, id judicare. Atque id decernitur omnibus postulantibus candidatis; ut ex senatusconsulto neque cujus intersit, neque contra quem sit, intelligi possit. Quare doce, a L. Murena illa esse commissæ: tum egomet tibi contra legem commissæ esse concedam.

XXXIII. Multi obviam prodierunt de provincia decedenti, consulatum petenti. Solet fieri: eccui autem non proditur revertenti? Quæ fuit ista multitudo? primum, si tibi istam rationem non possim reddere, quid habet admirationis, tali viro advenienti, candidato consulari, obviam prodisse multos? quod nisi esset factum, magis mirandum videretur.

69. Quid, si etiam illud addam, quod a consuetudine non abhorret, rogatos esse multos? num aut criminofum sit, aut mirandum, qua in civitate rogati infimo-  
rum

rum hominum filios propè de nocte ex ultima sæpe urbe deductum venire soleamus, in ea non esse gravatos homines prodire horâ tertiâ in campum Martium, præfertim talis viri nomine rogatos? Quid, si omnes societates venerunt, quarum ex numero multi hîc sedent iudices? quid, si multi homines nostri ordinis honestissimi? quid, si illa officiosissima, quæ neminem patitur non honestè in urbem introire, tota natio candidatorum? si denique ipse accusator noster Postumius obviam cum bene magna caterva sua venit: quid habet ista multitudo admirationis? Omitto clientes, vicinos, tribules, exercitum totum Luculli, qui ad triumphum per eos dies venerat: hoc dico, frequentiam in isto officio gratuitam, non modò dignitati ullius umquam, sed ne voluntati quidem defuisse. At sectabantur multi: doce, mercede: concedam esse crimen: hoc quidem remoto, quid reprehendis?

XXXIV. Quid opus est, inquit, sectatoribus? a me tu id quæris, quid opus sit eo, quo semper usi sumus? Homines tenues unum habent in nostrum ordinem aut promerendi, aut proferendi beneficii locum, hanc in nostris petitionibus operam, atque affectationem: neque enim fieri potest, neque postulandum est a no-

bis , aut ab equitibus Romanis , ut suos necessarios candidatos sectentur totos dies ; a quibus si domus nostra celebratur , si interdum ad forum deducimur , si uno basilicæ spatio honestamur , diligenter observari videmur & coli. Tenuiorum & non occupatorum amicorum est ista assiduitas ; quorum copia bonis & beneficiis deesse non solet.

71. Noli igitur eripere hunc inferiori generi hominum fructum officii , Cato : sine eos , qui omnia a nobis sperant , habere ipsos quoque aliquid , quod nobis tribuere possint. Si nihil erit , præter ipsorum suffragium , tenue est ; si , ut suffragantur , nihil valent gratiâ. Ipsi denique , ut solent loqui , non dicere pro nobis , non spondere , non vocare domum suam possunt : atque hæc a nobis petunt omnia : neque ullâ re aliâ , quæ a nobis consequuntur , nisi operâ suâ , compensari putant posse. Itaque & legi Fabiæ , quæ est de numero sectatorum , & senatusconsulto , quod est L. Cæsare consule factum , restiterunt : nulla est enim poena , quæ possit observantiam tenuiorum ab hoc veteri instituto officiorum excludere ;

72. At spectacula sunt tributim data , & ad prandium vulgo vocati : etsi hoc factum a Murena omnino , Iudices , non

est; ab ejus amicis autem more & modo factum est; tamen admonitus re ipsâ, recorder, quantum hæc quæstiones, in senatu habitæ, punctorum nobis, Servi, detraxerint. Quod enim tempus fuit aut nostrâ, aut patrum nostrorum memoriâ, quo hæc, sive ambitio est, sive liberalitas, non fuerit, ut locus & in circo & in foro daretur amicis & tribulibus? hæc homines tenuiores primùm, nondum qui a suis tribulibus vetere instituto assequebantur. \*\*\*

*Deest nonnihil.*

XXXV. Præfectum fabrûm semel locum tribulibus suis dedisse: quid statuent in viros primarios, qui in circo tötas tabernas, tribulium causâ, compararunt? Hæc omnia sectatorum, spectaculorum, prandiorum item crimina, a multitudine in tuam nimiam diligentiam, Servi, conjecta sunt, in quibus tamen Murena ab senatûs auctoritate defenditur. Quid enim? senatus num obviam prodire crimen putat? non; sed mercede: convince. Num sectari multos? non; sed conductos: doce. Num locum ad spectandum dare? aut ad prandium invitare? minimè; sed vulgò, passim. Quid est vulgò? universos. Non igitur, si L. Natta, summo loco adolescens, qui, & quo animo jam sit, & qualis vir futurus sit, videmus, in equi-

tum centuriis voluit esse & ad hoc officium necessitudinis, & ad reliquum tempus, graciosus, id erit ejus vitrico fraudi aut crimini: nec, si virgo Vestalis, hujus propinqua & necessaria, locum suum gladiatoribus concessit huic, non & illa pie fecit, & hic a culpa est remotus. Omnia hæc sunt officia necessariorum, commoda tenuiorum, munia candidatorum.

74. At enim agit mecum austerè & Stoicè Cato: negat verum esse, allici benevolentiam cibo: negat judicium hominum in magistratibus mandandis corrumpi voluptatibus oportere. Ergo ad cœnam, petitionis causâ, si quis vocat, condemnatur. Quippe, inquit: tu mihi summum imperium, summam auctoritatem, tu gubernacula reipublicæ petas fovendis hominum sensibus, & deliniendis animis, & adhibendis voluptatibus? Utrùm lenocinium, inquit, a grege delicatæ juventutis, an orbis terrarum imperium a populo Romano petebas? Horribilis oratio, sed eam usus, vita, mores, civitas ipsa respuit. Neque tamen Lacedæmonii, auctores istius vitæ atque orationis, qui quotidianis epulis in robore accumbunt; neque verò Cretes, quorum nemo gustavit umquam cubans, meliùs, quàm Romani homines, qui tempora voluptatis laboris-



que dispertiunt, respublicas suas retinuerunt: quorum alteri, uno adventu nostri exercitus, deleti sunt; alteri, nostri imperii præsidio disciplinam suam, legesque conservant.

XXXVI. Quare noli, Cato, majorum instituta, quæ res ipsa publica, quæ diuturnitas imperii comprobant, nimium severâ oratione reprehendere. Fuit eodem ex studio vir eruditus apud patres nostros, & honestus homo, & nobilis, Q. Tubero: is, quum epulum Q. Maximus, Africani patris sui nomine, populo Romano daret, rogatus est a Maximo, ut triclinium sterneret, quum esset Tubero ejusdem Africani sororis filius. Atque ille, homo eruditissimus, ac Stoicus, stravit pelliculis hædinis lectulos Punicanos, & exposuit vasa Samia: quasi verò esset Diogenes Cynicus mortuus, & non divini hominis Africani mors honestaretur: quem quum supremo ejus die Maximus laudaret, gratias egit diis immortalibus, quòd ille vir in hac republica potissimum natus esset: necesse enim fuisse, ibi esse terrarum imperium, ubi ille esset: hujus in morte celebranda graviter tulit populus Romanus hanc perversam sapientiam Tuberonis.

76. Itaque homo integerrimus, civis  
Q iiij

optimus , quum esset L. Pauli nepos ; P. Africani , ut dixi , sororis filius , his hædinis pelliculis præturâ dejectus est. Odit populus Romanus privatam luxuriam ; publicam magnificentiam diligit : non amat profusas epulas ; sordes & inhumanitatem multò minùs : distinguit rationem officiorum , ac temporum ; vicissitudinem laboris , ac voluptatis. Nam , quod ais , nullâ re allici hominum mentes oportere ad magistratum mandandum , nisi dignitate ; hoc tu ipse , in quo summa est dignitas , non servas : cur enim quemquam , ut studeat tibi , ut te adjuvet , rogas ? Rogas tu me , ut mihi præsis , ut committam ego me tibi. Quid tandem ? istuc me rogari oportet abs te , an te potius a me , ut pro mea salute laborem periculumque suscipias ?

77. Quid , quòd habes nomenclatorem ? in eo quidem fallis & decipis : nam , si nomine appellari abs te cives tuos honestum est , turpe est eos notiores esse servo tuo , quàm tibi : sin etiam noris , tamen per monitorem appellandi sunt ? cur antè petis , quàm infusurravit ? aut quid , quum admoneris , tamen , quasi tute noris , ita salutas ? quid , posteaquam es designatus , multò salutas negligentius ? Hæc omnia ad rationem civitatis si diri-

gas, recta sunt : sin perpendere ad disciplinæ præcepta velis, reperiantur pravis-  
sima. Quare nec plebi Romanæ eripiendi fructus isti sunt ludorum, gladiatorum, conviviorum ; quæ omnia majores nostri comparaverunt : nec candidatis ista benignitas adimenda est, quæ liberalitatem magis significat, quàm largitionem.

XXXVII. At enim te ad accusandum respublica adduxit. Credo, Cato, te isto animo, atque eâ opinione venisse : sed tu imprudentiâ laberis. Ego quod facio, Judices, quum amicitiae dignitatisque L. Murenæ gratiâ facio, tum me pacis, otii, concordiae, libertatis, salutis, vitæ denique omnium nostrum causâ facere clamo, atque obtestor. Audite, audite consulem, Judices, nihil dicam arrogantius, tantum dicam, totos dies atque noctes de republica cogitantem. Non usque eò L. Catilina rempublicam despexit atque contempsit, ut eâ copiâ, quam secum eduxit, se hanc civitatem oppressurum arbitraretur : latius patet illius sceleris contagio, quàm quisquam putat : ad plures pertinet. Intus, intus, inquam, est equus Trojanus ; a quo numquam, me consule, dormientes opprimemini.

79. Quæris a me, quid ego Catilinam metuam. Nihil : & curavi, ne quis me-

tueret : sed copias illius , quas hic video , dico esse metuendas : nec tam timendus est nunc exercitus L. Catilinæ , quàm isti , qui illum exercitum deseruisse dicuntur : non enim deseruerunt ; sed ab illo in speculis atque insidiis relictî , in capite , atque in cervicibus nostris restiterunt. Hi & integrum consulem , & bonum imperatorem , & naturâ , & fortunâ , cum reipublicæ salute conjunctum , dejici de urbis præsidio , & de custodia civitatis , vestris sententiis , deturbari volunt : quorum ego ferrum & audaciam rejeci in campo , debilitavi in foro , compressi etiam domi meæ sæpe , Judices : his vos si alterum consulem tradideritis , plus multò erunt vestris sententiis , quàm suis gladiis consecuti. Magni interest , Judices , id quod ego multis repugnantibus egi atque perfeci , esse Kalendis Januarii in republica duo consules.

80. Nolite arbitrari , mediocribus consiliis , aut usitatis viis , aut lege improbâ , aut perniciosâ largitione , auditum aliquando aliquod malum reipublicæ quæri : inita sunt in hac civitate consilia , Judices , urbis delendæ , civium trucidandorum , nominis Romani extinguendi. Atque hæc cives , cives , inquam ( si eos hoc nomine appellari fas est ) de patria sua & cogi-

tant, & cōgitaverunt. Horum ego quotidie consiliis occurro, audaciam debilito, sceleri resisto: sed vos moneo, Iudices: in exitu est jam meus consulatus: nolite mihi subtrahere vicarium meæ diligentiae: nolite adimere eum, cui rempublicam cupio tradere incolumem, ab his tantis periculis defendendam.

XXXVIII. Atque ad hæc mala, Iudices, quid accedat aliud, non videtis? Te, te appello, Cato: nonne prospicis tempestatem anni tui? jam enim hesternâ concione intonuit vox perniciofa designati tribuni, collegæ tui: contra quem multum tua mens, multum omnes boni providerunt, qui te ad tribunatûs petitionem vocaverunt. Omnia, quæ per hoc triennium agitata sunt jam ab eo tempore, quo a L. Catilina, & Cn. Pisone initum consilium senatûs interficiendi scitis esse, in hos dies, in hos menses, in hoc tempus erumpunt.

82. Qui locus est, Iudices, quod tempus, qui dies, quæ nox, quum ego non ex istorum insidiis ac mucronibus, non solum meo, sed multò etiam magis divino consilio eripiar, atque evolem? Neque isti me meo nomine interfici, sed vigilantem consulem de reipublicæ præsidio demovere volunt: nec minùs

vellent , Cato , te quoque aliquâ ratione , si possent , tollere ; id quod , mihi crede , & agunt , & moliuntur : vident , quantum in te sit animi , quantum ingenii , quantum auctoritatis , quantum reipublicæ præsidii : sed quum consulari auctoritate , & auxilio spoliatam vim tribunitiam viderint , tum se facilius inermem & debilitatum te oppressuros arbitrantur : nam ne sufficiatur consul , non timent : vident in tuorum potestate collegarum fore : sperant sibi Silanum , clarum virum , sine collega , te sine consule , rempublicam sine præsidio objici posse.

83. His tantis in rebus , tantisque in periculis , est tuum , M. Cato , qui non mihi , non tibi , sed patriæ natus es , videre quid agatur , retinere adiutorem , defensorem , socium in republica , consulem non cupidum , consulem ( quod maximè tempus hoc postulat ) fortunâ constitutum ad amplexandum otium ; scientiâ , ad bellum gerendum ; animo & usu , ad quod velis negotium.

XXXIX. Quamquam hujusce rei potestas omnis in vobis sita est , Indices : totam rempublicam vos in hac causa tenetis , vos gubernatis. Si L. Catilina cum suo consilio nefariorum hominum , quos

secum eduxit, hac de re posset judicare, condemnaret L. Murenam: si interficere posset, occideret. Petunt enim rationes illius, ut orbetur auxilio respublica: ut minuatur contra suum furem imperatorum copia: ut major facultas tribunis plebis detur, depulso adversario, seditionis ac discordiæ concitandæ. Idemne igitur delecti amplissimis ex ordinibus honestissimi atque sapientissimi viri judicabunt, quod ille importunissimus gladiator, hostis reipublicæ, judicaret?

84. Mihi credite, Judices, in hac causa non solum de L. Murenæ, verum etiam de vestra salute sententiam feretis. In discrimen extremum venimus: nihil est jam, unde nos reficiamus, aut ubi lapsi resistamus. Non solum minuenda non sunt auxilia, quæ habemus; sed etiam nova, si fieri possit, comparanda: hostis est enim non apud Anienem, quod bello Punico gravissimum visum est, sed in urbe, in foro (dii immortales! sine gemitu hoc dici non potest) non nemo etiam in illo sacrario reipublicæ, in ipsa, inquam, curia non nemo hostis est. Dii faxint, ut meus collega, vir fortissimus, hoc Catilinæ nefarium latrocinium armatus opprimat! ego togatus, vobis, bonisque omnibus adiutoribus, hoc, quod conceptum ref-

publica periculum parturit, consilio discuti-  
tiam, & comprimam!

85. Sed quid tandem fiet, si hæc elap-  
sa de manibus nostris, in eum annum,  
qui consequitur, redundarint? Unus erit  
consul, & is non in administrando bello,  
sed in sufficiendo collega occupatus. Hunc  
jam qui impedituri sint \*\*\* illa pestis im-  
manis, importuna, Catilinæ prorumpet,  
quâ poterit; & jam populo Romano mi-  
natur: in agros suburbanos repentè advola-  
bit: versabitur in castris furor, in curia  
timor, in foro conjuratio, in campo exer-  
citus, in agris vastitas: omni autem in  
fede ac loco ferrum, flammamque me-  
tuemus. Quæ jamdiu comparantur, eadem  
istâ omnia, si ornata suis præsiidiis erit res-  
publica, faciliè & magistratuum consiliis,  
& privatorum diligentia opprimuntur.

XL. Quæ quum ita sint, Judices, pri-  
mùm reipublicæ causâ, quâ nulla res cui-  
quam potior debet esse, vos, pro mea  
summa & vobis cognita in rempublicam  
diligentia, moneo, pro auctoritate consu-  
lari hortor, pro magnitudine periculi ob-  
testor, ut otio, ut paci, ut salutem, ut vi-  
tæ vestræ, & ceterorum civium, consu-  
latis: deinde ego fidem vestram, vel de-  
fensoris & amici officio adductus, oro  
atque obsecro, Judices, ut ne hominis



miseri, & quum corporis morbo, tum animi dolore confecti, L. Murenæ, recentem gratulationem novâ lamentatione obruat: modò maximo beneficio populi Romani ornatus, fortunatus videbatur, quòd primus in familiam veterem, primus in municipium antiquissimum, consulatum attulisset: nunc idem squalore sordidus, confectus morbo, lacrymis ac mœrore perditus, vester est supplex, Iudices, vestram fidem obtestatur, misericordiam implorat, vestram potestatem, ac vestras opes intuetur.

87. Nolite, per deos immortales! Iudices, hac eum re, quâ se honestiorem fore putavit, etiam ceteris antè partis honestatibus, atque omni dignitate, fortunâque privare. Atque ita vos Murena, Iudices, orat atque obsecrat, si injustè neminem læsit, si nullius aures, voluntatemve violavit, si nemini, ut levissimè dicam, odio nec domi, nec militiæ fuit: sit apud vos modestiæ locus, sit demissis hominibus perfugium, sit auxilium pudori. Misericordiam spoliatio consulatûs magnam habere debet, Iudices: unâ enim eripiuntur cum consulatu omnia. Invidiam verò his temporibus habere consulatus ipse nullam potest: objicitur enim concionibus seditiosorum, insidiis conjuratorum,

telis Catilinæ: ad omne denique periculum, atque ad omnem invidiam solus opponitur. Quare quid invidendum Murenæ, aut cuiquam nostrum sit in hoc præclaro consulatu, non video, Iudices: quæ verò miseranda sunt, ea & mihi ante oculos versantur, & vos videre, & perspicere potestis.

XLI. Si ( quod Jupiter omen avertat ) hunc vestris sententiis affligeritis; quò se miser vertet? domumne? ut eam imaginem clarissimi viri, parentis sui, quam paucis antè diebus laureatam in sua gratulatione conspexit; eandem deformatam ignominiâ, lugentemque videat? an ad matrem, quæ misera modò consulem osculata filium suum, nunc cruciatur; & sollicita est, ne eundem paulò post spoliatum omni dignitate conspiciat?

89. Sed quid ego matrem, aut domum appello, quem nova pœna legis & domo, & parente, & omnium suorum consuetudine conspectuque privat? Ibit igitur in exilium miser? quò? ad Orientisne partes, in quibus annos multos legatus fuit, & exercitus duxit, & res maximas gessit? At habet magnum dolorem, unde cum honore decesseris, eòdem cum ignominia reverti. An se in contrariam partem terrarum abdet, ut Gallia Transalpi-

na, quem nuper summo cum imperio libentissimè viderit, eundem lugentem, moerentem, exulem videat? in ea porro provincia, quo animo C. Murenam, fratrem suum, adspiciet? qui hujus dolor? qui illius moeror erit? quæ utriusque lamentatio? quanta autem perturbatio fortunæ, atque sermonis, quodd, quibus in locis paucis antè diebus factum esse consulem Murenam, nuntii litteræque celebrassent, & unde hospites atque amici gratulatum Romam concurrerint, repente eò accedat ipse nuntius suæ calamitatis?

90. Quæ si acerba, si misera; si luctuosa sunt, si alienissima a mansuetudine, & misericordiâ vestrà, Judices; conserve populi Romani beneficium; reddite reipublicæ consulem: date hoc ipsius pudori, date patri mortuo, date generi & familiæ, date etiam Lanuvio, municipio honestissimo, quod in hac tota causa frequens, moestumque vidistis: nolite a sacris patriis Junonis Sospitæ, cui omnes consules facere necesse est, domesticum, & suum consulem potissimum avellere. Quem ego vobis, si quid habet aut momenti commendatio, aut auctoritatis confirmatio mea, consul consulem, Judices, ita commendo, ut cupidissimum

otii, studiosissimum bonorum, acerrimum  
contra seditionem, fortissimum in bello,  
inimicissimum huic conjurationi, quæ nunc  
republicam labefactat, futurum esse pro-  
mittam, & spondeam.





# PRO P. SULLA.

## ORATIO VIGESIMA QUARTA.

*M. Lepido & L. Volcatio coff. P. Sulla & P. Autronius, designati coff. damnati fuerant de ambitu, & in eorum locum accusatores L. Cotta & L. Torquatus, legis beneficio successerant. Hoc judicium mox consecuta erat prima Catilinæ conjuratio, quâ consulibus & plerisque senatoribus conjurati perniciem machinabantur. Post triennium altera Catilinæ conjuratio in consulatû Ciceronis erupit. Quum conscii plerique pœnas dedissent, L. Torquati filius adolescens P. Sullæ nomen de utraque illa conjuratione detulit. Prioris conjurationis crimen propulsavit Q. Hortensius, qui tum præsens adfuerat, quum de ea quærere-*

*tur. De posteriore Cicero, qui eam patefecerat atque oppresserat, hac oratione Sullam defendit.*

*Acta causa est Silano & Murena coss. anno urbis 691. Ciceronis 45. hoc enim anno, ex indicio L. Vectii equitis Romani, qui de Catilinæ sociis in urbe remanserant, partim præsentibus, partim quum citati non respondiissent, damnati sunt.*

I. **M**AXIME vellem, Iudices, ut P. Sulla & antea dignitatis suæ splendorem obtinere, & post calamitatem acceptam, modestiæ fructum aliquem potuisset percipere: sed, quoniam ita tulit casus infestus, ut amplissimo in honore quum communi ambitionis invidiâ, tum singulari Autronii odio everteretur, & in his pristinæ fortunæ reliquiis miseris & afflictis, tamen haberet quosdam, quorum animos ne supplicio quidem suo satiare posset: quamquam ex hujus incommodis magnam animo molestiam capio, tamen in ceteris malis faciliè patior oblatum mihi tempus, in quo viri boni lenitatem meam, misericordiamque, notam omnibus quondam, nunc, quasi intermissam, agnoscerent; im-

probi ac perditī cives, redomiti atque victi, præcipitante republicâ, vehementem me fuisse atque fortem, conservatâ, mihi tem ac misericordem faterentur.

2. Et, quoniam L. Torquatus, meus familiaris ac necessarius, Judices, existimavit, si nostram in accusatione sua necessitatem familiaritatemque violasset, aliquid se de auctoritate meâ defensionis posse detrudere; cum hujus periculi propulsatione conjungam defensionem officii mei: quo quidem genere non uterer orationis, Judices, hoc tempore, si mea solum interesset: multis enim mihi locis & data facultas est, & sæpe dabitur de mea laude dicendi: sed, ut ille, Judices, quantum de mea auctoritate deripuisset, tantum se de ejus præsidiis deminuturum speravit; sic hoc ego sentio, si mei facti rationem vobis, constantiamque hujus officii ac defensionis probavero, causam quoque me P. Sullæ probaturum.

3. Ac primū abs te illud, L. Torquate, quæro, cur me a ceteris clarissimis viris, ac principibus civitatī, in hoc officio, atque in hoc defensionis jure fecernas: quid enim est, quamobrem abs te Q. Hortensii factum, clarissimi atque ornatissimi viri, non reprehendatur, reprehendatur meum? nam si initum est consilium a P. Sulla inflammandæ civita-

tis, hujus extinguendi imperii, delendæ urbis; mihi majorem hæ res dolorem; quàm Q. Hortensio, mihi majus odium afferre debent? meum denique gravius esse judicium, qui adjuvandus in his causis, qui oppugnandus, qui defendendus, qui deferendus esse videatur?

II. Ita, inquit: tu enim investigasti, tu patefecisti conjurationem. Quod quum dicit, non attendit, eum, qui patefecerit, hoc curasse, ut id omnes viderent, quod antea fuisset occultum. Quare ista conjuratio, si patefacta per me est, tam patet Hortensio, quàm mihi: quem quum videas hoc honore, auctoritate, virtute, consilio præditum, non dubitasse, quin innocentem P. Sullam defenderet; quæro, cur, qui aditus ad causam Hortensio patuerit, mihi interclusus esse debuerit. Quæro illud etiam, si me, qui defendo, reprehendendum putas esse, quid tandem de his existimes summis viris & clarissimis civibus, quorum studio & dignitate celebrari hoc judicium, ornari causam, defendi hujus innocentiam vides? non enim una est ratio defensionis ea, quæ posita est in oratione: omnes, qui adsunt, qui laborant, qui salvum volunt, pro sua parte atque auctoritate defendunt.

5. An verò, in quibus subselliis hæc ornamenta ac lumina reipublicæ viderem,



in his me apparere nollem, quorum ego operâ illum in locum, atque in hanc cel-  
sissimam sedem dignitatis atque honoris,  
multis meis ac magnis laboribus & peri-  
culis, adscendissem? Atque, ut intelligas,  
Torquate, quem accuses, si te id offen-  
dit, quodd ego, qui hoc genere quæstionis  
defenderim neminem, non desim P. Sul-  
læ; recordare de ceteris, quos adesse huic  
vides: intelliges & de hoc, & de ceteris  
judicium meum & horum par atque unum  
fuisse.

6. Quis nostrum adfuit Vargunteio? nemo: ne hic quidem Q. Hortensius, præ-  
sertim qui illum solus antea de ambitu de-  
fendisset: non enim jam se ullo officio  
cum illo conjunctum arbitrabatur, quum  
ille, tanto scelere commisso, omnium of-  
ficiorum societatem diremisset. Quis nos-  
trum Ser. Sullam? quis P.? quis M. Læ-  
cam? quis Cornelium, defendendum pu-  
tavit? quis his horum adfuit? nemo. Quid  
ita? quia ceteris in causis, etiam nocen-  
tes viri boni, si necessarii sunt, deferen-  
dos esse non putant: in hoc crimine non  
solum levitatis est culpa, verum etiam  
quædam contagio sceleris, si defendas  
eum, quem obstrictum esse patriæ parri-  
cidio suspicere.

7. Quid Autronio? nonne sodales, non  
collegæ sui, non veteres amici, quorum

ille copiâ quondam abundarat, non hi omnes, qui sunt in republica principes, defuerunt? immo etiam testimonio plerique læserunt? Statuerant, tantum illud esse maleficio, quod non modò non occultari per se, sed etiam aperiri, illustrarique deberet.

III. Quamobrem quid est, quod mirere, si cum iisdem me in hac causa vides adesse, cum quibus in ceteris intelligis abfuisse? nisi verò me unum vis ferum, præter ceteros, me asperum, me inhumanum existimari: me singulari immanitate & credulitate præditum. Hanc mihi tu si, propter res meas gestas, imponis in omni vita mea personam, Torquate, vehementer erras: me natura misericordem, patria severum; crudelem nec patria, nec natura esse voluit: denique istam ipsam personam vehementem & acrem, quam mihi tum tempus & respublica imposuit, jam voluntas, & natura ipsa detraxit: illa enim ad breve tempus severitatem postulavit; hæc in omni vita misericordiam, lenitatemque desiderat.

9. Quare nihil est, quòd ex tanto comitatu virorum amplissimorum me unum abstrahas: simplex officium, atque una est bonorum omnium causa: nihil erit, quod admirare posthac, si in ea parte, in qua

hos animadverteris, me videbis: nulla est enim in republica causa mea propria; tempus agendi fuit magis mihi proprium, quàm ceteris; doloris verò, & timoris, & periculi fuit illa causa communis: neque enim princeps tunc ad salutem esse potuissem, si esse alii comites noluissem. Quare necesse est, quod mihi consuli præcipuum fuit præter alios, id jam privato cum ceteris esse commune. Neque ego hoc partiendæ invidiæ, sed communicandæ laudis causâ loquor. Oneris mei partem nemini impertio; gloriæ, bonis omnibus,

10. In Autronium testimonium dixisti; inquit: Sullam defendis. Hoc totum ejusmodi est, Judices, ut, si ego sim inconstans ac levis, nec testimonio fidem tribui convenerit, nec defensioni auctoritatem: sin est in me ratio reipublicæ, religio privati officii, studium retinendæ voluntatis bonorum; nihil minùs accusator debet dicere, quàm a me defendi Sullam, testimonio læsum esse Autronium: videor enim non solum studium ad defendendas causas, verùm opinionis aliquid & auctoritatis, afferre; quâ & moderatè ego utar, Judices, & omnino non uterer, si ille me non coëgisset.

IV, Duæ conjurationes abs te, Torquate, constituuntur: una, quæ Lepido,

& Volcatio, consulibus, patre tuo consule designato, facta esse dicitur: altera, quæ me consule. Harum in utraque Sullam dicis fuisse. Patris tui, fortissimi viri, atque optimi consulis, scis, me consiliis non interfuisse: scis, me, quum mihi summus tecum usus esset, tamen illorum expertem temporum & sermonum fuisse: credo, quòd nondum penitus in republica versabar, quòd nondum ad propositum mihi finem honoris perveneram, quòd mea me ambitio & forensis labor ab omni illa cogitatione abstraheret.

12. Quis ergo intererat vestris consiliis? omnes hi, quos vides huic adesse, & in primis Q. Hortensius; qui quum propter honorem ac dignitatem, atque animum eximium in rempublicam, tum propter summam familiaritatem, summumque amorem in patrem tuum, tum communibus, tum præcipuis patris tui periculis commovebatur. Ergo istius conjurationis crimen defensum ab eo est, qui interfuit, qui cognovit, qui particeps & consilii vestri fuit, & timoris: cujus in hoc crimine propulsando quum esset copiosissima atque ornatissima oratio, tamen non minus inter auctoritatis in ea quàm facultatis. Illius igitur conjurationis, quæ facta contra vos, delata ad vos, a vobis prolata esse dicitur, ego testis esse non potui: non  
modò

modò enim nihil comperi, sed vix ad aures meas istius suspicionis fama pervenit.

13. Qui vobiscum in consilio fuerunt, qui vobiscum illa cognorunt, quibus ipsis periculum tum conflare putabatur, qui Autronio non adfuerunt, qui in illum testimonia gravia dixerunt, hunc defendunt, huic adsunt, in hujus periculo declarant, se non crimine conjurationis, ne adessent ceteris, sed hominum maleficio, deterritos esse. Mei consulatûs autem tempus, & crimen maximæ conjurationis a me defendetur. Atque inter nos partitio non est fortuitò, Judices, nec temerè facta: sed, quum videremus, eorum criminum nos patronos adhiberi, quorum testes esse possemus, uterque nostrûm id sibi suscipiendum putavit, de quo aliquid scire ipse atque existimare potuisset.

V. Et, quoniam de criminibus superioris conjurationis Hortensium diligenter audistis, de hac conjuratione, quæ, me consule, facta est, hoc primùm attendite. Multa, quum essem consul, de summis reipublicæ periculis audiui, multa quæsivi, multa cognovi: nullus umquam de Sulla nuntius ad me, nullum indicium, nullæ litteræ pervenerunt, nulla suspicio. Multùm hæc vox fortasse deberet valere ejus hominis, qui consul insidias reipublicæ consilio investigasset, veritate aperuisset,

magnitudine animi vindicasset, quum ipse nihil audisse de P. Sulla, nihil suspicatum esse diceret : sed ego nondum utor hac voce ad hunc defendendum ; ad purgandum me potius utor : ut mirari Torquatus desinat, me, qui Autronio abfuerim, Sullam defendere.

15. Quæ enim Autronii fuit causa ? quæ Sullæ est ? ille ambitus iudicium tollere, ac disturbare primum conflato voluit gladiatorum ac fugitivorum tumultu ; deinde, id quod vidimus omnes, lapidatione, atque concursu : Sulla, si sibi suus pudor, ac dignitas non prodesset, nullum auxilium requisivit. Ille damnatus ita se gerebat, non solum consiliis & sermonibus, verum etiam adspectu atque vultu, ut inimicus esse amplissimis ordinibus, infestus bonis omnibus, hostis patriæ videretur : hic se ita fractum illâ calamitate atque afflictum putavit, ut nihil sibi ex pristina dignitate superesse arbitraretur, nisi quod modestia retinisset.

16. Hac verò in conjuratione, quid tam conjunctum, quàm ille cum Catilina, cum Lentulo ? quæ tanta societas ullis inter ferum optimarum, quanta ei cum illis, sceleris, libidinis, audaciæ ? quod flagitium Lentulus non cum Autronio concepit ? quod sine eodem illo Catilina facinus admisit ? quum interim Sulla cum eis-

dem illis non modò noctem solitudinemque non quæreret, sed ne mediocri quidem sermone & congressu conjungeretur.

17. Illum Allobroges, maximarum rerum verissimi indices, illum multorum litteræ ac nuntii coarguerunt: Sullam interea nemo insimulavit, nemo nominavit. Postremò, ejecto, sive emissio jam ex urbe Catilinâ, ille arma misit, cornua, tubas, falces, signa, legiones; ille relictus intus, expectatus foris, Lentuli poenâ compressus, convertit se aliquando ad timorem, numquam ad sanitatem: hic contrà ita quievit, ut eo tempore omni Neapoli fuerit, ubi neque homines fuisse putantur hujus affines suspicionis; & locus est ipse non tam ad inflammandos calamitosorum animos, quàm ad consolandos accommodatus.

VI. Propter hanc igitur tantam dissimilitudinem hominum, atque causarum, dissimilem me in utroque præbui. Veniebat enim ad me, & sæpe veniebat Autronius, multis cum lacrymis, supplex, ut se defenderem; & se meum condiscipulum in pueritia, familiarem in adolescentia, collegam in quæstura commemorabat fuisse: multa mea in se, nonnulla etiam sua in me proferebat officia: quibus ego rebus, Judices, ita flectebar animo atque frangebar, ut etiam ex memoria,

R ij

quas mihi ipsi fecerat insidias , deponerem : ut jam immissum esse ab eo C. Cornelium , qui me in sedibus meis , in conspectu uxoris meæ ac liberorum meorum trucidaret , obliviscerer : quæ si de uno me cogitasset , quâ mollitiâ sum animi ac lenitate , numquam mehercule illius lacrymis ac precibus restitissem.

19. Sed , quum mihi patriæ , quum vestrorum periculorum , quum hujus urbis , quum illorum delubrorum atque templorum , quum puerorum infantium , quum matronarum ac virginum veniebat in mentem : & quum illæ infestæ ac funestæ faeces , universumque totius urbis incendium , quum tela , quum cædes , quum civium cruor , quum cinis patriæ versari ante oculos , atque animum memoriâ refricare cœperat ; tum denique ei resisitebam , neque solum illi hosti ac parricidæ , sed his etiam propinquis illius Marcellis , patri & filio , quorum alter apud me parentis gravitatem , alter filii suavitatem obtinebat : neque me arbitrabar sine summo scelere posse , quod maleficiû in aliis vindicasssem , idem in illorum socio , quum scirem , defendere.

20. Atque idem ego neque P. Sullam supplicem ferre , neque eosdem Marcellos pro hujus periculis lacrymantes adspicere , neque hujus M. Messallæ , homi-



nis necessarii, preces sustinere potui: neque enim est causa adversata naturæ; nec homo, nec res misericordiæ meæ repugnavit: nusquam nomen, nusquam vestigium fuerat: nullum crimen, nullum indicium, nulla suspicio. Suscepi causam, Torquate, suscepi, & feci libenter, ut me, quem boni constantem semper, ut spero, existimassent, eundem ne improbi quidem crudelem dicerent.

VII. Hic ait se ille, Judices, regnum meum ferre non posse. Quod tandem, Torquate, regnum? consulatus, credo, mei: in quo ego imperavi nihil, sed contra patribus conscriptis & bonis omnibus parui: quo in magistratu non institutum est a me, Judices, regnum, sed repressum. An tum, in tanto imperio, tanta potestate, non dicis fuisse regem; nunc privatum regnare dicis? quo tandem nomine? Quodd, in quos testimonia dixisti, inquit, damnati sunt: quem defendis, sperat se absolutum iri. Hic tibi ego de testimoniis meis hoc respondeo: si falsum dixerim, te in eos dixisse: sin verum; non esse hoc regnare, quum verum juratus dicas, probare.

22. De hujus spe tantum dico, nullas a me opes P. Sullam, nullam potentiam, nihil denique, præter fidem defensionis, expectare. Nisi tu, inquit, causam rece-

piſſes, numquam mihi reſtitiffet; ſed, indictâ cauſâ, profugiſſet. Si jam hoc tibi concedam, Q. Hortenſium, tantâ gravitate hominem, ſi hos tales viros non ſuo ſtare iudicio, ſed meo: ſi hoc tibi dem, quod credi non poteſt, niſi ego huic adeſſem, hos adfuturos non fuiſſe: uter tandem rex eſt, iſne, cui innocentes homines non reſiſtunt, an is, qui calamitoſos non deſerit? At hîc etiam, id quod tibi neceſſe minimè fuit, facetus eſſe voluiſti, quum Tarquinius, & Numam, & me, tertium peregrinum regem, eſſe dixiſti. Mitto jam de rege quærere: illud quæro, peregrinum cur me eſſe dixeris: nam, ſi iſum, non tam eſt admirandum, regem eſſe me, quia, ut tu vis etiam peregrini reges Romæ fuerunt, quàm conſulem Romæ fuiſſe peregrinum.

23. Hoc dico, inquit, te eſſe ex municipio. Fateor, & addo etiam, ex eo municipio, unde iterum jam ſalus huic urbi imperioque miſſa eſt. Sed ſcire ex te pervelim, quamobrem, qui ex municipiis veniant, peregrini tibi eſſe videantur: nemo enim iſtuc M. illi Catoni ſeni, quum plurimos haberet inimicos, nemo T. Coruncanio, nemo Curio, nemo huic ipſi noſtro C. Mario, quum ei multi inviderent, objecit umquam. Equidem vehementer lætor, eum eſſe me, in quem tu,

quum cuperes , nullam contumeliam jacere potueris , quæ non ad maximam partem civium conveniret.

VIII. Sed tamen te a me , pro magnis causis nostræ necessitudinis , monendum esse etiam atque etiam puto : non possunt omnes esse patricii : si verum quæris , nec curant quidem : nec se æquales tui , propter istam causam , abs te anteiri putant. Ac , si tibi nos peregrini videmur , quorum jam & nomen & honos inveteravit & huic urbi , & hominum famæ ac sermonibus ; quàm tibi illos competitores tuos , peregrinos videri necesse erit , qui jam ex tota Italia delecti , tecum de honore & de omni dignitate contendunt ? quorum cave tu quemquam peregrinum appelles , ne peregrinorum suffragiis obruare : qui si attulerint nervos , & industriam ; mihi crede , excutient tibi istam verborum jactationem , & te ex somno sæpe excitabunt ; nec patientur , se abs te , nisi virtute vincantur , honore superari.

25. Ac , si , Judices , ceteris patriciis me & vos peregrinos videri oporteret , a Torquato tamen hoc vitium sileretur : est enim ipse , a materno genere , municipalis honestissimi ac nobilissimi generis , sed tamen Asculani. Aut igitur doceat , Picentes solos non esse peregrinos , aut gaudeat suo generi me meum ante non ponere. Quare

neque me peregrinum posthæc dixeris , ne gravius refutere ; neque regem , ne deridere : nisi fortè regium tibi videtur , ita vivere , ut non modò homini nemini , sed ne cupiditati quidem ulli servias ; contemnere omnes libidines ; non auri , non argenti , non ceterarum rerum indigere ; in senatu sentire liberè ; populi utilitati magis consulere , quàm voluntati ; nemini cedere , multis obsistere : si hoc putas esse regium ; me regem esse confiteor : sin te potentia mea , si dominatio , si denique aliquod dictum arrogans , aut superbum movet ; quin tu id potiùs profers , quàm verbi invidiam , contumeliamque maledicti.

IX. Ego tantis a me beneficiis in republica positis , si nullum aliud mihi præmium a senatu , populoque Romano , nisi honestum otium postularem , quis non concederet ? sibi haberent honores , sibi imperia , sibi provincias , sibi triumphos , sibi alia præclaræ laudis insignia ; mihi liceret ejus urbis , quam conservassem , conspectu , tranquillo animo & quieto frui ? Quid , si hoc non postulo ? si ille labor meus pristinus , si sollicitudo , si officia , si operæ , si vigiliæ deserviunt amicis , præstò sunt omnibus ? si neque amici in foro requirunt studium meum , neque respublica in curia ? si me non modò rerum gesta-

rum vacatio, sed neque honoris, neque ætatis excusatio vindicat a labore? si voluntas mea, si industria, si domus, si animus, si aures patent omnibus? si mihi, ne ad ea quidem, quæ pro salute omnium gessi, recordanda, & cogitanda, quidquam relinquitur temporis? tamen hoc regnum appellabitur? cujus vicarius qui velit esse, inveniri nemo potest. Longè abest regni suspicio.

27. Si quæris, qui sint Romæ regnum occupare conati, ut ne replices annalium memoriam, ex domesticis imaginibus invenies. Res enim gestæ, credo, meæ me nimis extulerunt, ac mihi nescio quos spiritus attulerunt: quibus de rebus tam claris, tam immortalibus, Judices, hoc possum dicere, me, qui e summis eripuerim periculis urbem hanc, & vitam omnium civium, satis adeptum fore, si ex hoc tanto in omnes mortales beneficio nullum in me periculum redundarit.

28. Etenim, in qua civitate res tantas gesserim, memini, & in qua urbe verfer, intelligo: plenum forum est eorum hominum, quos ego a vestris cervicibus depuli, Judices, a meis non removi: nisi verò paucos fuisse arbitramini, qui conari, aut sperare possent, se tantum imperium posse delere. Horum ego faces eripere de manibus, & gladios extorquere

potui, sicut feci: voluntates verò confccleratas ac nefarias nec sanare potui, nec tollere. Quare non sum nescius, quanto periculo vivam in tanta multitudine improborum, quum mihi uni cum omnibus improbis æternum videam bellum esse susceptum.

X. Quòd si illis meis præsiidiis fortè invides; &, si ea tibi regia videntur, quòd omnes boni omnium generum atque ordinum suam salutem cum mea conjungunt: consolare te, quòd omnium mentes improborum mihi uni maximè sunt infensæ & adversæ: qui me non solum idcirco oderunt, quòd eorum conatus impios, & furorem confccleratum repressi; sed eò etiam magis, quòd nihil jam se simile, me vivo, conari posse arbitrantur.

30. At verò quid ego miror, si quid ab improbis de me improbè dicitur; quum L. Torquatus, primum ipse his fundamentis adolescentiæ jactis, eà spe proposità amplissimæ dignitatis, deinde L. Torquati, fortissimi consulis, constantissimi senatoris, semper optimi civis, filius, interdum efferatur immoderatione verborum? qui quum suppressâ voce de scelere P. Lentuli, de audacia conjuratorum omnium dixisset, tantummodo ut vos, qui ea probatis, exaudire possetis; de suppli-

cio P. Lentuli , de carcere , magnâ & queribundâ voce dicebat.

31. In quo primùm illud erat absurdum , quòd quum ea , quæ leniter dixerat , vobis probare volebat ; eos autem , qui circum iudiciũ stabant , audire nolebat ; non intelligebat , ea , quæ clarè diceret , ita illos audituros , quibus se venditabat , ut vos quoque audiretis , qui id non probabatis. Deinde alterum jam oratoris vitium , non videre , quid quæque causa postulet : nihil est enim tam alienum ab eo , qui alterum conjurationis accuset , quàm videri conjuratorum poenam mortemque lugere. Quod quum is tribunus plebis facit , qui unus videtur ex illis ad iugendos conjuratos relictus , non mirum est ; difficile est enim tacere , quum doleas : te , si quid ejusmodi facis , non modò talem adolescentem , sed in ea causa , in qua te vindicem conjurationis velis esse , vehementer admiror. Sed reprehendo tamen illud maximè , quòd , isto ingenio & prudentiâ præditus , causam reipublicæ non tenes , qui arbitrè , plebi Romanæ res eas non probari , quas , me consule , omnes boni pro salute communi gesserunt.

XI. Ecquem tu horum , qui adsunt , quibus te contra ipsorum voluntatem venditabas , aut tam sceleratum statuis fuisse ,

ut hæc omnia perire voluerit , aut tam miserum , ut & se perire cuperet , & nihil haberet , quod salvum esse vellet ? An verò clarissimum virum generis vestri , ac nominis , nemo reprehendit , qui filium suum vitâ privavit , ut in ceteris firmaret imperium : tu rempublicam reprehendis , quæ domesticos hostes , ne ab iis ipsa necaretur , necavit ?

33. Itaque attende jam , Torquate , quam ego defugiam auctoritatem consularis mei : maximâ voce , ut omnes exaudire possint , dico , semperque dicam : adestote omnes animis , qui adestis corporibus , quorum ego frequentiam magnopere lætor : erigite mentes , auresque vestras , & me de invidiosis rebus , ut ille putat , dicentem attendite. Ego consul , quum exercitus perditorum civium , clandestino scelere conflatus , crudelissimum & luctuosissimum exitium patriæ comparasset : quum ad occasum interitumque reipublicæ Catilina in castris ; in his autem templis atque tectis dux Lentulus esset constitutus : meis consiliis , meis laboribus , mei capitis periculis , sine tumultu , sine delectu , sine armis , sine exercitu , quinque hominibus comprehensis atque confossis , incensione urbem , internecione cives , vastitate Italiam , interitu rempublicam liberavi : ego vitam omnium ci-



vium , statum orbis terræ , urbem hanc denique , sedem omnium nostrum , arcem regum ac nationum exterarum , lumen gentium , domicilium imperii , quinque hominum amentium ac perditorum poenâ redemi. An me existimasti hæc injuratum in judicio non esse dicturum , quæ juratus in maxima concione dixissem ?

XII. Atque etiam illud addam , ne qui fortè incipiat improbus subito te amare , Torquate , & aliquid sperare de te ; atque , ut idem omnes exaudiant , clarissimâ voce dicam. Harum omnium rerum , quas ego in consulatu pro salute communi suscepi & gessi , L. ille Torquatus , quum esset meus contubernalis in consulatu , atque etiam in prætura fuisset , auctor , adjutor , particeps exstitit , quum princeps , quum signifer esset juventutis : parens ejus , homo amantissimus patriæ , maximi animi , summi consilii , singularis constantiæ , quum esset æger , tamen omnibus rebus illis interfuit : numquam est a me digressus : studio , consilio , auctoritate unus adjuvit plurimum , quum infirmitatem corporis animi virtute superaret.

35. Videsne , ut eripiam te ex improborum subita gratia , & reconciliem bonis omnibus ? qui te & diligunt , & retinent , retinebuntque semper : nec , si a me fortè desciveris , idcirco te a se , & a re-

publica , & a tua dignitate deficere patientur. Sed jam redeo ad causam ; atque hoc vos , Iudices , testor : mihi de me-  
metipso tam multa dicendi necessitas quædam imposita est ab illo. Nam , si Torquatus Sullam solum accusasset ; ego quoque hoc tempore nihil aliud agerem , nisi eum , qui accusatus esset , defenderem ; sed quum ille totâ illâ oratione in me esset inuectus , & quum initio , ut dixi , defensionem meam auctoritate spoliare voluisset ; etiam si dolor meus respondere non cogeret , tamen ipsa causa hanc a me orationem flagitasset.

XIII. Allobrogibus nominatum Sullam esse dicis. Quis negat ? sed lege indicium ; & vide , quemadmodum nominatus sit. L. Cassium dixerunt commemorasse , cum ceteris Autronium secum facere. Quæro , num Sullam dixerit Cassius ? Nusquam. Sese aiunt quæsisse de Cassio , quid Sulla sentiret. Videte diligentiam Gallorum : qui vitam hominum naturamque non nossent , ac tantum audissent , eos pari calamitate esse ; quæsi-  
verunt , essentne eadem voluntate ? Quid tum ? Cassius si respondisset , idem sentire , & secum facere Sullam ; tamen mihi non videretur in hunc id criminofum esse debere. Quid ita ? quia qui barbaros homines ad bellum impelleret , non de-

bebat minuere illorum suspicionem , & purgare eos , de quibus illi aliquid suspicarentur.

37. Non respondit tamen unà facere Sullam. Etenim esset absurdum , quum ceteros suâ sponte nominasset , mentionem Sullæ facere nullam , nisi admonitum & interrogatum : nisi fortè verisimile est , P. Sullæ nomen in memoria Cassio non fuisse : si nobilitas hominis , si afflictâ fortuna , si reliquæ pristinæ dignitatis , non tam illustres fuissent ; tamen Autronii commemoratio memoriam Sullæ retulisset : etiam , ut arbitror , quum auctoritates principum conjurationis ad incitandos animos Allobrogum colligeret Cassius , & quum sciret exteras nationes maximè nobilitate moveri , non prius Autronium , quàm Sullam nominasset.

38. Jam verò illud probari minimè potest , Gallos , Autronio nominato , putasse , propter calamitatis similitudinem , sibi aliquid de Sulla esse quærendum ; Cassio , si hic esset in eodem scelere , ne , quum appellasset quidem Autronium , hujus in mentem venire potuisse. Sed tamen quid respondit de Sulla Cassius ? Se nescire certum. Non purgat , inquit. Dixi antea ; ne si argueret quidem tum denique , quum esset interrogatus , id mihi criminosum videretur.

39. Sed ego in judiciis, & in quæstionibus non hoc quærendum arbitror, num purgetur aliquis; sed num arguatur: etenim quum negat se scire Cassius, utrùm sublevat Sullam, an satis probat se nescire? Sublevat apud Gallos. Quid ita? ne indicent? Quid? si periculum esse putasset, ne ulli umquam indicarent, de seipso confessus esset? Nescivit. Credo, Judices, celatum esse Cassium de Sulla uno: nam de ceteris certè sciebat; & ea domi ejus pleraque conflata esse constabat. Qui negare noluit esse in eo numero Sullam, quò plus spei Gallis daret; dicere autem falsum non ausus est; nescire dixit. Atqui hoc perspicuum est, quum is, qui de omnibus scierit, de Sulla se scire negarit, eandem vim esse negationis hujus, quàm si extra conjurationem hunc esse, se scire dixisset: nam, cujus scientiam de omnibus constat fuisse, ejus ignorantia de aliquo, purgatio debet videri. Sed jam non quæro, purgetne Cassius Sullam: illud mihi tantùm satis est, contra Sullam nihil esse in indicio.

XIV. Exclusus hac criminatione Torquatus rursus in me irruit, me accusat: ait me aliter, ac dictum est, in tabulas publicas retulisse. O dii immortales! (vobis enim tribuam, quæ vestra sunt: nec verò possum meo tantum ingenio dare, ut tot res,

tantas , tam varias , tam repentinas , in illa turbulentissima tempestate reipublicæ , meâ sponte dispexerim ) vos profectò animum meum tum conservandæ patriæ cupiditate incendistis : vos me ab omnibus ceteris cogitationibus ad unam salutem reipublicæ convertistis : vos denique in tantis tenebris erroris & inscientiæ , clarissimum lumen prætulistis menti meæ.

41. Vidi ego hoc , Judices , nisi recenti memoriâ senatûs , auctoritatem hujus indicii monumentis publicis testatus essem , fore , ut aliquando non Torquatus , neque Torquati quispiam similis ( nam id me multum fefellit ) sed ut aliquis patrimonio naufragus , inimicus otii , bonorum hostis , aliter indicata hæc esse diceret , quò facilius , vento aliquo in optimum quemque excitato , posset in malis reipublicæ portum suorum malorum aliquem invenire : itaque introductis in senatum indicibus , constitui senatores , qui omnia indicum dicta , interrogata , responsa perscriberent. At quos viros ? non solùm summâ virtute & fide , cujus generis in senatu facultas maxima ; sed etiam quos sciebam memoriâ , scientiâ , consuetudine , & celeritate scribendi , facillimè , quæ dicerentur , persequi posse : C. Cosconium , qui tunc erat prætor ; M. Messallam , qui tum præturam petebat ; P. Nigidium , App-

Claudium : credo esse neminem ; qui his hominibus , ad verè referendum , aut etiam scribendum , aut fidem putet , aut ingenium defuisse.

XV. Quid deinde ? quid feci ? quum scirem , ita indicium in tabulas publicas relatum , ut illæ tabulæ privatâ tamen custodiâ , more majorum , continerentur ; non occultavi , non continui domi , sed describi ab omnibus statim librariis , dividi passim , & pervulgari , atque edi populo Romano imperavi : divisi toti Italiæ , emisi in omnes provincias : ejus indicii , e quo salus oblata esset omnibus , expertem esse neminem volui.

43. Itaque dico , locum in orbe terrarum esse nullum , quo in loco populi Romani nomen sit , quin eodem perscriptum hoc indicium pervenerit. In quo ego tam subito , & exiguo , & turbido tempore multa divinitus , ita ut dixi , non meâ sponte , providi : primùm , ne qui posset tantum aut de reipublicæ , aut de alicujus periculo meminisse , quantum vellet : deinde , ne cui liceret umquam reprehendere illud indicium , aut temerè creditum criminari : postremò , ne quid jam a me , ne quid ex meis commentariis quæreretur ; ne aut oblivio mea , aut memoria videretur nimia : ne denique aut negligentia , turpis , aut diligentia , crudelis putaretur.

44. Sed tamen abs te, Torquate, quæro, quum indicatus tuus inimicus esset, & esset ejus rei frequens senatus, & recens memoria testis: tibi, meo familiari & contubernali, prius etiam edituri fuerint indicium scribæ mei, si voluisses, quàm in codicem retulissent: quum videres aliter fieri, cur tacuisti? passus es? non mecum, aut cum familiari meo questus es? aut, quoniam tam faciliè inveheris in amicos, iracundiùs, aut vehementiùs exposulasti? Tu, quum tua vox numquam sit audita: quum, indicio lecto, descripto, divulgato, quieveris, tacueris, repenti tantam rem enuntiare audeas? & in eum locum te deducas, ut antiè, quàm me commutati indicii coargueris, te summæ negligentiae, tuo indicio, convictum esse fateare?

XVI. Mihi cujusquam salus tanti fuisset, ut meam negligerem? per me ego veritatem patefactam contaminarem aliquo mendacio? quemquam denique ego juvarem, a quo & crudeles insidias in rempublicam factas, & in me potissimum consulem constitutas, putarem? Quòd si jam essem oblitus severitatis & constantiae meae, tamne amens eram, ut, quum litteræ posteritatis causâ repertæ sint, quæ subsidio oblivioni esse possent, ego recentem putarem memoriam cuncti senatus commentario meo posse superari?

46. Fero ego te , Torquate , jamdudum , fero ; & nonnumquam animum incitatum ad ulciscendam orationem tuam ; revoco ipse , & reflecto : permitto aliquid iracundiæ tuæ , do adolescentiæ , cedo amicitiaë , tribuo parenti : sed , nisi tibi aliquem modum tute constitueris ; coges oblitum me nostræ amicitiaë , habere rationem meæ dignitatis. Nemo umquam me tenuissimâ suspicione perstrinxit , quem non præverterim. Sed mihi hoc credas velim : non iis libentissimè soleo respondere , quos mihi videor facillimè posse superare.

47. Tu , quoniam minimè ignoras consuetudinem dicendi meam , noli hac novâ lenitate abuti meâ : noli aculeos orationis meæ , qui reconditi sunt , excussos arbitrari : noli id putare omnino a me esse amissum , si quid est tibi remissum atque concessum : quum illæ valent apud me excusationes injuriæ tuæ , iratus animus tuus , ætas , amicitia nostra ; tum nondum statuo te virium satis habere , ut ego tecum luctari & congregi debeam : quòd si esses usu atque ætate robustior ; essem idem , qui soleo , quum sum lacessitus : nunc tecum sic agam , tulisse ut potius injuriam , quàm retulisse gratiam videar.

XVII. Neque verò , quid mihi irascere , intelligere possum : si , quòd eum de-



fendo, quem tu accusas; cur tibi quoque ipse non succenseo, qui accuses eum, quem ego defendo? Inimicum, inquis, accuso meum. Et amicum ego defendo meum. Non debes tamen quemquam in conjurationis quæstione defendere. Immo nemo magis eum, de quo nihil est umquam suspicatus, quàm is, qui de aliis multa cogitavit. Cur dixisti testimonium in alios? Quia coactus, Cur damnati sunt? Quia creditum est. Regnum est, dicere in quem velis, ac defendere quem velis. Immo servitus est, non dicere in quem velis, ac defendere quem velis. Ac, si considerare cœperis, utrùm magis mihi hoc necesse fuerit facere, an istud tibi; intelliges, honestius te inimicitiarum modum statuere potuisse, quàm me humanitatis.

49. At verò quum honos agebatur amplissimus familiæ vestræ, hoc est, consultatus parentis tui, sapientissimus vir familiarissimis suis non succensuit pater tuus, quum Sullam & defenderent, & laudarent. Intelligebat, hanc nobis a majoribus esse traditam disciplinam, ut nullius amicitia ad propulsanda pericula impediremur. Et erat huic judicio longè dissimilis illa contentio: tum, afflicto P. Sullâ, consultatus vobis pariebatur, sicuti partus est; honoris erat certamen: ereptum repetere vos clamitabatis, ut victi in campo, in fo-

ro vinceretis : tum qui contra vos pro hujus salute pugnabant , amicissimi vestri , quibus non irascebamini , consulatum vobis eripiebant , honori vestro repugnabant , & tamen id inviolatâ vestrâ amicitîâ , integro officio , veteri exemplo atque instituto optimi cujusque faciebant.

XVIII. Ego verò quibus ornamentis adversor tuis ? aut cui dignitati vestræ repugno ? Quid est , quod jam ab eo expectas ? honor ad patrem , insignia honoris ad te delata sunt. Tu ornatus exsuviis hujus , venis ad eum lacerandum , quem interemisisti : ego jacentem , & spoliatum defendo , & protego. Atque hîc tu & reprehendis me , quia defendam , & irasceris : ego autem non modò tibi non irascor , sed ne reprehendo quidem factum tuum : te enim existimo tibi statuisse , quid faciendum putares , & satis idoneum officii judicem posuisse.

§ 1. At accusat C. Cornelii filius , idemque valere debet , ac si pater indicaret. O patrem Cornelium sapientem ! qui , quod præmii solet esse indicio , reliquerit ; quod turpitudinis in confessione , id per accusationem filii susceperit. Sed quid est tandem , quod indicat per istum puerum Cornelius ? Si est causa mihi ignota , cum Hortensio communicata ; respondeat Hortensius : sin tu ais illum comitatum

Autronii & Catilinæ, quum in campo, consularibus comitiis, quæ a me habitæ sunt, cædem facere voluerunt: Autronium tum in campo vidimus: &, quid dixi vidisse nos? ego vidi: vos enim tum, Iudices, nihil laborabatis, neque suspicabamini: ego tectus præsidio firmo amicorum, Catilinæ tum & Autronii copias, & conatum repressi.

52. Num quis est igitur, qui tum dicat in campum adspirasse Sullam? Atqui si tum se cum Catilina societate sceleris conjunxerat, cur ab eo discedebat? cur cum Autronio non erat? cur in pari causa non paria signa reperiuntur criminis? Sed quoniam Cornelius ipse etiam nunc de indicando dubitat, ut dicitis, informat ad hoc adumbratum indicium filii: quid tandem de illa nocte dicit, quum inter falciarios ad M. Læcam nocte eâ, quæ consecuta est posterum diem nonarum Novembris me consule, Catilinæ denuntiatione convenit? quæ nox omnium temporum conjurationis acerrima fuit, atque æcerbissima. Tum Catilinæ dies exeundi, tum ceteris manendi conditio, tum descriptio totam per urbem cædis, atque incendiorum constituta est: tunc tuus pater, Corneli, id quod tandem aliquando confitetur, illam sibi officiosam provinciam depoposcit, ut, quum primâ lucē consu-

lem salutatum veniret, intromissus meo more, & jure amicitiae, me in meo lectulo trucidaret.

XIX. Hoc tempore, quum arderet acerrimè conjuratio: quum Catilina egrederetur ad exercitum; Lentulus in urbe relinqueretur: Cassius incendiis, Cethegus cædi præponeretur: Autronio, ut occuparet Etruriam, præscriberetur: quum omnia ordinarentur, instituerentur, pararentur: ubi fuit Sulla, Corneli? num Romæ? Immo longè abfuit: num in iis regionibus, quò se Catilina inferebat? multò etiam longiùs: num in agro Cæmerti, Piceno, Gallico; quas oras maximè quasi morbus quidam illius furoris pervaserat? nihil verò minus: fuit enim, ut jam antè dixi, Neapoli: fuit in ea parte Italiae, quæ maximè eâ suspicione caruit.

54. Quid ergo indicat, aut quid affert, aut ipse Cornelius, aut vos, qui ab eo hæc mandata defertis? Gladiatores emptos esse, Fausti simulatione, ad cædem ac tumultum. Ita prorsus: interpositi sunt gladiatores, quos testamento patris videmus deberi: arrepta est familia; quæ si esset prætermissa, posset alia familia Fausti munus præbere. Utinam quidem hæc ipsa non modò iniquorum invidiæ, sed & æquorum expectationi satisfacere posset! Properatum vehementer, quum longè tempus

pus muneris abesset. Quasi verò tempus dandi muneris non valde appropinquaret. Nec opinante Fausto, quum is neque sciret, neque vellet, familia est comparata.

55. At litteræ sunt Fausti, per quas ille precibus a P. Sulla petit, ut emat gladiatores, & ut hos ipsos emat; neque solum ad Sullam missæ, sed ad L. Cæsarem, Q. Pompeium, C. Memmium; quorum de sententia tota res gesta est. At præfuit familiæ. Jam si in comparanda familia suspicio est nulla; quòd præfuit, nihil ad rem pertinet. Sed tamen munere fervili obtulit se ad ferramenta prospicienda: præfuit verò numquam: eaque res per Balbum, Fausti libertum, omni tempore administrata est.

XX. At enim Cincius est ab hoc in ulteriorem Hispaniam missus, ut eam provinciam perturbaret. Primum Cincius, Judices, L. Julio, C. Figulo, consulibus, profectus est aliquantò ante furorem Catilinæ, & ante suspensionem hujus conjurationis: deinde est profectus non tum primum, sed quum in iisdem locis aliquantò antè eadem de causa aliquot annos fuisset: ac profectus est non modò ob causam, sed etiam necessariam causam, magnâ ratione cum Mauritaniæ rege contractâ. Tum autem, illo profecto, Sullâ procurante ejus rem & gerente, plurimis

& pulcherrimis P. Cincii prædiis venditis, æs alienum ejusdem dissolutum est: ut, quæ causa ceteros ad facinus impulit, cupiditas retinendæ possessionis, ea Cincio non fuerit, prædiis deminutis.

57. Jam verò illud quàm incredibile? quàm absurdum? qui Romæ cædem facere, qui hanc urbem inflammare vellet, eum familiarissimum suum dimittere ab se, & mandare in ultimas terras? utrùm quò facilius Romæ ea, quæ conabatur, efficeret, si in Hispania turbatum esset? at hæc ipsa per se sine ulla conjunctione agebantur. An in tantis rebus, tam novis consiliis, tam periculosis, tam turbulentis, hominem amantissimum sui, familiarissimum, conjunctissimum officiis, usu, consuetudine, dimittendum esse arbitraretur? verisimile non est, ut, quem in secundis rebus, quem in otio secum semper habuisset, hunc in adversis, & in eo tumultu, quem ipse comparabat, ab se dimitteret.

58. Ipse autem Cincius (non enim mihi deferenda est causa amici veteris, atque hospitis) is homo est, aut eâ familiâ, ac disciplinâ, ut hoc credi possit, eum bellum reipublicæ facere voluisse? ut, cujus pater, quum ceteri deficerent finitimi ac vicini, singulari exstiterit in rempublicam nostram officio & fide, is sibi nefarium

bellum contra patriam suscipiendum putaret? cujus æs alienum videmus, Judices, non libidine, sed negotii gerendi studio esse contractum: qui ita Romæ debuit, ut in provinciis, & in regnis maximæ ei pecuniæ deberentur: quas quum peteret, non commisit, ut sui procuratores quidquam oneris, absente se, sustinerent: venire omnes suas possessiones, & patrimonio se ornatissimo spoliari maluit, quàm ullam moram cuiquam fieri creditorum suorum.

39. A quo quidem genere, Judices, ego numquam timui, quum in illa reipublicæ tempestate versarer. Illud erat genus hominum horribile & pertimescendum, qui tanto amore suas possessiones amplexi tenebant, ut ab his membra divelli citius ac distrahi posse diceres. Cincius numquam sibi cognationem cum prædiis esse existimavit suis: itaque se non modò ex suspicionem tanti sceleris, verùm etiam ex omni hominum sermone, non armis, sed patrimonio suo vindicavit.

XXI. Jam verò, quod subjicit, Pompeianos esse a Sulla impulsos, ut ad istam conjurationem, & ad hoc nefarium facinus accederent, id cujusmodi sit, intelligere non possum. An tibi Pompeiani conjurasse videntur? quis hoc umquam dixit? aut quæ fuit istius rei vel minima suspicio?

Disjuxit, inquit, eos a colonis, ut, hoc dissidio ac dissensione factâ, oppidum in sua potestate posset, & Pompeianos habere. Primum omnis Pompeianorum colonorumque dissensio, delata ad patronos est, quum jam inveterasset, ac multos annos esset exagitata: deinde ita a patronis res cognita est, ut nulla in re a ceterorum sententiis Sulla dissenserit: postremò coloni ipsi sic intelligunt, non Pompeianos a Sulla magis, quàm sese esse defensores.

61. Atque hoc, Judices, ex hac frequentia colonorum, honestissimorum hominum, intelligere potestis; qui adsunt, laborant: hunc patronum, defensorem, custodem illius coloniae, si in omni fortuna, atque in omni honore incolumem habere non potuerunt, in hoc tamen casu, quo afflictus jacet, per vos tutari conservareque cupiunt. Adsunt pari studio Pompeiani, qui ab illis etiam in crimen vocantur: qui ita de ambulatione, & de suffragiis suis cum colonis dissenserunt, ut idem de communi salute sentirent: ac ne hæc quidem P. Sullæ mihi videtur silentio prætereunda esse virtus, quòd, quum ab hoc illa colonia deducta sit, & quum commoda colonorum a fortunis Pompeianorum reipublicæ fortuna disjunxerit, ita caris utrisque est atque jucundus, ut non



alteros demovisse, sed utrosque constituisse videatur.

XXII. At enim & gladiatores, & omnis ista vis, rogationis Cæciliæ causâ comparabantur: atque hoc loco in L. Cæciliū, pudentissimum atque ornatissimum virum, vehementer invecus est: cujus ego de virtute & constantia, Judices, tantum dico; talem hunc in ista rogatione, quam promulgavit, non de tollenda, sed de levanda calamitate fratris sui, fuisse, ut consultum esse voluerit fratri; cum republica pugnare noluerit: promulgarit impulsus amore fraterno, destitit fratri auctoritate deductus.

63. Atque in ea re per L. Cæciliū Sulla accusatur, in qua re est uterque laudandus. Primū Cæcilius, \* qui id promulgarit, in quo res judicatas videbatur voluisse rescindere, ut statueretur: Sulla rectè reprehendit. Status enim reipublicæ maximè judicatis rebus continetur: neque ego tantum fraterno amorī dandum arbitror, ut quisquam de salute suorum consulat, communem relinquat. Nihil de judicio ferebat: sed pœnam ambitus eam ferebat, quæ fuerat nuper superioribus legibus constituta: itaque hac rogatione, non judicū sententiā, sed legis vitium corripiebat. Nemo judicium reprehendit, quum de pœna queritur, sed legem: damnatio enim est judicū, quæ manebat;

pœna, legis, quæ levabatur. Noli igitur animos eorum ordinum, qui præfunt judiciis summa cum gravitate & dignitate, alienare a causa: nemo labefactare iudicium est conatus: nihil est ejusmodi promulgatum: semper Cæcilius in calamitate fratris sui, iudicum potestatem perpetuandam, legis acerbitem mitigandam putavit.

XXIII. Sed quid ego de hoc plura disputem? Dicerem fortasse, & facile & libenter dicerem. Si paulò etiam longius, quàm finis quotidiani officii postulat, pietas & fraternus amor L. Cæcilium protulisset; implorarem sensus vestros; uniuscujusque indulgentiam in suos testarer; peterem errato veniam L. Cæcili ex intimis vestris cogitationibus, atque ex humanitate communi.

65. Lex diēs fuit proposita paucos; ferri cœpta numquam: posita est in senatu, populum Romanum laqueit: quum in Capitolium nos senatum convocassemus, nihil est actum prius; & id mandato Sullæ Q. Metellus prætor se loqui dixit, Sullam illam rogationem de se nolle ferri. Ex illo tempore, L. Cæcilius multa de republica egit: Agrariæ legi, quæ tota a me reprehensa & abjecta est, intercessorem fore professus est: improbis largitionibus restitit: senatûs auctoritatem numquam impedivit: ita se gessit in tribunatu, ut, opere de-

posito domestici officii, nihil postea nisi de reipublicæ commodis cogitarit.

66. Atque in ipsa rogatione, ne per vim quid ageretur, quis tamen nostram Sullam aut Cæcilium verebatur? nonne omnis ille terror, omnis seditionis timor atque opinio, ex Autronii improbitate pendebat? ejus voces, ejus minæ ferebantur: ejus adspectus, concursatio, stipatio, greges hominum perditorum, metum nobis seditionesque afferebant. Itaque P. Sulla, hoc importunissimo tum honoris, tum etiam calamitatis socio, atque comite, & secundas fortunas amittere coactus est, & in adversis sine ullo remedio atque allevamento permanere.

XXIV. Hic tu epistolam meam sæpe recitas, quam ego ad Cn. Pompeium de meis rebus gestis, & de summa reipublica misi; & ex ea crimen aliquod in P. Sullam quæris; &, si furorem incredibilem biennio antè conceptum erupisse in meo consulatu scripsi, me hoc demonstrasse dicis, Sullam in illa fuisse superiore conjuratione. Scilicet is sum, qui existimem; Cn. Pisonem, & Catilinam, & Vargunteium; & Autronium nihil sceleratè, nihil audacter ipsos per sese sine P. Sulla facere potuisse.

68. De quo etiam si quis dubitasset antea, num, id quod tu arguis, cogitasset; interfecto patre tuo, consule, descendere

Kalendis Januariis cum lictoribus ; sustulisti hanc suspicionem , quum dixisti , hunc , ut Catilinam consulem efficeret , contra patrem tuum operas & manum comparasse. Quod si tibi ego confiteor , tu mihi concedas necesse est , hunc , quum Catilinæ suffragaretur , nihil de suo consulatu , quem iudicio amiserat , per vim recuperando cogitavisse : neque enim istorum facinorum tantorum , tam atrocium crimen , Iudices , P. Sullæ persona suscipit.

69. Jam enim faciam , criminibus omnibus ferè dissolutis , contrà , atque in ceteris causis fieri solet , ut nunc denique de vita hominis ac de moribus dicam. Etenim de principio studuit animus occurrere magnitudini criminis , satisfacere expectationi hominum ; de me aliquid ipso , qui accusatus eram , dicere. Nunc jam revocandi estis edò , quò vos ipsa causa , etiam tacente me , cogit animos mentesque convertere.

XXV. Omnibus in rebus , Iudices , quæ graviores majoresque sunt , quid quisque voluerit , cogitarit , admiserit , non ex crimine , sed ex moribus ejus , qui arguitur , est ponderandum. Neque enim potest quisquam nostrum subito fingi , neque cujusquam repente vita mutari , aut natura converti. Circumspicite paulisper mentibus vestris , ut alia omittamus , hocce ipsos homines , qui huic affines sceleri

fuerunt. Catilina contra rempublicam conjuravit. Cujus aures umquam hoc respuerunt, conatum esse, hominem usque a pueritia non solum intemperantiâ & scelere, sed etiam consuetudine & studio in omni flagitio, stupro, cæde versatum? quis eum contra patriam pugnanti perisse miratur, quem semper omnes ad civile latrocinium natum putaverunt? Quis Lentuli societates cum indicibus, quis insaniam libidinum, quis perversam atque impiam religionem recordatur, qui illum aut nefariè cogitasse, aut stultè sperasse miretur? Quis de C. Cethego, atque ejus in Hispaniam profectio, ac de vulnere Q. Metelli Pii cogitat, cui non ad illius poenam carcer ædificatus esse videatur? Omitto ceteros, ne sit infinitum.

71. Tantum a vobis peto, ut taciti de omnibus, quos conjurasse cognitum est, cogitetis: intelligetis, unumquemque illorum prius a sua vita, quàm nostrâ suspicionem esse damnatum. Ipsum illum Autronium ( quoniam ejus nomen finitimum maximè est hujus periculo & crimini ) non sua hæc vita convincit? semper audax, petulans, libidinosus: quem in stuprorum defensionibus non solum verbis uti improbissimis solitum esse scimus, verùm etiam pugnis & calcibus: quem exturbare homines e possessionibus, cædem facere vicinorum, spoliare fana sociorum,

vi conatum & armis disturbare judicia ; in bonis rebus omnes contemnere , in malis pugnare contra bonos , non reipublicæ cedere , non fortunæ ipsi succumbere : hujus si causa non manifestissimis rebus teneretur , tamen eum mores ipsius ac vita convincerent.

XXVI. Agedum , conferte nunc cum illis vitam P. Sullæ , vobis populoque Romano notissimam , Judices , & eam ante oculos vestros proponite. Ecquod hujus factum aut commissum , non dicam audacius , sed quod cuiquam paulò minus consideratum videretur ? factum quæro : verbum ecquod umquam ex ore hujus excidit , unde quisquam posset offendi ? At verò in illa gravi L. Sullæ victoria , turbulentaque , quis P. Sullâ mitior ? quis misericordior inventus est ? quàm multorum hic vitam est a L. Sulla deprecatus ? quàm multi sunt summi homines , & ornatissimi , & nostri , & equestris ordinis , quorum pro salute se hic Sullæ obligavit ? quos ego nominarem ; neque enim ipsi nolunt , & huic animo gratissimo adsunt : sed quia majus est beneficium , quàm posse debet civis civi dare , ideo a vobis peto , ut , quod potuit , temporis tribuatis ; quod fecit , ipsi.

73. Quid reliquam constantiam vitæ commemorem ? dignitatem ? liberalitatem ? moderationem in privatis rebus ?

splendorem in publicis ? quæ ita a fortuna deformata sunt , ut tamen a natura inchoata compareant. Quæ domus ? quæ celebratio quotidiana ? quæ familiaris dignitas ? quæ studia amicorum ? quæ ex quoque ordine multitudo ? Hæc diu multumque , & multo labore quæsitæ , una eripuit hora. Accepit P. Sulla , Judices , verumtamen ejusmodi , quod videretur ejus vita & natura accipere potuisse. Honestatis & dignitatis habuisse nimis magnam judicatus est cupiditatem ; quam si nemo alius habuit in consulatu petendo , cupidior judicatus est hic fuisse , quàm ceteri : sin etiam in aliis nonnullis fuit iste consulatûs amor ; fortuna in hoc fuit fortasse gravior , quàm in ceteris.

74. Postea verò quis P. Sullam , nisi morientem , demissum , afflictumque vidit ? Quis umquam est suspicatus , hunc magis odio , quàm pudore hominum adspectum lucemque vitare ? Qui quum multa haberet invitamenta urbis & fori , propter summa studia amicorum , quæ tamen ei sola in malis restiterunt ; absuit ab oculis vestris ; & , quum lege retineretur , ipse se exsilio pene multavit. In hoc vos pudore , Judices , & in hac vita , tanto sceleri locum fuisse creditis ?

XXVII. Adspicite ipsum : contuemini os : conferte crimen cumvita ; vitam ,

ab initio ad hoc tempus explicatam, cum crimine recognoscite. Mitto rempublicam, quæ fuit semper Sullæ carissima: hosne amicos, tales viros, tam cupidos fui, per quos res ejus secundæ quondam erant ornatae, nunc sublevantur adversæ, crudelissimè perire voluit, ut cum Lentulo, & Catilina, & Cethego foedissimam vitam, ac miserrimam, turpissimâ morte propositâ, degeret? Non cadit, non, inquam, cadit in hos mores, non in hunc pudorem, non in hanc vitam, non in hunc hominem ista suspicio: nova quædam illa immanitas exorta est: incredibilis fuit, ac singularis furor: ex multis ab adolescentia collectis perditorum hominum vitiis repentè tanta ista importunitas inauditi sceleris exarsit.

76. Nolite, Judices, arbitrari, hominum illum impetum & conatum fuisse: neque enim ulla gens tam barbara, aut tam immanis umquam fuit, in qua non modò tot, sed unus tam crudelis hostis patriæ sit inventus: belluæ quædam illæ ex portentis immanes, ac feræ formâ hominum indutæ, exstiterunt. Perspiciate etiam atque etiam, Judices: nihil enim est, quod in hac causa dici possit vehementius: penitus introspicite Catilinæ, Autronii, Cethegi, Lentuli, ceterorumque mentes: quas vos in his libidines, quæ flagitia, quas turpitudines, quantas auda-



cias, quàm incredibiles furores, quas notas scelerum, quæ indicia parricidiorum, quantos acervos facinorum reperietis? ex magnis, & diuturnis, & jam desperatis reipublicæ morbis ista repentè vis erupit, ut, eâ confectâ & ejectâ, convalescere aliquando & sanari civitas possit. Neque enim est quisquam, qui arbitretur, illis inclusis in republica pestibus, diutius hæc stare potuisse: itaque eos non ad perficiendum scelus, sed ad luendas reipublicæ poenas Furia quædam incitaverunt.

XXVIII. In hunc igitur gregem vos nunc P. Sullam, Judices, ex his, qui cum hoc vivunt, atque vixerunt, honestissimorum hominum gregibus, rejicietis? ex hoc hominum numero, ex hac familiari dignitate, in impiorum partem, atque in parricidarum coetum ac numerum transferetis? Ubi erit igitur illud fortissimum præsidium pudoris? quo in loco nobis vita antè acta proderit? quod ad tempus existimationis partæ fructus reservabitur, si in extremo discrimine ac dimicatione fortunæ deferet? si non aderit? si nihil adjuvabit?

78. Quæstiones nobis fervorum, ac tormenta accusator minitatur; in quibus quamquam nihil periculi suspicamur, tamen illa tormenta gubernat dolor, moderatur natura cujusque tum animi tum corporis; regit quæsitior, flectit libido, corrumpit

spes, infirmat metus, ut in tot rerum angustiis nihil veritati loci relinquatur. Vita P. Sullæ torqueatur: ex ea quærat, num quæ occultetur libido, num quod lateat facinus, num quæ crudelitas, num quæ audacia: nihil erroris erit in causa, nec obscuritatis, Iudices, si a vobis vitæ perpetuæ vox ea, quæ gravissima debet esse, audietur.

79. Nullum in hac causa testem timeamus: nihil quemquam scire, nihil vidisse, nihil audisse arbitramur. Sed tamen, si nihil vos P. Sullæ fortuna movet, Iudices, vestra moveat: vestra enim, qui cum summa elegantia vixistis atque integritate, hoc maximè interest, non ex libidine, aut similitate, aut levitate testium causas honestorum hominum ponderari, sed in magnis disquisitionibus, repentinisque periculis vitam uniuscujusque esse testem. Quam vos, Iudices, nolite armis suis spoliata atque nudata objicere invidiæ, dedere suspicioni: munite communem arcem bonorum, obstruite perfugia improborum: valeat ad poenam, & ad salutem plurimum, quam solam videtis ipsam ex vi sua natura facillimè perspicere; subito flecti, fingique non posse.

XXIX. Quid verò hæc auctoritas (semper enim de ea dicendum est; quamquam a me timide modicèque dicetur) quid, inquam, hæc auctoritas nostra? qui a ce-

teris conjurationis causis abstinuimus , P. Sullam defendimus : nihil hunc tandem juvabit ? Grave est hoc dictum fortasse , Judices , si appetimus aliquid : si , quum ceteri de nobis silent , non etiam nosmetipsi tacemus , grave : sed , si lædimur , si accusamur , si in invidiam vocamur ; profectò concedetis , Judices , ut nobis libertatem retinere liceat , si minùs liceat dignitatem.

81. Accusati sunt uno nomine consulares ; ut jam videatur honoris amplissimè nomen plus invidiæ , quàm dignitatis asferre. Adfuerunt , inquit , Catilinæ , illumque laudarunt. Nulla tum patebat , nulla erat cognita conjuratio : defendebant amicum , aderant supplici , vitæ ejus turpitudinem in summis ejus periculis non insequabantur. Quin etiam parens tuus , Torquate , consul reo de pecuniis repetundis Catilinæ fuit advocatus : improbo homini , at supplici : fortasse audaci , at aliquando amico. Cui quum adfuit post delatam ad eum primam illam conjurationem ; indicavit se audisse aliquid , non credidisse. At idem non adfuit alio in judicio , quum adessent ceteri. Si postea cognorat ipse aliquid , quod in consulatu ignorasset ; ignoscendum est iis , qui postea nihil audierunt : sin illa res prima valuit ; non inveterata , quàm recens , debuit esse gravior. Sed , si tuus parens

etiam in illa suspicione periculi sui , tamen humanitate adductus advocationem hominis improbissimi fellâ curuli , atque ornamentis & suis , & consulatûs honestavit ; quid est , quamobrem consulares , qui Catilinæ adfuerunt , reprehendantur ?

82. At iidem iis , qui ante hunc causam de conjuratione dixerunt , non adfuerunt. Tanto scelere adstrictis hominibus , statuerunt , nihil a se adjumenti , nihil opis , nihil auxilii ferri oportere. Atque , ut de eorum constantia atque animo in rempublicam dicam , quorum tacita gravitas & fides de unoquoque loquitur , neque cuiusquam ornamenta orationis desiderat ; potest quisquam dicere umquam meliores , fortiores , constantiores consulares fuisse , quàm iis temporibus , & periculis , quibus pene oppressa est respublica ? Quis non de communi salute apertissimè , quis non fortissimè , quis non constantissimè sensit ? Neque ego præcipuè de consularibus disputo : nam hæc & hominum ornatissimorum , qui prætores fuerunt , & universi senatûs communis est laus : ut constet , post hominum memoriam numquam in illo ordine plus virtutis , plus amoris in rempublicam , plus gravitatis fuisse. Sed quia sunt descripti consulares , de his tantum mihi dicendum putavi , quod satis esset , attestante memoriâ omnium , neminem esse ex illo honoris gradu , qui non om-

ni studio ; virtute, auctoritate incubuerit ad rempublicam conservandam.

XXX. Sed quid ? ego , qui Catilinam non laudavi , qui reo Catilinæ consul non adfui , qui testimonium de conjuratione dixi in alios , adeone vobis alienus a familiaritate , adeo oblitus constantiæ meæ , adeo immemor rerum a me gestarum esse videor , ut , quum consul bellum gesserim cum conjuratis , nunc eorum ducem servare cupiam , & in animum inducam , cujus nuper ferrum retuderim , flammamque restinxerim , ejusdem nunc causam vitamque defendere ? Si medius fidius , Judices , non me ipsa respublica , meis laboribus & periculis conservata , ad gravitatem animi & constantiam suâ dignitate revocaret ; tamen hoc naturâ est insitum , ut , quem timeris , quicum de vita fortunisque contenderis , cujus ex insidiis evaseris , hunc semper oderis. Sed , quum agatur honos meus amplissimus , gloria rerum gestarum singularis : quum , quoties quisquam est in hoc scelere convictus , toties renovetur memoria per me inventæ salutis : ego sim tam demens , ego committam , ut ea , quæ pro salute omnium gessi , casu magis & felicitate a me , quàm virtute & consilio gesta esse videantur ?

84. Quid ergo ? hoc tibi sumis , dicet fortasse quispiam , ut , quia tu defenderis , innocens judicetur ? Ego verò , Judices ,

non modò nihil mihi assumo, in quo quispiam repugnet; sed etiam si quid ab omnibus conceditur, id reddo ac remitto: non in ea republica versor, non iis temporibus caput meum obtuli pro patria periculis omnibus, non aut ita sunt extincti, quos vici, aut ita grati, quos servavi, ut ego mihi plus appetere coner, quàm quantum omnes inimici invidique patiantur.

85. Grave esse videretur, eum, qui investigarit conjurationem, qui patefecerit, qui oppresserit, cui senatus singularibus verbis gratias egerit, cui uni togato supplicationem decreverit, dicere in iudicio: Non defenderem, si conjurasset: non dico id, quod grave est: dico illud, quod in his causis conjurationis non auctoritati assumam, sed pudori meo: Ego illè conjurationis investigator atque ultor, certè non defenderem Sullam, si conjurasse arbitrarer. Ego, Iudices, de tantis omnium periculis quum quærerem omnia, multa audirem, non crederem omnia, caverem omnia: dico hoc, quod initio dixi, nullius indicio, nullius suspicione, nullis litteris, de re P. Sullæ rem ullam ad me esse delatam.

XXXI. Quamobrem vos, Dii patrii, ac Penates, qui huic urbi, atque huic imperio præsidetis, qui hoc imperium, qui hanc libertatem, populumque Romanum, qui hæc tecta atque templa, me consule,

vestro numine auxilioque servastis, testor, integro me animo, ac libero, P. Sullæ causam defendere: nullum a me sciente facinus occultari, nullum scelus susceptum contra salutem omnium defendi ac tegi: nihil de hoc consul comperi, nihil suspicatus sum, nihil audiui.

87. Itaque idem ego ille, qui vehemens in alios, qui inexorabilis in ceteros esse visus sum, persolvi patriæ quod debui: reliqua jam a me meæ perpetuæ consuetudini, naturæque debentur. Tam sum misericors, Iudices, quàm vos: tam mitis, quàm qui lenissimus. In quo vehemens fui vobiscum, nihil feci, nisi coactus: reipublicæ præcipitanti subveni: patriam demersam extuli: misericordiâ civium adducti, tunc fuimus tam vehementes, quàm necesse fuit: salus esset omnium amissa unâ nocte, nisi esset severitas illa suscepta: sed, ut ad sceleratorum poenam amore reipublicæ sum adductus, sic ad salutem innocentium voluntate deducor.

88. Nihil video esse in hoc P. Sulla, Iudices, odio dignum, misericordiâ digna multa. Neque enim nunc propulsandæ calamitatis suæ causâ supplex ad vos, Iudices, confugit: sed ne qua generi ac nomini suo nota nefariæ turpitudinis inuratur. Nam ipse quidem, si erit vestro iudicio liberatus, quæ habet ornamenta, quæ solatia reliquæ vitæ, quibus lætari &

perfrui possit? domus erit, credo, exornata: aperientur majorum imagines: ipse ornatum ac vestitum recuperabit. Omnia, Judices, hæc amissa sunt: omnia generis, nominis, honoris insignia atque ornamenta unius judicii calamitate occiderunt: sed ne extinctor patriæ, ne proditor, ne hostis appelletur, ne hanc labem tanti generis in familia relinquat, id laborat, id metuit; ne denique hic miser conjurati, & conscelerati, & proditoris filius nominetur: huic puero, qui est ei vitâ suâ multò carior, metuit, cui honoris integros fructus non sit traditurus, ne æternam memoriam dedecoris relinquat.

89. Hic vos orat, Judices, parvus, ut se aliquando, si non integrâ fortunâ, at afflictâ, patri suo gratulari sinatis: huic misero notiora sunt judiciorum itinera, & fori, quàm campi, & disciplinarum. Non jam de vita P. Sullæ, Judices, sed de sepultura contenditur: vita erepta est superiore judicio: nunc, ne corpus ejiciatur, laboramus. Quid enim est huic reliqui, quod eum in vita hac teneat? aut quid est, quamobrem hæc cuiquam vita videatur?

XXXII. Nuper is homo fuit in civitate P. Sulla, ut nemo ei se neque honore, neque gratiâ, nec fortunis anteferret: nunc, spoliatus omni dignitate, quæ erepta sunt, non repetit: quod fortuna in malis reli-



qui fecit, ut cum parente, cum liberis, cum fratre, cum his necessariis, lugere suam calamitatem liceat, id sibi ne eripiat, Judices, vos obtestatur.

90. Te ipsum jam, Torquate, expletum esse hujus miseriis par erat: etsi nihil aliud Sullæ, nisi consulatum abstulissetis, tamen eo vos contentos esse oportebat: honoris enim contentio vos ad causam, non inimiciæ deduxerunt. Sed quum hujc omnia cum honore detracta sint, quum in hac fortuna misera ac luctuosissima destitutus sit: quid est, quod expetas amplius? lucisne hanc usuram eripere vis, plenam lacrymarum atque mœroris, in qua cum maximo cruciatu atque dolore retinetur? libenter reddiderit, ademptâ ignominiâ foedissimi criminis: an verò inimicum ut expellas? cujus ex miseriis, si esses crudelissimus, videndo fructum caperes majorem, quàm audiendo.

91. O miserum & infelicem illum diem, quo consul omnibus centuriis P. Sulla renuntiatus est! ô falsam spem! ô volucrem fortunam! ô cæcam cupiditatem! ô præposteram gratulationem! quàm citò illa omnia ex lætitia & voluptate ad luctum & lacrymas reciderunt, ut, qui paulò antè consul designatus fuisset, retineret repente nullum vestigium pristinae dignitatis! Quid enim erat mali, quod huic spoliato honore, famâ, fortunis, deesse vi-

430 *ORATIO PRO P. SULLA.*

deretur? aut cui novæ calamitati locus ullus relictus esset? urget eadem fortuna, quæ cœpit: reperit novum mœrorem: non patitur hominem calamitosum, uno modo afflictum, uno in luctu perire.

92. Sed jam impediior egomet, Judices, dolore animi, ne de hujus miseria plura dicam: vestræ jam sunt partes, Judices; in vestra mansuetudine atque humanitate causam totam repono: vos & rejectione interpositâ, nihil suspicantibus nobis, repentini in nos judices consedistis, ab accusatoribus delecti ad spem acerbitatis, a fortuna nobis ad præsidium innocentiae constituti. Ut ego, quid de me populus Romanus existimaret, quia severus in improbos fueram, laboravi, &, quæ prima innocentis mihi defensio est oblata, suscepi; sic vos severitatem judiciorum, quæ per hos menses in homines audacissimos facta est, lenitate ac misericordiâ mitigate.

93. Hoc quum impetrare a vobis ipsa causa debet; tum est vestri animi, atque virtutis declarare, non esse eos vos, ad quos potissimum, interpositâ rejectione, devenire convenerit. In quo ego, Judices, vos, quantum meus amor in vos postulat, tantum hortor, ut communi studio, quoniam in republica conjuncti sumus, mansuetudine & misericordiâ vestrâ falsam a nobis crudelitatis famam repellamus,



## PRO ARCHIA POETA.

### ORATIO VIGESIMA QUINTA.

*Archias, magni nominis Poeta, Antiochenus, Romam venit adolescens, & ab Heracliensibus civitate donatus in gratiam Luculli, Romanam etiam civitatem adeptus est lege Plautiâ Papiriâ, quæ anno urbis 664. civitatem dedit iis, qui fœderatis civitatibus adscripti fuissent, si tum, quum lex ferebatur, in Italia domicilium haberent, & sexaginta diebus apud prætorem essent professi. Elapsis autem annis octo supra viginti, Gratius quidam Archiæ diem dixit, quodd falsò se pro cive Romano gereret. Hunc Cicero defendit, probatque eum in civitatem Heracleam, de cujus fœdere constet, adscriptum fuisse, domicilium in*

*Italia habuisse, & professum esse apud Q. Metellum prætorem. Nam quodd census non sit, id illi non debere fraudi esse; quum eo tempore fuerit apud exercitum in Asia cum imperatore L. Lucullo. His breviter demonstratis, digreditur orator in laudem litterarum, omnisque doctrinæ, ac præsertim poeticæ facultatis, quâ præditi homines viris clarissimis ac summis imperatoribus in amore ac deliciis semper fuerunt. Quum igitur Archias excellenti ingenio res Romanas illustret, hunc in civitate retinendum esse.*

*Acta causa est M. Pupio, M. Valerio coff. anno urbis 692. Ciceronis 46.*

**I.** **S**I quid est in me ingenii, Judices; quod sentio quàm sit exiguum; aut si qua exercitatio dicendi, in qua me non infior mediocriter esse versatum; aut, si hujusce rei ratio aliqua, ab optimarum artium studiis ac disciplina profecta, a qua ego nullum confiteor ætatis meæ tempus abhorruisse: earum rerum omnium, vel in primis hic A. Licinius fructum a me repetere

petere propè suo jure debet. Nam quoad longissimè potest mens mea respicere spatium præteriti temporis, & pueritiæ memoriam recordari ultimam, inde usque repetens, hunc video mihi principem & ad suscipiendam, & ad ingrediendam rationem horum studiorum exstitisse. Quodd si hæc vox, hujus hortatu præceptisque conformata, nonnullis aliquando salutis fuit; a quo id accepimus, quo ceteris opitulari, & alios servare possemus, huic profectò ipsi, quantum est situm in nobis, & opem & salutem ferre debemus.

2. Ac, ne quis a nobis hoc ita dici fortè miretur, quodd alia quædam in hoc facultas sit ingenii, neque hæc dicendi ratio, aut disciplina: ne nos quidem huic cuncti studio penitus umquam dediti fuimus. Etenim omnes artes, quæ ad humanitatem pertinent, habent quoddam commune vinculum, & quasi cognatione quadam inter se continentur.

II. Sed ne cui vestrûm mirum esse videatur, me in quæstione legitima, & in judicio publico, quum res agatur apud prætorem populi Romani, lectissimum virum, & apud severissimos judices, tanto conventu hominum ac frequentia, hoc uti genere dicendi, quod non modò a consuetudine judiciorum, verum etiam a forensi sermone abhorreat: quæso a vobis,

ut in hac causa mihi detis hanc veniam, accommodatam huic reo, vobis, quemadmodum spero, non moleſtam; ut me, pro ſummo poëta atque eruditiffimo homine dicentem, hoc concurfu hominum litteratiſſimorum, hac veſtrâ humanitate, hoc denique prætoris exercentis iudicium, patiamini de ſtudiis humanitatis, ac litterarum paulò loqui liberiùs; & in ejuſmodi perſona, quæ propter otium ac ſtudium minimè in iudiciis periculisque tractata eſt, uti propè novo quodam & inuſitato genere dicendi. Quod ſi mihi a vobis tribui, concedique ſentiam; perficiam profeſſò, ut hunc A. Licinium non modò non ſegregandum, quum ſit civis, a numero civium; verùm etiam, ſi non eſſet, putetis adſciſcendum fuiſſe.

III. Nam ut primùm ex pueris exceſſit Archias, atque ab iis artibus, quibus ætas puerilis ad humanitatem informari ſolet, ſe ad ſcribendi ſtudium contulit; primùm Antiochiæ (nam ibi natus eſt, loco nobili, celebri quondam urbe; & copioſâ, atque eruditiffimis hominibus, liberaliſſimisque ſtudiis affluenti) celeriter antecellere omnibus ingenii gloriâ contigit. Poſt in ceteris Asiæ partibus, cunctaque Græcia, ſic ejus adventus celebrabatur, ut famam ingenii exſpectatio hominis, exſpectationem ipſius adventus admiratioque ſuperaret.

4. Erat Italia tunc plena Græcarum artium ac disciplinarum ; studiaque hæc & in Latio vehementius tum colebantur , quàm nunc iisdem in oppidis ; & hic Romæ , propter tranquillitatem reipublicæ non negligebantur. Itaque hunc & Tarentini , & Rhegini , & Neapolitani , civitate , ceterisque præmiis donarunt : & omnes , qui aliquid de ingeniis poterant judicare , cognitione atque hospitio dignum existimarunt.

5. Hac tantâ celebritate famæ quum esset jam absentibus notus , Romam venit , Mario consule , & Catulo : nactus est primum consules eos , quorum alter res ad scribendum maximas , alter quum res gestas , tum etiam studium atque aures adhibere posset. Statim Luculli , quum prætextatus etiam tum Archias esset , eum in domum suam receperunt : sed etiam hoc non solum ingenii ac litterarum , verum etiam naturæ atque virtutis fuit , ut domus , quæ hujus adolescentiæ prima fuerit , eadem esset familiarissima senectuti.

6. Erat temporibus illis jucundus Q. Metello illi Numidico , & ejus Pio filio : audiebatur a M. Æmilio : vivebat cum Q. Catulo , & patre , & filio : a L. Crasso colebatur : Lucullos verò , & Drusum , & Octavios , & Catonem , & totam Hortensiorum domum devinctam consuetudine

quum teneret, afficiebatur summo honore, quòd eum non solum colebant, qui aliquid percipere atque audire studebant, verum etiam, si qui fortè simulabant.

IV. Interim satis longo intervallo, quum esset cum L. Lucullo in Siciliam profectus, & quum ex ea provincia cum eodem Lucullo decederet, venit Heracleam: quæ quum esset civitas æquissimo jure ac fœdere, adscribi se in eam civitatem voluit; idque, quum ipse per se dignus putaretur, tum auctoritate & gratiâ Luculli ab Heracliensibus impetravit. Data est civitas Silvani lege, & Carbonis, *Si qui fœderatis civitatibus adscripti fuissent: si tum, quum lex ferebatur, in Italia domicilium habuissent: & , Si sexaginta diebus apud prætorem essent professi.* Quum hic domicilium Romæ multos jam annos haberet, professus est apud prætorem, Q. Metellum, familiarissimum suum.

8. Si nihil aliud, nisi de civitate ac lege dicimus, nihil dico amplius: causa dicta est: quid enim horum infirmari, Grati, potest? Heracleæne esse tum adscriptum negabis? Adest vir summâ auctoritate, & religione, & fide M. Lucullus, qui se non opinari, sed scire; non audivisse, sed vidisse; non interfuisse, sed egisse dicit. Adfunt Heraclienses legati, nobilissimi homines: hujus judicii causâ, cum mandatis,



& cum publico testimonio venerunt; quī hunc adscriptum Heracliensem dicunt. Hic tu tabulas desideras Heracliensium publicas, quas Italico bello, incenso tabulario, interisse scimus omnes. Est ridiculum, ad ea, quæ habemus, nihil dicere; quærere, quæ habere non possumus: & de hominum memoria tacere, litterarum memoriam flagitare: & quum habeas amplissimi viri religionem, integerrimi municipii jusjurandum fidemque, ea, quæ depravari nullo modo possunt, repudiare; tabulas, quas idem dicis solere corrumpi, desiderare.

9. At domicilium Romæ non habuit: is, qui, tot annis ante civitatem datam, sedem omnium rerum ac fortunarum suarum Romæ collocavit. At non est professus. Immo verò iis tabulis professus, quæ solæ ex illa professione, collegioque prætorum, obtinent publicarum tabularum auctoritatem.

V. Nam quum Appii tabulæ negligentius asservatæ dicerentur: Gabinii, quamdiu incolumis fuit, levitas, post damnationem, calamitas, omnem tabularum fidem resignasset: Metellus, homo sanctissimus modestissimusque omnium, tantâ diligentia fuit, ut ad L. Lentulum prætorem, & ad judices venerit, & unius nominis liturâ se commotum esse dixerit.

His igitur tabulis nullam lituram in nomen A. Licinii videtis.

10. Quæ quum ita sint , quid est , quòd de ejus civitate dubitetis , præsertim quum aliis quoque in civitatibus fuerit adscriptus ? Etenim quum mediocribus multis , & aut nullâ , aut humili aliquâ arte præditis , gratuitò civitatem in Græcia homines imperiebantur , Rheginos credo , aut Locrenses , aut Neapolitanos , aut Tarentinos , quod scenicis artificibus largiri solebant , id huic , summâ ingenii prædito gloriâ , noluisse. Quid ? quum ceteri non modò post civitatem datam , sed etiam post legem Papiam , aliquo modo in eorum municipiorum tabulas irrepserint ; hic , qui ne utitur quidem illis , in quibus est scriptus , quòd semper se Heracliensem esse voluit , rejicietur ?

11. Census nostros requiris scilicet : est enim obscurum , proximis censoribus , hunc cum clarissimo imperatore L. Lucullo , apud exercitum fuisse : superioribus , cum eodem quæstore fuisse in Asia : primis , Julio & Crasso , nullam populi partem esse censam. Sed , quoniam census non jus civitatis confirmat , ac tantummodo indicat , eum , qui sit census , ita se jam tum gessisse pro cive : iis temporibus , quæ tu criminaris , ne ipsius quidem judicio eum in civium Romanorum jure esse versatum ,

*PRO ARCHIA POETA.* 439

& testamentum sæpe fecit nostris legibus ;  
& adiit hereditates civium Romanorum ,  
& in beneficiis ad ærarium delatus est a  
L. Lucullo prætorè & consule.

VI. Quære argumenta , si qua potes ;  
numquam enim hic neque suo , neque ami-  
corum iudicio revincetur. Quæres a no-  
bis , Grati , cur tantopere hoc homine de-  
lectemur. Quia suppeditat nobis , ubi &  
animus ex hoc forensi strepitu reficiatur ,  
& aures convicio defessæ conquiescant. An  
tu existimas , aut suppetere nobis posse ,  
quod quotidie dicamus in tanta varietate  
rerum , nisi animos nostros doctrinâ exco-  
lamus ; aut ferre animos tantam posse con-  
tentionem , nisi eos doctrinâ eadem rela-  
xemus ? Ego verò fateor , me his studiis  
esse deditum : ceteros pudeat , si qui ita  
se litteris abdiderunt , ut nihil possint ex  
his neque ad communem afferre fructum ,  
neque in adspectum lucemque proferre :  
me autem quid pudeat , qui tot annos ita  
vivo , Iudices , ut ab nullius umquam me  
tempore aut commodum , aut otium meum  
abstraxerit , aut voluptas avocarit , aut de-  
nique somnus retardarit ?

13. Quare quis tandem me reprehendat ;  
aut quis mihi jure succenseat , si , quan-  
tum ceteris ad suas res obeundas , quan-  
tum ad festos dies ludorum celebrandos ,  
quantum ad alias voluptates , & ad ipsam

requiem animi & corporis conceditur temporis ; quantum alii tribuunt tempestivis conviviis ; quantum denique aleæ , quantum pilæ ; tantum mihi egomet ad hæc studia recolenda sumpsero ? Atque hoc adeo mihi concedendum est magis , quòd ex his studiis hæc quoque censetur oratio & facultas ; quæ quantacumque est in me , numquam amicorum periculis defuit : quæ si cui levior videtur ; illa quidem certè , quæ summa sunt , ex quo fonte hauriam , sentio.

14. Nam , nisi multorum præceptis , multisque litteris mihi ab adolescentia suasissem , nihil esse in vita magnopere expectandum , nisi laudem , atque honestatem ; in ea autem persequenda omnes cruciatus corporis , omnia pericula mortis atque exilii parvi esse ducenda : numquam me pro salute vestra in tot ac tantas dimicationes , atque in hos profligatorum hominum quotidianos impetus objecissem. Sed pleni omnes sunt libri , plenæ sapientium voces , plena exemplorum vetustas , quæ jacerent in tenebris omnia , nisi litterarum lumen accederet. Quàm multas nobis imagines , non solum ad intuendum , verum etiam ad imitandum , fortissimorum virorum expressas scriptores & Græci & Latini reliquerunt ? quas ego mihi semper in administranda republica proponens , animum , &

mentem meam ipsâ cogitatione hominum excellentium conformabam.

VII. Quæret quispiam, quid? illi ipsi summi viri, quorum virtutes litteris proditæ sunt, istâne doctrinâ, quam tu laudibus effers, eruditi fuerunt? Difficile est hoc de omnibus confirmare: sed tamen est certum, quid respondeam. Ego multos homines excellenti animo ac virtute fuisse, & sine doctrina, naturæ ipsius habitu propè divino, per seipsos & moderatos, & graves exstitisse fateor: etiam illud adjungo, sæpius ad laudem atque virtutem naturam sine doctrina, quàm sine natura valuisse doctrinam. Atque idem ego contendo, quum ad naturam eximiam atque illustrem accesserit ratio quædam, conformatioque doctrinæ; tum illud nescio quid præclarum ac singulare solere exsistere.

16. Ex hoc esse hunc numero, quem patres nostri viderunt, divinum hominem, Africanum: ex hoc C. Lælius, L. Furius, moderatissimos homines & continentissimos: ex hoc fortissimum virum, & illis temporibus doctissimum, M. Catonem illum senem: qui profectò si nihil ad percipiendam colendamque virtutem litteris adjuvarentur, numquam se ad eorum studium contulissent.

17. Quòd si non hic tantus fructus ostenderetur, & si ex his studiis delectatio

sola peteretur : tamen , ut opinor , hanc animi remissionem , humanissimam ac liberalissimam judicaretis. Nam ceteræ neque temporum sunt , neque ætatum omnium , neque locorum : hæc studia adolescentiam alunt , senectutem oblectant , secundas res ornant , adversis perfugium ac solatium præbent , delectant domi , non impediunt foris , pernoctant nobiscum , peregrinantur , rusticantur. Quodd si ipsi hæc neque attingere , neque sensu nostro gustare possemus , tamen ea mirari deberemus , etiam quum in aliis videremus.

VIII. Quis nostrum tam animo agresti ac duro fuit , ut Roscii morte nuper non commoveretur ? qui quum esset senex mortuus , tamen , propter excellentem artem ac venustatem , videbatur omnino mori non debuisse. Ergo ille corporis motu tantum amorem sibi conciliarat a nobis omnibus : nos animorum incredibiles motus , celeritatemque ingeniorum negligemus ? Quoties ego hunc Archiam vidi , Iudices ( utar enim vestrâ benignitate , quoniam me in hoc novo genere dicendi tam diligenter attenditis ) quoties ego hunc vidi , quum litteram scripsisset nullam , magnum numerum optimorum versuum de his ipsis rebus , quæ tum agerentur , dicere ex tempore ? quoties revocatum eandem rem dicere , commutatis verbis , atque sententiis ?

Quæ verò accuratè, cogitatèque scripsisset; ea sic vidi probari, ut ad veterum scriptorum laudem pervenirent. Hunc non ego diligam? non admirer? non omni ratione defendendum putem? Atqui sic a summis hominibus, eruditissimisque accepimus, ceterarum rerum studia, & doctrinâ, & præceptis, & arte constare; poëtam naturâ ipsâ valere, & mentis viribus excitari, & quasi divino quodam spiritu inflari. Quare suo jure noster ille Ennius sanctos appellat poëtas, quòd quasi deorum aliquo dono atque munere commendati nobis esse videantur.

19. Sit igitur, Iudices, sanctum apud vos, humanissimos homines, hoc poëtæ nomen, quod nulla umquam barbaria violavit. Saxa & solitudines voci respondent; bestię sæpe immanes cantu flectuntur, atque consistunt: nos instituti rebus optimis non poëtarum voce moveamur? Homerum Colophonii civem esse dicunt suum; Chii suum vindicant, Salaminii repetunt, Smyrnæi verò suum esse confirmant: itaque etiam delubrum ejus in oppido dedicaverunt: permulti alii præterea pugnant inter se, atque contendunt.

I X. Ergo illi alienum, quia poëta fuit, post mortem etiam expetunt: nos hunc vivum, qui & voluntate, & legibus noster est, repudiabimus? præsertim quum

omne olim studium , atque omne ingenium contulerit Archias ad populi Romani gloriam , laudemque celebrandam ? nam & Cimbricas res adolescens attigit , & ipsi illi C. Mario , qui durior ad hæc studia videbatur , jucundus fuit. Neque enim quisquam est tam averfus a Musis , qui non mandari versibus æternum suorum laborum facile præconium patiat. Themistoclem illum , summum Athenis virum , dixisse aiunt , quum ex eo quæreretur , quod acroama , aut cujus vocem libentissimè audiret : *Ejus , a quo sua virtus optimè prædicaretur.* Itaque ille Marius item eximè L. Plotium dilexit ; cujus ingenio putabat ea , quæ gesserat , posse celebrari.

21. Mithridaticum verò bellum magnum atque difficile , & in multa varietate terræ marique versatum , totum ab hoc expressum est : qui libri non modò L. Lucillum , fortissimum & clarissimum virum , verum etiam populi Romani nomen illustrent. Populus enim Romanus aperuit , Lucullo imperante , Pontum , & regiis quondam opibus , & ipsâ naturâ regionis vallatum : populi Romani exercitus , eodem duce , non maximâ manu innumerabiles Armeniorum copias fudit : populi Romani laus est , urbem amicissimam Cyzicenorum , ejusdem consilio , ex omni impetu regio , ac totius belli ore ac faucibus ereptam



esse, atque servatam: nostra semper fertur, & prædicabitur, L. Lucullo dimicante, cum interfectis ducibus depressa hostium classis, & incredibilis apud Tenedum pugna illa navalis: nostra sunt tropæa, nostra monumenta, nostri triumphi. Quare, quorum ingeniis hæc feruntur, ab his populi Romani fama celebratur.

22. Carus fuit Africano superiori. noster Ennius: itaque etiam in sepulcro Scipionum putatur is esse constitutus e marmore. At iis laudibus certè non solum ipsi, qui laudantur, sed etiam populi Romani nomen ornatur. In cælum hujus proavus Cato tollitur: magnus honos populi Romani rebus adjungitur: omnes denique illi Maximi, Marcelli, Fulvii, non sine communi omnium nostrum laude decorantur.

X. Ergo illum, qui hæc fecerat, Ruridum hominem, majores nostri in civitatem receperunt: nos hunc Heracliensem, multis civitatibus expetiturum, in hac autem legibus constitutum, de nostra civitate ejiciemus? Nam si quis minorem gloriæ fructum putat ex Græcis versibus percipi, quàm ex Latinis, vehementer errat, propterea quòd Græca leguntur in omnibus ferè gentibus: Latina suis finibus, exiguis sanè, continentur. Quare si res hæ, quas

gessimus , orbis terræ regionibus definiuntur ; cupere debemus , quò minùs manuum nostrarum tela pervenerint , eòdem gloriam famamque penetrare : quòd quum ipsis populis , de quorum rebus scribitur , hæc ampla sunt ; tum iis certè , qui de vita , gloriæ causâ , dimicant , hoc maximum & periculorum incitamentum est , & laborum.

24. Quàm multos scriptores rerum suarum Magnus ille Alexander secum habuisse dicitur ? Atque is tamen , quum in Sigeo ad Achillis tumulum adstitisset , *O fortunate* , inquit , *adolescens , qui tuæ virtutis Homerum præconem inveneris*. Et verè : nam , nisi Ilias illa exstitisset ; idem tumulus , qui corpus ejus contexerat , nomen etiam obruisset. Quid ? noster hic Magnus , qui cum virtute fortunam adæquavit , nonne Theophanem Mitylenæum , scriptorem rerum suarum , in concione militum civitate donavit ? & nostri illi fortes viri , sed rustici , ac milites , dulcedine quadam gloriæ commoti , quasi participes ejusdem laudis , magno illud clamore approbaverunt ?

25. Itaque , credo , si civis Romanus Archias legibus non esset , ut ab aliquo imperatore civitate donaretur , perficere non potuit. Sulla , quum Hispanos & Gallos donaret , credo , hunc petentem repu-

diasset : quem nos in concione vidimus , quum ei libellum malus poëta de populo subiecisset , quodd epigramma in eum fecisset tantummodo alternis versibus longiusculis , statim ex iis rebus , quas tunc vendebat , jubere ei præmium tribui sub ea conditione , *ne quid postea scriberet*. Qui sedulitatem mali poëtæ duxerit aliquo tamen præmio dignam , hujus ingenium & virtutem in scribendo , & copiam non expetisset ?

26. Quid ? a Q. Metello Pio , familiarissimo suo , qui civitate multos donavit , neque per se , neque per Lucullos impe- travisset ? qui præsertim usque eò de suis rebus scribi cuperet , ut etiam Cordubæ natis poëtis , pingue quiddam sonantibus atque peregrinum , tamen aures suas dederet.

XI. Neque enim est hoc dissimulan- dum , quod obscurari non potest ; sed præ nobis ferendum : trahimur omnes lau- dis studio ; & optimus quisque maximè gloriâ ducitur. Ipsi illi philosophi , etiam in illis libellis , quos de contemnenda glo- ria scribunt , nomen suum inscribunt : in eo ipso , in quo prædicationem nobilita- temque despiciunt , prædicari de se , ac nominari volunt. Decimus quidem Bru- tus , summus ille vir & imperator , Ac- ci , amicissimi sui , carminibus temporum

ac monumentorum aditus exornavit suorum. Jam verò ille, qui cum Ætolis, Ennio comite, bellavit, Fulvius, non dubitavit Martis manubias Musis consecrare. Quare, in qua urbe imperatores propè armati poëtarum nomen & Musarum delubra coluerunt, in ea non debent togati iudices a Musarum honore, & a poëtarum salute abhorrere.

28. Atque, ut id libentiùs faciatis, jam me vobis, Iudices, indicabo, & de meo quodam amore gloriæ, nimis acri fortasse, verumtamen honesto, vobis confitebor. Nam, quas res nos in consulatu nostro vobiscum simul pro salute hujus urbis atque imperii, & pro vita civium, proque universa republica gessimus, attigit hic versibus, atque inchoavit: quibus auditis, quòd mihi magna res & jucunda visa est, hunc ad perficiendum hortatus sum. Nullam enim virtus aliam mercedem laborum periculorumque desiderat, præter hanc laudis & gloriæ; quâ quidem detractâ, Iudices, quid est, quòd in hoc tam exiguo vitæ curriculo, & tam brevi, tantis nos in laboribus exerceamus?

29. Certè, si nihil animus præsentiret in posterum, & si, quibus regionibus vitæ spatium circumscriptum est, eisdem omnes cogitationes terminaret suas; nec tantis se laboribus frangeret, neque tot

*PRO ARCHIA POETA.* 449

curis vigiliisque angeretur , neque toties de vita ipsa dimicaret : nunc insidet quædam in optimo quoque virtus , quæ noctes & dies animum gloriæ stimulis concitat , atque admonet , non cum vitæ tempore esse dimittendam commemorationem nominis nostri , sed cum omni posteritate adæquandam.

XII. An verò tam parvi animi videamur esse omnes , qui in republica , atque in his vitæ periculis laboribusque versamur , ut , quum , usque ad extremum spatium , nullum tranquillum atque otiosum spiritum duxerimus , nobiscum simul moritura omnia arbitremur ? An quum statuas & imagines , non animorum simulacra , sed corporum , studiosè multi summi homines reliquerint ; consiliorum relinquere , ac virtutum nostrarum effigiem nonne multò malle debemus , summis ingeniis expressam & politam ? Ego verò omnia , quæ gerebam , jam tum in gerendo spargere me ac disseminare arbitrabar in orbis terræ memoriam sempiternam. Hæc verò sive a meo sensu post mortem abfutura est , sive , ut sapientissimi homines putaverunt , ad aliquam mei partem pertinebit ; nunc quidem certè cogitatione quadam , speque delector.

31. Quare conservate , Iudices , hominem pudore eo , quem amicorum videtis

# 450 ORAT. PRO ARCHIA POETA.

comprobari tum dignitate, tum etiam vetustate; ingenio autem tanto, quantum id convenit existimari, quod summorum hominum ingeniis expetitur esse videatis; causam verò ejusmodi, quæ beneficio legis, auctoritate municipii, testimonio Luculli, tabulis Metelli comprobetur. Quæ quum ita sint; petimus a vobis, *Judices*, si qua non modò humana, verum etiam divina in tantis negotiis commendatio debet esse; ut eum, qui vos, qui vestros imperatores, qui populi Romani res gestas semper ornavit; qui etiam his recentibus nostris, vestrisque domesticis periculis æternum se testimonium laudum daturum esse profiteatur; quique est eo numero, qui semper apud omnes sancti sunt habiti, atque dicti; sic in vestram accipiatis fidem, ut humanitate vestram levatus potius, quam acerbitate violatus esse videatur.

32. Quæ de causa pro mea consuetudine breviter, simpliciterque dixi, *Judices*, ea confido probata esse omnibus: quæ non fori, neque judiciali consuetudine, & de hominis ingenio, & communiter de ipsius studio locutus sum, ea, *Judices*, a vobis spero esse in bonam partem accepta; ab eo, qui judicium exercet, certè scio.



## PRO L. FLACCO.

### ORATIO VIGESIMA SEXTA.

*Accusatum a D. Lælio L. Flaccum de repetundis ex Asia, cui triennium ex prætura præfuerat, Cicero defendit. Tota ferè defensio ex confutatione testium Asiaticorum & Græcorum, qui Flaccum oppugnabant, & ex ipsius Flacci superiore vita, magnisque in remp. meritis, constat. Egit eandem causam Hortensius, de quo sic ad Atticum scribit Tullius libro II, 25. Hortensius quàm plenâ manu, quàm ingeniosè, quàm ornatè, nostras laudes in astra sustulit, quum de Flacci prætura, & de illo tempore Allobrogum diceret. Ex eadem epistola accusatum esse Flaccum, Cæsare & Bibulo cons. intelligitur, quod histo-*

*riæ quoque ratio docet. Nam quum prætor Flaccus fuerit Cicerone coff. triennium autem Asiam rexerit ; quod ipsa ostendit oratio , inde colligitur ejus accusationem in Cæsarem & Bibulum coff. incidere , anno urbis 694. Ciceronis 48. MANUTIUS.*

I. **Q**UUM in maximis periculis hujus urbis , atque imperii , gravissimo atque acerbissimo reipublicæ casu , socio atque adjutore consiliorum , periculorumque meorum , L. Flacco , cædem a vobis , conjugibus , liberis vestris , vastitatem a templis , delubris , urbe , Italiâ depellebam : sperabam , Judices , honoris potius L. Flacci me adjutorem futurum , quàm miseriarum deprecatorem. Quod enim esset præmium dignitatis , quod populus Romanus , quum hujus majoribus semper detulisset , huic denegaret ; quum L. Flaccus veterem Valeriæ gentis in liberanda patria laudem propè quingentesimo anno reipublicæ retulisset ?

2. Sed si fortè aliquando aut beneficii hujus obtreçtator , aut virtutis hostis , aut laudis invidus exstitisset : existimabam L. Flacco multitudinis potius imperitæ , nullo ta-



men cum periculo , quàm sapientissimorum & lectissimorum virorum iudicium esse subeundum. Etenim , quibus auctoribus , & defensoribus omnium tum salus esset non civium solùm , verùm etiam gentium defen-  
sa ac retenta , neminem umquam putavi per eos ipsos periculum hujus fortunis , atque insidias creaturum. Quòd si esset aliquando futurum , ut aliquis de L. Flacci perniciæ cogitaret , numquam tamen existimavi , Iudices , D. Lælium , optimi viri filium , optimâ ipsum spe præditum summæ dignitatis , eam suscepturum accusationem , quæ sceleratorum civium potius odio & furori , quàm ipsius virtuti atque institutæ adolescentiæ conveniret. Etenim quum a clarissimis viris justissimas inimicitias sæpe cum bene meritis civibus depositas esse vidissem , non sum arbitratus , quemquam amicum reipublicæ , posteaquam L. Flacci amor in patriam perspectus esset , novas huic inimicitias , nullâ acceptâ injuriâ , denuntiaturum.

3. Sed quoniam , Iudices , multa nos & in nostris rebus , & in republica fefellerunt ; ferimus ea , quæ sunt ferenda : tantum a vobis petimus , ut omnia reipublicæ subsidia , totum statum civitatis , omnem memoriam temporum præteritorum , salutem præsentium , spem reliquorum , in vestra potestate , in vestris sententiis , in hoc

uno judicio positam esse & defixam putetis. Si umquam respublica consilium, gravitatem, sapientiam, providentiam judicum imploravit; hoc tempore, hoc, inquam, tempore, implorat.

II. Non estis de Lydorum, aut Myso-  
rum, aut Phrygum, qui huc compulsi concitatieque venerunt, sed de vestra republica judicaturi, de civitatis statu, de communi salute, de spe bonorum omnium, si qua reliqua est etiam nunc, quæ fortium civium mentes cogitationesque sustentet. Omnia alia perfugia bonorum, præsidia innocentium, subsidia reipublicæ, consilia, auxilia, jura ceciderunt. Quem enim alium appellem? quem obtester? quem implorem? senatumne? at is ipse auxilium petit a vobis, & confirmationem auctoritatis suæ, vestræ potestati permissam esse sentit: an equites Romanos? judicabitis principes ejus ordinis quinquaginta, quid cum omnibus senseritis: an populum Romanum? at is quidem omnem suam de bonis potestatem tradidit vobis. Quamobrem, nisi hoc loco, nisi apud vos, nisi per vos, Judices, non auctoritatem, quæ amissa est, sed salutem nostram, quæ spe exigua extremâque pendet, tenuerimus; nihil est præterea, quod confugere possimus: nisi fortè quæ res hoc judicio tentetur, quid agatur, cui causæ fundamenta jaciantur, Judices, non videtis.

5. Damnatus est is, qui Catilinam, signa patriæ inferentem, interemit; quid est causæ, cur non is, qui Catilinam ex urbe repulit, pertimescat? repetitur ad pœnam, qui indicia communis exitii excepit; cur sibi confidat is, qui ea proferenda & partefacienda curavit? socii consiliorum, ministri, comitesque vexantur? quid auctores, quid duces, quid principes sibi expectent? Atque utinam inimici nostri, ac bonorum omnium, mecum potius contendant, utrùm tum omnes boni, duces nostri, an comites fuerint ad communem conservandam salutem. \*\*\*

*Permulta defunt*

III. Hunc igitur virum, Læli, quibus tandem rebus oppugnas? Fuit, P. Servilio imperatore, in Cilicia tribunus militum: ea res siletur. Fuit M. Pisoni quæstor in Hispania: vox de quæstura nulla missa est. Bellum Cretense ex magna parte gessit, atque unà cum summo imperatore sustinuit: muta est hujus temporis accusatio. Præturæ jurisdictio, res varia & multiplex ad suspiciones & simultates, non attingitur: ea verò in summo & periculosissimo reipublicæ tempore, etiam ab inimicis laudatur. At a testibus læditur. Antequam dico, a quibus, quâ spe, quâ vi, quâ re concitatis, quâ levitate, quâ egestate, quâ perfidiâ, quâ audaciâ præditis; dicam de

genere universo , & de conditione omnium nostrum.

- 7. Per deos immortales ! Judices , vos , quomodo is , qui anno antè Romæ jus dixerat , anno post in Asia jus dixerit , a testibus quæretis ignotis ? ipsi conjecturâ nihil judicabitis ? in tam varia jurisdictione tam multa decreta , tot hominum gratiosorum læsæ voluntates : quæ est umquam jacta non suspicio , quæ tamen solet esse falsa , sed iracundiæ vox , aut doloris ? Et is est reus avaritiæ , qui in uberrima re turpe compendium , in maledicentissima civitate , in suspiciosissimo negotio , maledictum omne , non modò crimen effugit. Prætereo illa , quæ prætereunda non sunt ; nullum hujus in privatis rebus factum avarum , nullam in re pecuniaria contentionem , nullam in re familiari sordem posse proferri. Quibus igitur testibus ego hosce possum refutare , nisi vobis ?

8. Timolites ille vicanus , homo non modò nobis , sed ne inter suos quidem notus , vos docebit , qualis sit L. Flaccus ? quem vos modestissimum adolescentem , provinciæ maximæ sanctissimum virum , nostri exercitus fortissimum militem , diligentissimum ducem , temperatissimum legatum , quæstoremque cognoverunt ? quem vos præsentem constantissimum servatorem , justissimum prætorem , & aman-

tissimum

tissimum reipublicæ civem judicastis? De quibus vos aliis testes esse debetis, de iis ipsi alios testes audietis?

IV. At quos testes? primum dicam (id quod est commune) Græcos; non quò nationi huic ego unus maximè fidem derogem: nam, si quis umquam de nostris hominibus a genere isto, studio, ac voluntate non abhorrens fuit, me & esse arbitror, & magis etiam tum, quum plus erat otii, fuisse: sed sunt in illo numero multi boni, docti, pudentes, qui ad hoc iudicium deducti non sunt; multi impudentes, illiterati, leves, quos variis de causis video concitatos. Verumtamen hoc dico de toto genere Græcorum: tribuo illis litteras, do multarum artium disciplinam, non adimo sermonis leporem, ingeniorum acumen, dicendi copiam: denique etiam, si qua sibi alia sumunt, non repugno: testimoniorum religionem & fidem numquam ista natio coluit, totiusque huiusce rei quæ sit vis, quæ auctoritas, quod pondus, ignorant.

10. Unde illud est? *Da mihi testimonium mutuum*: num Gallorum, num Hispanorum putatur? totum istud Græcorum est; ut etiam qui Græcè nesciunt, hoc, quibus verbis a Græcis dici soleat, sciant. Itaque videte, quo vultu, quâ confidentiâ dicant; tum intelligetis, quâ religione dicant. Numquam nobis ad rogatum respondent; sem-

per accusatori plus, quàm ad rogatum: numquam laborant, quemadmodum probent, quod dicunt; sed quemadmodum se explicent dicendo. Iratus Flacco dixit M. Lurco, quòd (ut ipse aiebat) libertus erat ejus turpi judicio condemnatus: nihil dixit, quod læderet eum, quum cupe- ret: impediēbat enim religio: tamen, id quod dixit, quanto cum pudore, quo tremore & pallore dixit? Quàm promptus homo P. Septimius? quàm iratus de judicio, & de villico? tamen hæsitabat: tamen ejus iracundiæ religio nonnumquam repugnabat. Inimicus M. Cœlius, quòd, quum in re manifesta putasset nefas esse, publicanum judicare contra publicanum, sublatus erat e numero recuperatorum: tamen tenuit se, neque attulit in judicium quidquam ad lædendum, nisi voluntatem.

V. Hi si Græci fuissent, ac nisi nostri mores, ac disciplina plus valerent, quàm dolor, ac simultas; omnes se spoliatos, vexatos, fortunis everfos esse dixissent, Græcus testis quum eâ voluntate proces- sit, ut lædat; non jurisjurandi, sed lædendi verba meditatur: vinci, refelli, coargui putat esse turpissimum: ad id se parat: nihil aliud curat. Itaque non optimus quisque, nec gravissimus, sed impudentissimus, loquacissimusque deligitur.

12. Vos autem in privatis minimarum

rerum judiciis testem diligenter expenditis : etiam si formam hominis , si nomen , si tribum nostis , mores tamen exquirendos putatis. Qui tum dicit testimonium ex nostris hominibus , ut se ipse sustentat ! ut omnia verba moderatur ! ut timeat , ne quid cupidè , ne quid iracundè , ne quid plus , minùsve , quàm sit necesse , dicat ! Num illos idem putatis ? quibus jusjurandum jocus est ; testimonium , ludus ; existimatio vestra , tenebræ ; laus , merces , gratia , gratulatio proposita est omnis in impudenti mendacio. Sed non dilatabo orationem meam : etenim posset esse infinita , si mihi libeat totius gentis in testimoniis dicendis explicare vanitatem. Sed propiùs accedam : de his vestris testibus dicam.

13. Vehementem accusatorem nacti sumus , Judices , & inimicum in omni genere odiosum , ac molestum ; quem spero his rebus fore magno usui & amicis , & reipublicæ : sed certè inflammatus incredibili cupiditate hanc causam , accusationemque suscepit. Qui comitatus in inquirendo ? comitatum dico ? immo verò quantus exercitus ? quæ jactura ? qui sumptus ? quanta largitio ? quæ quamquam utilia sunt causæ , timidè tamen dico ; quòd vereor , ne Lælius ex his rebus , quas sibi suscepit gloriæ causâ , putet aliquid , oratione meâ , sermonis in sese , aut invidiæ esse quæsitum.

VI. Itaque hanc partem totam relinquam : tantum a vobis petam , Judices , ut , si quid ipsi audistis communi famâ atque sermone , de vi , de manu , de armis , de copiis , memineritis , quarum rerum invidiâ , lege hac recenti ac novâ , certus est inquisitioni comitum numerus constitutus. Sed , ut hanc vim omittam , quanta illa sunt ? quæ quoniam accusatorio jure & more sunt facta , reprehendere non possumus , queri tamen cogimur : primum , quod , distributis partibus , sermo est totâ Asiâ dissipatus , Cn. Pompeium , quod L. Flacco est vehementer inimicus , contendisse a Lælio , paterno amico ac pernecessario , ut hunc hoc judicio arcefferet ; omnemque ei suam auctoritatem , gratiam , copias , opes , ad hoc negotium conficiendum detulisse.

15. Id hoc verisimilius Græcis hominibus videbatur , qui paulò antè familiarem Lælium in eadem provincia Flacco viderant : Pompeii autem auctoritas quum apud omnes tanta est , quanta esse debet , tum excellit in ista provincia , quam nuper & prædonum , & regum bello liberavit. Adjunxit illa , ut eos , qui domo exire volebant , testimonii denuntiatione terreret ; qui domi stare non poterant , largo & liberali viatico commoveret. Sic adolescens , ingenii plenus , locupletes metu , te



rues præmio, stultos errore permovit: sic sunt expressa ista præclara, quæ recitantur, psephismata, non sententiis, neque auctoritatibus declarata, nec jurejurando constricta, sed porrigendâ manu, profundendoque clamore multitudinis concitatae.

VII. O morem præclarum, disciplinamque, quam a majoribus accepimus, si quidem teneremus! sed nescio quo pacto jam de manibus elabitur. Nullam illi nostri sapientissimi & sanctissimi viri vim concionis esse voluerunt: quæ scisceret plebes, aut quæ populus juberet; summotâ concione, distributis partibus, tributim & centuriatim descriptis ordinibus, classibus, ætatibus, auditis auctoribus, re multos dies promulgatâ & cognitâ, juberi, vetarique voluerunt.

16. Græcorum autem totæ respUBLICÆ sedentis concionis temeritate administrantur. Itaque, ut hanc Græciam, quæ jamdiu suis consiliis perculsa & afflicta est, omittam; illa vetus, quæ quondam opibus, imperio, gloriâ floruit, hoc uno malo concidit, libertate immoderatâ, ac licentiâ concionum. Quum in theatrò imperiti homines, rerum omnium rudes ignarique, confederant; tum bella inutilia suscipiebant; tum seditiosos homines reipUBLICÆ præficiebant; tum optimè meritos cives e civitate ejiciebant.

17. Quòd si hæc Athenis tum , quum illæ non solùm in Græcia , sed propè cunctis gentibus enitebant , accidere sunt solita ; quam moderationem putatis in Phrygia , aut in Mysia concionum fuisse ? Nostras conciones , illarum nationum homines plerumque perturbant : quid , quum soli sunt ipsi , tandem fieri putatis ? Cæsus est virgis Cymæus ille Athenagoras , qui in fame frumentum exportare erat ausus : data concio Lælio est : processit ille , & Græcus apud Græcos non de culpa sua dixit , sed de pœna questus est : porrexerunt manus : psephisma natum est. Hoc testimonium est ? Nuper epulati , paulò antè omni largitione saturati Pergameni , quod Mithridates , qui multitudinem illam non auctoritate , sed taginâ tenebat , se velle dixit , id sutores , & coriarii conclamarunt. Hoc testimonium est civitatis ? Ego testes a Sicilia publicè duxi : verùm erant ea testimonia non concitata concionis , sed jurati fenatûs. Quare jam non est mihi contentio cum teste : vobis videndum est , sintne hæc testimonia putanda.

VIII. Adolescens bonus , honesto loco natus , disertus , cum maximo ornatissimoque comitatu venit in oppidum Græcorum : postulat concionem : locupletes homines & graves , ne sibi adversentur , testimonii denuntiatione deterret : egentes & leves

spe legationis & viatico publico, privatâ etiam benignitate, prolestat: opifices & tabernarios, atque illam omnem facem civitatum, quid est negotii concitare, in eum præsertim, qui nuper summo cum imperio fuerit, summo autem in amore esse, propter nomen ipsum imperii, non potuerit?

19. Mirandum verò est, homines eos; quibus odio sunt nostræ secures; nomen, acerbitati; scriptura, decumæ, portorium, morti; libenter arripere facultatem lædendi, quæcumque detur. Mementote igitur, quum audietis psephismata, non audire vos testimonia; audire temeritatem vulgi, audire vocem levissimi cujusque, audire strepitum imperitorum, audire concionem concitatam levissimæ nationis. Itaque perscrutamini penitus naturam rationemque criminum: jam nihil præter spem, nihil præter terrorem, ac minas, reperietis. \*\*\*

*Deesse videntur nonnulla.*

IX. In ærario nihil habent civitates, nihil in vectigalibus: duæ rationes conficiendæ pecuniæ, aut versurâ, aut tributo: nec tabulæ creditoris proferuntur, nec tributî confectio ulla recitatur. Quàm verò facilè falsas rationes inferre, & in tabulas, quodcumque commodum est, referre soleant, ex Cn. Pompeii litteris ad Hypsæum, & Hypsæi ad Pompeium missis, quæso, cognoscite. LITTERÆ POMPEII,

& HYPsÆI. Satisne vobis coarguere his auctoris dissolutam Græcorum consuetudinem, licentiamque impudentem videmur? nisi fortè, qui Cn. Pompeium, qui præsentem, qui nullo impellente, fallabant, eos, urgente Lælio, in absentem, & in L. Flaccum aut timidos fuisse, aut religiosos putamus.

21. Sed fuerint incorruptæ litteræ domi: nunc verò, quam habere auctoritatem, aut quam fidem possunt? Triduo lex ad prætorem deferri, judicum signis obsignari jubet: tricesimo die vix deferuntur. Ne corrumpi tabulæ facilè possint, idcirco lex obsignatas in publico poni voluit. At obsignantur corruptæ. Quid refert igitur, tantò post ad iudices deferantur, an omnino non deferantur? Quid, si testium studium cum accusatore sociatum est? tamenne isti testes habebuntur?

X. Ubi est igitur illa expectatio, quæ versari in judiciis solet? Nam antea, quum dixerat accusator acriter & vehementer, quumque defensor suppliciter demissèque responderat; tertius ille erat expectatus locus testium, qui aut sine ullo studio dicebant, aut cum dissimulatione aliqua cupiditatis.

22. Hoc verò quid est? Unà sedent, ex accusatorum subselliis surgunt, non dissimulant, non verentur: de subselliis que-

ror? unà ex domo prodeunt: si vèrbo titubarint, quò revertantur, non habebunt. An quisquam esse testis potest, quem accusator sine cura interroget; nec metuat, ne sibi aliquid, quod ipse nolit, respondeat? Ubi est igitur illa laus oratoris, quæ vel in accusatore antea, vel in patrono spectari solebat? Bene testem interrogavit: callidè accessit: reprehendit: quò voluit, adduxit: convicit, & elinguem reddidit.

23. Quid tu istum roges, Læli, qui priusquam hoc, *Te rogo*, dixeris, plura etiam effundet, quàm tu ei domi antè præscripseris? Quid ego autem defensor rogem? nam aut oratio testium refelli solet, aut vita lædi. Quà disputatione orationem refellam ejus; qui dicit, *Dedimus*: nihil ampliùs? In hominem dicendum est igitur, quum oratio argumentationem non habet. Quid dicam in ignotum? Querendum est ergo & deplorandum, id quod jamdudam facio, de omni accusationis iniquitate: primùm de communi genere testium: dicit enim ratio minimè in testimoniis dicendis religiosa: propiùs accedo: nego esse ista testimonia, quæ tu ipse psephismata appellas; sed & fremitum egentium, & motum quemdam temerarium Græculæ concionis. Intrabo etiam magis: qui gessit, non adest: qui nume-

rasse dicitur , non est deductus : privatae litterae nullae proferuntur : publicae retentae sunt in accusatorum potestate : summa est in testibus : hi vivunt cum inimicis ; adsunt cum adversariis ; habitant cum accusatoribus. Utrum hic tandem disceptionem & cognitionem veritatis , an innocentiae labem aliquam , aut ruinam fore putatis ? Multa enim sunt ejusmodi , Judices , ut etiam si in homine ipso , de quo agitur , negligenda sint , tamen in conditione atque in exemplo pertimescenda videantur.

XI. Si quem infimo loco natum , nullo splendore vitae , nullâ commendatione famae defenderem ; tamen civem a civibus communis humanitatis jure ac misericordiâ deprecarer , ne ignotis testibus , ne incitatis , ne accusatoris confessoribus , convivis , contubernalibus ; ne hominibus , levitate Græcis , crudelitate barbaris , civem ac supplicem vestrum dederetis ; ne periculosam imitationem exempli reliquis in posterum proderetis.

25. Sed , quum L. Flacci res agatur , cujus ex familia qui primus consul factus est , primus in hac civitate consul fuit , cujus virtute regibus exterminatis , libertas in republica constituta est ; quæ usque ad hoc tempus honoribus , imperiis , rerum gestarum gloriâ , continuata perman-

sit: quumque ab hac perenni contestataque virtute majorum non modò non degenerarit L. Flaccus, sed, id quod maximè florere in generis sui gloria viderat, laudem patriæ in libertatem vindicandæ prætor adamarit: in hoc ego reo ne quod perniciosum exemplum prodatur, pertimescam, in quo, etiam si quid errasset, omnes boni connivendum esse arbitrarentur?

26. Quod quidem ego non modò non postulo, sed contrà, Judices, vos oro & obtestor, ut totam causam quàm maximè intentis oculis, ut aiunt, acerrimè contemplemini: nihil religione testatum, nihil veritate fundatum, nihil dolore expressum; contràque omnia corrupta libidine, iracundiâ, studio, pretio, perjurio reperientur.

XII. Etenim jam universâ istorum cognitâ cupiditate, accedam ad singulas querelas, criminationesque Græcorum. Classis nomine pecuniam civitatibus imperatam queruntur: quod nos factum, Judices, confitemur. Sed, si hoc crimen est, aut in eo est, quòd non licuerit imperare; aut in eo, quòd non opus fuerit navibus; aut in eo, quòd nulla, hoc prætor, classis navigarit. Licuisse ut intelligas, cognosce, quid, me consule, senatus decreverit, quum quidem nihil a supe-

fioribus continuorum annorum decretis decesserit. SENATUSCONSULTUM. Proximum est ergo, ut opus fuerit classe, necne, quæramus. Utrum igitur hoc Græci statuent, aut ullæ exteræ nationes, an vestri prætores, vestri duces, vestri imperatores? Equidem existimo, in ejusmodi regione, atque provincia, quæ mari cincta, portibus distincta, insulis circumdata esset, non solum præsidii, sed etiam ornandi imperii causâ, navigandum fuisse.

28. Hæc enim ratio, ac magnitudo animorum in majoribus nostris fuit, ut quum in privatis rebus, suisque sumptibus, minimo contenti, tenuissimo cultu viverent; in imperio, atque in publica dignitate omnia ad gloriam, splendoremque revocarent. Quæritur enim in re domestica, continentiae laus; in publica, dignitatis.

29. Quodd si etiam præsidii causâ classem habuit, quis erit tam iniquus, qui reprehendat? Nulli erant prædones: quid? nullos fore, quis præstare poterat? Minuis, inquit, gloriam Pompeii: immo tu auges molestiam. Ille enim classes prædonum, urbes, portus, receptacula sustulit: pacem maritimam summâ virtute, atque incredibili celeritate confecit: illud verò neque suscepit, neque suscipere debuit, ut, si qua uspiam navicula prædonum apparuisset, accusandus videretur.



Itaque ipse in Asia, quum omnia jam bella terrâ marique confecisset, classem tamen iisdem istis civitatibus imperavit. Quod si tum statuit opus esse, quum ipsius præsentis nomine tuta omnia & pacata esse poterant; quid, quum ille decessisset, Flacco existimatis statuendum, & faciendum fuisse?

XIII. Quid nos hîc? nonne ipso Pompeio auctore, Silano, & Murenâ consulibus, decrevimus, ut classis in Italia navigaret? nonne eo ipso tempore, quum L. Flaccus in Asia remiges imperabat, nos hîc in mare superum, & inferum sestertium ter & quadragies erogabamus? Quid postremo anno? nonne M'. Curio & P. Sextilio quæstoribus, pecunia in classem est erogata? Quid? hoc omni tempore equites in ora maritima non fuerunt? Illa est enim gloria divini Pompeii; primùm prædones eos, qui tum, quum illi bellum maritimum gerendum datum est, toto mari dispersi vagabantur; reductos esse omnes in potestatem; deinde Syriam esse nostram, Ciliciam teneri, Cyprum per Ptolemæum regem nihil audere; præterea Cretam Metelli virtute esse nostram: nihil esse, unde profiscantur, nihil quò revertantur: omnes sinus, promontoria, littora, insulas, urbes maritimas, claustris imperii nostri contineri.

31. Quòd si Flacco prætorè , nemo in mari prædo fuisset , tamen hujus diligentia reprehendenda non esset : idcirco enim , quòd hic classèm habuisset , existimarem non fuisse. Quid si L. Oppii , L. Agrii , C. Cestii , equitum Romanorum , hujus etiam clarissimi viri , Cn. Domitii , qui in Asia tum legatus fuit , testimonio doceo , eo ipso tempore , quo tu ipse negas classèm habendam fuisse , complures a prædonibus esse captos ; tamen Flacci consiliùm in remigibus imperandis reprehendetur ? Quid si etiam occisus est a piratis Adramytenus , homo nobilis , cujus est ferè nobis omnibus nomen auditum , Atinas pugil , Olympionices ? hoc est apud Græcos ( quoniam de eorum gravitate dicimus ) propè majus & gloriosius , quàm Romæ triumphasse. At neminem cepisti. Quàm multi oræ maritimæ clarissimi viri præfuerunt , qui quum prædonem nullum cepissent , mare tamen tutum præstiterunt ? casus est enim in capièdo , locus , eventus , occasio : defendendi facilis est cautio , non solùm latibulis occultorum locorum , sed etiam tempestatum moderatione , & conversione.

XIV. Reliquum est , ut quæratùr , utrùm ista classis , cursu & remis , an sumptu tantùm & litteris navigarit. Num id igitur negari potest , cujus rei cuncta

testis est Asia, bipartitò classem distributam fuisse, ut una pars supra Ephesum, altera infra Ephesum navigaret? hac classe M. Crassus, vir amplissimus, ab Æno in Asiam, his navibus Flaccus ex Asia in Macedoniam navigavit. In quo igitur prætoris est diligentia requirenda? in numero navium, & in descriptione æquabili sumptus? dimidium ejus, quo Pompeius erat usus, imperavit: num potuit parcius? descripsit autem pecuniam ad Pompeii rationem, quæ fuit accommodata L. Sullæ descriptioni; qui quum omnes Asiæ civitates pro portione in provincias descripsisset, illam rationem in imperando sumptu & Pompeius & Flaccus secutus est: neque est adhuc tamen ea summa completa.

33. Non refert verb. Quid lucretur? quum enim onus imperatæ pecuniæ suscipit; id, quod tu crimen esse vis, confitetur. Qui igitur probari potest, in ea pecunia non referenda, crimen sibi ipsum facere, in qua crimen esset nullum, si referret? At enim negas fratrem meum, qui L. Flacco successerit, pecuniam ullam in remiges imperasse. Equidem Quinti fratris mei laude delector: sed aliis magis, gravioribus atque majoribus: aliud quiddam statuit, aliud vidit: existimavit, quocumque tempore auditum quid esset

de prædonibus , quàm vellet subito , se classem comparaturum : denique hoc primus frater meus in Asia fecit , ut hoc sumptu remigum civitates levaret : crimen autem tum videri solet , quum aliquis sumptus instituit eos , qui antea non erant instituti , non quum successor aliquid immutat de institutis priorum. Flaccus , quid alii postea facturi essent , scire non poterat : quid fecissent , videbat.

XV. Sed , quoniam de communi totius Asiæ crimine dictum est , aggrediar jam ad singulas civitates ; ex quibus sit sanè nobis prima civitas Acmonensis. Citat præco voce maximâ legatos Acmonenses : prodeant. Procedit unus Asclepiades. Etiamne præconem mentiri coëgisti ? est enim , credo , is vir , iste , ut civitatis nomen suâ auctoritate sustineat ; damnatus turpissimis judiciis domi , notatus litteris publicis ; cujus de probris , adulteriis , ac stupris exstant Acmonensium litteræ ; quas ego non solum propter longitudinem , sed etiam propter turpissimam obscœnitatem verborum prætereundas puto. Dixit publicè data drachmarum CCVI millia : dixit tantum : nihil ostendit , nihil protulit : sed adjunxit id , quod certè , quoniam erat domesticum , docere debuit ; se privatim drachmarum CCVI millia dedisse. Quantum sibi ablatum homo impudentissimus dicit , tantum nunquam est ausus , ut haberet , optare.

35. Ab Aulo Sextilio dicit se dedisse ; & a suis fratribus. Potuit dare Sextilius : nam fratres quidem consortes sunt mendicitatis. Audiamus igitur Sextilium : fratres denique ipsi prodeant : quàm volent, impudenter mentiantur ; & , quod numquam habuerint , dedisse se dicant : tamen aliquid fortasse coràm producti dicent , in quo reprehendantur. Non deduxi , inquit , Sextilium. Cedo tabulas : non deportavi. Fratres saltem exhibe : non denuntiavi. Quod ergo unus Asclepiades , fortunâ egens , vitâ turpis , existimatione damnatus , impudentiâ atque audaciâ fretus , sine tabulis , sine auctore legerit , id nos , quasi crimen , aut testimonium pertimescamus ?

36. Idem laudationem , quam nos ab Acmonensibus Flacco datam proferebamus , falsam esse dicebat : cujus quidem laudationis jactura exoptanda nobis fuit : nam ut signum publicum inspexit præclarus iste auctor suæ civitatis , solere suos cives , ceterosque Græcos ex tempore , quod opus sit , obsignare dixit. Tu verò tibi habeto istam laudationem ; nec enim Acmonensium testimonio Flacci vita & dignitas nititur : das enim mihi , quod hæc causa maximè postulat , nullam gravitatem , nullam constantiam , nullum firmum in Græcis hominibus consilium , nullam

denique esse testimonii fidem : nisi verò hætenus ista formula testimonii , atque orationis tuæ , describi ac distingui potest , ut Flacco absenti aliquid civitates tribuisse dicantur ; Lælio præfenti , per se agenti , vi legis , jure accusationis , opibus præterea suis terrenti ac minanti , nihil temporis causâ scripsisse , aut obsignasse videantur.

XVI. Equidem in minimis rebus sæpe res magnas vidi , Judices , deprehendi , ac teneri , ut in hoc Asclepiade. Hæc , quæ est a nobis prolata laudatio , obsignata erat cretâ illâ Asiaticâ , quæ ferè est omnibus nota nobis ; quâ utuntur omnes non modò in publicis , sed etiam in privatis litteris , quas quotidie videmus mitti a publicanis , sæpe unicuique nostrum : neque enim testis ipse signo inspecto falsum nos proferre dixit , sed levitatem totius Asiæ protulit ; de qua nos & libenter , & facilè concedimus. Nostra igitur laudatio , quam ille temporis causâ nobis datam dicit , datam quidem confitetur , consignata cretâ est : in illo autem testimonio , quod accusatori dicitur datum , ceram esse vidimus.

38. Hic ego , Judices , si vos Acmonensium decretis , si ceterorum Phrygum litteris permoveri putarem , vociferarer , & , quàm maximè possem , contenderem : testarar publicanos , excitarem negotiatores , vestram etiam conscientiam implorarem :

cerâ deprehensâ , considerem totius testimonii fictam audaciam manifestò comprehensam atque oppressam teneri. Nunc verò non insultabo vehementiùs , nec volitabo in hoc insolentiùs , neque in istum nugatorem , tamquam in aliquem testem , invehar , neque in toto Acmonensium testimonio , sive hîc confictum est , ut apparet ; sive missum domo est , ut dicitur , commovebor : etenim , quibus ego istam laudationem remittam , quoniam sunt ( ut Asclepiades dicit ) leves , horum testimonium non pertimescam.

XVII. Venio nunc ad Dorylensium testimonium ; qui producti , tabulas se publicas ad speluncas perdidisse dixerunt. O pastores nescio quos , cupidos litterarum ! si quidem nihil istis , præter litteras , abstulerunt. Sed aliud esse causæ suspicamur , ne fortè isti parum versuti esse videantur. Pœna est , ut opinor , Dorylæi gravior , quàm apud alios , falsarum & corruptarum litterarum : si veras protulissent , criminis nihil erat ; si falsas , erat pœna : bellissimum putarunt , dicere amissas.

40. Quiescant igitur , & me hoc in lucro ponere , atque aliud agere patiantur. Non sinunt : supplet enim ille nescio quis , & privatim dicit se dedisse. Hoc verò ferri nullo modo potest. Qui de tabulis publicis recitat , iis , quæ in accusatoris potesta-

te fuerunt , non debet habere auctoritatem ; sed tamen iudicium fieri videtur , quum tabulæ illæ ipsæ , cujusquemodi sunt , proferuntur : quum verò is , quem nemo vestrûm vidit unquam ; nemo , qui mortalis esset , audivit ; tantum dicit , *Dedi* : dubitatis , Iudices , quin ab hoc ignotissimo Phryge nobilissimum civem vindicetis ? Atque huic eidem nuper tres equites Romani honesti & graves , quum in causa liberali eum , qui asserebatur , cognatum suum esse diceret , non crediderunt. Quî hoc evenit , ut , qui locuples testis doloris & sanguinis sui non fuerit , idem sit gravis auctor injuriæ publicæ ?

41. Atque hic Dorylensis nuper quum efferretur magnâ frequentîâ , confessuque vestro , mortis illius invidiam in L. Flaccum Lælius conferebat. Facis injustè , Læli , si putas periculo nostro vivere tuos contubernales ; præsertim quod tuâ negligentîâ factum arbitremur : homini enim Phrygi , qui arborem fici numquam vidisset , fîscinam ficorum objecisti : cujus mors te ex aliqua parte relevavit : edacem enim hospitem amisisti : Flacco verò quid profuit , qui valuit tamdiu , dum huc prodiret ? mortuus est , aculeo jam emissio , ac dicto testimonio ? At istud columen actionis tuæ , Mithridates , posteaquam bîduum retentus testis a nobis , effudit , quæ vo-



luit, omnia; reprehensus, convictus, fractusque discessit; ambulat cum lorica: metuit homo doctus & sapiens, ne L. Flaccus nunc scelere se alliget, quum jam testem illum effugere non possit; ut, qui ante dictum testimonium sibi temperarit, quum tamen aliquid assequi posset, is nunc id agat, ut ad falsum avaritiæ testimonium, verum etiam maleficii crimen adjungat. Sed de hoc teste, totoque Mithridatico differuit & subtiliter, & copiosè Q. Hortensius: nos, ut instituimus, ad reliqua pergamus.

XVIII. Caput est omnium Græcorum concitandorum, qui cum accusatoribus sedet, Heraclides ille Temnites, homo ineptus & loquax, sed (ut sibi videtur) ita doctus, ut etiam magistrum aliorum se esse dicat: &, qui ita sit ambitiosus, ut omnes vos, nosque quotidie persalutet. Temni usque ad illam ætatem in senatum venire non potuit: &, qui se artem dicendi traditurum etiam ceteris profiteatur, ipse omnibus turpissimis judiciis convictus est.

43. Pari felicitate unà legatus venit Nicomedes, qui neque in senatum ullâ conditione pervenire potuit, & furti, & pro socio damnatus est. Nam princeps legationis Lysanias, adeptus est ordinem senatorium: sed quum rempublicam nimium amplecteretur, peculatûs damnatus, & bo-

na, & senatorium nomen amisit. Hi tres etiam ærarii nostri tabulas falsas esse voluerunt : nam servos novem se professi sunt habere, quum omnino sine comite venissent. Decreto scribendo primum video affuisse Lyfaniam ; cujus fratris bona, quòd is populo non solvebat, prætor Flacco publicè venierunt : præterea Philippus est, Lyfaniæ gener, & Hermobius, cujus frater Poles item pecuniæ publicæ est condemnatus.

XIX. Dicunt se Flacco, & iis, qui simul essent, drachmarum xv millia dedisse. Cum civitate mihi res est acerrimâ, & conficiendarum litterarum diligentissimâ ; in qua nummus commoveri nullus potest sine quinque prætoribus, tribus quæstoribus, quatuor mensariis, qui apud illos a populo creantur. Ex hoc tanto numero deductus est nemo ; &, quum illam pecuniam nominatim Flacco datam referant ; majorem etiam aliquam quum huic iidem darent, in ædem sacram reficiendam, se perscripsisse dicunt ; quod minimè convenit : nam aut omnia occultè referenda fuerunt, aut apertè omnia : quum perscribunt nominatim Flacco ; nihil timent, nihil verentur : quum operi publico referunt ; iidem homines subitò eundem, quem contempserant, pertimescunt. Si prætor dedit, ut est scriptum, a quæstore numeravit ;

quæstor a mensa publica ; mensa aut ex vestigali , aut ex tributo. Numquam erit istud simile criminis , nisi mihi totam rationem omni & personarum genere , & litterarum explicaris ; vel , quod est in eodem decreto scriptum , homines clarissimos civitatis , amplissimis usos honoribus , hoc prætor circumventos. Cur hi neque in judicio adsunt , neque in decreto nominantur ? non enim credo significari isto loco illum , qui se erigit , Heraclidem.

45. Utrum enim in clarissimis est civibus is , quem judicatum hic duxit Hermippus ? qui hanc ipsam legationem , quam habet , non accepit a suis civibus , sed usque Tmolo petivit : cui nullus honos in sua civitate habitus est umquam : res autem ea , quæ tenuissimis committebatur , huic uni in vita commissa sola est : custos , T. Aufidio prætor , frumento publico est positus : pro quo quum a P. Varino prætor pecuniam accepisset , celavit suos claves , ultroque iis sumptum intulit. Quod posteaquam Temni , litteris a P. Varino missis , cognitum atque patefactum est ; quumque eadem de re Cn. Lentulus , qui censor fuit , Temnitarum patronus , litteras misisset ; Heraclidem istum Temni nemo postea vidit. Atque , ut ejus impudentiam perspicere possitis , causam ipsam , quæ levissimi hominis animum in Flaccum incitavit , quæso , cognoscite.

XX. Fundum Cymæum Romæ mercatus est de pupillo Meculonio. Quum verbis se locupletem faceret, haberet nihil præter illam impudentiam, quam videtis, pecuniam sumpsit mutuam a Sex. Stola, iudice hoc nostro, primario viro, qui & rem agnoscit, neque hominem ignorat; qui tamen credidit P. Fulvii Veratii, lectissimi hominis, fide: ei quum solveret, sumpsit a C. & M. Fufiis, equitibus Romanis, primariis viris. Hic hercule, cornici oculum, ut dicitur: nam hunc Hermippum, hominem eruditum, civem suum, cui debebat esse notissimus, percussit; ejus enim fide sumpsit a Fufiis. Securus Hermippus Temnum proficiscitur, quum iste sese pecuniam, quam hujus fide sumpserat, a discipulis suis diceret Fufiis persoluturum: habebat enim Rhetor iste adolescentes quosdam locupletes, quos dimidio redderet stultiores, quàm acceperat, ubi nihil possent discere, nisi ignorantiam litterarum.

47. Neminem quidem adeo infatuare potuit, ut ei nummum ullum crederet. Itaque, quum Româ clam esset profectus, multosque minutis mutationibus fraudavisset; in Asiam venit, Hermippoque percunctanti de nomine Fufiano respondet, se omnem pecuniam Fufiis persolvisse. Interim, neque ita longo intervallo, libertus

tus a Fufiis cum litteris ad Hermippum venit : pecunia petitur ab Hermippo : Hermippus ab Heraclide petit : ipse tamen Fufiis fatisfacit abfentibus , & fidem fuam liberat. Hunc æftuantem & tergiverfantem iudicio ille perfequitur : a recuperatoribus caufa cognofcitur.

48. Nolite exiftimare , Iudices , non unam & eandem omnibus in locis efle fraudatorum , & infitiatorum impudentiam : fecit eadem omnia , quæ noſtri debitores folent : negavit ſefe omnino verſuram ullam feciſſe Romæ : Fufiorum ſe affirmavit numquam omnino nomen au-diſſe : Hermippum verò ipſum , pudentiſſimum atque optimum virum , veterem amicum atque hoſpitem meum , ſplendidiſſimum atque ornatiffimum civitatis ſuæ , probris omnibus , maledictiſque vexavit. Sed , quum ſe homo volubilis quadam præcipiti celeritate dicendi in illa oratione jactaret , repentè , testimoniis Fufiorum , nominibusque recitatis , homo audaciſſimus pertimuit , loquaciſſimus obmutuit. Itaque recuperatores contra iſtum rem minimè dubiam primâ actione iudicaverunt : quum iudicatum non faceret , addictus Hermippo , & ab hoc ductus eſt.

XXI. Habetis & honeſtatem hominis , & auctoritatem testimoni , & cauſam omnem ſimultatis. Atque iſ ab Hermippo miſ-

sus, quum ei pauca mancipia vendidisset; Romam se contulit: deinde in Asiam rediit, quum jam frater meus Flacco successisset: ad quem adiit, causamque ita detulit; recuperatores, vi Flacci coactos, & metu, falsum invitos judicavisse. Frater meus, pro sua æquitate, prudentiaque decrevit, ut, si judicatum negaret, in duplum iret: si metu coactos diceret, haberet eosdem recuperatores. Recusavit: &, quasi nihil esset actum, nihil judicatum, ab Hermippo ibidem mancipia, quæ ipse ei vendiderat, petere cœpit. M. Grætidius, legatus, ad quem est aditum, actionem se daturum negavit: re judicatâ stari ostendit placere.

50. Iterum iste, cui nullus esset usquam consistendi locus, Romam se retulit: persequitur Hermippus, qui numquam istius impudentiæ cessit: petit Heraclides a C. Plotio senatore, viro primario, qui legatus in Asia fuerat, mancipia quædam, quæ se, quum judicatum esset, per vim vendidisse dicebat. Q. Naso, vir ornatissimus, qui prætor fuerat, iudex sumitur: qui quum sententiam secundum Plotium se dicturum ostenderet, ab eo iudice abiit; & quoddam iudicium lege non erat, causam totam reliquit. Satisne vobis, Iudices, videor ad singulos testes accedere, neque, ut primò constitueram, tantummodo cum universo genere confligere?

51. Venio ad Lyfaniā ejusdem civitatis, peculiarem tuam, Deciane, testem; quem tu quum ephebum Temni cognosces, quoniam te nudus delectarat, semper nudum esse voluisti: abduxisti Temno Apollonidem: pecuniam adolescentulo grandi fœnore, fiduciā tamen acceptā, occupavisti: hanc fiduciam commissam tibi dicis: tenes hodie, ac possides. Eum tu testem spe recuperandi fundi paterni venire ad testimonium dicendum coëgisti, qui quoniam testimonium nondum dixit, quidnam sit dicturus, exspecto. Novi genus hominum, novi consuetudinem, novā libidinem. Itaque, etsi teneo, quid sit dicere paratus, nihil tamen contrā disputabo prius, quā dixerit: totum enim convertet, atque alia finget. Quamobrem & ille servet, quod paravit; & ego me ad id, quod attulerit, integrum conservabo.

XXII. Venio nunc ad eam civitatem, in quam ego multa & magna studia, & officia contuli; & quam meus frater in primis colit, atque diligit: quæ si civitas per viros bonos, gravesque homines, querelas ad vos detulisset, paulò commoverer magis: nunc verò quid putem? Trallianos Mæandrio causam commisisse, homini egenti, sordido, sine honore, sine existimatione, sine censu? Ubi erant illi, Pythodori, Ætideni, Lepisones, ceteri ho-

mines apud nos noti, inter suos nobiles? ubi illa magnifica & gloriosa ostentatio civitatis? nonne esset puditum, si hanc causam agerent severè, non modò legatum, sed Trallianum omnino dici Mæandrium? huic tali legato, huic publico testi patronum suum jam inde a patre atque maioribus, L. Flaccum mactandum civitatis testimonio tradidissent?

53. Non est ita, Judices, non est profectò: vidi ego in quodam judicio nuper Philodorum testem Trallianum, vidi Parrhasium, vidi Archidemum, quum quidem idem hic mihi Mæandrius, quasi ministrator, aderat, subjiciens, quid in suos cives, civitatemque, si vellem, dicerem; nihil enim illo homine levius, nihil egentius, inquinatius. Quare si hunc habent auctorem Tralliani, doloris sui, si hunc custodem litterarum, si hunc testem injuriæ, si hunc auctorem querelarum, remittant spiritus, comprimant animos suos, sedent arrogantiam, fateantur in Mæandrii persona esse expressam faciem civitatis: sin istum semper illi ipsi domi proteendum esse & conculcandum putaverunt; desinant putare auctoritatem esse in eo testimonio, cujus auctor inventus est nemo.

XXIII. Sed exponam, quid in re sit, ut quamobrem ista civitas, neque severè Flaccum oppugnarit, neque benignè de-



fenderit, scire possitis. Erat ei Castricia-  
no nomine irata; de quo toto respondi  
Hortensius: invita solverat Castricio pe-  
cuniam; jamdiu debitam: hinc totum  
odium, hinc omnis offensio. Quò quum  
venisset Lælius ad iratos, & illud Castrici-  
anum vulnus dicendo refricuisset; exsi-  
luerunt principes, neque in illa concione  
adfuerunt, neque ipsius decreti ac testi-  
monii auctores esse voluerunt: usque eò  
orba fuit ab optimatibus illa concio, ut  
princeps principum esset Mæandrius; cu-  
jus linguâ, quasi flabello seditionis, illa  
tum est egentium concio ventilata.

55. Itaque civitatis pudentis, ut ego  
semper existimavi, & gravis, ut ipsi exis-  
timari volunt, justum dolorem querelas-  
que cognoscite. Quæ pecunia fuerit apud  
se, Flacci patris nomine, collata a civita-  
tibus, hanc a se esse ablatam queruntur.  
Alio loco quæram, quid licuerit Flacco:  
nunc tantum a Trallianis requiro, quam  
pecuniam a se ablatam queruntur, suamne  
dicant, sibi a civitatibus collatam in usum  
suum: cupio audire. Non, inquit, dici-  
mus. Quid igitur? delatam ad nos, cre-  
ditam nobis, L. Flacci patris nomine, ad  
hujus dies festos atque ludos. Quid tum?  
Hanc te, inquit, capere non licuit.

56. Jam id videro: sed primum illud te-  
nebo: queritur gravis, locuples, ornata

civitas, quòd non retinet alienum : spoliata se dicit, quòd id non habet, quod ejus non fuit : quid hòc impudentius dici, aut fingi potest ? Delectum est oppidum, quo in oppido uno pecunia a tota Asia ad honores L. Flacci poneretur : hæc pecunia tota ab honoribus translata est in quæstum & fœnerationem : recuperata est multis pòst annis.

XXIV. Quæ civitati facta est injuria ? At molestè fert civitas : credo : avulsum est enim præter spem, quod erat spe devoratum lucrum. At queritur : impudenter facit : non enim omnia, quæ dolemus, eadem jure queri possumus. At accusat verbis gravissimis : non civitas, sed imperiti homines, a Mæandrio concitati. Quo loco etiam atque etiam facite, ut recorderini, quæ sit temeritas multitudinis, quæ levitas propria Græcorum, quid in concione seditiosa valeat oratio. Hic, in hac gravissima & moderatissima civitate, quum est forum plenum judiciorum, plenum magistratuum, plenum optimorum virorum & civium, quum speculatur atque obsidet rostra vindex temeritatis, & moderatrix officii, curia : tamen quantos fluctus excitari concionum videtis ? Quid vos fieri censetis Trallibus ? an id, quod Pergami ? nisi fortè hæ civitates existimari volunt, faciliùs unâ se epistolâ Mithrida-

tis moveri impellique potuisse, ut amicitiam populi Romani, fidem suam, jura omnia officii humanitatisque violarent, quàm ut filium testimonio læderent, cujus patrem armis pellendum suis mœnibus censuissent.

§8. Quare nolite mihi ista nomina civitatum nobilium opponere: quos enim hostes hæc familia contempsit, numquam eosdem testes pertimescet. Vobis autem est confitendum, si consiliis principum vestrae civitates reguntur; non multitudinis temeritate, sed optimatum consilio bellum ab istis civitatibus cum populo Romano esse susceptum: sin ille tum motus est temeritate imperitorum excitatus; patimini me delicta vulgi a publica causa separare.

XXV. At enim istam pecuniam huic capere non licuit. Utrùm vultis patri Flacci licuisse, necne? si licuit, sicuti certè licuit, ad ejus honores collatam, ex quibus ipse nihil capiebat; patris pecuniam rectè abstulit filius: si non licuit; tamen illo mortuo, non modò filius, sed quivis heres rectissimè potuit auferre. Ac tum quidem Tralliani, quum ipsi gravi sœnore istam pecuniam multos annos occupavissent, a Flacco tamen omnia, quæ voluerunt, impetraverunt; neque tam fuerunt impudentes, ut id, quod Lælius dixit, di-

cere auderent , hanc ab se pecuniam abstulisse Mithridatem. Quis enim erat , qui non sciret , in ornandis studiosiorem Mithridatem , quàm in spoliandis Trallianis fuisse ?

60. Quæ quidem a me si , ut dicenda sunt , dicerentur , gravius agerem , Iudices , quàm adhuc egi , quantam Asiaticis testibus fidem habere vos conveniret : revocarem animos vestros ad Mithridatici belli memoriam , ad illam universorum civium Romanorum per tot urbes , uno puncto temporis , miseram crudelemque cædem : prætores nostros deditos , legatos in vincula coniectos , nominis propè Romani memoriam cum vestigio imperii non modò ex ædibus Græcorum , verùm etiam ex litteris esse deletam. Mithridatem Deum , illum Patrem , illum Conservatorem Asiæ , illum Evium , Dionysum , Bacchum , Liberum nominabant.

61. Unum atque idem erat tempus , quum L. Flaccò consuli portas tota Asia claudebat ; Cappadocem autem illum non modò recipiebat suis urbibus , verùm etiam ultro vocabat. Liceat hæc nobis , si oblivisci non possumus , at tacere : liceat mihi potius de levitate Græcorum queri , quàm de crudelitate. Auctoritatem isti habeant apud eos , quos esse omnino noluerunt ? nam , quoscumque potuerunt , togatos ,

interemerunt : nomen civium Romanorum , quantum in ipsis fuit , sustulerunt.

XXVI. In hac igitur urbe se jactent , quam oderunt ? apud eos , quos inviti vident ? in ea republica , ad quam opprimendam non animus eis , sed vires defuerunt ? Adspiciant hunc florem legatorum , laudatorumque Flacci , ex vera atque integra Græcia : tum se ipsi expendant , tum cum his se comparent : tum , si audebunt , dignitati horum componant suam.

62. Adsunt Athenienses , unde humanitas , doctrina , religio , fruges , jura , leges ortæ , atque in omnes terras distributæ putantur : de quorum urbis possessione , propter pulchritudinem etiam inter deos certamen fuisse proditum est : quæ vetustate eâ est , ut ipsa ex sese suos cives genuisse dicatur ; & eorum eadem terra parens ,ATRIX , patria , dicatur : auctoritate autem tantâ est , ut jam fractum propè ac debilitatum Græciæ nomen hujus urbis laude nitatur.

63. Adsunt Lacedæmonii ; cujus civitatis spectata ac nobilitata virtus , non solum naturâ corroborata , verum etiam disciplinâ putatur : qui soli toto orbe terrarum septingentos jam annos amplius unis moribus , & numquam mutatis legibus vivunt. Adsunt ex Achaia cuncta multi legati ,

Bæotia, Thessalia; quibus locis nuper legatus L. Flaccus, imperatore Metello, præfuit. Neque verò te, Massilia, prætereo, quæ L. Flaccum militem quæstoremque cognosti: cujus ego civitatis disciplinam atque gravitatem non solum Græciæ, sed haud scio an cunctis gentibus anteponendam dicam: quæ tam procul a Græcorum omnium regionibus, disciplinis, linguaque divisa, quum in ultimis terris cincta Gallorum gentibus, barbariæ fluctibus alluatur, sic optimatum consilio gubernatur, ut omnes ejus instituta laudare facilius possint, quàm æmulari. Hisce utitur laudatoribus Flaccus, his innocentiae testibus, ut Græcorum cupiditati Græcorum auxilio resistamus.

XXVII. Quamquam quis ignorat, qui modò umquam mediocriter res istas scire curavit, quin tria Græcorum genera sint verè? quorum uni sunt Athenienses, quæ gens Ionum habebatur: Æoles alteri: Diores tertii nominabantur. Atque hæc cuncta Græcia, quæ famâ, quæ gloriâ, quæ doctrinâ, quæ plurimis artibus, quæ etiam imperio, & bellicâ laude floruit, parvum quemdam locum, ut scitis, Europæ tenet, semperque tenuit: Asiæ maritimam oram, bello superatam, cinxit urbibus, non ut munitam coloniis illa augeret, sed ut obsessam teneret.

65. Quamobrem quæso a vobis, Asiatici testes, ut, quum verè recordari voletis, quantum auctoritatis in iudicium afferatis, vosmetipsi describatis Asiam; nec, quid alienigenæ de vobis loqui soleant; sed quid vosmetipsi de genere vestro statuatis, memineritis. Namque, ut opinor, Asia vestra constat ex Phrygia, Mysia, Caria, Lydia. Utrùm igitur nostrum est, an vestrum, hoc proverbium, *Phrygem plagis fieri solere meliorem*? Quid de tota Caria? nonne hoc vestrâ voce vulgatum est, si quid *cum periculo* experiri velis, *in Care* id potissimum esse faciendum? Quid porrò in Græco sermone tam tritum atque celebratum est, quàm, si quis despicatui ducitur, ut *Myssorum ultimus* esse dicatur? Nam quid ego dicam de Lydia? quis umquam Græcus comoediam scripsit, in qua servus primarum partium non Lydus esset? Quamobrem quæ vobis fit injuria, si statuimus vestro nobis iudicio standum esse de vobis?

66. Equidem mihi jam satis superque dixisse videor de Asiatico genere testium: sed tamen vestrum est, Iudices, omnia, quæ dici possunt in hominum levitatem, inconstantiam, cupiditatem, etiamsi a me minùs dicuntur, vestris animis & cogitatione comprehendere.

XXVIII. Sequitur auri illa invidia Ju-

daici. Hoc nimirum est illud, quòd non longè a gradibus Aureliis hæc causa dicitur : ob hoc crimen hic locus abs te, Læli, atque illa turba quæsita est : scis quanta sit manus, quanta concordia, quantum valeat in concionibus : summissâ voce agam, tantum ut iudices audiant : neque enim desunt, qui istos in me, atque in optimum quemque incitent : quos ego, quò id facilius faciant, non adjuvabo.

67. Quum aurum, Judæorum nomine, quotannis ex Italia, & ex omnibus vestris provinciis Hierosolymam exportari soleret, Flaccus sanxit edicto, ne ex Asia exportari liceret. Quis est, Iudices, qui hoc verè non laudare possit ? Exportari aurum non oportere, quum sæpe antea senatus, tum me consule, gravissimè iudicavit. Huic autem barbaræ superstitioni resistere, severitatis : multitudinem Judæorum, flagrantem nonnumquam in concionibus, pro republica contemnere, gravitatis summæ fuit.

68. At Cn. Pompeius, captis Hierosolymis, victor ex illo fano nihil attigit. In primis hoc, ut multa alia, sapienter, quòd in tam suspiciosa ac maledica civitate locum sermoni obtrektorum non reliquit : non enim credo religionem & Judæorum, & hostium, impedimento præstantissimo imperatori, sed pudorem, fuisse. Ubi er-



go crimen est? quoniam quidem furtum nusquam reprehendis, edictum probas, judicatum fateris, quæsitum & prolatum palam non negas, actum esse per viros primarios res ipsa declarat. Apameæ manifestò comprehensum, ante pedes prætoris in foro expensum est auri pondo centum paulò minùs per Sæx. Cæsium, equitem Romanum, castissimum hominem atque integerrimum: Laodiceæ viginti pondo paulò ampliùs per hunc ipsum L. Peducæum, judicem nostrum: Adramyttii per Cn. Domitium, legatum: Pergami non multùm.

69. Auri ratio constat: aurum in ærario est: furtum non reprehenditur: invidia quæritur: a iudicibus oratio avertitur: vox in coronam turbamque effunditur. Sua cuique civitati religio, Læli, est; nostra nobis. Stantibus Hierosolymis, pacatisque Judæis, tamen istorum religio sacrorum a splendore hujus imperii, gravitate nominis nostri, majorum institutis, abhorrebat: nunc verò hòc magis, quòd illa gens, quid de imperio nostro sentiret, ostendit armis: quàm cara diis immortalibus esset, docuit, quòd est victa, quòd elocata, quòd servata.

XXIX. Quamobrem, quoniam, quod crimen esse voluisti, id totum vides in laudem esse conversum, veniamus jam ad

civium Romanorum querelas : ex quibus sit sanè prima Deciani. Quid tibi tandem, Deciane, injuriæ factum est ? negotiarius in libera civitate : primùm patere me esse curiosum : quousque negotiaberere ? præsertim quum sis isto loco natus. Annos jam triginta in foro versaris ; sed tamen in Pergameno : longo intervallo , si quando tibi peregrinari commodum est , Romam venis : affers faciem novam , nomen vetus , purpuram Tyriam : in qua tibi invidéo , quòd unis vestimentis tamdiu lautus es.

71. Verùm esto : negotiari libet : cur non Pergami ? Smyrnæ ? Trallibus ? ubi & multi cives Romani sunt , & jus a nostro magistratu dicitur ? Otium te delectat : lites , turba , prætor , odio est : Græcorum libertate gaudes : cur ergo unus tu Apollonidenfes amantissimos populi Romani , fidelissimosque socios , miseriore habes , quàm aut Mithridates , aut etiam pater tuus habuerit umquam ? cur his per te frui libertate suâ , cur denique esse liberis non licet ? homines sunt tota ex Asia frugalissimi , sanctissimi , a Græcorum luxuria & levitate remotissimi , patresfamiliâs suo contenti , aratores , rusticani : agros habent & naturâ perbonos , & diligentia , culturâque meliores : in hisce agris tu prædia habere voluisti : omnino

mallem ( & magis erat tuum , si te crassi agri delectabant ) hîc alicubi in Crustumino , aut in Capenati paravisses. Verum esto : Catonis est dictum , *pedibus compensari pecuniam* : longè omnino a Tiberi ad Caicum ; quo in loco etiam Agamemnon cum exercitu errasset , nisi ducem Telephum invenisset. Sed concedo id quoque : placuit oppidum , regio delectavit : emissas.

XXX. Amyntas est genere , honore , existimatione , pecuniâ , princeps illius civitatis : hujus socrum , mulierem imbecilli consilii , fatis locupletem , pellexit Decianus ad sese ; & , quum illa , quid ageretur , nesciret , in possessione prædiorum ejus familiam suam collocavit : uxorem abduxit ab Amynta prægnantem ; quæ peperit apud Decianum filiam , hodieque apud Decianum est & uxor Amyntæ , & filia.

73. Num quid harum rerum a me fingitur , Deciane ? sciunt hæc omnes nobiles , sciunt boni viri , sciunt denique nostri homines , sciunt mediocres negotiatores. Exsurge , Amynta : repete a Deciano , non pecuniam , non prædia : socrum denique sibi habeat : restituat uxorem : reddat misero patri filiam : nam membra , quæ debilitavit lapidibus , fustibus , ferro ; manus , quas contudit ; digitos , quos

confregit ; nervos , quos concidit , restituere non potest : filiam , filiam , inquam , ærumnoso patri , Deciane , redde.

74. Hæc Flacco non probasse te miraris ? cui , quæso , tandem probasti ? emptiones falsas , prædiorum proscriptiones cum mulierculis , apertâ circumscriptione , fecisti : tutor his rebus Græcorum legibus adscribendus fuit : Polemocratem scripsisti , mercenarium & administrum consiliorum tuorum : adductus est in iudicium Polemocrates de dolo malo , & de fraude , a Dione , hujus ipsius tutelæ nomine. Qui concursus ex oppidis finitimis undique ? qui dolor animorum ? quæ quærela ? Condemnatus est Polemocrates sententiis omnibus : irritæ venditiones : irritæ proscriptiones. Non restituis. Desers ad Pergamenos , ut illi reciperent in suas litteras publicas , præclaras proscriptiones & emptiones tuas : repudiant , rejiciunt. At qui homines ? Pergameni , laudatores tui. Ita enim mihi gloriari visus es laudatione Pergamenorum , quasi honorem majorum tuorum affecutus esses : & hòc te superiorem putabas esse , quàm Lælium , quòd te civitas Pergamena laudaret. Num honestior est civitas Pergamena , quàm Smyrnæ ? At ne ipsi quidem dicunt.

XXXI. Vellem tantum habere otii , ut possem recitare psephisma Smyrnæorum ,

quod fecerunt in Castricium mortuum ; primùm ut in oppidum introferretur ; quod aliis non conceditur : deinde , ut ferrent ephebi : postremò , ut imponeretur aurea corona mortuo. Hæc P. Scipioni , clarissimo viro , quum esset Pergami mortuus , facta non sunt. At Castricium quibus verbis , dii immortales ! *Decus patriæ , ornamentum populi Romani , florem juventutis* appellant. Quare , Deciane , si cupidus es gloriæ , alia ornamenta censeo quæras.

76. Pergameni te deriserunt. Quid ? tu ludi te non intelligebas , quum tibi hæc recitabant , clarissimum virum , præstantissimâ sapientiâ , singulari ingenio : mihi crede , ludebant : quum verò coronam auream litteris imponebant ; re verâ non plus aurum tibi , quàm monedulæ committebant. Ne tum quidem hominum venustatem & facetias perspicere potuisti ? Isti igitur , isti Pergameni proscriptiones , quas tu afferebas , repudiaverunt. P. Orbis , homo & prudens , & innocens , contra te omnia decrevit.

XXXII. In P. Globulum , meum necessarium , fuisti gratiosior. Utinam neque ipsum , neque me pœniteret ! Flaccum in curia \* decrevissent. Veridicas adjungis causas inimicitiarum , quòd patri L. Flacci , ædili curuli , pater tuus , tribunus plebis , diem dixerit. At istud , ne ip-

si quidem patri Flacci valde molestum esse debuit ; præsertim quum ille , cui dies dicta est , prætor postea factus sit , & consul : ille , qui diem dixit , non potuerit privatus in civitate consistere. Sed , si justas inimicitias putabas , cur , quum tribunus militum Flaccus esset , in ejus legione miles fuisti , quum tibi per leges militares effugere liceret iniquitatem tribuni ? Cur autem prætor te , inimicum paternum , in consilium vocavit ? quæ quidem quàm sanctè solita sint observari , scitis omnes.

78. Nunc accusamur ab iis , qui in consilio nobis fuerunt. Decrevit Flaccus. Num aliud , atque oportuit ? In liberos. Num aliter , ac censuit senatus ? In absentem decrevit. Quum ibidem esses , quum prodire nolles : non est hoc in absentem reum. **SENATUSCONSULTUM , & DECRETUM FLACCI.** Quid , si non decrevisset , sed edixisset ? quis posset verè reprehendere ? Num etiam fratris mei litteras , plenissimas humanitatis & æquitatis , reprehensus es ? quas easdem mulieri a me datas apud Pataranos requisivit. Recita litteras Q. Ciceronis. **LITTERÆ Q. CICERONIS.**

79. Quid ? hæc Apollonidenfes , occasione factâ , ad Flaccum detulerunt ? apud Orbium acta non sunt ? ad Globulum delata non sunt ? ad senatum nostrum , me consule , nonne legati Apollonidenfes om-

nia postulata de injuriis unius Deciani detulerunt? At hæc prædia etiam in censu dedicavisti. Mitto, quòd aliena: mitto, quòd possessa per vim: mitto, quòd convicta ab Apollonidensibus: mitto, quòd a Pergamenis repudiata: mitto etiam, quòd a nostris magistratibus in integrum restituta: mitto, quòd nullo jure, neque in re, neque in possessione tua.

So. Illud quæro, sintne ista prædia censui censendo: habeant jus civile: sint, necne sint, Mancipi: subsignari apud ærarium, apud censorem possint: in qua tribu denique ista prædia censuisti? Commisisti, si tempus aliquod gravius accidisset, ut ex iisdem prædiis & Apollonide, & Romæ imperatum esset tributum. Verùm esto: gloriosus fuisti: voluisti magnum agri modum censeri, & ejus agri, qui dividi plebi Romanæ non potest. Censu es præterea numeratæ pecuniæ centum triginta H-S millia. Eam opinor tibi numeratam non esse abs te. Sed hæc omitto. Censu es Mancipia Amyntæ: neque huic ullam in eo fecisti injuriam: possidet enim ea Mancipia Amyntas. Ac primò quidem pertimuit, quum te audisset servos suos esse censum. Retulit ad jurisconsultos. Constabat inter omnes, si aliena censendo, Decianus sua facere posset, cum (maximam habiturum esse familiam. Res-

ponsum est, ejus facta non vidèri. Idem visum est postea Flacco, quum rem cognosceret: itaque decrevit.)

XXXIII. Habetis causam inimicitiarum; quâ causâ inflammatus Decianus, ad Lælium detulerit hanc opimam accusationem. Nam ita questus est Lælius, quum de perfidia Deciani diceret: qui mihi auctor fuit, qui causam ad me detulit, quem ego sum secutus, is a Flacco corruptus est, is me deseruit, ac prodidit. Siccine tu auctor tandem eum, cui tu in consilio fuisses, apud quem omnes gradus dignitatis tuæ retinuisses, prudentissimum hominem, nobilissimâ familiâ natum, optimè de republica meritum, in discrimen omnium fortunarum vocavisti? Scilicet defendam Decianum; qui tibi in suspicionem nullo suo delicto venit.

82. Non est, mihi crede, corruptus. Quid enim fuit, quod ab eo redimeretur? ut duceret judicium? cui sex horas omnino lex dedit. Quantum tandem ex his horis detraheret, si tibi morem gerere voluisset? Nimirum illud est, quod ipse suspicatur. Invidisti ingenio subscriptoris tui; quod ornabat facile locum, quem prehendat, & acutè testes interrogabat, aut circumveniebat: fortasse \* fecisti & tu, & populi sermo, ne exciperes. Idcirco Decianum usque ad coronam applicuisti. Sed,



ut hoc verisimile est, ita haud verisimile, Decianum a Flacco esse corruptum.

83. Ita scitote, Judices, esse cetera: vel quod ait Luceius, L. Flaccum sibi dare cupisse, ut a fide se abduceret, festerium vicies. Et eum tu accusas avaritiæ, quem dicis festerium vicies voluisse perdere? nam quid emebat, quum te emebat? ut ad se transires? quam partem causæ tibi daremus? an, ut enuntiaries consilia Lælii? qui testes ab eo prodirent? Quid? nos non videbamus habitare unâ? quis hoc nescit? tabulas in Lælii potestate fuisse, num dubium est? An, ne vehementer, ne copiosè accusares? Nunc facis suspicionem: ita enim dixisti, ut nescio quid abs te impetratum esse videatur.

XXXIV. At enim Androni Sextilio gravis injuria facta est, & non ferenda: quod, quum esset uxor ejus Valeria intestatò mortua, sic egit eam rem Flaccus, quasi ad ipsum hereditas pertineret. In quo quid reprehendas, scire cupio. Quod falsum intenderit? quî doces? Ingenua, inquit, fuit. O peritum juris hominem! Quid? ab ingenuis mulieribus hereditates lege non veniunt? In manum, inquit, convenerat. Nunc audio: sed quæro, usu, an coëmptione. Usu non potuit: nihil enim potest de tutela legitima sine omnium tutorum auctoritate deminui. Coëmptione?

omnibus ergo auctoribus : in quibus certè Flaccum fuisse non dices.

85. Relinquitur illud , quod vociferari non destitit , non debuisse , quum prætor esset , suum negotium agere , aut mentionem facere hereditatis. Maximas audio tibi , L. Luculle , qui de L. Flacco sententiam laturus es , pro tua eximia liberalitate , maximisque beneficiis in tuos , venisse hereditates , quum Asiam provinciam consulari imperio obtineres : si quis eas , suas esse dixisset , concessisses ? Tu , T. Vecti , si qua tibi in Africa venerit hereditas , usu amittes ? an tuum , nullâ avaritiâ , salvâ dignitate , retinebis ? At istius hereditatis , jam Globulo prætore , Flacci nomine , petita possessio est : non igitur impressio , non occasio , non vis , non tempus , non imperium , non secures ad injuriam faciendam Flacci animum impulerunt.

86. Itaque eodem etiam M. Lurco , vir optimus , meus familiaris , convertit aculeum testimonii sui : negavit , a privato pecuniam in provincia prætorem petere oportere. Cur tandem , M. Lurco , non oportet ? eripere , extorquere , accipere contra leges non oportet : petere non oportere , numquam ostendes , nisi docueris non licere. An legationes sumere liberas , exigendi causâ , sicut & tu ipse nuper , & multi viri boni sæpe fecerunt , rectum est ?

quod ego non reprehendo ; socios video queri : prætorem , si hereditatem in provincia non reliquerit , non solum reprehendendum , verum etiam condemnandum putas ? Doti , inquit , Valeria pecuniam omnem suam dixerat.

XXXV. Nihil istorum explicari potest , nisi ostenderis , illam in tutela Flacci non fuisse. Si fuit , quæcumque sine hoc auctore est dicta dos , nulla est. Sed tamen Lurconem , quamquam pro sua dignitate moderatus est in testimonio dicendo religioni suæ , tamen iratum Flacco esse vidistis : neque enim occultavit causam iracundiæ suæ , neque reticendam putavit : questus est , libertum suum , Flacco prætore , esse damnatum. O conditiones miseras administrandarum provinciarum ! in quibus diligentia plena simultatum est ; negligentia , vituperationum : ubi severitas periculosa est ; liberalitas ingrata : sermo insidiosus ; assentatio perniciofa : frons omnium familiaris ; multorum animus iratus : iracundiæ occultæ ; blanditiæ apertæ : venientes prætores expectant , præsentibus inserviunt , abeuntes deserunt. Sed omitamus querelas , ne nostrum consilium in prætermittendis provinciis laudare videamur.

88. Litteras misit de villico P. Septimij , hominis ornatij , qui villicus cædemp

fecerat. Septimium ardentem iracundiâ videre potuistis. In Lurconis libertum iudicium ex edicto dedit : hostis est Lurco. Quid igitur ? hominum gratiosorum splendorumque libertis fuit Asia tradenda ? an simultates nescio quas cum libertis vestris Flaccus exercet ? an vobis in vestris, vestrorumque causis severitas odio est ; eandem laudatis , quum de nobis iudicatis ?

XXXVI. At iste Andro , spoliatus bonis , ut dicitis , ad dicendum testimonium non venit. Quid , si veniat ? Decisionis arbiter C. Cæcilius fuit ; quo splendore vir ? quâ fide ? quâ religione ? Obsignator C. Sextilius , Lurconis sororis filius ; homo & pudens , & constans , & gravis. Si vis erat , si fraus , si metus , si circumscriptio ; quis pactionem fieri , quis adesse istos coëgit ? Quid , si ista omnis pecunia huic adolescentulo , L. Flacco , reddita est ? si petita ? si redacta ? si per hunc Antiochum , paternum hujus adolescentis libertum , seni illi Flacco probatissimum ? videmur non solum avaritiæ crimen effugere , sed etiam liberalitatis laudem assequi singularem ? communem enim hereditatem quæ æqualiter ad utrumque lege venisset , concessit adolescenti , propinquo suo : nihil ipse attigit de Valerianis bonis : quod statuerat facere , adductus hujus pudore ,

dore, & non amplissimis patrimonii copiis, id non solum fecit; sed etiam prolixè cumulatèque fecit. Ex quo intelligi debet, eum contra leges pecunias non cepisse, qui tam fuerit in hereditate concedenda liberalis.

90. At Falcidianum crimen est ingens: talenta quinquaginta se Flaccò dicit dedisse. Audiamus hominem. Non adest. Quomodo igitur dicit? Epistolam mater ejus profert, & alteram soror: scriptum ad se dicunt esse ab illo, tantam pecuniam Flacco datam. Ergo is, qui si aram tenens juraret, crederet nemo, per epistolam, quod volet, injuratus probabit? At qui vir? quàm non amicus suis civibus? qui patrimonium satis lautum, quod hìc nobiscum conficere potuit, Græcorum conviviiis maluit dissipare.

91. Quid attinuit relinquere hanc urbem? libertate tam præclarâ carere? adire periculum navigandi? quasi bona comesset Romæ non liceret. Nunc denique materculæ suæ festivus filius, aniculæ minimè suspiciosæ, purgat se per epistolam, ut eam pecuniam, quâcum trajecerat, non consumpsisse, sed Flacco dedisse videatur.

XXXVII. At fructus isti Trallianorum Globulo prætore venierunt: Falcidiusemerat H-S nongentis millibus. Si dat tantam pecuniam Flacco, nempe idcirco dat, ut

rata sit emptio : emit igitur aliquid , quod certè multò pluris esset : dat de lucro : nihil detrahit de vivo : minùs igitur lucri facit.

92. Cur Albanum venire jubet ? cur matri præterea blanditur ? cur epistolis , & sororis , & matris imbecillitatem aucupatur ? postremò cur non audimus ipsum ? Retinetur , credo , in provincia : mater negat : venisset , inquit , si esset denuntiatum. Tu certè coëgisses , si ullum firmamentum in illo teste posuisses : sed hominem ab negotio abducere noluisti : magnum erat ei certamen propositum , magna cum Græcis contentio ; qui tamen , ut opinor , jacent victi : nam iste unus totam Asiam magnitudine poculorum , bibendoque superavit. Sed tamen quis tibi , Læli , de epistolis istis indicavit ? Mulieres negant se scire. Quis is est igitur ? Ille ipse tibi , se ad matrem & sororem scripsisse , narravit ? an etiam scripsit oratu tuo ?

93. At verò M. Æbutium , & constantissimum & pudentissimum hominem , Falcidii affinem , nihil interrogas ? nihil ejus generum , pari fide præditum , C. Manilium ? qui profectò de tanta pecunia , si esset data , nihil audisse non posset. His tu igitur epistolis , Deciane , recitatis , his mulierculis productis , illo absente auctore laudato , tantum te crimen probaturum pu-

taſti; præſertim quum ipſe, non deducendo Falcidium, judicium feceris, plus falſam epiſtolam habituram ponderis, quàm ipſius præſentis fictam vocem, & ſimulatum dolorem?

XXXVIII. Sed quid ego de epiſtolis Falcidii, aut de Androne Sextilio, aut de Deciani cenſu tamdiu diſputo, & expoſtulo? de ſalute omnium noſtrùm, de fortunis civitatis, de ſumma republica taceo? quam vos univerſam in hoc judicio veſtris humeris, veſtris, inquam, humeris, Judices, ſuſtinetis. Videtis, in quo motu temporum, quanta in converſione rerum ac perturbatione verſemur. Quum alia multa certi homines, tum hoc vel maximè moliuntur, ut veſtræ quoque mentes, veſtra judicia, veſtræ ſententiæ, optimo cuique infeſtiſſimæ atque inimiciſſimæ reperiuntur. Gravia judicia pro reipublicæ dignitate, multa de conjuratorum ſcelere feciſtis: non putant ſatis converſam rempublicam, niſi in eandem impiorum pœnam optimè meritos cives detrulerint.

95. Oppreſſus eſt C. Antonius: eſto: habuit quamdam ille infamiam ſuam: neque tamen ille ipſe, pro meo jure dico, vobis judicibus damnatus eſſet: cujus damnatione ſepulcrum L. Catilinæ, floribus ornatum, hominum audaciſſimorum, ac domeſticorum hoſtium conventu epuliſque

celebratum est : iusta Catilinæ facta sunt, Nunc a Flacco Lentuli pœnæ per vos expetuntur. Quam potestis P. Lentulo, qui vos in complexu liberorum conjugumque vestrarum trucidatos, incendio patriæ se-  
pelire conatus est, mactare victimam gra-  
tiores, quàm si L. Flacci sanguine illius  
nefarium in nos omnes odium faturave-  
ritis ?

96. Litemus igitur Lentulo, parente-  
mus Cethego, revocemus ejectos : nimiae  
pietatis, & summi amoris in patriam vi-  
cissim nos pœnas, si ita placet, suffera-  
mus : nos jam ab indicibus nominamur :  
in nos crimina finguntur : nobis pericula  
comparantur : quæ si per alios agerent ;  
si denique per populi nomen, civium  
imperitorum multitudinem concitassent ;  
æquiore animo ferre possemus : illud verò  
ferri non potest, quòd per senatores, &  
per equites Romanos, qui hæc omnia pro  
salute omnium, communi consilio, unâ  
mente atque virtute gefferunt, harum re-  
rum auctores, duces, principes spoliari  
omnibus fortune, ac de civitate expelli  
posse arbitrantur.

97. Etenim populi Romani perspiciunt  
jam mentem & voluntatem : omnibus re-  
bus, quibus potest, populus Romanus si-  
gnificat, quid sentiat : nulla varietas est in-  
ter homines opinionis, nulla voluntatis,



nulla sermonis. Quare, si quis illuc me vocat, venio: populum Romanum disceptatorem non modò non recuso, sed etiam depono. Vis absit; ferrum ac lapides removeantur; operæ facebant; servitia si leant: nemo erit tam injustus, qui me audierit, sit modò liber & civis, quin potius de præmiis meis, quàm de pœna cogitandum putet.

XXXIX. O dii immortales! quid hòc miserius? nos, qui P. Lentulo ferrum & flammam de manibus extorsimus, imperitæ multitudinis judicio confidimus; lectissimorum civium & amplissimorum sententias pertimescimus. M. Aquilium patres nostri multis avaritiæ criminibus testimoniisque convictum, quia cum fugitivis fortiter bellum gesserat, judicio liberaverunt. Consul ego nuper defendi C. Pisonem; qui quia consul fortis constansque fuerat, incolumis est reipublicæ conservatus: defendi item consul L. Murenam, consulem designatum: nemo illorum judicum, clarissimis viris accusantibus, audiendum sibi de ambitu putavit, quum, bellum jam gerente Catilinâ, omnes, me auctore, duos consules Kalendis Januarii scirent esse oportere. Innocens & bonus vir, & omnibus rebus ornatus, his hoc anno, me defendente, absolutus est A. Thermus. Quanta, reipublicæ causâ,

lætitia populi Romani , quanta gratulatio consecuta est ! Semper graves & sapientes iudices in rebus iudicandis , quid utilitas civitatis , quid communis salus , quid reipublicæ tempora poscerent , cogitaverunt.

99. Quum tabella vobis dabitur , Iudices , non de Flacco dabitur solum : dabitur de ducibus auctoribusque conservandæ civitatis : dabitur de omnibus bonis civibus : dabitur de vobismetipsis : dabitur de liberis vestris , de vita , de patria , de salute communi : non iudicatis in hac causa de exteris nationibus , non de fociis ; de vobis , ac de vestrâ republicâ iudicatis.

XL. Quòd si provinciarum vos ratio magis movet , quàm vestra ; ego verò non modò non recuso , sed etiam postulo , ut provinciarum auctoritate moveamini. Etenim opponemus Asiæ provinciæ primùm magnam partem ejusdem provinciæ , quæ pro hujus periculis legatos laudatoresque misit : deinde provinciam Galliam , provinciam Ciliciam , provinciam Hispaniam , provinciam Cretam. Græcis autem , Lydis , & Phrygibus , & Mysis obsistent Massilienses , Rhodii , Lacedæmonii , Athenienses , cuncta Achaia , Thessalia , Bœotia. Septimio & Cœlio testibus , P. Servilius & A. Metellus , hujus pudoris integritatisque testes , repugna-

*PRO L. FLACCO.* 511

bunt. Asiaticæ jurisdictioni urbana jurisdictionis respondebit: annui temporis criminationem omnis ætas L. Flacci, & perpetua vita defendet.

101. Et, si prodesse L. Flacco, Judices, debet, quod se tribunum militum, quod quæstorem, quod legatum imperatoribus clarissimis, exercitibus ornatissimis, provinciis gravissimis, dignum suis majoribus præstitit: prosit, quod hic, vobis videntibus, in periculis communibus omnium vestrum, sua pericula cum meis conjunxit: prosint honestissimorum municipiorum, coloniarumque laudationes: prosit etiam senatus, populi que Romani præclara & vera laudatio.

102. O nox illa, quæ pene æternas huic urbi tenebras attulisti! quum Galli ad bellum, Catilina ad urbem, conjurati ad ferrum & flammam vocabantur: quum ego te, Flacce, cælum noctemque contestans, flens flentem obtestabar; quum tuæ fidei optimæ & spectatissimæ salutem urbis, & civium commendabam. Tu, tum, Flacce, prætor, communis exitii nuntios cepisti: tu inclusam in litteris reipublicæ pestemprehendisti: tu periculorum indicia, tu salutis auxilia, ad me & ad senatum attulisti. Quæ tibi tum gratiæ sunt a me actæ? quæ ab senatu? quæ a bonis omnibus? quis tibi, quis C. Pom-

ptino , fortissimo viro , quemquam bonum putaret umquam non salutem , verum honorem ullum denegaturum ? O noniæ illæ Decembres , quæ , me consule , fuistis ! quem ego diem verè natalem hujus urbis , aut certè salutarem appellare possum.

XLI. O nox illa , quam iste est dies consecutus , fausta huic urbi ! miserum me , metuo ne funesta nobis. Qui tum animus L. Flacci ? ( nihil dicam enim de me ) qui amor in patriam ? quæ virtus ? quæ gravitas existit ? Sed quid ea commemoro , quæ tum , quum agebantur , uno consensu omnium , unâ voce populi Romani , uno orbis terræ testimonio , in cælum laudibus efferebantur ? nunc ve-reor , ne non modò non prosint , verum etiam aliquid obsint. Etenim multò acriorem improborum interdum memoriâ esse sentio , quam bonorum. Ego te , si quid gravius acciderit , ego te , inquam , Flacce , prodidero : mea dextera illa , mea fides , mea promissa , quum te , si rempublicam conservaremus , omnium bonorum præsidio , quoad viveres , non modò munium , sed etiam ornatum fore pollicebar : putavi , speravi , etiam si honos noster vobis vilior fuisset , salutem certè caram futuram.

104. At , L. Flaccum quidem , Judices , si ( quod dii immortales omen avertant )

gravis injuria affligerit, numquam tamen prospexisse vestræ salutis, consuluisse vobis, liberis, conjugibus, fortunis vestris, pœnitebit: semper ita sentiet, talem se animum & generis dignitati, & pietati suæ, & patriæ debuisse: vos ne pœniteat tali civi non pœpercisse, per deos immortales! Judices, providete. Quotus enim quisque est, qui hanc in republica sectam sequatur? qui vobis, qui vestri similibus placere cupiat? qui optimi atque amplissimi cujusque hominis atque ordinis auctoritatem magni putet; quum illam viam sibi videant expeditiorem ad honores, & ad omnia, quæ concupiverunt?

XLII. Sed cetera sint eorum: sibi habeant potestatem, sibi honores, sibi ceterorum commodorum summās facultates. Liceat iis, qui hæc salva esse voluerunt, ipsis esse salvis. Nolite, Judices, existimare, eos, quibus integrum est, qui nondum ad honores accesserunt, non expectare hujus exitum judicii. Si L. Flacco tantus amor in bonos omnes, tantum in rempublicam studium, calamitati fuerit; quem posthac tam amentem fore putatis, qui non illam viam vitæ, quam antè præcipientem & lubricam esse ducebat, huic planæ & stabili præponendam esse arbitretur? Quòd si talium civium vos, Judices, tædet; ostendite: mutabunt sententiam, qui

# 514 ORATIO PRO L. FLACCO.

potuerint : constituent , quid agant , quibus integrum est : nos , qui jam progressi sumus , hunc exitum nostræ temeritatis feremus : sin hoc animo quàm plurimos esse vultis , declarabitis hoc iudicio , quid sentiat.

106. Huic , huic misero puero , vestro ac liberorum vestrorum supplici , Iudices , hoc iudicio , vivendi præcepta dabit : cui si patrem conservatis , qualis ipse debeat esse civis , præscribetis : sin eripitis , ostendetis , bonæ rationi , & constanti , & gravi nullum a vobis fructum esse propositum : qui vos , quoniam est id ætatis , ut sensum jam percipere possit ex mœrore patrio , auxilium nondum patri ferre possit , orat , ne suum luctum patris lacrymis , patris mœrorem suo fletu augeatis : qui etiam me intuetur , me vultu appellat , meam quodammodo flens fidem implorat , ac repetit eam , quam ego patri suo quondam pro salute patriæ sponponderim , dignitatem. Misere mini familiæ , Iudices , misere mini fortissimi patris , misere mini filii : nomen clarissimum & fortissimum , vel generis , vel vetustatis , vel hominis causâ , reipublicæ reservate.

FINIS.

---

## NOTANDA ET CORRIGENDA.

*Numerus alter Paginam , alter Lineam  
indicat.*

P. 4 , L. 13. *Veritas*. Victorius & Manutius habent *falsitas*. Emendarunt Lambinus & Gruterus e suis mss. quibus & duo e nostris accedunt.

5 , 4. *Si oratio labefactabit*. Ita cum Lambino codex noster optimus : alii cum vulgatis , *si ratio labefactabit*.

8 , 28. *Convincta*. Ita duo e nostris mss. quidam malunt *conjuncta* , aut *convicta*.

10 , 13. *Funestis ominibus*. Addunt codices nostri & editi complures *omnium* , quam vocem , a mala manu profectam , rectè delevit Grævius.

Ibid. 26. *Dedecus jam familiæ*. Mediam vocem cum Grævio aliisque expunximus.

17 , 28. *Jucundius esse duxit*. Ita Sylvius & Grævius , & sic habent duo e nostris codices : alii cum vulgatis , *jucundum*.

18 , 27. *Propiora hujus causæ*. Mallet Lambinus , *huic causæ*.

20 , 19. *Se ipsa cruciavit*. Ita Quintilianus & Grævius , & firmant duo codices e nostris : alii servant vulgatum , *seipsam*.

22 , 9. *Arte quadam praditus....accommodatâ*. Rectè Gulielmius , deletâ voce , *praditus* , legit *accommodatus* , ut habent veteres editi , & nonnulli codices Palatini , & unus e nostris.

24 , 16. *Allegatos*. Criminis affines. Turnebus legit , *alligatos*.

26, 9. *Ut aut justè &c.* J. Frid. Gronovius reponebat, *ut aut parum justè pièque accusaret*, idque hujus loci sententia postulare videtur.

35, 14. *Patronus adhibetur.* Addunt vulgati, *nisi fortè hæc causa est, quòd medici nihil præter artificium, oratores etiam auctoritatem præstare debent*: sed hanc sententiam, hoc loco absurdam, quam ignorant plures nostri & Græviani codices, auctoribus Sylvio & Grævio, delevimus.

36, 13. *Ita tum Fabricius.* Sic habet codex regius optimus, meliùs quàm vulgatum, *jam tum Fabricius.*

41, 14. *Tantum donis, datis, muneribus perfecerat.* Ita hunc locum legit ac distinguit Grævius: alii paulò aliter, *tantum donis datis, muneribusque perfecerat.*

43, 16. *Miserrimus & inanissimus.* Gruterus ex quibusdam codicibus suis maluit, *miserrimis in locis & inanissimis*: & sic habet unus e nostris.

52, 8. *Oppianicus quærebat.* Gruterus mallet, *requirebat.* Codex unus e nostris scribit, *querbatur*: alii vulgatum tenent.

53, 27. *Quum re premeretur.* Ita Grævius, & sic habent nostri codices plerique. Malè in vulgatis, *reprimeretur.* Paulò pòst cum eodem Grævio dedimus, *atque rejectum est*, ubi vulgati, & *ejectum est.*

57, 8. *Possunt iidem illud iudicium fuisse defendere.* Ita locum hunc ex vetustis codicibus, & sic unus e nostris, restituit Grævius. Mendosè vulgati, *possunt illud idem iudicium non fuisse defendere.* Voculam *non* planè ignorant codices nostri.

59, 13. *Non modus est habitus.* Ita Grævius



e suis mss. & sic constanter nostri, pro vulgato *adhibitus*.

71, 12. *Animadversionem, atque auctoritatem censoriam*. Ita cum Victorio & Grutero codices nostri. Lambinus maluit *animadversio, atque auctoritas censoria*.

77, 19. *Aut illud afferant*. Locum corruptum sic refingit Lambinus: *nam illud quod afferunt nihil est, aliquid esse, quod...de ceteris nihil comperisse*.

78, 30. *Et quam conditionem....eamdem tu constitues &c.* Grævius affert e mss. aliam lectionem, *convenire, ut quam conditionem....eamdem tu constituas &c.* & ita duo nostri codices.

79, 15. *Probatum illud erat multitudini: illicitum est contra dicere*. Ita cum Manutio & Ant. Augustino Grævius, qui tamen censet delendam esse voculam *est*. Codices nostri cum vulgatis, *probatum illud erat: multitudinem illicitum est contradicere*.

83, 23. *In quos tum consules designatos*. Locum emendat Manutius, *ii, quæis tum coff. designatis*. Infra dedimus e nostris & Grævianis codicibus, *perferendum*, ubi mendosè vulgati, *referendum*.

90, 10. *In hoc loco sexto*. Ita quidem Victorius & Grævius, nec aliter codices nostri. Quid si legamus, *in hoc loco selecto*.

Ibid. 29. *Ommes. Lege, omnes*.

94, 4. *Questus in veteres iudices*. Videtur admittenda Manutii conjectura, *legentis, quæ est usus in veteres iudices*.

96, 17. *Equestrem ordinem non teneri*. Lege nimirum Sempronii. Plura erant alia legis Corneliæ capita, de sicariis, de beneficiis, de coi-

tionibus, de falso &c. ut quæstiones capitales haberentur.

110, 22. *Sestertiūm*. In codicibus scribitur *sestertiorum*: unde Jac. Gronovius suspicatur legendum *sestertiūm* *cl.*

Ibid. 31. *Ex omni parte dentium*. Sylvius censet legendum ex Prisciano, *ex omni parte dentatam*.

116, 26. *Donis, muneribus*. Ita cum Victorio & Lambino Grævius: alii, *donis muliebris*, & sic codices nostri.

121, 5. *Res pecuarias*. Ita Grævius ex editione omnium princeps: alii dederunt *res pecuniarias*, ut habent codices nostri.

Ibid. 23. *In testimonio*. Alii *ex testimonio*. Grævium & codices nostros sequimur.

127, 24. *Per scribit in sua lege*. Ita codices, pro vulgato, *proscribit*.

131, 6. *Quum mittantur*. Grævius ex codice Erfurtensi legit, *quum immittantur*.

134, 23. *Quot? quorum hominum?* Regius noster optimus scribit, *quo? quorum hominum?*

136, 23. *Luxuries Capuana.....corrupt*. Ita Grævius & suis mss. Nostri cum vulgatis habent *Capua*, vel *Capua*.

137, 28. *Ac dignitate retinenda*. Vulgò *retinendum*. Mutavit Grævius ex codice Erfurtensi, cui accedunt nostri.

152, 30. *Poterat potestate*. Posteriorem vocem delebat Grævius: Muretus verò rēponebat, *poterat potestve*.

155, 2. *In indice & in præscriptione*. Ita Græviani & nostri codices. Vulgati habent tantum *in præscriptione*. Infra ex iisdem codicibus dedimus, ut volebat Turnebus, *equā ei parte*, pro vulgato, *equā sibi parte*.

157, 2. *Cui...sit datus.* Ita codices nostri, ut edidit Victorius, Manutius, Lambinus. Gruterus maluit, *qui...sit datus.*

160, 5. *Jubet ad auspicia coloniarum deducendarum causâ &c.* Vulgò *jubet auspicii &c.* sed codices nostri habent *auspicia.* Præpositionem addidimus cum Grævio, qui deleri volebat vocem *causâ.*

Ibid. 23. *Centuriis.* Censet Turnebus legendum esse, *tentoriis*, quæ erant ex pellibus, quum *tabernacula* essent e tabulis.

162, 31. *In urbe partim.* In diversis urbis partibus. Hunc locum frustra sollicitant interpretes.

163, 11. *Illud magis est cavendum.* Ita codices nostri, pro vulgato, *illud est magis credendum.*

164, 27. *An si condemnare Asiam nolet?* Hæc est lectio mss. quam anteponendam duximus vulgatæ, *an si condemnare Asiam volet?*

166, 1. *Inter omnes ferè video convenire.* Vocem *video* delendam censet Grævius.

167, 10. *Undque.* Hic lacunam agnoscit Ursinus: putat enim deesse enumerationem eorum, quæ publica populi R. facta erant in Africa, Hispania, Gallia &c. Locus aliis videtur integer, & sic legendus: *Atque illud circumspicite vestris mentibus. Namque legatos &c.*

171, 12. *Maotide.* Codices constanter scribunt *Maoti*, vel *Maote.*

Ibid. 29. *Pompeio.* Vulgati, *Cn. Pompeio*, sed invitis codicibus.

175, 27. *Horum erit nullum judicium.* Vox *nullum* repugnat sententiæ: illam igitur, tamquam a mala manu profectam, delevimus.

177, 21. *Nihil prætermiffum sit : omnes &c.* Ita codices nostri, & sic dedit Manutius. Alii, *nihil prætermiffum : sed omnes &c.*

179, 24. *Vescinus*. Ab urbe *Vescia*. Malè vulgati, *Veslinus*.

180, 8. *Italiam*. Vox procul dubio mendosa. Manutius & Lambinus reponunt *Apuliam*, Ant. Augustinus, *Liguriam*.

Ibid. 13. *Neratiana auctionis*. Ita Turnebi codices & nostri, non ut vulgò *Veratiana*. Infrà iidem codices, ut & Græviani, habent *inietur*, pro *inibitur*.

183, 2. *Aut dicat*. Ita cum Turnebo dedimus, ut sensus postulat. Infrà ejusdem Turnebi codices, ut & Græviani & nostri scribunt, *quid pecuniæ fiet?* pro vulgato, *quid pecuniâ fiet?*

Ibid. 31. *An est locus, qui coloniam postulet?* *est qui planè recuset*. Ita ex conjectura Lauredani Manutius & Lambinus. Vitiosè codices, *est planè rectius &c.*

184, 14. *Quò colonias*. Vulgò, *quot colonias*. Correxerit Grævius e suis mss. quibus etiam accedunt nostri.

190, 2. *Belli difficultatibus affliguntur...belli difficultates sustentantur*. Ita ex optimo codice profert Gruterus, meliùs quàm in vulgatis, qui habent *facultatibus & facultates*.

191, 27. *Vexillum*. Ita e conjectura Lauredani Manutius, Lambinus, & Gruterus. Nam codices habent *exsilium* aut *auxilium*; utrumque mendosè.

194, 10. *Nihil omnino est cogitatum*. Ita Grævius e mss. Alii, *nihil omnino excogitatum*.

Ibid. 14. *Bella gravia Carthaginiensium*. Videtur admittenda Lauredani conjectura legentis, *Carthaginiense tertium*.

195, 19. *Capuæ ab illo creati*. Est hæc conjectura Grævii, cui præiverat Ursinus. Alii aliter emendant corruptam mss. lectionem, *Capuæ & Locreanti*. Manutius divinabat, *eâ lege creati*.

196, 12. *Probatae*. Ita Lambinus post Lauredanum. Alii, *probatas* aut *probantibus*.

198, 3. *Pupiniam*. Unus e nostris mss. habet, *Papinianum*.

199, 3. *Cum istis tuis actoribus*. Ita Lauredanus & Grævius, & firmant duo e nostris mss. Alii *auctoribus*. Ibid. pro *expleretis*, dedimus ex conjectura Gruteri, *expilaretis*. Et paulò post e Puteano, *opponeretis*, pro vulgato, *opponere vis*.

200, 1. *Nihil vi ac manu*. Ita Gruterus post Lauredanum. Alii, *nihil elatâ manu*.

201, 32. *Quibus otiosi negotium facessimus*. Grævius existimat Ciceronem potius scripturum fuisse, *qui vobis otiosis negotium faceffunt*. Sed hæc extrema pars orationis ejusmodi est, ut minimè in ea Tulliana manus agnoscatur. Nec quidquam opis in scriptis codicibus.

205, 26. *Ademptus....datus*. Puteanus habet *ademptum....datum*.

210, 23. *Convocaverunt*. Gulielmus legebat *vocaverunt*, quia *convocare*, non nisi de pluribus dicitur.

215, 30. *C. Curius*. Ita vocatur in oratione pro Rabirio Postumo, probantque Hotomanus, Ursinus &c. In vulgatis dicitur *C. Curtius*.

218, 21. *Tu cujusdam*. Error typographicus. Lege, *tu cujusquam*.

220, 24. *Obductio capitis*. Muretus mallet *obnuptio*, quem vide Var. Lect. 8, 9.

235, 6. *Tum denique interficere*. Ita Guliel-

mii codices, & duo e nostris, ut voluit Lipsius, pro vulgato, *tum denique interficiam te.*

236, 1. *C. Mallium.* Malè in quibusdam editis scribitur *Manlium*, contra consentientem librorum veterum auctoritatem.

Ibid. 23. *Non audiam, sed etiam non videam.* Negationem utroque loco delevimus, obsecuti Grævii codicibus, & tribus e nostris. Corruptus est locus ab iis, qui ignorabant, *non modò* poni sæpissime pro *non modò non.* Vide Muretum Var. Lect. 10, 7.

Ibid. 30. *M. Læca.* Ita, teste Ursino, nomen scribitur in denario argenteo, in quo M. hic Porcius Læca describitur; & sic Grævius in duobus mss. & nos in nostris reperimus.

239, 7. *Quoniam id quod est primum, & quod est hujus imperii... proprium.* Ita Grævii codices & nostri, meliùs quàm vulgatum, *quoniam id quod primum, atque hujus imperii... proprium est.*

240, 16. *Ad summam rempublicam.* Hanc lectionem mss. Grævii & nostrorum duximus præferendam vulgatæ, *ad summam reipublicæ.*

Ibid. 19. *Potestne tibi hujus vitæ hæc lux.* Verba *hujus vitæ* abjecimus, quæ nec in Mureti, nec in Grævii codicibus, nec in duobus e nostrisperiuntur.

242, 25. *Aliquot jam annis.* Ita codices nostri, ut & Gruteriani, meliùs quàm in vulgatis, *jam tot annos.*

244, 6. *Si hic emori.* Ita cum Victorio & Grævio codices nostri. Gruterus maluit, *si hic morari.*

245, 21. *Est mihi tanti.* Mediam vocem ignorant codices nostri, quam cum Grævio delevimus.

Ibid. 25. *Ut temporibus reipublicæ cedas.* Ita

Grævius e suis mss. quibus accedunt quatuor e nostris. Malè vulgò editur, *concedas*, cujus vocis sensus est alius, quàm hic locus postulat.

246, 15. *A quo jam sciam*. Hic & infra Muretus, deletà præpositione, legit *quò*, hoc est, in castra Mallii.

247, 19. *Bonis otiosorum*. Ita Manutius, & sic habent quatuor Grævii codices, & tres e nostris. Vulgò *bonis occisorum*.

248, 21. *De civium reorum*. Ita tres Græviani codices, & tres e nostris: quartus habet *de civium r.* unde vulgati, *de civium Romanorum*, ineptè, ut censet Grævius.

252, 6. *Et homines*. Vulgò, & *omnes*. Sequimur librum Ursini vetustissimum, cui consentiunt Grævii codices, & tres e nostris.

254, 29. *Jacet ille prostratusque est*. Vulgò, *jacet ille prostratus*, *Quirites*. Ursini, Grævii codices, & nostri habent quod dedimus.

256, 7. *Quem amare calumniâ*, id est, iniquiunt Ursinus & Ernestus, simulato amore *cæperat*. Locus non videtur sanus. Quidam emendarunt, *quem amare prætextatum in Gallia cæperat*. Paulò post, *reliquit quos viros? ...quàm nobiles?* Addunt vulgati, *vos videtis*: quas voces ignorant Grævii codices & nostri.

259, 25. *Ebrios sobriis*. Ita codices nostri, & omnes ad unum libri veteres: idque Mureto probatur præ vulgato, *ebriosos*.

261, 1. *Quievit*. Est hoc a Mureto. Grævius mallet e Duisburgensi codice, *ivit*. Neutra vox in nostris visitur.

266, 1. *Ex iis coloniis, quas Fesulis*. Codices nostri scribunt *Fesulas*, sed vox illa locum hic habere nequit. Eam igitur delevimus, auctoribus

Mureto , Manutio , Lambino &c. Suspiciatur Muretus occasionem errori præbitam esse ex loco simili orationis sequentis n. 14. *Ex his colonis , quos Fesulas L. Sulla deduxit.*

274 , 16. *Cum voluptate servamur.* Ita constanter Grævii codices & nostri , pro vulgato , *conservamur.*

278 , 17. *Sine metu.* Ita Græviani & nostri codices , pro vulgato , *sine timore* , quod non æquè placet. Mox iidem codices constanter habent *receasset* , non , *recepisset.*

282 , 31. *De summa republica.* Ita Lambinus , & sic solet Tullius. Vulgò *de summa reip.* codices nostri addunt , *salute.*

284 , 17. *Jam ad certas res.* Ita codices nostri , & Mureto teste , libri omnes veteres , quod præferendum duximus vulgato , *jam ad ceteras res.*

287 , 4. *Locaverunt.* Vulgò *statuerunt.* Sequimur codices Gruteri potiores , & nostros , & sic jam e libro suo emendandum monuerat Cujacius.

292 , 3. *Quòd si omnis impetus....depulsus a vobis , se in me unum converterit.* Ita omnes membranæ , a nobis & a Grævio excussæ ; non , ut vulgò , *quòd si omnes impetus...depulsi a vobis...converterint.*

294 , 10. *Mihi quidem.* Posteriores vocem , quam sententia non flagitat , delevimus , obsecuti Grævii codicibus , & quatuor e nostris.

296 , 11. *Quem mihi videtur amplecti resp.* Ita rectè e libris veteribus reposuit Muretus , & sic habent e nostris codicibus quatuor. Vulgò , *qui mihi videtur amplecti rempublicam.*

Ibid. 19. *Unà reipublica peste.* Ita Græviani & nostri codices , & sic editi omnes ante Lam-



binum, qui primus locum interpolavit, deditque, *inā cum republica.*

299, 13. *Quæ municipiis dispartiri jubet.* Ita Grævius e Duisburgensi codice, cui accedunt duo e nostris. Vulgò, *itaque municipiis &c.* sed vox *itaque* nec in nostris, nec in ullo alio codice visitur.

Ibid. 30. *Multos uno dolore dolores &c.* Ita placuit Grutero & Grævio, & suadent utriusque codices, ut & nostri, in quibus scribitur *multos*, omissā voce *dolores*, quod non insolitum libraris, si quando vox eadem iteratur. In vulgatis legitur, *multos uno dolore, animi... & omnes scelerum pœnas &c.* quod intricatum, & minime Tullianum videtur.

306, 5. *Ab amore debita pecunia.* Has voces e suis mss. adjecit Grævius, quas tamen ignorant nostri: & sanè poterant abesse.

Ibid. 16. *Qui suā virtute fortunam hujus civitatis consecuti.* Ita Gruteriani & nostri codices, & editi omnes ante Muretum, qui reposuit, *qui fortunā suā civitatis jus consecuti*, quæ lectio non debuit vulgatæ præponi.

308, 25. *Quàm pene delerit.* Ita regius codex optimus. Primam vocem omittunt vulgati.

316, 26. *Quodd natura affert.* Muretus & Lambinus malunt, *quodd natura fert*, idque Grævio probatur.

326, 17. *Certatum est.* Scil. uter operam utiliorem reip. navaret. Ita Grævii codex optimus & regius. Vulgati habent *tractatum est*: sed quid sit tractare tempus ignorare se fatetur Grævius.

331, 13. *Tum verò nullo usu: utrisque superstitibus, presentibus.* Ita codex unus e nostris, ut edidit Victorius, Manutius, Lambinus. Gru-

terus e suis Palatiis maluit, *tum verò in illo : utrisque &c.* nullo sensu. Vocem *prasentibus* de-  
lent Manutius & Hotomanus, tamquam interpre-  
tamentum vocis *superstitibus*.

332, 23. *Gratiæ...multò etiam minores*. Ita  
codices nostri, & veteres editi. Recentiores de-  
derunt, *gratiæ...multò etiam minùs*.

333, 13. *Igitur. Lege agitur*.

338, 20. *Tanti astimata est*. Duo e nostris  
mss. habent, *tanti existimata est*.

347, 26. *Occurro vestræ satietati*. Ita Lambi-  
nus, cui adstipulatur unus e nostris mss. ut &  
Memmi & S. Victoris, qui scribunt *sapietati*,  
pro vulgato *sapientia*.

348, 9. *Vallatum indicibus*. Hoc est, homini-  
bus improbis, quos alibi ait Tullius *voluntarios*  
*optimis civibus periculum moliri*. Eodem sensu vox  
ista usurpatur in oratione pro Sulla 70. & pro  
Flacco 95. Hunc igitur locum frustra sollicitant  
viri docti.

358, 29. *De L. Philippo*. Manutius reponit,  
*de L. Philo*, qui doctrinà & sapientià clarus, con-  
jungitur item cum Scipione, Lælio, Catone, in  
oratione pro Archia 16.

364, 5. *Gladiatoribus*. Hoc est spectaculo gla-  
diatorum. Vulgò editur *gladiatorium*. Emenda-  
runt Lambinus & Ursinus ex mss. in quibus scri-  
bitur *gladiat. i, e, gladiatoribus*, & sic solet  
Tullius.

372, 7. *Hunc jam qui impedituri sint*. Locus  
mutilus, quem ut expleat Pantagathus, addit ver-  
bum *videtis*. Neoterici habent, *parati sunt*.

Ibid. 28. *Deinde ego vestram fidem vel defen-  
soris &c.* Locus fractus, in quo magna est scrip-  
torum varietas. Manutio placeret, reserctis aliis,

legi, deinde ego vos, fide defensoris & amici officio adductus, oro.

379, 28. *Clarissimi atque ornatissimi viri.* Ita planè duo e nostris mss. ut dedit Grævius. Vulgò *clarissimi viri atque ornatissimi civis.*

381, 20. *Quis P.?* Fratrem Serv. Sullæ, Inep-  
tè in quibusdam editis, *quis P. Lentulum?*

389, 17. *Sed repressum.* Ita Gruterus & Græ-  
vius ex optimo Vaticano, cui proximè accedit  
unus e nostris, in quo scribitur *sed repulsum.* Vul-  
gati, *sed non permissum.* At plerique codices omit-  
tunt negationem, quæ, interpolato demum loco,  
addita videtur.

395, 4. *Quæ leniter dixerat.* Ita Ursini liber ve-  
tus, & codices duo e nostris, pro vulgato *leviter.*

397, 18. *Quum princeps, quum auctor.* Voces  
*quum auctor*, quas plerique codices ignorant, e  
superiore versu repetitas, cum Grævio delevimus.

403, 18. *Tuo indicio.* Ita Grævius e suis mss.  
quibus accedunt nostri. Alii habent *tuo iudicio*,  
minùs rectè.

407, 17. *Informat ad hoc.* Antiquè dictum pro  
*adhuc*, ut habent vulgati. Grævii codices & nos-  
tros sequimur.

410, 12. *At hæc ipsa per se sine ulla conjunc-  
tione agebantur.* Ex his verbis nullam posse ido-  
neam sententiam elici rectè judicat Grævius. For-  
tè legendum cum nota interrogationis, *an hæc ip-  
sa per se sine ulla conjunctione agebantur?* quæ  
scil. Romæ Sulla, Cincius in Hispania moliri di-  
cebantur. Ita sensus constat.

413, 12. *Tamen cum r: p. pugnare.* Primam  
vocem, quam ignorant codices nostri, delevimus.

Ibid. 18. *Qui id promulgarit, in quo &c.* Lo-  
cus corruptus. Laudat e mss. Henr. Stephanus;

qui id promulgavit, quo fratris casum levare posset, quem quia res judicatas &c. Infra pro, ut statueretur, Ursini liber habet tueretur. Fortè, ut fratrem tueretur.

414, 21. *Posita est in senatu, populum Romanum latuit.* Hæc verba pro spuris habet Grævius, nec sanè videntur esse Ciceronis.

415, 19. *De summa reipublica.* Omnino videtur legendum, *de summa republica.*

418, 8. *Conferte nunc cum illis vitam P. Sullæ.* Ita Grævius e suis mss. & sic quoque tres e nostris. Alii cum vulgatis, *conferte nunc cum illius vitam vitam P. Sullæ.*

424, 31. *Attestante memoriâ omnium.* Hanc lectionem e mss. & vetustius editis restituit Grævius, repudiatam a Grutero, qui maluit, *attestantem memoriam omnium*, nullo sensu.

425, 10. *Servare.* Ita cum Grævio tres e mss. nostris pro vulgato, *conservare.*

433, 17. *Cunâli.* Vocem hanc de uno homine dici non posse notat Passeratius. Pantagathus legebat, *huicce uni studio.*

434, 28. *Cunâque Græciâ.* Ita plerique cum Pantagatho. Alii *cunâque Græciâ,*

435, 19. *In domum suam receperunt.* Ita codices nostri cum Grævianis. Vulgati omittunt præpositionem.

438, 29. *Iis temporibus, quæ tu criminaris.* Ita cum vulgatis codices nostri. Grævius mallet, *quæ tu criminaris*, & ita sensus postulat, nisi si Tullius Græcorum more loqui voluit.

440, 25. *Nisi litterarum lumen accederet.* Sic habent codices nostri. Affert probatque Grævius lectionem codicis Erfurtensis, *accenderet*, i, e., illustraret.

442, 2. *Animi remissionem*. Ita e conjectura Bonamicus. Codices habent aut *animadversionem*, quod amplectitur Victorius, aut *animi adversiōnem*, quod Gruterus sequitur.

443, 11. *Inflari*. Vulgò *afflari*. Sequimur Gruteri & Grævii codices, quibus etiam accedunt nostri. Unus tantum habet *inflammari*.

449, 27. *Ad aliquam animi mei partem*. Vocem *animi*, quam ignorant liber vetus Mureti, & unus e nostris, quæque hic otiosa videtur, delvimus.

Ibid. 31. *Quem amicorum studiis videtis comprobari tum dignitate, tum etiam venustate*. Ita quidem vulgati: sed vox *studiis* in Grævianis & in nostris codicibus nulla exstat: in uno tantum, sed alio atramento, superscripta est. Dedimus præterea, ex conjectura certissima Mureti, *vetustate*, pro *venustate*. Inepta videtur in talibus viris *venustatis* commendatio: quæ autem comprobatio pudoris in *venustate*?

454, 15. *Ceciderunt*. Ita Grævius & codices nostri constanter. Gruterus habet *occiderunt*.

456, 22. *Timolites ille vicanus*. Turnebo displicet vox ultima, quæ vix locum hic habere potest, reponitque *Nicanus*.

462, 19. *Sutores & coriarii*. Ita plerique codices, etiam duo e nostris. Alii, *sutores & zonarii*. Grævius probat emendationem Pantagathi legentis, *sutores zonarii & coriarii*.

466, 11. *In conditione*. Sic habent codices nostri, & veteres editi, quod scil. magistratuum misera utique conditio futura sit, hoc si exemplo invitati homines malevoli, ipsis pericula creare audeant. Sic locum interpretatur Ernestus. Recentiores dederunt, *in imitatione*.

Ibid. 30. *Honoribus, imperiis*. Ita liber S. Victoris, idque placuit Lambino, Grutero, & Grævio. Alii codices, tum Græviani, tum nostri, scribunt *imperii*: unus tantum habet *imperio*, quæ utraque lectio ferri nequit.

468, 9. *Portibus*. Ita codices, non *portubus*, quod tamen aliâ manu in uno e nostris mss. adscriptum fuit.

469, 15. *Erogabamus*. Nihil certius hac emendatione Turnebi, quam Lambinus admisit. Gruteri *rogabamus* huic loco repugnat, & sic tamen duo e nostris mss.

471, 14. *In provincias*. Grævius legendum censet *in provincia*, vel utramque vocem delendam, ut sensus constet.

Ibid. 20. *Onus suscipit*. Ita codices Manutio, Faerno, Grævio & nobis excussi. Alii, *genus suscipit*.

472, 11. *De communi totius Asiæ crimine*. Grævius censet vocem ultimam additam esse ab aliquo, qui non intellexerit quid esset *commune Asiæ*.

Ibid. 16. *Prodeant: procedit &c*. Vulgò, *procedit unus Asclepiades: prodeant*. Locum transpositione corruptum restituit Grævius.

474, 29. *Quàm maximè*. Ita constanter codices nostri cum Grævianis. Vulgò, *quantum maximè*.

475, 21. *Dorylai*. Ita codices nostri & veteres editi: recentiores, *Dorylensium*.

476, 28. *Aculeo jam emisso*. Ita regius codex, ut dedit Lambinus. Alii, *aculeo jam dimisso*.

478, 15. *Conficiendarum litterarum diligentissima*. Ita, teste Turnebo, libri omnes veteres, & sic quoque Grævianus unus; quæ lectio placuit

Grutero, præ vulgata, *conficientissima litterarum.*

Ibid. 22. *Majorem etiam aliquam.* Ita cum Victorio & Grævio codices nostri constanter. Vulgò, *majorem etiam aliam.*

479, 19. *Huic uni.* Codex regius habet, *huic una*, & sic dedit Manutius.

480, 22. *Ubi nihil possent discere, nisi ignorantiam litterarum.* Hoc totum abesse ab optimo libro Vaticano testatur Ursinus, idque inepti aliqujus glossema esse censet.

482, 15. *Re judicatâ.* August. & Ernestus legunt *rei judicatæ.*

Ibid. 27. *Ab eo judice abiit*, nempe Heraclides, & quòd *judicium &c.* Vulgò, & *ab eo judice abiret, quod judicium &c.* Emendavit Faernus.

487, 17. *Patimini.* Ita cum Grævio codices nostri, non, *patiamini.*

488, 20. *Illum Evium, Dionysum.* Ita Faerni liber, & editi veteres, quod revocavit Grævius, pro vulgato, *illum Evium, Nysium.*

493, 27. *Quòd elocata.* Francii codex primus, & unus e nostris habent, *quòd est locata*, unde Grævius conjicit, *quod est pacata.*

497, 27. *Flaccum in curia decrevissent. Veridicas adjungis causas, &c.* Locum corruptum sic emendabat Pantagathus: *Flaccum in curia decrevisse injuriam dicis. Adjungis causas &c.*

498, 24. *Quas easdem mulieri a me datas &c.* Hæc sic refingit Pantagathus: *queis easdem mulieres amandatas apud Pataranos requisivit?*

499, 31. *Maximam habiturum &c.* Hæc unci inclusa Lambinus in veteri codice invenit. Aliis editionibus absunt; neque ea Gruterus habet pro Germanis.

# 532 NOTANDA ET CORRIGENDA.

300, 29. *Fortasse fecisti & tu, & populi sermo, ne exciperes.* Hæc maculis foeda detergit ingeniosè Manutius : *fortasse fecisset ut ex populi sermone excideres.*

306, 19. *Negant se scire. Quis is est igitur? Ille ipse tibi &c.* Ita cum Faerno & Grævio codices nostri, & sic ferè editi veteres. Recentiores habent, *negant se scire qui sis. Ipse igitur ille tibi &c.*

307, 10. *De summa republica.* Sic solet Tullius. Vulgati, *de summa reipublicæ.*

## FINIS.





